

ბავშვზე მორგებული მართლმსაჯულება

კანონმდებლობის კვლევა

კვლევა ჩატარდა გაეროს ბავშვთა ფონდის მიერ ევროკავშირის და გაეროს ერთობლივი პროექტის „მართლმსაჯულების ხელმისაწვდომობის გაუმჯობესება და ბავშვზე მორგებული მართლმსაჯულების სისტემის განვითარება საქართველოში“ ფარგლებში.

წინამდებარე ანგარიში მოამზადა ნანა ჩაფიძემ, გაეროს ბავშვთა ფონდის კონსულტანტმა სამართლებრივი დაცვის საკითხებზე, თეა მაჩაიძის, გაეროს ბავშვთა ფონდის კონსულტანტის ბავშვთა მართლმსაჯულების საკითხებზე, ტექნიკური დახმარებით. ანგარიშის მომზადების პროცესს კოორდინაციას უწევდნენ თეონა კუჭავა, გაეროს ბავშვთა ფონდის მართლმსაჯულების პროგრამის ხელმძღვანელი და პიერ ფერი, გაეროს ბავშვთა ფონდის ბავშვთა დაცვის განყოფილების ხელმძღვანელი.

© გაეროს ბავშვთა ფონდი 2017

შინაარსი

რეზიუმე

შესავალი - ბავშვზე მორგებული მართლმსაჯულება

1. საერთაშორისო სამართლებრივი მექანიზმები და სტანდარტები
2. განხილული ეროვნული საკანონმდებლო აქტები
3. კანონმდებლობის ანალიზი
 - 3.1. ბავშვზე ზეგავლენის შეფასების მექანიზმი
 - 3.2. ბავშვის უფლებათა ფუნდამენტური პრინციპები
 - 3.2.1. ბავშვის საუკეთესო ინტერესების უპირატესობა
 - 3.2.2. ბავშვის მონაწილეობა
 - 3.2.3. დისკრიმინაციის დაუშვებლობა
 - 3.3. ბავშვის წვდომა მართლმსაჯულებაზე და სამართლებრივი დაცვის საშუალებები
 - 3.3.1. ინფორმაცია და კონსულტაცია
 - 3.3.2. პირადი მონაცემების დაცვა
 - 3.3.3. სპეციალიზაცია და მულტიდისციპლინური მიდგომა
 - 3.3.4. ბავშვზე მორგებული პროცესი
 - 3.3.5. იურიდიული დახმარება და წარმომადგენლობა
 - 3.3.6. ბავშვზე მორგებული მართლმსაჯულება პროცესის შემდეგ (ინფორმირება, აღსრულება, ზიანის/კომპენსაციის მოთხოვნა)
 - 3.4. ბავშვის ძირითად უფლებათა შესახებ ეროვნული კანონმდებლობის ანალიზი
 - 3.4.1. ბავშვის უფლება განათლებაზე
 - 3.4.2. ბავშვის უფლება ჯანმრთელობის დაცვაზე
 - 3.4.3. ბავშვთა ალტერნატიული ზრუნვა
 - 3.4.4. ბავშვთა დაცვა ძალადობისგან

ზოგადი ინფორმაცია

„ბავშვზე მორგებული მართლმსაჯულება“ გულისხმობს მართლმსაჯულების ისეთ სისტემას, რომელიც ქმნის ბავშვის უფლებათა ეფექტური განხორციელების გარანტიას ბავშვის უფლებათა დაცვის პრინციპების, ბავშვის ინდივიდუალური განვითარების და საქმის გარემოებების მხედველობაში მიღებით. ბავშვზე მორგებული მართლმსაჯულება ნიშნავს მართლმსაჯულებას, რომელიც არის მისაწვდომი, ასაკთან შესაბამისი, სწრაფი, თანმიმდევრული, ბავშვის უფლებებსა და საჭიროებებზე მორგებული. ესაა სისტემა, რომელიც უზრუნველყოფს ბავშვის უფლებების დაცვას სამართლიანი სასამართლო პროცესის, სასამართლო პროცესში მონაწილეობის და ინფორმირების, პირადი და ოჯახური ცხოვრების, პატივისა და ღირსების პატივისცემის შესახებ¹.

საქართველოში ბავშვზე მორგებული მართლმსაჯულების სისტემის განვითარება დაიწყო 2009 წელს არასრულწლოვანთა მართლმსაჯულების სისტემის რეფორმის სტრატეგიის მიღებით, რომელიც ყოველწლიურად განახლებადი დოკუმენტია. რეფორმის ფარგლებში დაინერგა განრიდების და მედიაციის პროგრამა, კანონთან კონფლიქტში მყოფი ბავშვების მიმართ შემოღებული იქნა ინდივიდუალური მიდგომა, დაიწყო პროფესიონალთა სპეციალიზაცია. 2015 წელს მიღებული იქნა არასრულწლოვანთა მართლმსაჯულების კოდექსი, რომელმაც დაამკვიდრა სისხლის სამართლის სისტემასთან შეხებაში მყოფი არასრულწლოვანების საუკეთესო ინტერესების დაცვის გარანტიები, განრიდების პროგრამაში ჩართვის და თავისუფლების აღკვეთის ალტერნატიული ფორმების გამოყენების უპირატესობა, პროფესიონალთა სავალდებულო სპეციალიზაცია, მულტიდისციპლინური მიდგომა და ინდივიდუალური საჭიროებების გათვალისწინება გადაწყვეტილების მიღებისას.

2014 წლიდან სტრატეგიამ მიზნად დაისახა ბავშვზე მორგებული მართლმსაჯულების სისტემის რეფორმის გაფართოვება ყველა ბავშვის უფლებების რეალიზებისთვის, რომელიც შესაძლოა აღმოჩნდეს მართლმსაჯულებასთან კონტაქტში სისხლის, სამოქალაქო თუ ადმინისტრაციული კანონმდებლობის სფეროებში შემავალ საკითხებთან დაკავშირებით. მიუხედავად ამისა, 2016 წლის ბოლომდე რეფორმის ფარგლებში გაწეული ძალისხმევა ძირითადად მიმართული იყო სისხლის სამართლის სისტემაზე, თუმცა, ბოლო დროს ჩატარებულმა კვლევებმა ნათლად დაადასტურა სამოქალაქო და ადმინისტრაციული კანონმდებლობის და სისტემების რეფორმის აუცილებლობა. იუნისეფის მიერ ჩატარებული კვლევის მიხედვით „ბავშვები უზარმაზარ სირთულეებს აწყდებიან მართლმსაჯულების სისტემასთან შეხებისას. ბავშვები დამოკიდებულნი არიან უფროსებზე, რათა მიიღონ ინფორმაცია საკუთარი უფლებების შესახებ; გაერკვნენ და გამოიყენონ არსებული სამართლებრივი დაცვის საშუალებები და ჰქონდეთ წვდომა სასამართლოსა და მართლმსაჯულების სხვა მექანიზმებზე“².

არასრულწლოვანთა მართლმსაჯულების სისტემის რეფორმის სტრატეგიისა და 2017-2021 წლების სამოქმედო გეგმის თანახმად, იუსტიციის სამინისტროს კოორდინაციით უნდა განხორციელდეს ბავშვთა უფლებების თაობაზე სამოქალაქო და ადმინისტრაციული კანონმდებლობის რეფორმა. რეფორმის მხარდაჭერის მიზნით, მტკიცებულებაზე დაფუძნებული და მონაწილეობით პროცესის უზრუნველსაყოფად, 2016 წლის ბოლოს

¹ ევროპის საბჭოს სახელმძღვანელო მითითებები ბავშვზე მორგებული მართლმსაჯულების შესახებ, განმარტებები, გვ. 17

² UNICEF study on Children's Equitable Access to Justice in Albania, Georgia, Kyrgyzstan and Montenegro, 2015

გაეროს ბავშვთა ფონდის მიერ განხორციელდა წინამდებარე საკანონმდებლო ანალიზი. ხოლო 2017 წლის იანვარში იუსტიციის სამინისტროსთან არსებული კერძო სამართლის უწყებათაშორისი საბჭოს ფარგლებში შეიქმნა მულტიდისციპლინური სამუშაო ჯგუფი,³ რომლის მთავარი ფუნქცია პროცესის კოორდინაცია და ხელმძღვანელობა, ანალიზის სრულყოფა, სპეციფიკური რეკომენდაციების შემუშავება და საკანონმდებლო ცვლილებების პაკეტის მომზადებაა.

საკანონმდებლო ანალიზის მეთოდოლოგია

საკანონმდებლო ანალიზის ანგარიში მომზადდა ეროვნული კანონმდებლობის 30-ზე მეტი სამართლებრივი აქტის სამაგიდო კვლევის შედეგად გაეროს ბავშვთა უფლებების კონვენციის, გაეროსა და ევროპის საბჭოს სხვა საერთაშორისო კონვენციების და სახელმძღვანელო დოკუმენტებთან მიმართებაში. ანალიზის შედეგებში აისახა გაეროს ბავშვთა ფონდის და სხვა ორგანიზაციების მიერ შესაბამის სფეროებში ჩატარებული კვლევები. საკანონმდებლო ანალიზი წარმოადგენს მონაწილეობითი პროცესის შედეგს და სათანადოდ ითვალისწინებს ექსპერტების, სახელმწიფო უწყებების, სასამართლოსა და სამოქალაქო ორგანიზაციების წარმომადგენელთა მოსაზრებებსა და შენიშვნებს.

კანონმდებლობის კვლევა ჩატარდა შემდეგი ძირითადი საკითხების გარშემო: ბავშვთა უფლებების ძირითადი პრინციპები; ბავშვზე მორგებული მართლმსაჯულების ძირითადი ელემენტები; ძირითადი მატერიალური უფლებები. დოკუმენტში, აგრეთვე, გაანალიზებულია ბავშვზე ზეგავლენის შეფასების მექანიზმის დანერგვის საკითხი, როგორც მთავრობის, ასევე, პარლამენტის და ადგილობრივი თვითმმართველობის ორგანოების მიერ გადაწყვეტილებების მიღებისას.

ძირითადი მიგნებები

ბავშვთა დაცვის კონსტიტუციური გარანტიები

გაეროს ბავშვის უფლებათა კონვენცია, საქართველოს კონსტიტუციის შემდეგ, იერარქიით დგას საქართველოს ყველა კანონსა და ორგანულ კანონზე მაღლა. კონსტიტუციის დადგენილი ნორმები „ბავშვებისა და ახალგაზრდების ფიზიკურ აღზრდასა და სპორტში მათ ჩართვაზე“ და „დედათა და ბავშვთა უფლებები დაცულია კანონით“⁴ არ ქმნის მყარ კონსტიტუციურ გარანტიებს ბავშვის, როგორც უფლებების მატარებელი დამოუკიდებელი სუბიექტის, უფლებების დასაცავად. შესაბამისად, რეკომენდებულია საქართველოს კონსტიტუციაში განხორციელდეს ცვლილება ბავშვის უფლებებთან დაცვის ძირითადი პრინციპების განმტკიცების, სახელმწიფოს ანგარიშვალდებულების გაძლიერების და უფლებების ეფექტური დაცვის კონსტიტუციური გარანტიის შექმნისთვის.

ბავშვთა უფლებების დაცვის პოლიტიკური მექანიზმი

საქართველოს კანონმდებლობა, რომელიც ეხება პარლამენტის, მთავრობის და ადგილობრივი თვითმმართველობის ორგანოების საქმიანობასა და გადაწყვეტილების მიღების პროცესს, არ ადგენს გარანტიებს ბავშვის უფლებებთან დაკავშირებული საკითხების დროული და ეფექტური გადაწყვეტისთვის.

³ სამუშაო ჯგუფის შემადგებლობაში შევიდნენ პარლამენტის კომიტეტები, შესაბამისი სამინისტროები და სხვა სახელმწიფო უწყებები, სასამართლოს, სახალხო დამცველის და სამოქალაქო ორგანიზაციების წარმომადგენლები

⁴ ამავე მოსაზრებას განავრცობს ევროპის საბჭოს საკონსულტაციო ორგანო, ვენეციის კომისია 2017 წლის 19 ივნისს გამოცემულ დასკვნაში საქართველოს კონსტიტუციის ცვლილებების პროექტთან დაკავშირებით

გაეროს ბავშვის უფლებათა კომიტეტის რეკომენდაციის მიხედვით⁵ მნიშვნელოვანია შეიქმნას ბავშვთა უფლებრივ მდგომარეობაზე ზეგავლენის შეფასების მექანიზმი, რომლის მიზანია უზრუნველყოს ბავშვის საუკეთესო ინტერესების გათვალისწინება კანონმდებლობის შემუშავების, პოლიტიკის განსაზღვრის, ბიუჯეტირების, პროგრამების შემუშავების და განხორციელების პროცესში.

ბავშვის უფლებათა დაცვის ძირითად პრინციპები

კანონმდებლობის ანალიზის შედეგად გამოიკვეთა, რომ ბავშვის საუკეთესო ინტერესების უპირატესობის, ბავშვის მოსმენის და მისი აზრის სათანადოდ გათვალისწინების პრინციპები სათანადოდ არაა ასახული და გარანტირებული სამოქალაქო და ადმინისტრაციული კანონმდებლობით, მათ შორის, საოჯახო ურთიერთობების, განათლების, ჯანდაცვის და სოციალური დაცვის ხელმისაწვდომობის საკითხებზე. კანონმდებლობა არ ქმნის სათანადო გარანტიებს ყველა ბავშვის დასაცავად არათანაბარი მოპყრობისა და დისკრიმინაციისგან, განსაკუთრებით აღსანიშნავია შეზღუდული შესაძლებლობის მქონე, ქუჩაში მცხოვრები ან/და მომუშავე, სახელმწიფო ზრუნვაში მყოფი, ეთნიკური/ენობრივი უმცირესობის, მიგრანტი და სხვა მოწყვლად ჯგუფებს მიკუთვნებული ბავშვები.

ბავშვზე მორგებული მართლმსაჯულების ძირითად ელემენტები

საქართველოს კანონმდებლობა არ ასახავს ბავშვზე მორგებული მართლმსაჯულების ძირითად ელემენტებს სამოქალაქო და ადმინისტრაციული სამართლით რეგულირებულ სფეროებში, მათ შორის, საოჯახო დავები მშობლის უფლება-მოვალეობებთან დაკავშირებით, ძალადობისგან, ექსპლუატაციისა და შრომის მიძიმე ფორმებისგან დაცვა, სახელმწიფო ზრუნვა, სოციალური დაცვის და ჯანდაცვის სერვისებზე უარი, ინკლუზიურ განათლებაზე და გარემოზე წვდომა, სკოლიდან გარიცხვის და სხვა სახის დისციპლინური ღონისძიებების გამოყენების საკითხები. ეს ნიშნავს, რომ კანონმდებლობით არ არის გარანტირებული ბავშვთა ეფექტური წვდომა ინფორმაციაზე საკუთარი უფლებებისა და ამ უფლებების დაცვის მექანიზმების შესახებ; საპროცესო კანონმდებლობა არ ადგენს ბავშვზე მორგებულ სასამართლო პროცედურებს.

მართალია, კანონით ბავშვს უფლება აქვს 14 წლის ასაკიდან მიმართოს სასამართლოს, თუმცა დადგენილი არ არის მის შესაძლებლობებზე მორგებული სასამართლოსადმი მიმართვის, საქმის განხილვის და გადაწყვეტილების აღსრულების პროცედურები. უფლების დარღვევის შემთხვევაში დაცვის საშუალებების მოძიების და გამოყენების თვალსაზრისით, ბავშვი თითქმის სრულად არის დამოკიდებული მის მშობელზე ან მეურვეზე. კანონით გარანტირებული არ არის უფასო იურიდიული დახმარება სოციალური სტატუსის მიუხედავად ყველა შემთხვევაში, როდესაც ბავშვი დამოუკიდებლად მიმართავს ადმინისტრაციულ ორგანოს ან სასამართლოს ან/და როდესაც ამას მოითხოვს ბავშვის საუკეთესო ინტერესები. კანონმდებლობა ვერ უზრუნველყოფს დაზარალებულ/მსხვერპლ ბავშვთა ზიანის ანაზღაურების დროულ და ეფექტურ მექანიზმს (ანაზღაურება სახელმწიფოს მიერ, ხოლო შემდეგ ეტაპზე - დამრღვევისგან), კომპენსაციის მოთხოვნის და გასაჩივრების ადაპტირებულ პროცედურებს. კანონმდებლობა არ ითვალისწინებს სპეციალურ, ბავშვზე მორგებულ პროცედურებს სასამართლო გადაწყვეტილების შესახებ ბავშვის ინფორმირების და ბავშვზე მორგებული ფორმით აღსრულების შესახებ.

მეურვეობისა და მზრუნველობის ორგანო თავად ან მის მიერ დანიშნული პირის საშუალებით ახორციელებს ბავშვის საპროცესო წარმომადგენლობას სამართალწარმოების პროცესში. თუმცა კანონმდებლობა არ ასახავს საპროცესო წარმომადგენლის პროცესში

⁵ მუხ. 3,4; კომიტეტის ზოგადი კომენტარი 5 (2003)

„ჩაბმის“ კონკრეტულ შინაარსს, ფუნქციებსა და მოვალეობებს, ეთიკურ პრინციპებს, დამოუკიდებლობის გარანტიებს, სპეციალიზაციას და სხვა; განსაკუთრებით პრობლემურია სახელმწიფო ზრუნვაში მყოფ ბავშვთა უფლება წარმომადგენლობაზე. წარმომადგენლობის შინაარსის გარკვევა შეუძლებელია შესაბამისი საკანონმდებლო რეგულირების არარსებობის გამო⁶.

კანონმდებლობა ვერ უზრუნველყოფს ბავშვთა პირადი მონაცემების დაცვის გარანტიებს, განსაკუთრებით მნიშვნელოვან ისეთ საკითხებზე, როგორცაა: ალტერნატიულ ზრუნვაში განთავსება, საოჯახო დავები, თავშესაფრის მაძიებელი და მიგრანტი ბავშვები, ჯანმრთელობის დაცვა, სისხლის სამართლის პასუხისმგებლობის ასაკს მიუღწეველ ბავშვთა მიერ ანტისოციალური ქცევის და დაკავშირებული დისციპლინური საკითხები და სხვა.

კანონმდებლობა არ ადგენს პროფესიონალთა სავალდებულო სპეციალიზაციას სამოქალაქო და ადმინისტრაციული მართლმსაჯულების სფეროებში ბავშვის უფლებების, ბავშვთან კომუნიკაციის მეთოდების, ასაკობრივი საჭიროებების და ბავშვზე მორგებული პროცესის შესახებ.

ბავშვთა ძირითადი უფლებების ასახვა საერთაშორისო სტანდარტების შესაბამისად

კანონმდებლობა, აგრეთვე, გაანალიზდა ძირითად უფლებებთან მიმართებაში, როგორცაა: განათლების უფლება, ჯანდაცვის უფლება, სოციალური დაცვა და ალტერნატიული ზრუნვა, საჭიროების შემთხვევაში, ბავშვთა დაცვა ძალადობის, ექსპლუატაციისგან და შრომის უკიდურესი ფორმებისგან.

კანონმდებლობის ანალიზის შედეგად გამოვლინდა, რომ კანონმდებლობა არ მოიცავს ნებისმიერი ფიზიკური დასჯის, დამამცირებელი მოპყრობის ან/და სასჯელის უპირობო, პირდაპირ აკრძალვას ოჯახში, სკოლაში და სხვა გარემოში; ცალკე დანაშაულებად არაა აღიარებული ბავშვით ვაჭრობა და ბავშვთა ექსპლუატაცია ბავშვის უფლებათა კონვენციის შინაარსით და განმარტებულია მხოლოდ ტრეფიკინგის დანაშაულის შემადგენლობაში; დადგენილი არ არის შრომის უკიდურესი ფორმები, რეგულარული მონიტორინგის და გამოვლენის მექანიზმები და შრომის უკიდურესი ფორმისგან ბავშვთა დაცვის სპეციფიკური გარანტიები.

განათლების უფლებასთან დაკავშირებით საჭიროა ინკლუზიური განათლების ცნების განმარტების გაუმჯობესება და ხელმისაწვდომობის საკანონმდებლო გარანტიების დადგენა; ბავშვის მონაწილეობის უფლების უზრუნველყოფა სასკოლო დისციპლინის საკითხებში (სხვა სკოლაში გადაყვანა, რეფერალი „ანტისოციალური ქცევის დროს“, სხვა ღონისძიებების განმარტება).

უფლება ჯანდაცვაზე უნდა იყოს უზრუნველყოფილი ისეთი საკანონმდებლო გარანტიების დანერგვით, რომლებიც უზრუნველყოფს სახელმწიფო ზრუნვაში მყოფ, ძალადობის და სხვა დანაშაულების მსხვერპლ ბავშვთა წვდომას ჯანდაცვის და რეაბილიტაციის სერვისზე; ბუნებრივი კვების ხელშეწყობის მექანიზმის დანერგვას; მავნე ზეგავლენისგან ბავშვთა დაცვის და ფსიქიატრიული მკურნალობის პროცესში ბავშვთა უფლებების დაცვის სამართლებრივი გარანტიების შექმნას.

სოციალური დაცვა და სახელმწიფო ზრუნვის მიმართულებით კანონმდებლობა უნდა გაუმჯობესდეს ბავშვთა სოციალური დაცვის/დახმარების, ოჯახის მხარდაჭერის სერვისების და მიტოვების პრევენციის ღონისძიებების, განსაკუთრებით მოწყვლადი ჯგუფების, როგორცაა შშმ ბავშვების, მშობლის მზრუნველობას მოკლებული ბავშვების,

⁶ ამ მხრივ საკანონმდებლო ხარვეზებზე ყურადღებას ამახვილებს, ასევე, ევროპის სასამართლო თავის გაადწევეტილებაში „ნ.წ. საქართველოს წინააღმდეგ“, თებერვალი, 2016

ძალადობის მსხვერპლი ბავშვების საჭიროებების გათვალისწინებით. ხარვეზები უნდა აღმოიფხვრას სახელმწიფო ზრუნვის სტანდარტების, დაწესებულებათა რეგულირების, სტანდარტების დაცვის მონიტორინგის გაუმჯობესების მიზნით.

ძირითადი რეკომენდაციები

ბავშვთა უფლებებთან დაკავშირებით განხილული კანონებიდან (განათლება, ჯანდაცვა, სოციალური დაცვა, სახელმწიფო ზრუნვა, ადმინისტრაციული და სამოქალაქო პროცესი, სხვა), ყველა მათგანი საჭიროებს ცვლილებებს ამა თუ იმ ხარისხით. ამავე დროს, გამოიკვეთა რიგი საკითხები ბავშვთა დაცვის და მართლმსაჯულებასთან წვდომის კუთხით, რომლებიც საერთოდ არ არის სათანადოდ მოცული დღევანდელი კანონმდებლობით.

რეკომენდებულია არსებული ხარვეზების შესავსებად ცვლილებების პაკეტთან ერთად განვიხილოთ ცალკე საკანონმდებლო აქტის შემუშავების საკითხი, რომელიც შეავსებს და გააძლიერებს სამართლებრივ ჩარჩოს ბავშვთა დაცვის და მართლმსაჯულებასთან წვდომის გარანტიებს სამოქალაქო და ადმინისტრაციული სამართლის რეგულირების ქვეშ არსებულ სფეროებში, კერძოდ, ისეთ კომპონენტებს, როგორცაა: ბავშვის უფლებათა ძირითადი პრინციპების უზრუნველყოფის ზოგადი საკანონმდებლო გარანტიები ყველა სფეროში, ბავშვზე მორგებული მართლმსაჯულების ძირითადი საკანონმდებლო გარანტიები და აღსრულების მექანიზმები, ადმინისტრაციული ორგანოების მიერ გადაწყვეტილების მიღების ბავშვზე მორგებული პროცედურები, მშობელთა მზრუნველობას მოკლებული ბავშვების დაცვა, ძალადობისგან ბავშვთა დაცვის გარანტიები, სხვა.

ბავშვზე მორგებული მართლმსაჯულება შესავალი

გაეროს ბავშვთა ფონდის კვლევამ „ბავშვთა თანაბარი წვდომა მართლმსაჯულებაზე ალბანეთში, საქართველოში, ყირგიზეთსა და მონტენეგროში“⁷ გამოავლინა, რომ ბავშვები უზარმაზარ სირთულეებს აწყდებიან მართლმსაჯულების სისტემასთან შეხებისას. ბავშვები დამოკიდებულნი არიან უფროსებზე, რათა მიიღონ ინფორმაცია საკუთარი უფლებების შესახებ; გაერკვნენ და გამოიყენონ არსებული სამართლებრივი დაცვის საშუალებები და ჰქონდეთ წვდომა სასამართლოსა და მართლმსაჯულების სხვა მექანიზმებზე. ბავშვზე მორგებული პროცედურები მხოლოდ ცალკეულ შემთხვევებში გამოიყენება. თითქმის არ არსებობს მექანიზმები და რესურსები, რომელიც უზრუნველყოფდა მართლმსაჯულების სისტემაში ბავშვთა საჭიროებების გათვალისწინებას და მათი შესაძლებლობების განვითარების მხარდაჭერას.

2015 წლის ივნისში საქართველოს პარლამენტმა მიიღო „არასრულწლოვანთა მართლმსაჯულების კოდექსი“, რომლითაც განმტკიცდა საერთაშორისო სტანდარტები საქართველოს არასრულწლოვანთა მართლმსაჯულების სისტემაში. რაც შეეხება სამოქალაქო და ადმინისტრაციულ საკითხებზე ბავშვთა მართლმსაჯულების საკითხს, სამოქალაქო და ადმინისტრაციული კანონმდებლობის გაუმჯობესება წარმოადგენს „არასრულწლოვანთა მართლმსაჯულების სისტემის რეფორმის“ სახელმწიფო სტრატეგიისა და სამოქმედო გეგმის ერთ-ერთ პრიორიტეტს 2017 წლისთვის.

წინამდებარე დოკუმენტი წარმოადგენს ბავშვზე მორგებული მართლმსაჯულების კუთხით საერთაშორისო სტანდარტებთან მიმართებაში საქართველოს სამოქალაქო და ადმინისტრაციული კანონმდებლობის ანალიზს. დოკუმენტში საკითხების თემატიკა და სტრუქტურა აგებულია „ბავშვზე მორგებული მართლმსაჯულების ევროპის საბჭოს სახელმძღვანელო პრინციპების“⁸ თანმიმდევრობით, რომელიც მომზადებულია გაეროსა და ევროპის საბჭოს ყველა ძირითადი სამართლებრივი ინსტრუმენტის საფუძველზე.

1. საერთაშორისო სამართლებრივი სტანდარტები და ინსტრუმენტები

საქართველოს არის წევრი სახელმწიფო გაეროს და ევროპის საბჭოს თითქმის ყველა საერთაშორისო კონვენციისა და მათი დამატებითი ოქმებისა, რომლებიც პირდაპირ და არაპირდაპირ ეხება ბავშვთა უფლებებს. მათ შორის ყველაზე მნიშვნელოვანი სამართლებრივი აქტები და ინსტრუმენტები ასახავს მართლმსაჯულებასთან კონტაქტში მყოფი ბავშვის უფლებების დაცვის გარანტიებს, რომელთა უზრუნველყოფაც სახელმწიფოს ვალდებულებაა. წინამდებარე ანალიზი განხორციელდა იმ საერთაშორისო და რეგიონული ინსტრუმენტების მიხედვით, რომლებიც უშუალოდ ეხება ბავშვთა უფლებების და მართლმსაჯულებაზე

⁷ გაეროს ბავშვთა ფონდის კვლევა „ბავშვთა თანაბარი წვდომა მართლმსაჯულებაზე ალბანეთში, საქართველოში, ყირგიზეთსა და მონტენეგროში“ (2015)

⁸ ევროსაბჭოს მინისტრთა კომიტეტის მიერ მიღებულია 2010 წელს

წვდომის საკითხებს სამოქალაქო და ადმინისტრაციული სფეროს კანონმდებლობის კრილში, კერძოდ:

გაეროს ინსტრუმენტები:

- გაეროს ბავშვის უფლებათა კონვენცია (1989)⁹
- ბავშვის უფლებათა კონვენციის დამატებითი ოქმი ბავშვებით ვაჭრობის, ბავშვთა პროსტიტუციის და ბავშვთა პორნოგრაფიის შესახებ (2000)¹⁰
- ბავშვის უფლებათა კონვენციის დამატებითი ოქმი შეტყობინების პროცედურების შესახებ (2014)¹¹
- შეზღუდული შესაძლებლობების მქონე პირთა კონვენცია (2008)¹²
- გაეროს რეზოლუცია (2005) “სახელმძღვანელო მითითებები მართლმსაჯულების შესახებ მსხვერპლი და მოწმე ბავშვების მონაწილეობით“

გაეროს კომიტეტების ზოგადი კომენტარები (სახელმძღვანელო განმარტებები):

- ბავშვის უფლებათა კომიტეტის ზოგადი კომენტარი #5 (2003) „ბავშვის უფლებათა კონვენციის განხორციელების ზოგადი ღონისძიებები (მუხ. 4, 42 და 44 (6))“
- ბავშვის უფლებათა კომიტეტის ზოგადი კომენტარი #12 (2009) „ბავშვის უფლება მისი მოსაზრებების მოსმენაზე“
- ბავშვის უფლებათა კომიტეტის ზოგადი კომენტარი #14 (2013) „ბავშვის უფლება მისი საუკეთესო ინტერესების უპირატესად გათვალისწინების შესახებ“
- ბავშვის უფლებათა კომიტეტის ზოგადი კომენტარი #6 (2005) „თანმხლების გარეშე მყოფი და ოჯახისგან განცალკევებული ბავშვების მიმართ მოპყრობა წარმოშობის ქვეყნის გარეთ“
- ბავშვის უფლებათა კომიტეტის ზოგადი კომენტარი #8 (2006) „ბავშვის უფლება დაცული იყოს ფიზიკური დასჯისა და სხვა სასტიკი ან დამამცირებელი სასჯელებისგან“
- ბავშვის უფლებათა კომიტეტის ზოგადი კომენტარი #9 (2006) „შეზღუდული შესაძლებლობების მქონე ბავშვთა უფლებები“
- ბავშვის უფლებათა კომიტეტის ზოგადი კომენტარი #13 (2011) „ბავშვის უფლება ძალადობის ყველა ფორმისგან დაცვის შესახებ“
- ბავშვის უფლებათა კომიტეტის ზოგადი კომენტარი #15 (2013) „ბავშვის უფლება ჯანდაცვის უმაღლესი სტანდარტით სარგებლობის შესახებ“
- ბავშვის უფლებათა კომიტეტის ზოგადი კომენტარი #1 (2001) „მუხ. 29 (1). განათლების მიზნები“
- შეზღუდული შესაძლებლობის მქონე პირთა კომიტეტის ზოგადი კომენტარი #4 (2016) „მუხ. 24. უფლება ინკლუზიური განათლების შესახებ“

ევროპის საბჭოს ინსტრუმენტები:

⁹ საქართველოს მიერ რატიფიცირებულია 1994 წელს

¹⁰ საქართველოს მიერ რატიფიცირებულია 2005 წელს

¹¹ საქართველოს მიერ რატიფიცირებულია 2016 წელს

¹² საქართველოს მიერ რატიფიცირებულია 2013 წელს

- ევროპის ადამიანის უფლებათა და ძირითად თავისუფლებათა კონვენცია¹³
- ევროპის სოციალური ქარტია¹⁴
- ევროპის საბჭოს კონვენცია სექსუალური ექსპლუატაციისა და ძალადობისგან ბავშვთა დაცვის შესახებ¹⁵
- ევროპის კონვენციამ წამების და არაადამიანური ან დამამცირებელი მოპყრობის ან სასჯელის პრევენციის შესახებ¹⁶
- ევროპის საბჭოს კონვენცია პერსონალური მონაცემების ავტომატური დამუშავებისას ინდივიდთა დაცვის შესახებ¹⁷

ევროპის საბჭოს სახელმძღვანელო მითითებები პოლიტიკისა და კანონმდებლობის შესახებ:

- ევროპის საბჭოს პოლიტიკის სახელმძღვანელო პრინციპები ძალადობისგან ბავშვთა დაცვის ინტეგრირებული ეროვნული სტრატეგიების შესახებ¹⁸
- ევროპის საბჭოს მინისტრთა კომიტეტის სახელმძღვანელო მითითებები ბავშვზე მორგებული მართლმსაჯულების შესახებ¹⁹

2. განხილული საკანონმდებლო აქტები

დოკუმენტში განხილულია დაახლოებით 30-მდე კანონი, რომლებიც ეხება: ბავშვის სამართლებრივ ქმედუნარიანობას, სამოქალაქო და ადმინისტრაციული სამართალწარმოების პროცესს, სასამართლო გადაწყვეტილებათა აღსრულებას, ძალადობისგან დაცვას, განათლებას, ჯანმრთელობის დაცვას, სოციალურ დაცვას, უფლებების დარღვევის შემთხვევაში ზიანის ანაზღაურების და სხვა საკითხებს. გაანალიზებულია შემდეგი საკანონმდებლო აქტები:

- საქართველოს კონსტიტუცია
- სამოქალაქო კოდექსი
- ადგილობრივი თვითმმართველობის კოდექსი
- კანონი სახალხო დამცველის შესახებ
- კანონი დისკრიმინაციის ყველა ფორმის აღმოფხვრის შესახებ
- ზოგადი ადმინისტრაციული კოდექსი
- სამოქალაქო საპროცესო კოდექსი
- ადმინისტრაციული საპროცესო კოდექსი
- კანონი იურიდიული დახმარების შესახებ
- კანონი ბაჟის შესახებ
- კანონი სააღსრულებო წარმოებათა შესახებ
- კანონი პერსონალურ მონაცემთა დაცვის შესახებ
- კანონი ზოგადი განათლების შესახებ
- კანონი სკოლამდელი აღზრდისა და განათლების შესახებ

¹³ საქართველოს მიერ რატიფიცირებულია 20.05.1999

¹⁴ ევროპის სოციალური ქარტია (შესწორებული), მიღებულია 1996წ. 3 მაისს. საქართველოს მიერ რატიფიცირებულია 2005 წ. 1 ივლისს <https://www.matsne.gov.ge/ka/document/view/43174>

¹⁵ ე.წ. „ლანზაროტის კონვენცია“ ძალაში შევიდა 01/07/2010; რატიფიცირებულია 23.09.2014

¹⁶ მიღებულია 1987 წელს და რატიფიცირებულია საქართველოს მიერ 20.06.2000

¹⁷ ძალაში შევიდა 01.10.1985; საქართველოს მიერ რატიფიცირებულია 14.12.2005

¹⁸ სახელმძღვანელო პრინციპები შემუშავდა 2008-2009 წლებში <https://rm.coe.int/CoERMPublicCommonSearchServices/DisplayDCTMContent?documentId=090000168046d3a0>

¹⁹ ევროპის საბჭოს მინისტრთა კომიტეტმა მიიღო 2010 წლის 17 ნოემბერს

- კანონი ჯანმრთელობის დაცვის შესახებ
- კანონი პაციენტის უფლებების შესახებ
- კანონი ფსიქიატრიული დახმარების შესახებ
- კანონი სამედიცინო-სოციალური ექსპერტიზის შესახებ
- კანონი ოჯახში ძალადობის, ოჯახში ძალადობის მსხვერპლთა დაცვისა და დახმარების შესახებ
- კანონი სოციალური დახმარების შესახებ
- კანონი შვილად აყვანის და მინდობით აღზრდის შესახებ
- კანონი სააღმზრდელო საქმიანობის ლიცენზირების შესახებ
- კანონი შეზღუდული შესაძლებლობის მქონე პირთა სოციალური დაცვის შესახებ
- კანონი სამოქალაქო აქტების შესახებ
- საქართველოს ოკუპირებული ტერიტორიებიდან იძულებით გადაადგილებულ პირთა – დევნილთა შესახებ
- კანონი უცხოელთა და მოქალაქეობის არმქონე პირთა სამართლებრივი სტატუსის შესახებ
- კანონი შრომითი მიგრაციის შესახებ
- კანონი გარემოს დაცვის შესახებ
- კანონი ტრანსპორტის შესახებ
- კანონი ბინათმესაკუთრეთა ამხანაგობის შესახებ

წინამდებარე დოკუმენტში კანონმდებლობა გაანალიზებულია ბავშვზე მორგებული მართლმსაჯულების ძირითადი ელემენტების მიხედვით, კერძოდ, ესაა: ბავშვის საუკეთესო ინტერესების უპირატესად გათვალისწინება მის უფლებებთან დაკავშირებული საკითხების განხილვისას, ბავშვის მონაწილეობა ადმინისტრაციული წარმოების და სასამართლოს მიერ საქმის განხილვის პროცესში, დისკრიმინაციისგან ბავშვის დაცვის სამართლებრივი გარანტიები, ბავშვის ხელმისაწვდომობა ინფორმაციაზე, იურიდიულ დახმარებასა და წარმომადგენლობაზე უფლებების დარღვევის შემთხვევაში ან/და სამართალწარმოების პროცესში, ბავშვის პერსონალური მონაცემების დაცვა, ზიანის ანაზღაურება და კომპენსაცია, ბავშვთან მომუშავე პროფესიონალთა სპეციალიზაცია. გამომდინარე იქედან, რომ ბავშვთა დაცვის თვალსაზრისით ძირითად უფლებათა შორის პრიორიტეტულია ბავშვის უფლება განათლებაზე, ჯანდაცვასა და სოციალურ დაცვაზე, ეს დოკუმენტი, აგრეთვე, მოიცავს ამ უფლებების უზრუნველყოფის სამართლებრივი გარანტიების ანალიზს ეროვნული კანონმდებლობის კრილში.

3. კანონმდებლობის ანალიზი

3.1. ბავშვთა უფლებრივ მდგომარეობაზე ზეგავლენის შეფასება

კომიტეტი²⁰ აღნიშნავს, ბავშვის საუკეთესო ინტერესების უპირატესად გათვალისწინებამ კანონმდებლობაში, პოლიტიკის შემუშავებისა და განხორციელების დროს სახელმწიფოსგან მოითხოვს ბავშვზე ზეგავლენის შეფასების მექანიზმის დანერგვას. ეს მექანიზმი გულისხმობს ნებისმიერი კანონის მიღების, პოლიტიკის შემუშავების თუ ბიუჯეტირების პროცესში წინასწარ შეფასდეს ბავშვის უფლებებზე მოსალოდნელი შედეგები.

²⁰ ზოგადი კომენტარი #5, პარა. 45, 27, ასევე, იხილეთ, ზოგადი კომენტარი #14, პარა. 35

ამგვარი წინასწარი შეფასების ჩატარება მტკიცებულებაზე დაფუძნებული გადწყვეტილებების მისაღებად აღიარებულია და პრაქტიკაში დანერგილია ევროკავშირის, ეკონომიკური თანამშრომლობისა და განვითარების ორგანიზაციის (OECD), გაეროს ბავშვთა ფონდის და მსოფლიო ბანკის მიერ. ბავშვზე ზეგავლენის შეფასების ძირითადი მიზანია დაეხმაროს მთავრობას კონვენციით ნაკისრი ვალდებულებების შესრულებაში და უზრუნველყოს ბავშვთა საკითხების პრიორიტეტულად განხილვა სხვადასხვა სექტორული პოლიტიკის და პროგრამების შემუშავების პროცესში. ეს შეფასება უნდა ჩატარდეს ახალი კანონების, რეგულაციების, დადგენილებების მომზადების პროცესში ეროვნულ, რეგიონულ და ადგილობრივ დონეებზე²¹.

საქართველოს კანონი ნორმატიული აქტების შესახებ განსაზღვრავს ნორმატიული აქტების მომზადების და მიღების წესს²². კანონის თანახმად, კანონპროექტს უნდა დაერთოს განმარტებითი ბარათი, რომელშიც აისახება, მათ შორის, მისი ფინანსური დასაბუთება, მოსალოდნელი საფინანსო-ეკონომიკური შედეგები საერთაშორისო სამართლებრივ სტანდარტებთან (მათ შორის, ევროკავშირის დირექტივები, საერთაშორისო ხელშეკრულებები) შესაბამისობა, ექსპერტების დასკვნები²³.

საქართველოს უმაღლესი საკანონმდებლო ორგანოს, პარლამენტის, უფლებამოსილების განხორციელების წესსა და პროცედურას, პარლამენტის სტრუქტურას განსაზღვრავს „პარლამენტის რეგლამენტი“²⁴, რომელიც არის კანონის ძალის მქონე ნორმატიული აქტი²⁵. რეგლამენტი მოითხოვს, რომ საკანონმდებლო ინიციატივის მომზადების დროს კანონპროექტს თან უნდა დაერთოს განმარტებითი ბარათი, რომელში აუცილებელია მიეთითოს კანონპროექტის მიზეზი, მიზანი, არსი, ფინანსური დასაბუთება, მიმართება საერთაშორისო სამართლებრივ სტანდარტებთან და ვალდებულებებთან. კანონპროექტს შესაძლოა დაერთოს დამოუკიდებელი ექსპერტის დასკვნა და ასევე ლობისტის დასკვნა, ამგვარი დასკვნების არსებობის შემთხვევაში²⁶.

განხილული კანონებით გათვალისწინებული არ არის კანონპროექტის ინიცირების დროს ბავშვთა ჯგუფის ან ზოგადად ბავშვთა უფლებებზე ზეგავლენის შეფასების ვალდებულება. რეკომენდირებულია გადაიხედოს ეს კანონები და მათში აისახოს საკანონმდებლო აქტების შემუშავების პროცესში ბავშვზე ზეგავლენის შეფასების სავალდებულო მექანიზმები, რათა უზრუნველყოფილი იქნას ნებისმიერი კანონის ან საკანონმდებლო ცვლილების შესაბამისობა ბავშვის ან ბავშვთა ჯგუფის (ჯგუფების) საუკეთესო ინტერესებთან.

3.2. ბავშვის უფლებათა ძირითადი პრინციპები (ბავშვის საუკეთესო ინტერესები, მონაწილეობის უფლება, დისკრიმინაციის აკრძალვა)

3.2.1. ბავშვის საუკეთესო ინტერესები

²¹ EU-UNICEF Child-Rights Toolkit / UNICEF, 2014/ Module 5

²² მუხ. 1

²³ მუხ. 17

²⁴ <https://matsne.gov.ge/ka/document/view/1691403>

²⁵ საქართველოს კანონი ნორმატიული აქტების შესახებ, მუხ. 10 (10) <https://matsne.gov.ge/ka/document/view/90052>

²⁶ მუხ. 145

ა) ბავშვის საუკეთესო ინტერესების უპირატესად გათვალისწინება სამოქალაქო ურთიერთობებში

ბავშვის უფლებათა კონვენცია მოითხოვს, რომ ბავშვებთან დაკავშირებით ნებისმიერი მოქმედების განხორციელებისას საჯარო ან კერძო სოციალური კეთილდღეობის დაწესებულებების, სასამართლოების, ადმინისტრაციული თუ საკანონმდებლო ორგანოების მიერ, უპირველეს ყოვლისა გათვალისწინებული უნდა იყოს ბავშვის საუკეთესო ინტერესები²⁷. სახელმწიფო ვალდებულია იზრუნოს ბავშვთა კეთილდღეობაზე²⁸. ბავშვზე ზრუნვის ყველა საჯარო, კერძო და მოხალისეობრივი დაწესებულება და სერვისი უნდა შეესაბამებოდეს კონვენციის შესაბამისად, კანონმდებლობით დადგენილ სტანდარტებს²⁹. კონვენცია მიუთითებს ბავშვის საუკეთესო ინტერესების უპირატესად გათვალისწინების ვალდებულების შესახებ, ასევე, ისეთ საკითხებზე, რომლებიც ეხება მშობლის ვალდებულებებს³⁰, ოჯახის გაერთიანებას³¹, ბავშვის განცალკევებას მშობლებისგან³², ოჯახური გარემოსგან მოშორებას და ალტერნატიული ზრუნვას³³, შვილად აყვანას³⁴.

გაეროს შეზღუდული შესაძლებლობის მქონე პირთა უფლებების კონვენცია მოითხოვს, რომ მონაწილე სახელმწიფოებმა მიიღონ ყველა საჭირო ზომა შეზღუდული შესაძლებლობების მქონე ბავშვებმა სხვა ბავშვების თანასწორად ისარგებლონ ადამიანის უფლებებითა და ძირითადი თავისუფლებებით. შეზღუდული შესაძლებლობის მქონე ბავშვებთან დაკავშირებულ ნებისმიერ ქმედებაში, უპირველეს ყოვლისა გათვალისწინებული უნდა იქნას ბავშვის საუკეთესო ინტერესები³⁵.

კომიტეტის თანახმად,³⁶ ბავშვის საუკეთესო ინტერესების ცნება სამგანზომილებიანია:

ა) მატერიალური უფლება: ბავშვის (ბავშვთა ჯგუფის, ზოგადად ბავშვების) უფლება მისი საუკეთესო ინტერესები შეფასდეს და დაეთმოს უპირველესი ყურადღება მასთან დაკავშირებით ნებისმიერ საკითხზე გადაწყვეტილების მისაღებად. ესაა კონვენციით დადგენილი, სახელმწიფოს არსებითი ვალდებულება, რომელიც პირდაპირ უნდა იქნეს გამოყენებული და დარღვევის შემთხვევაში, გასაჩივრდეს სასამართლოში.

ბ) ფუნდამენტური სამართლებრივი პრინციპი: თუ ეროვნულ კანონში სამართლებრივი ნორმა იძლევა ერთზე მეტი განმარტების საშუალებას, გამოყენებული უნდა იქნას ის განმარტება, რომელიც ყველაზე მეტად ემსახურება ბავშვის საუკეთესო ინტერესებს, როგორც მოცემულია კონვენციასა და მის დამატებით ოქმებში.

გ) საპროცესო ნორმა: ბავშვის საუკეთესო ინტერესების შეფასება და განსაზღვრა მოითხოვს საპროცესო გარანტიებს. უფრო მეტიც, ბავშვთან, ბავშვთა ჯგუფთან ან ზოგადად ბავშვებთან დაკავშირებით მიღებული გადაწყვეტილება უნდა მოიცავდეს ამ უფლების უპირატესად გათვალისწინების დასაბუთებას. კერძოდ, დასაბუთებაში უნდა იქნას ახსნილი, რა იქნა მიჩნეული ბავშვის საუკეთესო ინტერესებად; რა კრიტერიუმებს დაეფუძნა ასეთი მსჯელობა; და როგორ იქნა დადგენილი ბავშვის საუკეთესო ინტერესები სხვა პირთა ინტერესებსა და პოლიტიკურ საკითხებთან მიმართებაში.

²⁷ მუხ. 3.1

²⁸ მუხ. 3.2

²⁹ მუხ. 3.3

³⁰ მუხ. 18.1

³¹ მუხ. 10

³² მუხ. 9

³³ მუხ. 20

³⁴ მუხ. 21

³⁵ მუხ. 7

³⁶ ბავშვის უფლებათა კომიტეტის ზოგადი კომენტარი #14 „ბავშვის საუკეთესო ინტერესების უპირატესი გათვალისწინების შესახებ“, პარა. 6

ევროპის საბჭოს მინისტრთა კომიტეტის სახელმძღვანელო მითითებები ბავშვზე მორგებული მართლმსაჯულების შესახებ მიუთითებს სახელმწიფოს შემდეგ ვალდებულებებზე:

1. ბავშვის საუკეთესო ინტერესების უპირატესი გათვალისწინების უფლების კანონმდებლობით უზრუნველყოფა;
2. ბავშვის საუკეთესო ინტერესების შეფასებისას: ა) ბავშვის მოსაზრებებს უნდა მიენიჭოს სათანადო მნიშვნელობა; ბ) გათვალისწინებული უნდა იქნას ბავშვის ყველა სხვა უფლება, მათ შორის, ღირსების, თავისუფლების და თანაბარი მოპყრობის უფლება; გ) გამოყენებული უნდა იქნეს მულტიდისციპლინური მიდგომა ყველა უწყების მიერ, რომელიც შეისწავლის ყველა ინტერესს, მათ შორის, ბავშვის ფსიქოლოგიურ და ფიზიკურ კეთილდღეობას, სამართლებრივ, სოციალურ და ეკონომიკურ ინტერესებს.
3. სასამართლოებმა ბავშვთა მონაწილეობით საქმეთა განხილვისა და გადაწყვეტილების მიღებისას უნდა გამოიყენონ მულტიდისციპლინური მიდგომა ბავშვის საუკეთესო ინტერესების დასადგენად³⁷.

სამოქალაქო კოდექსი მიუთითებს, რომ მშობლები უფლებამოსილი და ვალდებულნი არიან აღზარდონ თავიანთი შვილები, იზრუნონ მათი ფიზიკური, გონებრივი, სულიერი და სოციალური განვითარებისათვის, აღზარდონ ისინი საზოგადოების ღირსეულ წევრებად, მათი „ინტერესების უპირატესი გათვალისწინებით“³⁸. გარდა ამისა, სამოქალაქო კოდექსი ადგენს, რომ მშობლებს ევალებათა დაიცვან თავიანთი არასრულწლოვანი შვილების უფლებები და ინტერესები, რაც მოიცავს შვილების ქონების მართვასა და გამოყენებას³⁹. აღსანიშნავია, რომ „საუკეთესო ინტერესების უპირატესი გათვალისწინების“ პრინციპი აღნიშნულია მხოლოდ მშობელთა მიერ ბავშვის აღზრდის მოვალეობებთან მიმართებაში და არა ყველა უფლებასთან დაკავშირებით, როგორცაა მშობლის მიერ ბავშვის წარმომადგენლობა მესამე პირებთან ურთიერთობაში და ბავშვის ქონების მართვა. კანონი არ ადგენს ბავშვის ქონებრივი უფლებების დაცვის მყარ სამართლებრივ გარანტიებს მშობელთა მიერ მისი ქონების განკარგვის უფლების ბოროტად გამოყენების რისკების თავიდან აცილებისთვის⁴⁰.

სამოქალაქო კოდექსის თანახმად, სასამართლო განხილვას ექვემდებარება ბავშვთა მონაწილეობით შემდეგი საკითხების განხილვა: ბავშვის საცხოვრებელი ადგილის განსაზღვრა მშობელთა შეუთანხმებლობის შემთხვევაში⁴¹; ბავშვის აღზრდის საკითხების გადაწყვეტა მშობელთა შეუთანხმებლობის შემთხვევაში⁴²; მშობლის უფლება-მოვალეობების შეზღუდვა შეიძლება სასამართლოს მიერ, თუმცა მას უნარჩუნდება ბავშვის რჩენის ვალდებულება⁴³; მშობლის უფლება-მოვალეობების ჩამორთმევა (მათ შორის, 14 წელს მიღწეული ბავშვის ინიციატივით)⁴⁴; მშობლის უფლება-მოვალეობების აღდგენა⁴⁵; საალიმენტო მოვალეობის შესახებ დავას⁴⁶; შვილად აყვანის შესახებ გადაწყვეტილება⁴⁷;

³⁷ ევროპის საბჭოს მინისტრთა კომიტეტის სახელმძღვანელო მითითებები 1-4, გვ.19

³⁸ მუხ. 1198.1

³⁹ სამოქალაქო კოდექსი, მუხ. 1198.4

⁴⁰ გთხოვთ დამატებით იხილოთ თბილისის საქალაქო სასამართლოს საოჯახო საქმეთა განმხილველი მოსამართლის, ქ-ნ ეკა ზარნაძის მოხსენება ამ საკითხზე

⁴¹ მუხ. 1201.2

⁴² მუხ. 1200

⁴³ მუხ. 1205

⁴⁴ მუხ. 1206

⁴⁵ მუხ. 1209

⁴⁶ მუხ. 1214

⁴⁷ მუხ. 1242, 1254 და 1255

შვილად აყვანის ბათილობა⁴⁸. ამ საკითხებთან დაკავშირებით კოდექსი არ ასახავს სასამართლოს მიერ გადაწყვეტილების მიღებისას ბავშვის საუკეთესო ინტერესების უპირველესად გათვალისწინების პრინციპს.

რეკომენდებულია სამოქალაქო კოდექსმა აღიაროს ბავშვის მატერიალური უფლება მისი საუკეთესო ინტერესების უპირატესი გათვალისწინების შესახებ ყველა საკითხთან დაკავშირებით, რომელიც მას ეხება, როგორც მშობელთა მიერ აღზრდის მოვალეობის, ასევე, მათ მიერ ბავშვის მესამე პირებთან წარმომადგენლობის და ბავშვის ქონების განკარგვის შესახებ გადაწყვეტილებების მიღებისას. შესაბამისად, ეს პრინციპი უნდა გავრცელდეს სასამართლოს მიერ ბავშვთან დაკავშირებით ნებისმიერი გადაწყვეტილების მიღებისას. საკანონმდებლო ცვლილებების შემუშავებისას გათვალისწინებული უნდა იქნეს სამოქალაქო კოდექსით ბავშვის ფუნდამენტური მატერიალური უფლების აღიარება მისი საუკეთესო ინტერესების შეფასებასა და უპირატესად გათვალისწინებაზე მასთან დაკავშირებით ნებისმიერი გადაწყვეტილების მიღებისას. კანონში ყურადღება უნდა გამახვილდეს, რომ ამ უფლების დარღვევა ექვემდებარება სასამართლოში გასაჩივრებას.

ა.ბ) საუკეთესო ინტერესების უპირატესად გათვალისწინება, როგორც საპროცესო ნორმა

სამოქალაქო საპროცესო კოდექსი ადგენს, რომ 7-დან 18 წლამდე არასრულწლოვანთა უფლებებსა და კანონით დაცულ ინტერესებს სასამართლოში იცავენ მათი მშობლები ან მზრუნველები. ამასთანავე, სასამართლო ვალდებულია ასეთ საქმეებში ჩააბას თვით არასრულწლოვნებიც⁴⁹. მცირეწლოვნის უფლებებსა და კანონით დაცულ ინტერესებს სასამართლოში იცავს მისი კანონიერი წარმომადგენელი. სასამართლო უფლებამოსილია მცირეწლოვანიც ჩააბას⁵⁰.

კოდექსი ადგენს, რომ სასამართლოს საბოლოო გადაწყვეტილების სამოტივაციო ნაწილში უნდა აღინიშნოს სამართლებრივი შეფასება და კანონები, რომლებითაც სასამართლო ხელმძღვანელობდა⁵¹. სასამართლოს შეუძლია მხარეთა შუამდგომლობის საფუძველზე, ბავშვთან დაკავშირებით მიიღოს შუალედური გადაწყვეტილება საოჯახო დავების დროს მშობელთა მიერ ბავშვზე ზრუნვის, აღსაზრდელად გადაცემის, ბავშვთან ურთიერთობის და რჩენის საკითხებზე⁵².

სამოქალაქო საპროცესო კოდექსი არ ადგენს სპეციფიკურ საპროცესო გარანტიებს და ბავშვთან დაკავშირებით მიღებული სასამართლო გადაწყვეტილების სათანადოდ დასაბუთების წესს.

აქედან გამომდინარე, რეკომენდებულია საკანონმდებლო ცვლილებების განხორციელებისას ყურადღება გამახვილდეს ბავშვთა მონაწილეობით სამოქალაქო საქმეთა წარმოების დროს ისეთი პროცესუალური გარანტიების დადგენაზე, როგორცაა: მოსამართლის მიერ ბავშვთან დაკავშირებით ფაქტების დადგენა და გაანალიზება მისი საუკეთესო ინტერესების დასადგენად მულტიდისციპლინური მიდგომით, საჭიროებისამებრ, სხვადასხვა სპეციალისტების მონაწილეობით; გადაწყვეტილებათა მიღების დროულობა და მისი გადასინჯვის შესაძლებლობა ბავშვის ზრდადი განვითარების გათვალისწინებით; გადაწყვეტილებათა დასაბუთების ვალდებულება ბავშვის საუკეთესო ინტერესების უპირატესი გათვალისწინების შესახებ. რაც შეეხება

⁴⁸ მუხ. 1272

⁴⁹ მუხ. 81.3

⁵⁰ მუხ. 81.4

⁵¹ სამოქალაქო საპროცესო კოდექსი, მუხ. 249.4

⁵² მუხ. 355

გადაწყვეტილების დასაბუთებას, მასში უნდა იქნას ახსნილი, რა იქნა მიჩნეული ბავშვის საუკეთესო ინტერესებად; რა კრიტერიუმებს დაეფუძნა ასეთი მსჯელობა; და როგორ იქნა დადგენილი ბავშვის საუკეთესო ინტერესები სხვა პირთა ან უწყებათა ინტერესებთან მიმართებაში.

ბ) ბავშვის საუკეთესო ინტერესების უპირატესი გათვალისწინება ადმინისტრაციული ორგანოების მიერ

ზოგადი ადმინისტრაციული კოდექსი, რომელიც განსაზღვრავს ადმინისტრაციული ორგანოების მიერ ადმინისტრაციულ-სამართლებრივი აქტის გამოცემის და აღსრულების, ადმინისტრაციული საჩივრის და განცხადების განხილვის წესს, მიზნად ისახავს უზრუნველყოს ადმინისტრაციული ორგანოების მიერ ადამიანის უფლებებისა და თავისუფლებების დაცვა⁵³. კოდექსის რეგულირების სფეროში ექცევა ადმინისტრაციული ორგანოების მიერ ბავშვებთან დაკავშირებით გადაწყვეტილების მიღება ისეთ საკითხებზე, როგორცაა: ალტერნატიულ ზრუნვაში განთავსება, ანტისოციალური ქცევის დროს გადამისამართების ღონისძიება, ძალადობისგან ბავშვის დაცვა და სხვა საკითხები. თუმცა კოდექსი არ ასახავს ბავშვის უფლებას მისი საუკეთესო ინტერესების უპირატესად გათვალისწინებაზე ადმინისტრაციულ ორგანოს მიერ გადაწყვეტილების მიღებისას.

რეკომენდებულია ზოგადმა ადმინისტრაციულმა კოდექსმა აღიაროს ბავშვის ფუნდამენტური უფლება მისი საუკეთესო ინტერესების შეფასებასა და უპირატესად გათვალისწინებაზე ადმინისტრაციული ორგანოს მიერ მასთან დაკავშირებით ნებისმიერი გადაწყვეტილების მიღებისას. კანონში ყურადღება უნდა გამახვილდეს, რომ ამ უფლების დარღვევა ექვემდებარება სასამართლოში გასაჩივრებას.

სოციალური დახმარება და ალტერნატიული ზრუნვა

გაეროს ბავშვის უფლებათა კომიტეტი მიუთითებს⁵⁴ „გაეროს ბავშვთა ალტერნატიული ზრუნვის სტანდარტებზე“⁵⁵ მიზნად ისახავს უზრუნველყოს ბავშვთა ალტერნატიულ ზრუნვაში განთავსების თავიდან არიდება, გარდა აუცილებელი შემთხვევისა. კონკრეტულად, „ფინანსური და მატერიალური სიღარიბე ან სხვა პირობები, რომლებიც პირდაპირ ან ერთმნიშვნელოვნად ახასიათებს სიღარიბეს, არავითარ შემთხვევაში არ შეიძლება გახდეს ბავშვის ოჯახიდან განცალკევების ერთადერთი საფუძველი... არამედ, ეს პირობები უნდა იყოს აღქმული სიგნალად, რომელიც გვანიშნებს ამ ოჯახის მხარდაჭერის საჭიროებაზე“.

კანონი სოციალური დახმარების შესახებ აწესრიგებს საქართველოს ტერიტორიაზე სოციალური დახმარების მიღებასთან დაკავშირებულ ურთიერთობებს, განსაზღვრავს უფლებამოსილ ადმინისტრაციულ ორგანოებს, ადგენს სოციალური დახმარების სახეებსა და მისი დანიშვნის ძირითად პრინციპებს⁵⁶. ეს კანონი მხოლოდ ერთგან მოიხსენიებს ბავშვის საუკეთესო ინტერესებს, კერძოდ, რეინტეგრაციის შემწეობის ხელშეკრულების პირობების დარღვევისას ბიოლოგიური ოჯახი კარგავს ფულადი დახმარების მიღების უფლებას, ხოლო რეინტეგრირებული ბავშვის საკითხი წყდება მისი ინტერესების უპირატესი დაცვით⁵⁷.

⁵³ ზოგადი ადმინისტრაციული კოდექსი, მუხ. 1 (1,2)

⁵⁴ კომიტეტის ზოგადი კომენტარი #14 ბავშვის საუკეთესო ინტერესების უპირატესობის შესახებ (2013), პარა. 62

⁵⁵ გაეროს გენერალური ასამბლეის რეზოლუცია 64/142, პარა. 15

⁵⁶ მუხ. 1.2

⁵⁷ მუხ. 21 (3)

კანონის თანახმად, სპეციალიზებულ დაწესებულებაში, გარდა პანსიონისა, ბავშვის მოთავსების შესახებ გადაწყვეტილებას იღებს მეურვეობისა და მზრუნველობის ორგანო⁵⁸. ბავშვის მოთავსება დაწესებულებაში ხდება დაინტერესებული პირის განცხადების საფუძველზე, რომელიც შეიძლება იყოს თავად მოთავსების მსურველი ან მისი ოჯახის წევრი, მეურვეობის და მზრუნველობის ორგანო ან სასამართლო⁵⁹.

კანონი არ ასახავს ბავშვის საუკეთესო ინტერესების უპირატესი გათვალისწინების პრინციპს სოციალური დახმარების დანიშვნის და სპეციალიზებულ დაწესებულებაში ბავშვის მოთავსების შესახებ გადაწყვეტილების მიღებისას.

კანონი სააღმზრდელო საქმიანობის ლიცენზირების შესახებ განსაზღვრავს სააღმზრდელო საქმიანობის ლიცენზიის გაცემის პირობებს და გაცემაზე უფლებამოსილ ორგანოს. ეს კანონი ვრცელდება ყველა სახის სააღმზრდელო საქმიანობაზე, გარდა მინდობით აღზრდისა, განათლების სამინისტროს მიერ დაფუძნებული სკოლა-პანსიონისა და ისეთი დაწესებულებისა, სადაც ბავშვი იმყოფება წელიწადში არაუმეტეს 3 თვისა⁶⁰. ერთ-ერთი სალიცენზიო მოთხოვნაა მთავრობის მიერ დადგენილი ბავშვზე ზრუნვის სტანდარტების დაკმაყოფილება⁶¹. ესაა რეგლამენტი რომელიც, თავის მხრივ, ავალდებულებს ალტერნატიული ზრუნვის სერვისის მომწოდებელს დაიცვას შემდეგი სტანდარტები: ინფორმაციის ხელმისაწვდომობა მომსახურების შესახებ, მომსახურების ინკლუზიურობა, კონფიდენციალობის დაცვა, ინდივიდუალური მიდგომა, ემოციური და სოციალური განვითარება, კვება, დასვენების და გაჯანსაღების შესაძლებლობა, განათლება, ჯანდაცვა, უკუკავშირის და გაპროტესტების პროცედურები, ძალადობისგან დაცვა, ზრუნვა და მეთვალყურეობა, დამოუკიდებელი ცხოვრებისთვის მზადება, გარემო, სანიტარული მდგომარეობა, პერსონალის კვალიფიკაცია.

აღსანიშნავია, რომ ეს კანონი არსად მოიხსენიებს სააღმზრდელო საქმიანობის განხორციელების პრინციპებს, მათ შორის, ბავშვის საუკეთესო ინტერესების უპირატესი გათვალისწინების ვალდებულებას. მთავრობის დადგენილება ბავშვზე ზრუნვის სტანდარტების შესახებ, ასევე, არ ასახავს ბავშვის უფლებების დაცვის ამ ფუძემდებლურ პრინციპს სხვა ისეთ პრინციპებთან ერთად, როგორცაა მოსმენის და აზრის გათვალისწინების უფლება, დისკრიმინაციის დაუშვებლობა, და სხვა.

ზემოთაღნიშნულიდან გამომდინარე, მნიშვნელოვანია საკანონმდებლო ცვლილებების შემუშავებისას გათვალისწინებული იქნეს შემდეგი საკითხები: განხილული კანონების ხარვეზების შევსება ალტერნატიულ ზრუნვაში ბავშვის მოთავსების პრინციპების ასახვით (ალტერნატიულ ზრუნვაში განთავსება, როგორც უკიდურესი საშუალება; ბავშვის და ოჯახის მდგომარეობის მულტიდისციპლინური შეფასება; ზრუნვის სათანადო ფორმის შერჩევა ბავშვის საუკეთესო ინტერესების შესაბამისად; რეგულარული მონიტორინგის სისტემას; და სხვა).

საკანონმდებლო ცვლილებებმა უნდა მოიცვას, აგრეთვე, სააღმზრდელო საქმიანობის ლიცენზირების შესახებ კანონში (ან ახალი კანონის მიღება) სკოლა-პანსიონის ლიცენზირების რეგულირება (სპეციფიკური საკითხია, რადგან მოიცავს საგანამანთლებლო და სააღმზრდელო კომპონენტს), ყველა სააღმზრდელო დაწესებულების რეგულარული მონიტორინგი სტანდარტებთან შესაბამისობის, ბავშვთა მდგომარეობის შემოწმების და სერვისების გაუმჯობესების მიზნით.

⁵⁸ მუხ. 14 (1,2)

⁵⁹ მუხ. 14 (4)

⁶⁰ მუხ. 1

⁶¹ მუხ. 6.3 (ვ)

ბ.ა) სასამართლოს მიერ ადმინისტრაციული სამართალწარმოების პროცესში

ადმინისტრაციული სამართალწარმოების წესით განიხილება ადმინისტრაციული დავები ადმინისტრაციული ორგანოს გადაწყვეტილებების კანონიერების, ადმინისტრაციული ორგანოს მიერ ზიანის ანაზღაურების, ადმინისტრაციულ-სამართლებრივი აქტის გამოცემის ან სხვა ქმედების განხორციელების თაობაზე. ამის გარდა, ადმინისტრაციული სამართალწარმოების წესით განიხილება საქმეები, რომლებიც გამომდინარეობს ადმინისტრაციული სამართლის კანონმდებლობიდან. ადმინისტრაციული წესით განიხილება, აგრეთვე, არანებაყოფლობითი ფსიქიატრიული დახმარების მიზნით პირის სტაციონარში მოთავსების და ტუბერკულოზის კონტროლის შესახებ კანონის თანახმად, პირის ანარებაყოფლობითი იზოლაციის საქმე⁶². განსაკუთრებით აღსანიშნავია, რომ ადმინისტრაციულ სამართალწარმოებას ექვემდებარება ისეთი საკითხები, როგორცაა: ძალადობისგან ბავშვის დაცვა, არანებაყოფლობითი ფსიქიატრიული დახმარება, ანტისოციალური ქცევის მქონე ბავშვის მიმართ გადამისამართების ღონისძიების გამოყენება (მათ შორის, სკოლა პანსიონში გაგზავნა), უცხოელის საქართველოდან გაძევების საკითხი და სხვა.

ადმინისტრაციული საპროცესო კოდექსი მხოლოდ ძალადობისგან ბავშვის დაცვის საქმის წარმოებასთან დაკავშირებით მიუთითებს, რომ ძალადობისგან დაცვის ღონისძიებათა შესახებ ადმინისტრაციული სამართალწარმოების ყველა ეტაპზე, მათ შორის, არასრულწლოვნის დაკითხვისას გათვალისწინებული უნდა იქნეს არასრულწლოვნის „საუკეთესო ინტერესები მისი ასაკისა და განვითარების დონის შესაბამისად“⁶³. კოდექსი არ მოიცავს სასამართლოს მიერ ბავშვის საუკეთესო ინტერესების შეფასების და განსაზღვრის ვალდებულებას ბავშვთან დაკავშირებით ნებისმიერი გადაწყვეტილების მიღებისას და გადაწყვეტილებათა სათანადო დასაბუთების საკითხს.

შესაბამისად, რეკომენდებულია გადაიხედოს ადმინისტრაციული საპროცესო კოდექსი იმ მიზნით, რომ ბავშვის საუკეთესო ინტერესების უპირატესი გათვალისწინების შეფასების და განსაზღვრის ვალდებულება გავრცელდეს ბავშვთან დაკავშირებით არა მხოლოდ ცალკეულ, არამედ ნებისმიერ საკითხზე გადაწყვეტილების მიღებისას.

გ) ბავშვის საუკეთესო ინტერესების გათვალისწინება სხვა სფეროს მარეგულირებელი კანონებით

ადგილობრივი თვითმმართველობის კოდექსი ადგენს მუნიციპალიტეტის საკუთარ უფლებამოსილებებს, რომელთა ის ახორციელებს დამოუკიდებლად და საკუთარი პასუხისმგებლობით⁶⁴. მუნიციპალიტეტის საკუთარ უფლებამოსილებებს შორის მითითებულია: სათანადო ინფრასტრუქტურის განვითარება, მათ შორის, საჯარო თავშეყრის ადგილებისა და მუნიციპალური ტრანსპორტის სათანადოდ ადაპტირება და აღჭურვა ბავშვებისათვის, ასევე, შესაბამისი ღონისძიებების განხორციელება სოციალური დახმარების, ახალგაზრდული პოლიტიკის განვითარების ხელშეწყობის, ოჯახში ძალადობის პრევენციის, ოჯახში ძალადობის მსხვერპლთა დაცვისა და დახმარების, ჯანმრთელობისთვის უსაფრთხო გარემოს შექმნის მიზნით, ასევე, უფლებამოსილია გადაწყვიტოს ნებისმიერი სხვა საკითხი, რაც ხელისუფლების სხვა ორგანოს უფლებამოსილება არ არის და აკრძალული არაა კანონით⁶⁵.

⁶² ადმინისტრაციული საპროცესო კოდექსი

⁶³ მუხ. 21¹² (3)

⁶⁴ მუხ. 15.2

⁶⁵ მუხ. 16.2 „უ“, 3, 4

კოდექსი არ მიუთითებს ვალდებულებებზე, როგორცაა ყველა გადაწყვეტილების მიღებისას ბავშვის, ბავშვთა ჯგუფის ან ზოგადად ბავშვთა პოპულაციის საუკეთესო ინტერესების უპირატესი გათვალისწინება. გამომდინარე იქედან, რომ ამ პრინციპის აღიარება არ წარმოადგენს მხოლოდ ბავშვის უფლებების მიმართ პატივისცემის გამოხატვას, არამედ თავისთავში მოიცავს მისი განხორციელების კონკრეტულ მექანიზმებს, როგორცაა ბავშვის ან ბავშვთა ჯგუფის ინტერესების შეფასება ყველა სხვა უფლებების გათვალისწინებით, ბავშვთა მოსმენა და მათი მოსაზრებების სათანადოდ გათვალისწინება და საბოლოოდ მათ საუკეთესო ინტერესებთან ყველაზე შესაბამისი გადაწყვეტილების მიღება სათანადო დასაბუთებით. კოდექსი ასევე არ ითვალისწინებს ადგილობრივი თვითმმართველობის განხორციელებისას ბავშვთა მონაწილეობის პრინციპს. აქედან გამომდინარე, მნიშვნელოვანია განხორციელდეს შესაბამისი საკანონმდებლო ცვლილებები, რომლებიც გააუმჯობესებს ბავშვთა ინტერესების გათვალისწინებას და დაცვას ადგილობრივი ხელისუფლების მიერ.

კანონი ბინათმესაკუთრეთა ამხანაგობის შესახებ მიუთითებს, რომ ბინათმესაკუთრეთა ამხანაგობის არასრულწლოვან წევრთა ინტერესებს წარმოადგენენ მათი კანონიერი წარმომადგენლები. ქმედებანი არასრულწლოვანთა სახელით ხორციელდება კანონმდებლობის შესაბამისად⁶⁶. კანონი არ მოიცავს სხვა რაიმე მითითებას ამხანაგობის მიერ გადაწყვეტილების მიღებისას ბავშვთა მონაწილეობის, მათი საუკეთესო ინტერესების და უფლებების შესახებ. მნიშვნელოვანია ბავშვის აზრის მოსმენის და სერიოზული მნიშვნელობის მინიჭების პრინციპი, როგორც საუკეთესო ინტერესების გათვალისწინების შემადგენელი ნაწილი, უზრუნველყოფა მოხდეს ყველა დონეზე, პირველ რიგში, ოჯახსა და საცხოვრებელ გარემოში.

კანონი გარემოს დაცვის შესახებ ძირითად მიზნებს შორის მიუთითებს სახელმწიფოს მიერ გარემოს დაცვის და რაციონალური ბუნებათსარგებლობის უზრუნველყოფას „მომავალი თაობების ინტერესების“ გათვალისწინებით⁶⁷. სხვა მხრივ, არცერთი სხვა დებულება არ ეხება გარემოს დაცვის საკითხების დაგეგმვის და გადაწყვეტის დროს ბავშვთა უფლებების და საუკეთესო ინტერესების უპირატესი გათვალისწინების პრინციპს.

3.2.2. ბავშვის უფლება მონაწილეობაზე

ბავშვის უფლებათა კონვენცია მოითხოვს, სახელმწიფომ უზრუნველყოს ბავშვის მიერ, მასთან დაკავშირებულ საკითხებზე, მოსაზრებების თავისუფლად გამოხატვის უფლება, როდესაც ბავშვს შეუძლია ჩამოაყალიბოს საკუთარი მოსაზრებები, რომლებსაც უნდა მიენიჭოს სათანადო მნიშვნელობა ბავშვის ასაკისა და განვითარების შესაბამისად. ბავშვს უნდა მოუსმინონ მასთან დაკავშირებულ ნებისმიერ სასამართლო და ადმინისტრაციულ პროცესში, პირდაპირ ან წარმომადგენლის ან შესაბამისი დაწესებულების მეშვეობით, ეროვნული საპროცესო კანონმდებლობით დადგენილი წესით⁶⁸.

კონვენცია სახელმწიფოს აკისრებს ვალდებულებას უზრუნველყოს ბავშვის მონაწილეობის უფლების აღსრულება მისი მოსმენით და მისი მოსაზრებებისთვის სათანადო მნიშვნელობის მინიჭებით, რაც გარანტირებული უნდა იყოს ეროვნული

⁶⁶ მუხ. 19.4
⁶⁷ მუხ. 3.1
⁶⁸ მუხ. 12

კანონმდებლობით⁶⁹. ყველა პროცესი, რომელშიც ბავშვები მონაწილეობენ და ხდება მათი მოსმენა, აუცილებლად უნდა იყოს⁷⁰: ინფორმატიული, ნებაყოფლობითი, პატივისცემით განწყობილი, ბავშვზე მორგებული, ინკლუზიური, ბავშვის საკითხებზე გადამზადებული პროფესიონალების მიერ, უსაფრთხო, ბავშვისადმი ანგარიშვალდებული.

ევროპის საბჭოს მინისტრთა კომიტეტის სახელმძღვანელო პრინციპები⁷¹ მიუთითებს სახელმწიფოებს:

- მოსამართლეებმა უნდა დაიცვან ბავშვის უფლება მოსმენაზე ყველა საკითხზე, რომელიც მას ეხება. მოსმენის დროს გამოყენებული უნდა იქნეს ბავშვის აღქმის დონისა და კომუნიკაციის შესაძლებლობებთან შესაბამისი საშუალებები საქმის გარემოებების გათვალისწინებით. ბავშვებს უნდა ჰქონთ, თუ რა ფორმით ურჩევნიათ ამ უფლების განხორციელება. ბავშვის მოსაზრებებს და შეხედულებას უნდა მიენიჭოს სათანადო მნიშვნელობა მისი ასაკისა და განვითარების დონის შესაბამისად;
- მხოლოდ ასაკის გამო ბავშვს არ უნდა წაერთვას შესაძლებლობა მოუსმინონ. როდესაც კი ბავშვი გაბოიჩენს ინიციატივას მოუსმინონ მას მასთან დაკავშირებულ საქმეზე, მოსამართლემ არ უნდა უარყოს და უნდა მოუსმინოს მის მოსაზრებებს, თუ ეს არ ეწინააღმდეგება ბავშვის საუკეთესო ინტერესებს.

ა) ბავშვის მონაწილეობის უფლება ოჯახში

მშობელთა უფლება-მოვალეობების შესახებ, კონვენცია ხაზგასმით აღნიშნავს, რომ სახელმწიფომ უნდა აღიაროს მშობელთა ვალდებულება ბავშვს, მისი განვითარების შესაძლებლობების გათვალისწინებით, მიაწოდოს სათანადო მითითებები და რჩევა-დარიგება საკუთარი უფლებების თავადვე განხორციელების შესახებ. ბავშვის აღზრდა-განვითარებისას მშობელთა ძირითადი საზრუნავი უნდა იყოს ბავშვის საუკეთესო ინტერესები⁷². კომიტეტი მიუთითებს, რომ მშობელთა მიერ ბავშვის აღზრდისას მისი საუკეთესო ინტერესების განმარტება უნდა შეესაბამებოდეს კონვენციას მთლიანობაში, მათ შორის, ძალადობისგან ბავშვის დაცვის და ბავშვის მოსაზრებების მოსმენის კუთხით. საუკეთესო ინტერესებით არ შეიძლება გამართლდეს ფიზიკური დასჯის პრაქტიკა ან სხვა სახის სასტიკი ან დამამცირებელი სასჯელი, რაც ეწინააღმდეგება ბავშვის ღირსებას და ფიზიკურ მთლიანობას. იგივე ითქმის, კონვენციის მე-5 მუხლზეც, რომელიც მოითხოვს, რომ მშობლებმა სათანადო მითითებები და რჩევა-დარიგებები მიაწოდონ ბავშვებს. ტერმინის „სათანადო“ განმარტება არ ტოვებს არანაირ სივრცეს დისციპლინის ძალადობრივი ფორმებისთვის⁷³.

კომიტეტი მიუთითებს⁷⁴, რომ სახელმწიფოს კანონმდებლობა და პოლიტიკის დოკუმენტები უნდა ითვალისწინებდეს მშობლების, მეურვეებისა და მზრუნველების მიერ ბავშვის მოსმენას და მათი მოსაზრებებისთვის სათანადო მნიშვნელობის მინიჭებას ბავშვთან დაკავშირებულ საკითხებზე. მშობლებს უნდა გაეწიოთ შესაბამისი კონსულტაცია, რათა ბავშვებს მხარი დაუჭირონ მოსმენის და მოსაზრებების გათვალისწინების უფლების განხორციელებაში.

⁶⁹ ზოგადი კომენტარი #12, პარა. 15

⁷⁰ ზოგადი კომენტარი #12, პარა. 132-134, გვ. 29

⁷¹ ევროპის საბჭოს მინისტრთა კომიტეტის სახელმძღვანელო პრინციპები, 44-47, გვ. 28

⁷² მუხ. 5 და მუხ. 18.1

⁷³ ზოგადი კომენტარი #8, პარა. 26 და 28

⁷⁴ ზოგადი კომენტარი #12, პარა. 90-96, გვ. 21

საქართველოს სამოქალაქო კოდექსით რეგულირდება საოჯახო ურთიერთობები. კოდექსი ადგენს, რომ შვილების მიმართ მშობლებს თანაბარი უფლება-მოვალეობები აქვთ. ბავშვს აქვს უფლება ცხოვრობდეს და იზრდებოდეს ოჯახში⁷⁵. დაუშვებელია არასრულწლოვანი ბავშვის აღზრდისას მშობლის/კანონიერი წარმომადგენლის მიერ აღზრდის ისეთი მეთოდების გამოყენება, რომლებიც არასრულწლოვანის ფიზიკურ ან/და ფსიქიკურ ტანჯვას იწვევს⁷⁶.

მნიშვნელოვანია აღინიშნოს, რომ სამოქალაქო კოდექსით დადგენილი დებულება ბავშვის მშობელთა თანაბარი მონაწილეობის შესახებ შესაბამისობაშია კონვენციის მოთხოვნასთან⁷⁷, თუმცა არ ასახავს არ მოიცავს მშობელთა პასუხისმგებლობას გაამლიერონ ბავშვი, მისი განვითარების შესაძლებლობების შესაბამისად, სათანადო მითითებების და რჩევა-დარიგების მიწოდების გზით, რათა ბავშვმა მონაწილეობა მიიღოს მასთან დაკავშირებული გადაწყვეტილებების მიღებაში და საბოლოოდ თავადვე შეძლოს საკუთარი უფლებების განხორციელება. მნიშვნელოვანია, ასევე, აღზრდის მტანჯველი მეთოდების გამოყენების აკრძალვა, თუმცა არასაკმარისია დღეს არსებული სოციალურ-კულტურული კონტექსტის პირობებში ბავშვთა ფიზიკური დასჯის პრაქტიკის აღმოსაფხვრელად⁷⁸.

აქედან გამომდინარე, რეკომენდირებულია სამოქალაქო კოდექსი შესაბამისობაში მოვიდეს მშობელთა უფლება-მოვალეობების და ოჯახში ბავშვის უფლებების შესახებ ბავშვის უფლებათა კონვენციასთან⁷⁹ და სამოქალაქო კოდექსში გაფართოვდეს მშობლის უფლება-მოვალეობები ბავშვის უფლებრივი გაძლიერების კუთხით. ამავე დროს, რეკომენდირებულია პირდაპირ აკრძალოს ბავშვის მიმართ ფიზიკური დასჯის ან სხვა სასტიკი ან/და დამამცირებელი მოპყრობის ან/და სასჯელის გამოყენება.

52 ქვეყანაში უკვე კანონით პირდაპირ აკრძალულია ბავშვთა ფიზიკური დასჯა. საინტერესოა რამდენიმე ქვეყნის მაგალითი თვალსაჩინოებისთვის⁸⁰:

ფინეთი⁸¹

„ბავშვი უნდა აღიზარდოს ურთიერთგაგების, უსაფრთხოების და სიყვარულის გარემოცვაში. დაუშვებელია მისი დამცირება, ფიზიკურად დასჯა ან სხვაგვარად შეურაცხყოფა. მშობლებმა და სხვა მზრუნველებმა უნდა წახალისონ, მხარი დაუჭიროონ და ხელი შეუწყონ მის დამოუკიდებელ, პასუხისმგებლობის გრძნობით აღჭურვილ და მოწიფულ პიროვნებად განვითარებას“.

შვედეთი⁸²

„ბავშვებს უფლება აქვთ ზრუნვაზე, უსაფრთხოებასა და კარგ აღზრდაზე. ბავშვის მიმართ მოპყრობა უნდა ეფუძნებოდეს მისი პიროვნებისა და ინდივიდუალობის პატივისცემას და დაუშვებელია მის მიმართ ფიზიკური დასჯის ან სხვა დამამცირებელი სასჯელის გამოყენება“.

⁷⁵ მუხ. 1197

⁷⁶ მუხ. 1198.1¹

⁷⁷ ბავშვის უფლებათა კონვენცია, მუხ. 18.1

⁷⁸ იხ. გაეროს ბავშვთა ფონდის კვლევა ბავშვთა მიმართ ძალადობის შესახებ საქართველოში http://unicef.ge/uploads/Unicef_VAC_GEO_Final3_02_09.pdf

⁷⁹ კონვენციის მე-5 და მე-19 მუხლები

⁸⁰ <http://www.endcorporalpunishment.org/>

⁸¹ „აქტი ბავშვზე ზრუნვისა და უფლებების შესახებ“ ცვლილება 1983წ; მუხ. 1 (3)

⁸² კოდექსი მშობელთა უფლება-მოვალეობებისა და მეურვეობის შესახებ, ცვლილება 1979წ. მუხ. 1

კოსტა-რიკა⁸³

„ბავშვებსა და ახალგაზრდებს უფლება აქვთ მიიღონ რჩევები, განათლება, ზრუნვა და დისციპლინური მითითებები თავიანთი დედის, მამის ან მასწავლებლის, ასევე სხვა მზრუნველების ან საგანმანათლებლო და ჯანდაცვის ცენტრების პერსონალის, თავშესაფრის, დაკავების დაწესებულების ან სხვა ტიპის დაწესებულების პერსონალისგან, რაც არცერთ შემთხვევაში არ მოიცავს ამ პირებისგან ფიზიკური დასჯის ან სხვა სახის დამამცირებელი მოპყრობის დაშვებას“.

ბ) ბავშვის მოსმენა და მისი მოსაზრებების სათანადოდ გათვალისწინება სამოქალაქო სამართალწარმოების დროს

სამოქალაქო საპროცესო კოდექსი ადგენს, რომ 7-დან 18 წლამდე არასრულწლოვანთა უფლებებსა და კანონით დაცულ ინტერესებს სასამართლოში იცავენ მათი მშობლები ან მზრუნველები. ამასთანავე, სასამართლო ვალდებულია ასეთ საქმეებში ჩააბას თვით არასრულწლოვნებიც⁸⁴. მცირეწლოვნის უფლებებსა და კანონით დაცულ ინტერესებს სასამართლოში იცავს მისი კანონიერი წარმომადგენელი. სასამართლო უფლებამოსილია მცირეწლოვანიც ჩააბას პროცესში⁸⁵. არამართლზომიერად გადაადგილებული ან დაკავებული ბავშვის საქმეზე, სასამართლომ უნდა მოუსმინოს ბავშვს, თუ მისი ასაკი, ფიზიკური და ფსიქიკური მდგომარეობა ამის შესაძლებლობას იძლევა. ბავშვის მოსმენა უნდა განხორციელდეს საქართველოს კანონმდებლობით დადგენილი წესით და მას უნდა დაესწროს ექსპერტი ან/და სოციალური მუშაკი⁸⁶.

კოდექსი არ გვაწვდის განმარტებას ან სხვა რაიმე მითითებას ბავშვის უფლებაზე მისი მოსაზრების მოსმენასა და სათანადოდ გათვალისწინებაზე. ამავე დროს, არცერთ მუხლში არაა განმარტებული, თუ რას გულისხმობს „საქმეში ჩაბმა“. შესაბამისად, ამ საკითხის განმარტება და გადაწყვეტა პრაქტიკაში დამოკიდებულია ინდივიდუალურ მოსამართლეზე, რაც ვერ უზრუნველყოფს ბავშვის უშუალოდ მოსმენის და მისი მოსაზრებების სათანადოდ გათვალისწინების უფლებას კონვენციით აღიარებული შინაარსით.

შესაბამისად, რეკომენდირებულია კოდექსმა ასახოს, რომ ყველა ბავშვს აქვს უფლება მოსმენასა და მონაწილეობაზე მისი ასაკისა და განვითარების შესაბამისად. ტერმინი „ასაკისა და განვითარების“ შესაბამისად უნდა განიმარტოს, როგორც სახელმწიფოს ვალდებულება ნებისმიერ ბავშვს მოუსმინოს და ამისათვის გამოიყენოს ყველა შესაბამისი საკომუნიკაციო თუ სხვა დამხმარე საშუალება. ამ ტერმინის განმარტება არასწორია იმ გაგებით, თითქოს პატარა ასაკის ბავშვის მოსმენა არაა სავალდებულო, რადგან მას ვერბალურად არ შეუძლია გამართულად გადმოსცეს თავისი მოსაზრება. მითითება იმაზე, რომ სასამართლო ბავშვს მოუსმენს, „თუ მისი ასაკი, ფიზიკური და ფსიქიკური მდგომარეობა ამის საშუალებას იძლევა“ ფაქტობრივად მოსმენის უფლებას უზღუდავს მცირეწლოვან და შშმ ბავშვებს, ხოლო სხვა ბავშვებთან მიმართებაშიც არ ქმნის მათი მოსმენის გარანტიას. ბავშვს უნდა მოუსმინონ ყოველთვის, როდესაც მას სურს აზრის გამოთქმა. „სახელმწიფომ უნდა უზრუნველყოს თუნდაც მცირე ასაკის ბავშვთა დამოუკიდებელი წარმომადგენლობა ყველა სამართლებრივ პროცესში და მათი მოსმენა

⁸³ კოდექსი ბავშვებისა და ახალგაზრდების უფლებების შესახებ, ცვლილება 2008წ. მუხ. 24

⁸⁴ მუხ. 81.3

⁸⁵ მუხ. 81.4

⁸⁶ 351¹³

ნებისმიერ საკითხზე, რომელიც მათ ეხებათ”⁸⁷. ბავშვის უფლება მისი აზრის მოსმენასა და სათანადოდ გათვალისწინებაზე მისი ასაკისა და განვითარების შესაბამისი საშუალებებით უნდა აისახოს არა მხოლოდ რომელიმე კონკრეტულ საკითხთან დაკავშირებით, არამედ ბავშვთან დაკავშირებით ნებისმიერი საკითხის განხილვისას. ამავე დროს, კოდექსმა უნდა დაადგინოს დამატებითი საპროცესო გარანტიები, რათა ბავშვის მოსაზრებების მოსმენა იყოს ინფორმატიული, ნებაყოფლობითი, პატივისცემით განწყობილი, ბავშვზე მორგებული, ინკლუზიური, ბავშვის საკითხებზე გადამზადებული პროფესიონალების მიერ, უსაფრთხო, ბავშვისადმი ანგარიშვალდებული.

გ) ბავშვის მოსმენა ადმინისტრაციული ორგანოების და სასამართლოს მიერ ადმინისტრაციული სამართალწარმოების პროცესში

როგორც ზემოთ აღინიშნა (იხ. 3.2.1 „ბ“, „ბ.ა“) ადმინისტრაციული ორგანოების მიერ განხილვას ექვემდებარება მთელი რიგი მნიშვნელოვანია საკითხებისა ბავშვთა მიმართ, მათ შორისაა, ანტისოციალური ქცევის მქონე ბავშვთა გადამისამართების ღონისძიებების, ალტერნატიულ ზრუნვაში მოთავსების, არანებაყოფლობითი ფსიქიატრიული მკურნალობის, უცხოელის გაძევების და სხვა საკითხებზე. ზოგადი წესით, ადმინისტრაციული ორგანოს მიერ მიღებული გადაწყვეტილებები ექვემდებარება ზემდგომ ადმინისტრაციულ ორგანოში და შემდეგ - სასამართლოში გასაჩივრებას⁸⁸.

ზოგადი ადმინისტრაციული კოდექსი ადმინისტრაციულ წარმოებაში მონაწილეობისთვის იყენებს სამოქალაქო კოდექსით დადგენილ ნორმებს სამართლებრივი ქმედუნარიანობის შესახებ⁸⁹, რომლის მიხედვითაც 7 წლამდე ბავშვი ქმედუნაროდ ითვლება, ხოლო 7-18 წლამდე ბავშვის მესამე პირებთან ურთიერთობაში წარმოადგენს მისი კანონიერი წარმომადგენელი. კოდექსი არ მიუთითებს ბავშვის უფლებაზე მისი მოსაზრებების მოსმენის და სათანადოდ გათვალისწინების შესახებ, თუ საკითხი ეხება ბავშვის ან ბავშვთა ჯგუფის უფლებებს. იგივე ითქმის **ადმინისტრაციულ საპროცესო კოდექსზეც, რომელიც** ადგენს ზოგად ნორმებს მონაწილეობის შესახებ, თუმცა არ ადგენს კონკრეტულ ნორმას ბავშვის უფლების შესახებ მოუსმინონ მას ნებისმიერ საკითხზე, რომელიც მის უფლებებს ეხება. მიუხედავად იმისა, რომ ზოგადი ნორმები, ამ მხრივ, არ გამორიცხავს ბავშვთა მონაწილეობას, პირდაპირი სამართლებრივი ნორმების დადგენის გარეშე ბავშვის ამ უფლების რეალიზება პრაქტიკაში ვერ იქნება უზრუნველყოფილი. მით უფრო, როდესაც ბავშვის მოსმენისთვის საჭიროა დამატებითი საპროცესო გარანტიები, როგორცაა სათანადო მხარდაჭერა სპეციალურად მომზადებული პროფესიონალების, შესაბამისი საკომუნიკაციო საშუალებებით და ბავშვზე მორგებული პროცედურების დაცვით. **რეკომენდირებულია, ზოგადი ადმინისტრაციული კოდექსით აღიარებული იქნეს ბავშვის მატერიალური უფლება მის მოსმენასა და მოსაზრებების სათანადოდ გათვალისწინებაზე, ხოლო ადმინისტრაციული საპროცესო კოდექსით დადგინდეს საპროცესო გარანტიები ამ უფლების განხორციელებისთვის ბავშვის ასაკისა და განვითარების შესაბამისი საშუალებებით კონვენციის შესაბამისად.**

3.2.3. დისკრიმინაციის აკრძალვა

⁸⁷ ზოგადი კომენტარი #7, პარა. 13. ა)

⁸⁸ ადმინისტრაციული საპროცესო კოდექსი, მუხ. 2

⁸⁹ იხ. ზოგადი ადმინისტრაციული კოდექსის 74-75-ე მუხლები და სამოქალაქო კოდექსის მე-12-16 მუხლები

ბავშვის უფლებათა კონვენციის მე-2 მუხლი ავალდებულებს მონაწილე სახელმწიფოებს პატივი სცენ და უზრუნველყონ კონვენციით აღიარებული უფლებები ყოველი ბავშვისთვის თავიანთი იურისდიქციის ფარგლებში, ყოველგვარი დისკრიმინაციის გარეშე.

შეზღუდული შესაძლებლობის მქონე პირთა კონვენცია⁹⁰ მოუწოდებს სახელმწიფოებს უზრუნველყონ შეზღუდული შესაძლებლობის მქონე პირთა თანაბარი და ეფექტური სამართლებრივი დაცვა ნებისმიერი დისკრიმინაციისგან. თანასწორობისა და დისკრიმინაციის აღმოფხვრის ხელშეწყობის მიზნით, კონვენცია ავალდებულებს სახელმწიფოებს, მიიღონ ყველა შესაბამისი ზომა, რათა უზრუნველყონ გონივრული მისადაგების გათვალისწინება.

ბავშვის უფლებათა კომიტეტი განმარტავს⁹¹, რომ დისკრიმინაციის აკრძალვის ვალდებულება სახელმწიფოსგან მოითხოვს აქტიურად გამოავლინოს ის ბავშვები და ბავშვთა ჯგუფები, რომელთა უფლებების აღიარებისა და რეალიზებისთვის განსაკუთრებული ზომების მიღებაა საჭირო. კერძოდ, კომიტეტი ხაზს უსვამს მრავალმხრივი (დისაგრეგირებული) მონაცემთა შეგროვების საჭიროებას, რათა გამოვლინდეს დისკრიმინაცია ან დისკრიმინაციის რისკები⁹².

ევროპის საბჭოს ჩარჩო კონვენცია ეროვნული უმცირესობების დაცვის შესახებ⁹³ მოუწოდებს წევრ სახელმწიფოებს ტოლერანტობისა და კულტურათაშორისი დიალოგის ხელშეწყობას, განსაკუთრებით, განათლების, კულტურის და მედიის მიმართულებით⁹⁴. სახელმწიფომ ხელი უნდა შეუწყოს კომუნიკაციას მასწავლებელთა და მოსწავლეთა შორის, მათ შორის, მასწავლებელთა გადამზადების და საინფორმაციო მასალის მიწოდების გზით⁹⁵.

ევროპის საბჭოს სახელმძღვანელო მითითებები⁹⁶ ხაზგასმით აღნიშნავს, რომ განსაკუთრებული ყურადღება უნდა მიექცეს მოწყვლად ჯგუფებს, როგორცაა: მიგრანტი, ლტოლვილი და თავშესაფრის მაძიებელი ბავშვები, ბავშვები თანმხლების გარეშე, შეზღუდული შესაძლებლობის მქონე ბავშვები, ქუჩაში მცხოვრები და უსახლკარო ბავშვები, ბოშა ბავშვები, ალტერნატიული ზრუნვის დაწესებულებებში მცხოვრები ბავშვები.⁹⁷ განსაკუთრებით აღსანიშნავია, რომ თანმხლების გარეშე მყოფ ბავშვებს, რომლებსაც არა აქვს ბინადრობის სტატუსი, არ უნდა აღეკვეთოთ თავისუფლება მიუხედავად იმისა, არიან თუ არა ისინი თავშესაფრის მაძიებელი.

ა) დისკრიმინაციის აკრძალვის საკანონმდებლო გარანტიები

⁹⁰ მუხ.5

⁹¹ ზოგადი კომენტარი #5 (2003) „ბავშვის უფლებათა კონვენციის აღსრულების ძირითადი ზომები“, გვ. 4

⁹² Human Rights Committee, general comment No. 18 (1989), HRI/GEN/1/Rev.6, pp. 147 et seq.

⁹³ მიღებულია 1995 წელს, საქართველო შეუერთდა 22.12.2005

<http://www.coe.int/en/web/minorities/etats-partie>

⁹⁴ მუხ. 6

⁹⁵ მუხ.12

⁹⁶ ევროპის საბჭოს სახელმძღვანელო მითითებები ბავშვზე მორგებული მართლმსაჯულების შესახებ, პარაგრაფი 78 (22-ე მითითების განმარტება), 2010

⁹⁷ ევროპის საბჭოს სახელმძღვანელო მითითებები ბავშვზე მორგებული მართლმსაჯულების შესახებ, 2010

კანონი დისკრიმინაციის ყველა ფორმის აღმოფხვრის შესახებ კრძალავს ნებისმიერი სახის დისკრიმინაციას და ავალდებულებს ყველა კერძო და საჯარო დაწესებულებას ყველა სამართლებრივი აქტი და შიდა რეგულაცია შეუსაბამოს ამ კანონს, მოახდინოს სწრაფი რეაგირება სავარაუდო დისკრიმინაციის ფაქტზე და მისი დადასტურების შემთხვევაში პასუხისმგებლობა დააკისროს დამრღვევს⁹⁸.

კანონი დისკრიმინაციის აღმოფხვრასა და თანასწორობის უზრუნველყოფაზე ზედამხედველობის ანუ მონიტორინგის ფუნქციას აკისრებს სახალხო დამცველს, რომელიც უფლებამოსილია განიხილოს ფიზიკურ და იურიდიულ პირთა საჩივრები დისკრიმინაციის შესახებ. დისკრიმინაციის მსხვერპლის უფლებების აღსადგენად სახალხო დამცველი შესაბამის დაწესებულებას უგზავნის რეკომენდაციას. თუ რეკომენდაცია არ შესრულდა, სახალხო დამცველი უფლებამოსილია დაინტერესებული პირის სახით მიმართოს სასამართლოს ადმინისტრაციული ორგანოს წინააღმდეგ და მოითხოვოს შესაბამისი ადმინისტრაციულ-სამართლებრივი აქტის გამოცემა ან ქმედების განხორციელება⁹⁹. კანონის თანახმად, სახალხო დამცველს ეკისრება დისკრიმინაციის საკითხებზე საზოგადოების ცნობიერების ამაღლება და სტატისტიკური მონაცემების აღრიცხვა და გაანალიზება დისკრიმინაციის ფაქტებზე¹⁰⁰. ამ საკითხზე გამოსცემს სპეციალურ ანგარიშს¹⁰¹.

კანონი აკისრებს ვალდებულებას ნებისმიერ ადმინისტრაციულ, სახელმწიფო ხელისუფლების და ადგილობრივი თვითმმართველობის ორგანოებს სახალხო დამცველს მიაწოდონ საქმესთან დაკავშირებული ნებისმიერი ინფორმაცია და ახსნა განმარტება. კერძო პირებს ასეთი ინფორმაცია შეუძლიათ გასცენ ნებაყოფლობით¹⁰².

ამასთანავე, კანონი ადგენს, რომ ყველა პირს, რომელიც თავს მიიჩნევს დისკრიმინაციის მსხვერპლად, უფლება აქვს მიმართოს სასამართლოს სამოქალაქო საპროცესო კოდექსით დადგენილი წესით და მოითხოვოს მორალური ან/და მატერიალური ზიანის ანაზღაურება¹⁰³. საქმის განხილვაში მესამე პირად შეიძლება ჩაერთოს სახალხო დამცველი უფლებადამცველი ორგანიზაციის ან გაერთიანების მოთხოვნით და სავარაუდო მსხვერპლის თანხმობით¹⁰⁴.

საქართველოს ანტიდისკრიმინაციული კანონმდებლობა არ მოიცავს “გონივრული მისადაგების” პრინციპს, რომელიც CRPD-ის ერთ-ერთ ყველაზე მნიშვნელოვან ინოვაციას წარმოადგენს და რომელიც გონივრული მისადაგების გათვალისწინებაზე უარის თქმას დისკრიმინაციის სახედ განიხილავს. გონივრული მისადაგება აუცილებელია და შესაბამისად ჩასატარებელია სათანადო მოდიფიკაცია და კორექტირება, კონკრეტული საჭიროების შემთხვევაში, რომელიც უზრუნველყოფს შეზღუდული შესაძლებლობის მქონე პირებს მათი უფლებებით თანაბრად სარგებლობის შესაძლებლობით (მაგალითად, ფიზიკურ გარემოზე სპეციალურად ადაპტირება, ინფორმაციის, საზოგადოებრივი ობიექტების, სკოლების ხელმისაწვდომობა). გონივრული მისადაგებით სარგებლობის უფლება, როგორც დისკრიმინაციისგან დაცვის განუყოფელი ნაწილი, ექვემდებარება

⁹⁸ მუხ. 4

⁹⁹ მუხ. 6.1-2 (ა-ზ)

¹⁰⁰ 6.2 (თ-ი)

¹⁰¹ მუხ.7

¹⁰² მუხ. 8.4

¹⁰³ მუხ.10

¹⁰⁴ მუხ.11

დაუყოვნებლივ ამოქმედებას და არა ეტაპობრივ დანერგვას. შესაბამისად, ეს იმას ნიშნავს, რომ სახელმწიფოს არ შეუძლია გონივრულ მისადაგებაზე უარის თქმა არასაკმარისი ფინანსური რესურსებით გაამართლოს.

განხილული ნორმების ანალიზით ჩანს, რომ საკანონმდებლო ცვლილებების გზით უნდა გაუმჯობესდეს დისკრიმინაციისგან ბავშვთა დაცვის გარანტიები შემდეგი საკითხების გათვალისწინებით:

- კანონმა უნდა დაადგინოს დისკრიმინაციისგან ბავშვთა დაცვის სპეციალური ღონისძიებების გატარების ვალდებულება და ბავშვზე მორგებული გასაჩივრების პროცედურები. გონივრული მისადაგების პრინციპი უნდა განმტკიცდეს კანონით და უზრუნველყოს ყველა უწყებამ, რომელსაც შეხება აქვს ბავშვთა უფლებებთან;
- კანონის თანახმად, სახალხო დამცველს უნდა გაეზარდოს მანდატი, რათა გამოსცეს სავალდებულო ძალის მქონე გადაწყვეტილება დისკრიმინაციის აღმოფხვრის მოთხოვნით და სათანადო სანქციების დაწესებით;
- კანონმა უნდა დაადგინოს დისაგრეგირებულ მონაცემთა (მათ შორის, სქესის, ეთნიკური, რელიგიური, შეზღუდული შესაძლებლობის, მოქალაქეობის, ალტერნატიულ ზრუნვაში ყოფნის და სხვა მნიშვნელოვანი მახასიათებლების მიხედვით) შეგროვებისა და ანალიზის ვალდებულება ადმინისტრაციული, სახელმწიფო ხელისუფლებისა და ადგილობრივი თვითმმართველობის ორგანოებისთვის დისკრიმინაციის ფაქტების, გამომწვევი მიზეზებისა და რისკების გამოვლენის მიზნით. სახალხო დამცველის ვალდებულება ამ კუთხით არასაკმარისია, რადგან მის მიერ შეგროვილი ინფორმაცია იქნება მხოლოდ იმ შემთხვევების შემცველი, რომელთა განხილვაც უშუალოდ სახალხო დამცველის აპარატს მოუწევს და ვერ ასახავს ერთიან სურათს;
- კანონმა უნდა დააკისროს სახელმწიფო ხელისუფლებისა და ადგილობრივი თვითმმართველობის ორგანოებს დისკრიმინაციის შესახებ შესაბამისი საგანმანათლებლო-საინფორმაციო ღონისძიებების განხორციელება, მათ შორის, ბავშვებისთვის. მხოლოდ სახალხო დამცველის როლი ამ კუთხით საკმარისი ვერ იქნება.

გაეროს ადამიანის უფლებათა კომიტეტი¹⁰⁵ მიესალმა საქართველოს კანონს „დისკრიმინაციის ყველა ფორმის აღმოფხვრის შესახებ“, თუმცა წუხილი გამოთქვა, აღსრულების მექანიზმის შესახებ, დამოუკიდებელი ორგანოს არარსებობის ფონზე, რომელმაც უნდა უზრუნველყოს შესასრულებლად სავალდებულო გადაწყვეტილებების გამოცემა და მოითხოვოს დამრღვევებზე ჯარიმის დაკისრება; დარღვევების პრევენციისთვის არასაკმარისი სანქციების შესახებ; და სახალხო დამცველის აპარატის მიერ თავისი ახალი ფუნქციების ეფექტურად განსახორციელებლად არასაკმარისი რესურსების შესახებ. კომიტეტის რეკომენდაციით, სახალხო დამცველის აპარატი უნდა აღიჭურვოს უფლებამოსილებით გასცეს იურიდიულად სავალდებულო დასკვნები და მოითხოვოს თავის მანდატის ფარგლებში სამართალწარმოების დაწყება. კომიტეტი ხაზგასმით აღნიშნავს, რომ სახელმწიფომ უნდა გააუმჯობესოს ანტიდისკრიმინაციული კანონმდებლობა, მათ შორის, უნდა უზრუნველყოს დამრღვევების სათანადოდ სანქცირება და დისკრიმინაციის მსხვერპლთა ეფექტური და სათანადო საშუალებებით უზრუნველყოფა.

¹⁰⁵ გაეროს ადამიანის უფლებათა კომიტეტი წარმოადგენს დამოუკიდებელი ექსპერტებისგან შემდგარ ორგანოს, რომელიც მონაწილე ქვეყნებში სამოქალაქო და პოლიტიკური უფლებების საერთაშორისო პაქტის მონიტორინგს განხორციელებს. დასკვნა საქართველოს შესახებ 19 აგვ / 2014 http://tbinternet.ohchr.org/_layouts/treatybodyexternal/TBSearch.aspx?TreatyID=8&DocTypeID=5

ბ) დისკრიმინაციის დაუშვებლობა განათლების სფეროში

ზოგადი განათლების შესახებ კანონის თანახმად, სასწავლო გეგმები უნდა იყოს ობიექტური და არადისკრიმინაციული¹⁰⁶. მოსწავლეს, მშობელს და მასწავლებელს ან მათ გაერთიანებებს უფლება აქვთ თანაბარ პირობებში, დისკრიმინაციის გარეშე, კანონით დადგენილი წესით, ისარგებლონ ამ კანონით და სკოლის მიერ აღიარებული უფლებებით და თავისუფლებებით, ასევე, სკოლის რესურსებით¹⁰⁷. სკოლა თანასწორობის საფუძველზე იცავს უმცირესობების წევრების ინდივიდუალურ და კოლექტიურ უფლებას, თავისუფლად ისარგებლონ მშობლიური ენით, შეინარჩუნონ და გამოხატონ თავიანთი კულტურული კუთვნილება¹⁰⁸.

კანონი ვიწროდ განმარტავს დისკრიმინაციას, კერძოდ, მიუთითებს, რომ სკოლა ვალდებულია დაიცვას და ხელი შეუწყოს მოსწავლეებს, მშობლებს და მასწავლებლებს შორის შემწყნარებლობისა და ურთიერთპატივისცემის დამკვიდრებას, განურჩევლად მათი სოციალური, ეთნიკური, რელიგიური, ლინგვისტური და მსოფლმხედველობრივი კუთვნილებისა¹⁰⁹. ამასთანავე, ჩანაწერი ეროვნული სასწავლო გეგმის არადისკრიმინაციულობის შესახებ მნიშვნელოვანია მკაფიოდ ასახავდეს, თუ რომელ კრიტერიუმებს უნდა აკმაყოფილებდეს სასწავლო გეგმა, რომ ის ჩაითვალოს არადისკრიმინაციულად. უმცირესობებთან დაკავშირებით, კანონი უშვებს მათ მიერ მშობლიური ენით სარგებლობას და კულტურული კუთვნილების გამოხატვას, თუმცა არ ადგენს მათი ხელშეწყობის ღონისძიებებს.

კანონი ზოგადი განათლების შესახებ მიუთითებს, რომ ინკლუზიური განათლება არის სპეციალური საგანმანათლებლო საჭიროების მქონე მოსწავლის ჩართვა ზოგადსაგანმანათლებლო პროცესში თანატოლებთან ერთად¹¹⁰. სპეციალური საგანმანათლებლო საჭიროების მქონე ბავშვებთან დაკავშირებით, კანონი განსაზღვრავს განათლებისა და მეცნიერების სამინისტროს უფლებამოსილებას შეიმუშავოს ინკლუზიური განათლების დანერგვის, განვითარებისა და მონიტორინგის წესები, აგრეთვე, იდენტიფიკაციის მექანიზმი¹¹¹. სამინისტროს ინკლუზიური განათლების მულტიდისციპლინური გუნდი ახორციელებს პირის შეფასებას სპეციალური საგანმანათლებლო საჭიროების განსაზღვრის მიზნით და მისთვის განათლების საუკეთესო ფორმის შერჩევას¹¹².

საყურადღებოა, რომ კანონი სკოლას ანიჭებს უფლებამოსილებას და არ აკისრებს ვალდებულებას ინკლუზიური განათლების პირობების შექმნაზე¹¹³. ინკლუზიური განათლების განმარტება არ შეესაბამება საერთაშორისო სტანდარტით დადგენილ განმარტებას, რისი გამტკიცებაც ეროვნული კანონით ძალიან მნიშვნელოვანია მისი სწორი იმპლემენტაციისა და სახელმწიფოს ანგარიშვალდებულებისთვის.

¹⁰⁶ მუხ.5.6

¹⁰⁷ მუხ. 8.1

¹⁰⁸ მუხ. 13.7

¹⁰⁹ მუხ. 13.6

¹¹⁰ მუხ. 3 „უ“

¹¹¹ მუხ. 26.1 „მ“

¹¹² მუხ. 2 „ჩ“

¹¹³ მუხ. 33.2 „ვ“

გაეროს კომიტეტი შეზღუდული შესაძლებლობის მქონე პირთა უფლებების საკითხებზე აღნიშნავს¹¹⁴, რომ გაეროს ადამიანის უფლებათა უმაღლესი კომისრის ოფისის თემატურმა კვლევამ შეზღუდული შესაძლებლობის მქონე პირთა განათლების უფლების შესახებ (2013) დაადასტურა, რომ მხოლოდ ინკლუზიურ განათლებას შეუძლია შეზღუდული შესაძლებლობის მქონე პირებისთვის ერთდროულად მაღალი ხარისხის განათლების მიწოდება და სოციალური განვითარება, და გარანტიის შექმნა განათლების უფლების საყოველთაობის და არადისკრიმინაციულობისთვის¹¹⁵.

კანონი ადგენს, რომ მოსწავლეს უფლება აქვს თავისი უფლებებისა და თავისუფლებების დასაცავად გაასაჩივროს მასწავლებლისა და სკოლის უკანონო და არამართლზომიერი ქმედებები, ასევე, მიიღოს ზიანის სრული ანაზღაურება. კანონი ავალდებულებს სკოლას, შექმნას საჩივრების დამოუკიდებელი და მიუკერძოებელი განხილვის ეფექტიანი საშუალება¹¹⁶. თუმცა, როგორც ზემოთ აღინიშნა, არც სამოქალაქო საპროცესო კოდექსი და არც ადმინისტრაციული საპროცესო კოდექსი არ ადგენს ბავშვზე მორგებულ პროცედურებს სასამართლოსადმი მიმართვის და პროცესში მონაწილეობის თვალსაზრისით (იხ. 3.2). ზოგადი განათლების შესახებ კანონიც, თავის მხრივ, არ ადგენს ბავშვზე მორგებულ გასაჩივრების მექანიზმთან დაკავშირებით რაიმე კონკრეტულ მითითებას და პროცედურებს, რომელიც ხელმისაწვდომი იქნებოდა მოსაწავლისთვის მისი უფლებებისა და თავისუფლებების დარღვევის შემთხვევაში. მნიშვნელოვანია ამ კანონმა განსაზღვროს კონკრეტული სამართლებრივი დაცვის საშუალებები და ზიანის ანაზღაურების გარანტიები, რათა შემდეგ სკოლამ კანონის თანახმად შეასრულოს აღნიშნული ვალდებულება.

გ) შეზღუდული შესაძლებლობის მქონე ბავშვები

კანონი შეზღუდული შესაძლებლობების მქონე პირთა სოციალური დაცვის შესახებ გვაწვდის შეზღუდული შესაძლებლობების მქონე პირის განმარტებას, კრძალავს დისკრიმინაციას, მიუთითებს სახელმწიფოს ვალდებულებაზე სოციალური ინფრასტრუქტურის და სოციალური დახმარების ხელმისაწვდომობის, სკოლამდელი, ზოგადი, პროფესიული და უმაღლესი განათლების უზრუნველყოფის შესახებ შეზღუდული შესაძლებლობების მქონე ბავშვებისთვის.

ადმინისტრაციულ სამართალდარღვევათა კოდექსი¹¹⁷ ითვალისწინებს ფინანსურ სანქციებს დასახლებული პუნქტების დაპროექტებისა და განაშენიანების, საცხოვრებელი რაიონების ფორმირების, საპროექტო გადაწყვეტილებების შემუშავების, შენობათა და ნაგებობათა მშენებლობისა და რეკონსტრუქციის დროს შეზღუდული შესაძლებლობის მქონე პირის საჭიროებებისა და მოთხოვნილებების გათვალისწინებლობისთვის (500-800 ლარი), ხოლო ჯარიმის გამოწერაზე უფლებამოსილი ორგანო შრომის, ჯანმრთელობის და სოციალურ საკითხთა სამინისტრო. სანქციების შესახებ ოქმის გამოწერაზე მითითებულია სამინისტრო, თუმცა დადგენილი არაა რომელი კონკრეტული სამსახურია უფლებამოსილი ადასრულოს ეს მექანიზმი.

არც ეს და არც სხვა რომელიმე კანონი არ ადგენს სპეციალურ ნორმებს მართლმსაჯულებაზე წვდომის საკითხზე შეზღუდული შესაძლებლობის მქონე ბავშვებისთვის, როგორც სასამართლოსთვის მიმართვის, ასევე, სათანადო დახმარების

¹¹⁴ გაეროს კომიტეტი შშმ პირთა უფლებებზე, ზოგადი კომენტარი #4 ინკლუზიური განათლების შესახებ, 02.09.2016

¹¹⁵ A/HRC/25/29 para 3

¹¹⁶ მუხ. 12.1-2

¹¹⁷ მუხ. 178² და 239.45

გაწევის თვალსაზრისით (ინფორმაციის მიწოდება, კონსულტაცია, კომუნიკაციის საშუალებები და სხვა). შესაბამისად, რეკომენდირებულია საკანონმდებლო ცვლილებები განხორციელდეს ამ მიმართულებით, რათა უზრუნველყოთ შეზღუდული შესაძლებლობის მქონე ბავშვთა წვდომა მართლმსაჯულებაზე დისკრიმინაციის გარეშე.

დ) მიგრანტი ბავშვების უფლებები

უცხოელ, მოქალაქეობის არმქონე, თავშესაფრის მაძიებელ ბავშვთა უფლება განათლებაზე

კანონი უცხოელთა და მოქალაქეობის არმქონე პირთა სამართლებრივი მდგომარეობის შესახებ¹¹⁸ ადგენს, რომ საქართველოში მყოფ უცხოელს აქვს უფლება განათლებაზე კანონით დადგენილი წესით¹¹⁹.

ზოგადი განათლების შესახებ კანონის თანახმად, სახელმწიფო უზრუნველყოფს სრული ზოგადი განათლების მიწოდებას ყველა ბავშვისთვის, მათ შორის, მოქალაქეობის არმქონე, დროებითი ბინადრობის უფლების მქონე, უცხოელი და საერთაშორისო დაცვის ქვეშ მყოფი ბავშვებისთვის (ლტოლვილი, თავშესაფრის მაძიებელი, სხვა)¹²⁰.

კანონი „ადრეული და სკოლამდელი აღზრდისა და განათლების შესახებ“ ადგენს, რომ სკოლამდელი განათლება ნებაყოფლობითი, უნივერსალური და ხელმისაწვდომია ყველა ბავშვისთვის¹²¹, მათ შორის, უცხოელისთვის¹²².

მთავრობის დადგენილება „საქართველოში თავშესაფრის მაძიებელთა და ლტოლვილის ან ჰუმანიტარული სტატუსის მქონე პირთათვის ზოგადი განათლების მიღების ხელშეწყობის მიზნით განსახორციელებელი ღონისძიებების შესახებ“¹²³ ადგენს ბავშვებისთვის ქართული ენის შემსწავლელ პროგრამაზე ხელმისაწვდომობას, რათა მათ იმ დონეზე შეისწავლონ ქართული ენა, რაც საჭიროა საქართველოში ზოგადი სასკოლო განათლების მისაღებად. დადგენილება მიუთითებს, რომ განათლებისა და მეცნიერების სამინისტრო უზრუნველყოფს ქართულ ენაში მომზადების საგანამანათლებლო პროგრამის დაძლევის შემთხვევაში შესაბამის კლასში სწავლის გაგრძელების შესაძლებლობას, კანონით დადგენილი წესით¹²⁴. სამინისტრო, ასევე, უზრუნველყოფს ქართული ენის შესაბამისი კვალიფიკაციის პირის მეშვეობით სწავლებას¹²⁵.

განხილული კანონების ანალიზით ირკვევა, რომ ბავშვის უფლება განათლებაზე აღიარებულია ყველა ბავშვისთვის მოქალაქეობის მიუხედავად, თუმცა დადგენილი არ არის ამ უფლების განხორციელების გარანტიები. კერძოდ, განხილული კანონები აღიარებს ამ უფლებას ზოგადად და განხორციელების შესახებ მიუთითებს „კანონმდებლობით დადგენილ წესს“. ასეთი კონკრეტული წესი მოცემულია განხილულ მთავრობის დადგენილებაში, რომელიც მიუთითებს ქართული ენის სწავლების პროგრამაში უცხოელ ლტოლვილთა და თავშესაფრის მაძიებელ ბავშვთა ჩართვის შესახებ. განათლების სამინისტრო უზრუნველყოფს ქართული ენის სწავლებას „შესაბამისი კვალიფიკაციის პირის მიერ“ და ბავშვთა ჩართვას ზოგადი განათლების შესაბამის კლასში „ქართული ენის პროგრამის დაძლევის შემთხვევაში“. აღნიშნული ჩანაწერით გაურკვეველია, თუ რა იგულისხმება კვალიფიკაციის „შესაბამისობაში“ და რა მოხდება,

¹¹⁸ <https://matsne.gov.ge/ka/document/view/2278806>

¹¹⁹ მუხ. 33

¹²⁰ მუხ. 22. 1,7

¹²¹ მუხ. 4.2

¹²² მუხ. 3 „ვ“

¹²³ დადგენილება 29.01.2015 / #15

¹²⁴ მუხ. 2.5 „ბ“

¹²⁵ მუხ. 2.5 „ე“

თუ ბავშვი პროგრამას ვერ დაძლევა. განხილული კანონები და მთავრობის დადგენილება არ მიუთითებს სპეციფიკურ დამხმარე ღონისძიებებზე, რომელიც ხელს შეუწყობდა ბავშვს ინდივიდუალური საგანმანათლებლო საჭიროებების მიხედვით ქართული ენის შესწავლის და შემდეგ ზოგადი განათლების მიღებაში.

ყურადსაღებია, რომ ადმინისტრაციული საპროცესო კოდექსი ითვალისწინებს განსაკუთრებული განხილვის საპროცესო წესებს უცხოელის საქართველოდან გამეცების, გამეცების გადავადების, დროებითი მოთავსების ცენტრში განთავსების და ამასთან დაკავშირებით მოსამართლის ბრძანების გასაჩივრების შესახებ¹²⁶. ეს კოდექსი, ასევე, ადგენს საერთაშორისო დაცვის მქონე პირთა ან თავშესაფრის მაძიებელთა სასამართლოსთვის მიმართვის უფლებას დაცვის ან თავშესაფრის მოთხოვნის მიზნით, რომელსაც სასამართლო განიხილავს 2 თვის ვადაში¹²⁷. თუმცა, კოდექსი არ ადგენს უცხოელი, მოქალაქეობის არმქონე ან/და თავშესაფრის მაძიებელი ბავშვისთვის მისი განათლების, ჯანდაცვის და სოციალურ სერვისზე წვდომის უფლებების დარღვევის გასაჩივრების განსაკუთრებულ წესს. ასეთ პირობებში, რთული იქნება უცხოელი ბავშვისთვის უშუალოდ ან წარმომადგენლის მეშვეობით მართლმსაჯულებასთან ეფექტური წვდომა განათლების უფლების დარღვევის შემთხვევაში.

აქედან გამომდინარე, რეკომენდირებულია ამ საკითხის დამატებით შესწავლა, არსებული მდგომარეობის და რესურსების გაანალიზება. საბოლოო ჯამში, კანონმდებლობა ამ კუთხით უნდა გაუმჯობესდეს, რათა ყველა ბავშვს, მოქალაქეობის მიუხედავად, ხელი მიუწვდებოდეს ინდივიდუალურ, დროულ და ეფექტურ მხარდაჭერაზე ზოგადი განათლების მისაღებად.

დოკუმენტების არმქონე, თანმხლების გარეშე მყოფ ბავშვები საქართველოს ტერიტორიაზე

ბავშვის უფლებათა კომიტეტი განმარტავს¹²⁸, რომ ბავშვის საუკეთესო ინტერესების პრინციპიდან გამომდინარე, ზოგადი წესით, დაუშვებელია თანმხლების გარეშე მყოფი ბავშვების დაპატიმრება. ბავშვის დაპატიმრება არ შეიძლება მხოლოდ თანმხლების გარეშე ან ოჯახისგან განცალკევებით ყოფნის ან მისი საემიგრაციო ან საცხოვრებელი სტატუსის ან ამგვარი სტატუსის არქონის გამო.

უცხოელთა და მოქალაქეობის არმქონე პირთა სამართლებრივი მდგომარეობის შესახებ¹²⁹ არეგულირებს უცხოელთა საქართველოში შემოსვლის, ყოფნის, ტრანზიტით გავლისა და საქართველოდან გასვლის სამართლებრივ საფუძვლებსა და მექანიზმებს, აგრეთვე განსაზღვრავს უცხოელთა და მოქალაქეობის არმქონე პირთა უფლებებსა და მოვალეობებს, საქართველოში მყოფ უცხოელთა საქართველოდან გამეცების ფორმებსა და პროცედურებს, გამეცების პროცესში მონაწილე სახელმწიფო დაწესებულებათა კომპეტენციის ფარგლებსა და პასუხისმგებლობას¹³⁰. კანონის განხორციელების ზოგად პრინციპებს შორისაა დისკრიმინაციის დაუშვებლობის, არგამეცების, ოჯახის ერთიანობისა და ბავშვის საუკეთესო ინტერესების დაცვის პრინციპი¹³¹. უცხოელის საქართველოდან გამეცების გადავადება მოხდება 30 დღით, თუ იქმნება არასრულწლოვნის უმეტესალყურეოდ დარჩენის ან/და განათლების გარეშე დარჩენის რისკი¹³².

¹²⁶ თავი VII¹⁰

¹²⁷ მუხ. 21²⁴

¹²⁸ ზოგადი კომენტარი #6, პარა. 61

¹²⁹ <https://matsne.gov.ge/ka/document/view/2278806>

¹³⁰ მუხ. 1.2

¹³¹ მუხ.3

¹³² მუხ. 55.1 „ვ“

კანონი ამკვიდრებს დროებითი საიდენტიფიკაციო მოწმობის გაცემის შესაძლებლობას თავშესაფრის მაძიებელ, საქართველოში მოქალაქეობის არმქონე პირის სტატუსის მაძიებელ, აგრეთვე საქართველოში დროებითი ყოფნის უფლების მქონე პირებზე (იდენტიფიცირება შეუძლებელია, არცერთი სახელმწიფო არ იღებს, გამეფება დაუშვებელია). ასევე, დროებითი მოწმობა გაიცემა იუსტიციის მინისტრის ბრძანებით განსაზღვრულ შემთხვევებში იმ პირებზე, რომელთა მიმართაც საქართველოს კანონმდებლობა არ ითვალისწინებს პირადობის დამადასტურებელი სხვა დოკუმენტის გაცემას¹³³. დროებითი საიდენტიფიკაციო მოწმობა გაიცემა 1 წლის ვადით. საქართველოში დროებითი ყოფნის ვადის გაგრძელების შემთხვევაში დროებით საიდენტიფიკაციო მოწმობას სააგენტო გასცემს განმეორებით, იმავე ვადით, საქართველოს შინაგან საქმეთა სამინისტროს მიმართვის საფუძველზე. დროებითი საიდენტიფიკაციო მოწმობის მიღებიდან 5 წლის შემდეგ უცხოელი უფლებამოსილია მიმართოს სააგენტოს სპეციალური ბინადრობის ნებართვის მისაღებად¹³⁴. უმეტესადაა მყოფი არასრულწლოვნის ან ოჯახის დროებითი განთავსების ცენტრში მოთავსება შეუძლებელია მხოლოდ უკიდურეს შემთხვევაში და მაქსიმალურად მოკლე ვადით, მათი საუკეთესო ინტერესების გათვალისწინებით. თუ დაკავებული უცხოელი არასრულწლოვანია ან უმწეო მდგომარეობაში იმყოფება, მისი დაკავების შესახებ შეტყობინების ვალდებულება ეკისრება უფლებამოსილ ორგანოს. არასრულწლოვანი უცხოელის დაკავების შესახებ ეცნობება მის კანონიერ წარმომადგენელს. უცხოელის დაკავების შესახებ დაუყოვნებლივ ეცნობება საქართველოს საგარეო საქმეთა სამინისტროს და შესაბამისი სახელმწიფოს საკონსულოს¹³⁵. დროებითი განთავსების ცენტრში უზრუნველყოფილი უნდა იქნეს არასრულწლოვნის უფლებების დაცვა¹³⁶.

ეს კანონი აგრეთვე მიუთითებს, რომ საქართველოს კანონმდებლობის დარღვევისათვის უცხოელს დადგენილი წესით ეკისრება სისხლის სამართლის, სამოქალაქო ან ადმინისტრაციული პასუხისმგებლობა¹³⁷. საქართველოს საზღვრის უკანონო გადმოკვეთისთვის სისხლის სამართლის კოდექსი ითვალისწინებს ჯარიმას ან 3-დან 5 წლამდე თავისუფლების აღკვეთას¹³⁸. თუმცა ამ მუხლთან გაკეთებულია დათქმა, რომ სისხლის სამართლის პასუხისმგებლობისგან თავისუფლდებიან ის პირი, რომელიც საქართველოში იმ ტერიტორიიდან შემოვიდა, სადაც მის სიცოცხლეს ან ჯანმრთელობას საფრთხე ემუქრებოდა და რომელიც საქართველოს თავშესაფარს თხოვს მხოლოდ იმ პირობით, რომ ის დაუყოვნებლივ გამოცხადდება ხელისუფლების ორგანოში და წარადგენს სათანადო განმარტებას საქართველოში უკანონო შემოსვლის ან უნებართვო ყოფნის შესახებ, და თუ მის ქმედებაში არ არის სხვა დანაშაულის ნიშნები, აგრეთვე პირი, რომელმაც აღნიშნული ქმედება ადამიანით ვაჭრობის (ტრეფიკინგის) მსხვერპლად ყოფნის გამო, ადამიანით ვაჭრობის (ტრეფიკინგის) მსხვერპლის სტატუსის მოპოვებამდე ჩაიდინა¹³⁹.

ეს შენიშვნა არ მოიცავს მითითებას იმ არასრულწლოვანზე, რომელიც უნებართვოდ იმყოფება საქართველოს ტერიტორიაზე, რის გამოც უშვებს საქართველოს ტერიტორიაზე უნებართვოდ მოხვედრილ არასრულწლოვანთა დაკავების და აღკვეთის ღონისძიების

¹³³ მუხ.2

¹³⁴ მუხ.60

¹³⁵ მუხ.64

¹³⁶ მუხ. 66

¹³⁷ მუხ.68

¹³⁸ სისხლის სამართლის კოდექსი, მუხ. 344.1

¹³⁹ სისხლის სამართლის კოდექსი, შენიშვნა 344-ე მუხლზე

სახით თავისუფლების აღკვეთის შეფარდების შესაძლებლობას¹⁴⁰. იმ შემთხვევაში, არასრულწლოვანი დაექვემდებარება სისხლის სამართლის პასუხისმგებლობას საზღვრის უკანონო გადმოკვეთის ან გადაკვეთისთვის, კანონით გათვალისწინებულ დაცვის გარანტიებს შინაარსი სრულიად ეკარგება.

აქედან გამომდინარე, რეკომენდირებულია გადაიხედოს განხილული კანონები და შესაბამისობაში მოვიდეს ერთმანეთთან, აგრეთვე რაც ყველაზე მნიშვნელოვანია - მიგრანტი ბავშვის უფლებების დაცვის საერთაშორისო სტანდარტებთან.

ე) სამართალწარმოება დისკრიმინაციის საქმეზე

სამოქალაქო საპროცესო კოდექსი ადგენს, რომ ნებისმიერ პირს, რომელიც თავს დისკრიმინაციის მსხვერპლად მიიჩნევს, უფლება აქვს, სასამართლოში შეიტანოს სარჩელი იმ პირის/დაწესებულების წინააღმდეგ, რომელმაც, მისი ვარაუდით, მის მიმართ დისკრიმინაცია განახორციელა. სარჩელით მიმართვა შესაძლებელია 3 თვის განმავლობაში მას შემდეგ, რაც პირმა გაიგო ან უნდა გაეგო იმ გარემოების შესახებ, რაც დისკრიმინაციულად მიაჩნია. სარჩელის აღძვრისას პირმა უნდა წარადგინოს ფაქტები და შესაბამისი მტკიცებულებები, რის შემდეგაც მოპასუხეს ეკისრება საპირისპიროს მტკიცების ტვირთი¹⁴¹.

სარჩელის ფორმის დაუცველად წარდგენის შემთხვევაში, სასამართლო მოსარჩელეს უდგენს ხარვეზს და გამოსასწორებლად უნიშნავს გონივრულ ვადას. თუ ხარვეზი არ გამოსწორდა, სასამართლო სარჩელს წარმოებაში არ მიიღებს¹⁴². სასამართლოს მიერ საქმის განხილვის შედეგად, ის იღებს გადაწყვეტილებას დისკრიმინაციის ფაქტის დადასტურების და სარჩელის დაკმაყოფილების ან უარის თქმის შესახებ, რაც შეიძლება გასაჩივრდეს სააპელაციო წესით მხარეთა მიერ¹⁴³.

გასაჩივრების აღნიშნული პროცედურა არ მოიცავს რაიმე მითითებას ბავშვზე მორგებულ პროცესზე, გასაჩივრების მექანიზმსა და ადაპტირებულ კომუნიკაციის საშუალებებზე. არაფერია აღნიშნული დისკრიმინაციის საქმეებზე იურიდიული დახმარების, თარჯიმნის, შესტური ენის და სხვა სახის მხარდაჭერის სერვისების ხელმისაწვდომობაზე.

3.3. ბავშვზე მორგებული მართლმსაჯულება და უფლებათა სამართლებრივი დაცვის საშუალებები

გაეროს ბავშვის უფლებათა კომიტეტი განმარტავს¹⁴⁴, რომ “უფლებების აღიარებას რეალური შინაარსი ვერ ექნება ეფექტური სამართლებრივი დაცვის მექანიზმების გარეშე“. ეს მოთხოვნა მკაფიოდ არის ასახული კონვენციასა და დანარჩენ ექვს ძირითად ადამიანის უფლებათა საერთაშორისო ხელშეკრულებაში. ბავშვების განსაკუთრებული და მშობლებზე დამოკიდებული სტატუსი რეალურ სირთულეებს უქმნის მათ თავიანთი

¹⁴⁰ 2015 წელს ადგილი ჰქონდა სომალის მოქალაქე 4 ბავშვის მიმართ აღკვეთის ღონისძიების სახით პატიმრობის შეფარდებას. ისინი დაკავებული იყვნენ საზღვრის უკანონო გადაკვეთისთვის საქართველოდან თურქეთის მიმართულებით არაბეთის გაერთიანებულ ემირატებში მოსახვედრად

¹⁴¹ მუხ. 363², 363³

¹⁴² მუხ.363⁴

¹⁴³ მუხ.363⁵, 363⁶

¹⁴⁴ ზოგადი კომენტარი #5 (2003), კონვენციის განხორციელების ზოგადი ღონისძიებები (მუხ. 4,42 და 44, პარა.6)

უფლებების დაცვის გზაზე. ამრიგად, სახელმწიფოებმა უნდა უზრუნველყონ ეფექტური, ბავშვზე მორგებული პროცედურები ბავშვებისა და მათი კანონიერი წარმომადგენლებისთვის. ბავშვზე მორგებული პროცედურები მოიცავს ბავშვისთვის გასაგებ ენაზე ინფორმაციის მიწოდებას, კონსულტაციას, ადვოკატირებას. ადვოკატირება თავის მხრივ მოიცავს ბავშვის გაძლიერებას საკუთარი უფლებების თავადვე დაცვის მიზნით და ხელმისაწვდომობას გასაჩივრების დამოუკიდებელ მექანიზმებსა და სასამართლოზე იურიდიული და სხვა სახის დახმარების თანხლებით.

გაერთიანებული ერების ორგანიზაციის სახელმძღვანელო მითითებაში¹⁴⁵ აღნიშნულია, რომ ბავშვთა მართლმსაჯულების საკითხები მხედველობაში უნდა იქნას მიღებული ეროვნული კანონმდებლობის გადახედვის, შემუშავების და განხორციელების პროცესში, კერძოდ, ბავშვთა საკითხების ინტეგრირება უნდა მოხდეს საკონსტიტუციო რეფორმის განხორციელებისას; კანონმდებლობის შემუშავებისას; სამართალდამცავების, სასამართლოს წარმომადგენლების, დაკავების ადგილების პერსონალის, იურისტების, სოციალური მუშაკების და სხვა პროფესიონალების ეთიკის კოდექსების, სტანდარტების და სამსახურში მიღების კრიტერიუმების შედგენისას.

ევროპის საბჭოს სახელმძღვანელო მითითებები ბავშვზე მორგებული მართლმსაჯულების შესახებ განმარტავს, რომ კანონის უზენაესობის პრინციპი, გარანტირებული უნდა იყოს ბავშვებისთვის ისევე, როგორც ზრდასრულებისთვის, და არ უნდა შემცირდეს ან გაუქმდეს ბავშვის საუკეთესო ინტერესების ქვე-ტექსტით. ეს ეხება როგორც სასამართლო, ასევე ადმინისტრაციულ სამართალწარმოებას¹⁴⁶. სახელმწიფოები ვალდებული არიან შექმნან დამოუკიდებელი და ეფექტური გასაჩივრების მექანიზმები ბავშვის ასაკისა და აღქმის დონის შესაბამისად¹⁴⁷.

ევროპის საბჭოს სახელმძღვანელო მითითებები ბავშვზე მორგებული მართლმსაჯულების შესახებ ხაზგასმით აღნიშნავს ბავშვზე მორგებული მართლმსაჯულების ძირითად ელემენტებს, კერძოდ: ინფორმაცია და კონსულტაცია; პირადი და ოჯახური ცხოვრების დაცვა; უსაფრთხოება; პროფესიონალთა მომზადება; მულტიდისციპლინური მიდგომა; თავისუფლების აღკვეთა მხოლოდ უკიდურეს შემთხვევაში და ა.შ.¹⁴⁸.

3.3.1 ინფორმაცია და კონსულტაცია

„ბავშვის უფლებათა კონვენციის“ მე-13 მუხლი აღიარებს ბავშვის უფლებას ნებისმიერი სახის ინფორმაციის ან იდეის ზეპირი, წერილობითი თუ ბეჭდური ფორმით მიღებას ან გავრცელებაზე. 37-ე და მე-40 მუხლებით გარანტირებულია ყველა ბრალდებული ბავშვის დაუყოვნებლივი ინფორმირება, ხოლო 42-ე მუხლი ავალდებულებს სახელმწიფოებს, ყველა სათანადო და ქმედითი საშუალებებით, სრულყოფილი ინფორმაცია მიაწოდონ ბავშვებს კონვენციის პრინციპებისა და დებულებების შესახებ.

¹⁴⁵ გაეროს გენერალური მდივნის სახელმძღვანელო მითითება „გაეროს მიდგომა ბავშვთა მართლმსაჯულების საკითხებზე“, 2008

¹⁴⁶ ევროპის საბჭოს სახელმძღვანელო მითითებები, 2010, E, გვ 19

¹⁴⁷ ევროპის საბჭოს სახელმძღვანელო მითითებები, 2010, პარა 48, გვ 56

¹⁴⁸ ევროპის საბჭოს სახელმძღვანელო მითითებები, პარა. ა. 1-22, გვ. 20-24

მშობელთა უფლება-მოვალეობების შესახებ, ბავშვის უფლებათა კონვენციის მე-5 მუხლი ხაზგასმით აღნიშნავს, რომ სახელმწიფომ უნდა აღიაროს მშობელთა ვალდებულება ბავშვს, მისი ზრდადი შესაძლებლობების გათვალისწინებით, მიაწოდოს სათანადო მითითებები და რჩევა-დარიგება საკუთარი უფლებების თავადვე განხორციელების შესახებ.

გაეროს სახელმძღვანელო მითითებების „სამართალწარმოების შესახებ მოწმე და მსხვერპლი ბავშვების მონაწილეობით“¹⁴⁹ თანახმად, მსხვერპლი და მოწმე ბავშვები, მათი მშობლები ან მზრუნველები და სხვა კანონიერი წარმომადგენლები, მართლმსაჯულებასთან პირველივე კონტაქტისას უნდა იყვნენ დაუყოვნებლივ და სათანადოდ ინფორმირებული მათი უფლებების, სამართალწარმოების პროცესის, მხარდაჭერის სერვისების, გასაჩივრების მექანიზმების შესახებ.

ევროპის საბჭოს კონვენცია ბავშვთა სექსუალური ექსპლუატაციისა და სექსუალური ძალადობისგან დაცვის შესახებ¹⁵⁰ მოითხოვს, სახელმწიფომ გაატაროს საკანონმდებლო ზომა, რათა უზრუნველყოს დაწყებით და საშუალო განათლების ეტაპებზე ბავშვებმა მიიღონ სათანადო ინფორმაცია სექსუალური ექსპლუატაციის, ძალადობის და დაცვის საშუალებების შესახებ¹⁵¹.

ევროპის საბჭოს სახელმძღვანელო მითითებები განმარტავს¹⁵², მართლმსაჯულების სისტემასთან ან ადმინისტრაციულ ორგანოებთან (ჯანდაცვა, განათლება, სოციალური საკითხები, სხვა) პირველივე კონტაქტისას და მთელი პროცესის განმავლობაში, ბავშვები და მათი მშობლები დაუყოვნებლივ და სათანადოდ უნდა იყვნენ ინფორმირებული, მათ შორის, შემდეგ საკითხებზე: ბავშვის უფლებები და როლი სასამართლო ან ადმინისტრაციულ პროცესში; მხარდაჭერის მექანიზმები პროცესში მონაწილეობისთვის; პროცესის შესაძლო შედეგები; პროცესის ადგილი და თარიღი, როდესაც ბავშვი უშუალო მონაწილეა; გადაწყვეტილების გასაჩივრების მექანიზმები; ანაზღაურების მიღების შესაძლებლობა დამღვევი პირისგან ან სახელმწიფოსგან სასამართლოს ან სხვა ალტერნატიული პროცესის გზით; დამხმარე სერვისების (ჯანდაცვის, ფსიქო-სოციალური, თარჯიმნის, სხვა) ან სასწრაფო ფინანსური დახმარების მიღების შესაძლებლობა; ბავშვის საუკეთესო ინტერესების დაცვის განსაკუთრებული ზომები, როდესაც ის სხვა ქვეყნის მოქალაქეა.

ინფორმაცია და კონსულტაცია ადაპტირებული უნდა იყოს გენდერული და კულტურული მგრძობიარობის გათვალისწინებით, ბავშვის ასაკისა და განვითარების დონის შესაბამისად იმ ენაზე, რომელიც მას ესმის.

ზოგადად საქართველოში ადამიანის უფლებათა შესახებ საგანმანათლებლო-საინფორმაციო საქმიანობას ახორციელებს სახალხო დამცველი კანონის საფუძველზე.

კანონი „სახალხო დამცველის შესახებ“¹⁵³ სახალხო დამცველის ერთ-ერთ ფუნქციად მიუთითებს საგანმანათლებლო საქმიანობის განხორციელებას ადამიანის უფლებათა და

¹⁴⁹ გაეროს სახელმძღვანელო მითითებები, ECOSOC Resolution 2005/20 /VII. უფლება ინფორმირებაზე

¹⁵⁰ კონვენცია მიღებულია 25/10/2007. საქართველოს მიერ რატიფიცირებულია 23/09/2014

¹⁵¹ კონვენციის მუხ. 6

¹⁵² პარა. 1-5, გვ. 20-21

¹⁵³ <https://matsne.gov.ge/ka/document/view/33034>

თავისუფლებათა სფეროში¹⁵⁴. ამასთანავე, სახალხო დამცველის აპარატში ფუნქციონირებს ბავშვის უფლებათა ცენტრი, რომლის ერთ-ერთი ამოცანაა ბავშვის ძირითად უფლებათა და თავისუფლებათა პოპულარიზაციისა და ამ სფეროში საზოგადოების სამოქალაქო ცნობიერების ამაღლების მიზნით, საგანმანათლებლო საქმიანობის განხორციელება¹⁵⁵.

გარდა ზემოთაღნიშნული ზოგადი ჩანაწერისა, კანონი არ მოიცავს კონკრეტულ დებულებებს ბავშვებთან ინფორმირებისა და მხარდაჭერის შესახებ. აქედან გამომდინარე, რეკომენდირებულია ამ კანონმა გააძლიეროს სახალხო დამცველის როლი და ფუნქციები ბავშვთა უფლებების მიმართულებით, კონკრეტულად ასახოს ბავშვთა ინფორმირების საკითხი უფლებების სამართლებრივი დაცვის საშუალებების და მართლმსაჯულებასთან წვდომის შესახებ და ასევე, გაიზარდოს სახალხო დამცველის როლი ადმინისტრაციული წარმოების და სასამართლო განხილვის პროცესში ბავშვთა უშუალო სამართლებრივი მხარდაჭერის შესახებ განსაკუთრებით მოწყვლად მდგომარეობაში მყოფი ბავშვების მიმართ (უმცირესობათა ჯგუფები, დევნილი და ლტოლვილი ბავშვები, ალტერნატიულ ზრუნვაში მყოფი ბავშვები, შეზღუდული შესაძლებლობის მქონე ბავშვები და სხვა).

სამოქალაქო საპროცესო კოდექსი არ ადგენს დებულებას ბავშვის ინფორმირების შესახებ სასამართლო პროცესთან დაკავშირებით.

საფრანგეთში ბავშვთა საქმეებზე მომუშავე პროკურორები და მოსამართლეები ბავშვს აწვდიან ინფორმაციას, მათ შორის, სამოქალაქო სამართალწარმოებაში მონაწილეობისას პირველივე შეხვედრისთანავე. მოსამართლე კანონით უფლებამოსილია, ასევე, მოიწვიოს სხვა სპეციალიზებული პროფესიონალი ბავშვისთვის ინფორმაციის/ახსნა-განმარტების მიწოდების მიზნით. ასეთი ვალდებულება, აგრეთვე, ეკისრებათ ბავშვთა ადვოკატებს და სხვა პროფესიონალ საპროცესო წარმომადგენლებს.

კანონი ზოგადი განათლების შესახებ¹⁵⁶ ადგენს, რომ მოსწავლეს, მშობელს და მასწავლებელს უფლება აქვთ პირადად ან არჩეული წარმომადგენლის მეშვეობით მონაწილეობა მიიღონ სკოლის მართვაში, მიიღონ სკოლაში არსებული ინფორმაცია, გარდა პერსონალურისა. მათ აქვთ უფლება მოითხოვონ და მიიღონ სკოლის მიერ მათთან დაკავშირებული საკითხის გადაწყვეტისას მათი აზრის მოსმენისა და განხილვაში უშუალოდ ან წარმომადგენლის მეშვეობით მონაწილეობის შესაძლებლობა¹⁵⁷.

ამავე კანონის თანახმად, სკოლა ვალდებულია ყოველ ახალ მოსწავლეს, მშობელს და მასწავლებელს გააცნოს მათი უფლებები და თავისუფლებები¹⁵⁸. მოსწავლეს, მშობელს და მასწავლებელს უფლება აქვთ თავიანთ უფლებებისა და თავისუფლებების დასაცავად გაასაჩივრონ მასწავლებლისა და სკოლის უკანონო და სხვა არამართლზომიერი ქმედებები, აგრეთვე მიიღონ მიყენებული ზიანის სრული ანაზღაურება. სკოლა ვალდებულია შექმნას საჩივრების დამოუკიდებელი და მიუკერძოებელი განხილვის ეფექტიანი საშუალება¹⁵⁹

კანონი ანიჭებს უფლებას მოსწავლეს მიიღოს „სკოლაში არსებული ინფორმაცია“ და სკოლას ავალდებულებს მოსწავლეს სკოლაში მიღებისას გააცნოს მისი უფლებები, ასევე, შექმნას დამოუკიდებელი და მიუკერძოებელი განხილვის ეფექტიანი საშუალება. თუმცა

¹⁵⁴ მუხ. 3.3

¹⁵⁵ <http://ombudsman.ge/ge/specializirebuli-centrebi/bavshvis-uflebata-dacvis-centri/bavshvis-uflebebs-centris-shesaxeb>

¹⁵⁶ კანონი ზოგადი განათლების შესახებ, 04.08.2005 <https://matsne.gov.ge/ka/document/view/29248>

¹⁵⁷ მუხ.11

¹⁵⁸ მუხ.10

¹⁵⁹ მუხ.12

ჩანაწერი გასაჩივრების მექანიზმებზე ზოგადია და არ მოიცავს მოსწავლისთვის ინფორმაციის მიწოდებას გასაჩივრების პროცედურებზე და სათანადო კონსულტაციის და მხარდაჭერის სერვისს, მათ შორის, სპეციალური საჭიროების მქონე ბავშვისთვის, ასაკისა და განვითარების შესაბამისი საშუალებებით.

კანონი ფსიქიატრიული დახმარების შესახებ ადგენს, რომ 16 წლამდე ბავშვის ფსიქიატრიული დახმარება, მათ შორის, მკურნალობა, დასაშვებია მისი კანონიერი წარმომადგენლის თხოვნის ან/და ინფორმირებული თანხმობის საფუძველზე (აუცილებელია გადაწყვეტილების მიღების პროცესში პაციენტის მონაწილეობა მისი ასაკისა და ფსიქიკური ჯანმრთელობის მდგომარეობის გათვალისწინებით)¹⁶⁰. აქტიური ბიოლოგიური მეთოდებით (შოკური, კრუნჩხვითი და სხვა) მკურნალობა დასაშვებია კანონიერი წარმომადგენლის ინფორმირებული თანხმობით, მხოლოდ ექიმ-ფსიქიატრთა კომისიის გადაწყვეტილებით¹⁶¹.

ეს კანონი ადგენს, რომ 16 წლამდე ბავშვის ნებაყოფლობითი მკურნალობისთვის სტაციონარში განთავსება ხდება მისი კანონიერი წარმომადგენლის თხოვნითა და ინფორმირებული თანხმობით, ხოლო ბავშვის მონაწილეობა აუცილებელია მისი ასაკისა და ფსიქიატრიული მდგომარეობის გათვალისწინებით¹⁶².

„ჯანმრთელობის დაცვის შესახებ“ საქართველოს კანონით 16 წლამდე ასაკის არასრულწლოვანი პაციენტის გამოყენება სწავლების ობიექტად დასაშვებია მხოლოდ მისი მშობლის ან კანონიერი წარმომადგენლის ინფორმირებული თანხმობით. გადაწყვეტილების მიღებისას აუცილებელია პაციენტის მონაწილეობაც ასაკისა და გონებრივი განვითარების გათვალისწინებით¹⁶³. მიხედვითაც მცირეწლოვანი შეიძლება იყოს სამედიცინო-ბიოლოგიური კვლევის ობიექტი, თუ იგი არ გამოხატავს რაიმე წინააღმდეგობას და მიღებულია მისი ნათესავის ან კანონიერი წარმომადგენლის ინფორმირებული თანხმობა¹⁶⁴.

ორივე კანონის განხილული ნორმების თანახმად, ფსიქიატრიული მკურნალობის და სწავლების ობიექტად ბავშვის გამოყენების დროს სავალდებულოა კანონიერი წარმომადგენლის ინფორმირებული თანხმობა. მითითება არასრულწლოვანი პაციენტის მონაწილეობის აუცილებლობაზე მისი ასაკისა და ჯანმრთელობის/გონებრივი მდგომარეობის გათვალისწინებით ბუნდოვანია და მკაფიოდ არ ადგენს ბავშვის საუკეთესო ინტერესების შეფასების, მოსაზრებების მოსმენის და მხედველობაში მიღების, მისი სათანადოდ ინფორმირების და კონსულტაციის გაწევის ვალდებულებას. აქედან გამომდინარე, ამ ნორმების საფუძველზე ბავშვი შესაძლოა დაექვემდებაროს ამგვარ მკურნალობას და სწავლების ობიექტად გამოყენებას მისი სურვილის და საუკეთესო ინტერესების საწინააღმდეგოდ. რაც შეეხება გასაჩივრებას, ფსიქიატრიული მკურნალობის მეთოდების გამოყენების მიზანშეწონილობის სასამართლოში გასაჩივრება შეუძლია მხოლოდ კანონიერ წარმომადგენელს ან ნათესავს¹⁶⁵ და არ აღიარებს ბავშვის ან ბავშვის უფლებების სხვა დამცველთა უფლებას ხელმისაწვდომ და მორგებულ გასაჩივრების მექანიზმზე. ამავე დროს, გაურკვეველია, თუ რომელი უწყება ახორციელებს მონიტორინგს კვლევებში მონაწილე ბავშვის მიმართ განხორციელებული მეთოდების შესაბამისობაზე ამ ბავშვის საუკეთესო ინტერესებთან.

¹⁶⁰ მუხ. 10

¹⁶¹ მუხ. 8.2

¹⁶² მუხ. 17.1 „ბ“

¹⁶³ მუხ. 42

¹⁶⁴ მუხ. 110

¹⁶⁵ მუხ. 16.6

სამოქალაქო საპროცესო კოდექსი ადგენს, რომ სასამართლო მედიაციას ექვემდებარება: საოჯახო სამართლებრივი დავები, გარდა, შვილად აყვანისა, შვილად აყვანის ბათილობისა, მშობლის უფლების შეზღუდვის ან ჩამორთმევისა; სამემკვიდრეო დავა; სამეზობლო დავა; ნებისმიერი დავა, თუ მხარეები თანახმა არიან. სარჩელის სასამართლოში წარდგენის შემდეგ სასამართლო მედიაციას დაქვემდებარებული საქმე შეიძლება გადაეცეს მედიატორს (ფიზიკურ ან იურიდიულ პირს) დავის მხარეთა შეთანხმებით დასრულების მიზნით¹⁶⁶.

სასამართლო განხილვის ალტერნატივა ანუ მედიაცია მორიგების მიზნით არ მიუთითებს მონაწილე მხარეთა რაიმე ასაკობრივ შეზღუდვას, თუმცა არ მოიცავს ბავშვზე მორგებული მართლმსაჯულების მოთხოვნებს, როგორცაა: ბავშვისთვის მისთვის გასაგებ ენაზე და კომუნიკაციის საშუალებებით ინფორმაციის და კონსულტაციის მიწოდებას, ბავშვის მოსმენის და მისი აზრის გათვალისწინების წესს, მედიაციის პროცესში ბავშვის მონაწილეობის თავისებურებებს, მის ასაკსა და აღქმის დონესთან მისადაგებულ პროცედურებს, ა.შ. საერთოდ, კანონი არ ითვალისწინებს სასამართლოში საქმის სასარჩელო წესით წარმოების დაწყებამდე ბავშვის კონსულტირებას და ინფორმაციის მიწოდებას სასამართლო განხილვის ალტერნატიული მექანიზმის, მედიაციის შესაძლებლობის შესახებ.

3.3.2. პირადი და ოჯახური ცხოვრების დაცვა

ბავშვის უფლებათა კონვენციის მე-16 მუხლი ადგენს, რომ არცერთი ბავშვი არ უნდა დაექვემდებაროს მის პირად და ოჯახურ ცხოვრებაში ან პირად მიმოწერაში მიკერძოებულ ან უკანონო ჩარევას, ასევე, მისი ღირსებასა და რეპუტაციაზე უკანონო თავდასხმას. ბავშვის უფლებაა კანონით დაიცვას თავი ამგვარი ჩარევის ან თავდასხმისგან.

„ევროპის საბჭოს კონვენცია პირადი მონაცემების ავტომატური დამუშავებისას ინდივიდთა დაცვის შესახებ“¹⁶⁷:

- კრძალავს იმ პერსონალური მონაცემების დამუშავებას, რომელიც ეხება პირის წარმოშობას, პოლიტიკურ მოსაზრებებს ან რელიგიურ ან სხვა რწმენას, ჯანმრთელობას ან სექსუალურ ცხოვრებას, ასევე ნასამართლობას, თუ კანონი არ ადგენს დაცვის სათანადო გარანტიებს¹⁶⁸.
- ადგენს, რომ ავტომატური დამუშავების პერსონალური მონაცემები უნდა იყოს: მოპოვებული და დამუშავებული სამართლიანად და კანონიერად; ინახებოდეს კონკრეტული და ლეგიტიმური მიზნისთვის და არ იქნეს გამოყენებული ამ მიზნებთან შეუსაბამოდ; ადეკვატური, რელევანტური და არ აჭარბებდეს მიზანს, რომლისთვისაც ინახება; სწორი და საჭიროებისამებრ განახლებული; ინახებოდეს მონაცემთა სუბიექტის იდენტიფიცირებადი ფორმით მხოლოდ იმ ვადით, რა ვადაც დადგენილია ამ მონაცემის შენახვის მიზნისთვის¹⁶⁹.
- კონვენცია მოითხოვს, რომ ეროვნული კანონით ნებისმიერ პირს უნდა შეეძლოს დაადგინოს ავტომატურად დამუშავებული პერსონალური მონაცემთა ფაილის არსებობა, მისი მიზანი, ამ ფაილის ადმინისტრატორის ვინაობა და მდებარეობა;

¹⁶⁶ სამოქალაქო საპროცესო კოდექსი, მუხ. 187¹-187⁹

¹⁶⁷ ევროპის საბჭოს კონვენცია პერსონალური ინფორმაციის ავტომატური დამუშავების პროცესში ინდივიდთა დაცვის შესახებ, 1981/საქართველოს მიერ რატიფიცირებულია 14/12/2005 <http://www.coe.int/en/web/conventions/full-list/-/conventions/treaty/108>

¹⁶⁸ მუხ. 6

¹⁶⁹ მუხ. 5

მიიღოს გონივრული პერიოდულობით და დაგვიანების გარეშე, დადასტურება მის შესახებ პერსონალური მონაცემები შენახულია თუ არა ავტომატური დამუშავებით და დაცული ფორმით; მოითხოვოს მასთან დაკავშირებული პერსონალური მონაცემების წაშლა ან შესწორება, თუ დამუშავებულია კანონის და კონვენციის საწინააღმდეგოდ; ჰქონდეს წვდომა სამართლებრივი დაცვის საშუალებაზე, თუ მისი მოთხოვნები არ შესრულდა¹⁷⁰.

კონვენციის დამატებითი ოქმის თანახმად¹⁷¹, სახელმწიფომ უნდა შექმნას უწყება, რომელსაც ექნება გამოძიების და ჩარევის უფლებამოსილება, ასევე, სასამართლო წარმოების დაწყება დარღვევის შემთხვევაში. უწყებას უნდა ჰქონდეს საჩივრების განხილვის უფლებამოსილება¹⁷². ამგვარი უწყების ინტერვენციის ფორმა შეიძლება ეროვნულ კანონში აისახოს სხვადასხვა ფორმით, როგორცაა: სავალდებულო ძალის მქონე განკარგულება არასწორი ან უკანონოდ შეგროვილი მონაცემის წაშლის, განადგურების ან შესწორების შესახებ, მონაცემთა დამუშავებამდე სავალდებულო დასკვნის მიწოდების უფლებამოსილება, სხვა¹⁷³.

ევროპის მინისტრთა კომიტეტის „სახელმძღვანელო პრინციპები ბავშვზე მორგებული მართლმსაჯულების თაობაზე“¹⁷⁴ განმარტავს, რომ სახელმწიფოს კანონმდებლობით უნდა დარეგულირდეს სასამართლო ან სხვა სახის პროცესებში მონაწილე ბავშვთა პირადი ცხოვრების და პერსონალური მონაცემების დაცვა. კანონით უნდა იყოს გარანტირებული, რომ ბავშვთან დაკავშირებული ინფორმაცია ან პირადი მონაცემები არ იქნება ხელმისაწვდომი ან გამოქვეყნებული, განსაკუთრებით მედიით. ამ ინფორმაციაში იგულისხმება ისეთი მონაცემი, რომელსაც შეუძლია გაამჟღავნოს ან არაპირდაპირ მიუთითოს ბავშვის ვინაობაზე, როგორცაა გამოსახულება, ბავშვის ან ბავშვის ოჯახის დეტალური აღწერა, სახელები ან მისამართები, აუდიო და ვიდეო ჩანაწერები, ა.შ. მედიის მიერ ბავშვთა საკითხების გაშუქება უნდა დარეგულირდეს კანონმდებლობით ან მედიის თვით-რეგულირების მექანიზმით.

სახელმწიფომ უნდა უზრუნველყოს ბავშვების პირად მონაცემთა შემცველ დოკუმენტებზე ან ჩანაწერებზე დაშვების შეზღუდვა. განსაკუთრებით ისეთი მონაცემები, რომლებიც უკავშირდება, მაგალითად, დისციპლინურ ღონისძიებას ანტი-სოციალური ქცევისთვის, ძალადობის შემთხვევას, სამედიცინო ჩარევას, სპეციალურ განათლებას შშმ ბავშვისთვის ან ღარიბ ოჯახთა სოციალური დახმარების პროგრამაში მონაწილეობას¹⁷⁵.

თუ პირადი და სენსიტიური მონაცემების გადაცემა აუცილებელია, ბავშვის საუკეთესო ინტერესების გათვალისწინებით, ეს უნდა მოხდეს შესაბამისი მონაცემთა დაცვის კანონმდებლობის მიხედვით. ბავშვებთან მომუშავე ყველა პროფესიონალი შებოჭილი უნდა იყოს კონფიდენციალობის დაცვის მკაცრი წესებით, გარდა ისეთი შემთხვევისა, როდესაც ინფორმაციის გაუმჟღავნებლობა ბავშვის დაზიანების რისკს ქმნის

¹⁷⁰ მუხ. 8

¹⁷¹ ევროპის საბჭოს კონვენცია პერსონალური ინფორმაციის ავტომატური დამუშავების პროცესში ინდივიდთა დაცვის შესახებ, 28.01.1981/ საქართველოს მიერ რატიფიცირებულია 14/12/2005

¹⁷² მუხ. 1.2

¹⁷³ ევროპის საბჭოს კომენტარი კონვენციის დამატებით ოქმზე, პარა. 13

<https://rm.coe.int/CoERMPublicCommonSearchServices/DisplayDCTMContent?documentId=09000016800cce56>

¹⁷⁴ ევროპის მინისტრთა კომიტეტის „სახელმძღვანელო პრინციპები ბავშვზე მორგებული მართლმსაჯულების თაობაზე“, მითითებები 6-10 / განმარტებები, პარა: 57-62

¹⁷⁵ სახელმძღვანელო მითითებები, პარა. 57, გვ. 61

(მაგალითად, ესაა ბავშვის მოტაცების შემთხვევა, როდესაც ინფორმაციის გავრცელებამ ამ ფაქტზე შეიძლება ხელი შეუწყოს მის პოვნას)¹⁷⁶.

ზოგადი საკანონმდებლო გარანტიები

ზოგადი ადმინისტრაციული კოდექსის თანახმად, ყველას აქვს უფლება, გაეცნოს ადმინისტრაციულ ორგანოში არსებულ საჯარო ინფორმაციას, აგრეთვე მიიღოს მისი ასლები, თუ ისინი არ შეიცავენ სახელმწიფო, პროფესიულ ან კომერციულ საიდუმლოებას ან პერსონალურ მონაცემებს¹⁷⁷. კოდექსი ადგენს:

- ადმინისტრაციულ წარმოებაში მონაწილე საჯარო მოსამსახურეს უფლება არა აქვს გაამჟღავნოს ან არასამსახურებრივი მიზნით გამოიყენოს ადმინისტრაციული წარმოების დროს მიღებული ან შექმნილი საიდუმლო ინფორმაცია¹⁷⁸.
- პერსონალური მონაცემების ცნების განმარტება, დაცვასა და დამუშავებასთან დაკავშირებული ურთიერთობები წესრიგდება „პერსონალურ მონაცემთა დაცვის შესახებ“ საქართველოს კანონით¹⁷⁹.
- საჯარო დაწესებულება ვალდებულია წერილობითი თხოვნის საფუძველზე მიაწოდოს სხვა საჯარო დაწესებულებას მასთან დაცული პერსონალური მონაცემები სუბიექტის თანხმობით¹⁸⁰.
- ყველას აქვს უფლება იცოდეს: საჯარო მონაცემთა ბაზაში მისი პერსონალური მონაცემების არსებობა ან არარსებობა, აგრეთვე მათი გაცნობის წესი; იმ პირთა კატეგორია, რომელთაც კანონით უფლება აქვთ გაეცნონ საჯარო მონაცემთა ბაზაში არსებულ პერსონალურ მონაცემებს¹⁸¹.
- საჯარო დაწესებულება ვალდებულია არ გაახმაუროს პერსონალური მონაცემები თვით ამ პირის თანხმობის ან კანონით გათვალისწინებულ შემთხვევებში – სასამართლოს დასაბუთებული გადაწყვეტილების გარეშე¹⁸².
- ადმინისტრაციული წარმოების პერსონალური მონაცემების შემცველი მასალების გაცნობის უფლება პირს ენიჭება სასამართლოს გადაწყვეტილებით¹⁸³.
- სხდომის თავმჯდომარე უფლებამოსილია ადმინისტრაციული წარმოება ზეპირი მოსმენით დახურულად გამოაცხადოს პერსონალური მონაცემების დაცვის მიზნით¹⁸⁴.

კოდექსის მოქმედება არ ვრცელდება აღმასრულებელი ხელისუფლების ორგანოთა იმ საქმიანობაზე, რომელიც დაკავშირებულია: დანაშაულის ჩადენის გამო პირის სისხლისსამართლებრივ დევნასთან და სისხლის სამართლის საქმის წარმოებასთან; ოპერატიულ-სამძებრო საქმიანობასთან; სასამართლოს მიერ გამოტანილი და კანონიერ ძალაში შესული გადაწყვეტილების აღსრულებასთან¹⁸⁵. კოდექსის მე-3 თავი ინფორმაციის თავისუფლების შესახებ ვრცელდება, სასამართლო ხელისუფლების ორგანოებზეც¹⁸⁶.

¹⁷⁶ იგივე, პარა. 8, გვ. 22

¹⁷⁷ მუხ. 10

¹⁷⁸ მუხ. 11

¹⁷⁹ მუხ. 27¹

¹⁸⁰ მუხ. 37¹

¹⁸¹ მუხ. 42. „კ“, „ლ“

¹⁸² მუხ. 44.1

¹⁸³ მუხ. 99.2

¹⁸⁴ მუხ. 111.1

¹⁸⁵ მუხ. 4

¹⁸⁶ მუხ. 3.2 „დ“

კოდექსის მითითებით „პერსონალურ ინფორმაციადა“ მიიჩნევა ფიზიკური პირის საიდენტიფიკაციო ინფორმაცია ანუ ფიზიკური, ფიზიოლოგიური, ფსიქოლოგიური, ეკონომიკური, კულტურული ან სოციალური ნიშნის შემცველი ინფორმაცია, როგორც განმარტებულია კანონით „პერსონალურ მონაცემთა დაცვის შესახებ“ და არ მოიცავს განსაკუთრებული კატეგორიის მონაცემებს. კოდექსი გვაწვდის პერსონალური ინფორმაციის დაცვის რამდენიმე მნიშვნელოვან გარანტიას, როგორცაა: საჯარო მოსამსახურეთა მიერ საიდუმლო (მათ შორის, პერსონალური) ინფორმაციის გამჟღავნების ან არასამსახურებრივი მიზნით გამოყენების აკრძალვა, საჯარო დაწესებულებებს შორის პერსონალური ინფორმაციის გაცვლა მხოლოდ წერილობითი ფორმით და სუბიექტის თანხმობით, პირის უფლება იცოდეს მის შესახებ არსებული პერსონალური ინფორმაციის შესახებ, სხდომის დახურვა პერსონალური მონაცემების დაცვის მიზნით. თუმცა ამ დებულებების გარდა ეს საკანონმდებლო აქტი არ მოიცავს ბავშვებთან დაკავშირებული პერსონალური ინფორმაციის შექმნის, დამუშავების, შენახვის და მართვის ისეთ მნიშვნელოვან პრინციპებს, როგორცაა: ლეგიტიმური მიზანი, კანონიერება და სამართლიანობა, ხანგრძლივობა, შენახვის პირობები და უსაფრთხოება.

კანონმდებლობით ადმინისტრაციული წარმოებით განიხილება ბავშვებთან დაკავშირებული რიგი საკითხები, მათ შორის: განათლების სამინისტროსთან არსებული ექსპერტთა ჯგუფის ადმინისტრაციული წარმოება ანტისოციალური ქცევის ბავშვებთან დაკავშირებით, სოციალური დახმარების საკითხის განხილვა სახელმწიფო უწყებების ან ადგილობრივი თვითმმართველობის ორგანოების მიერ, ძალადობისგან ბავშვის დაცვის ღონისძიებები, როგორცაა, სოციალური მუშაკის გადაწყვეტილება ბავშვის მოძალადისგან განცალკევების შესახებ, სამედიცინო ჩარევის შესახებ გადაწყვეტილების მიღებისას (მაგ. ფსიაქიატრიული მკურნალობის და ა.შ.), ასევე, ნებისმიერი სხვა საკითხი, რომელიც სახელმწიფო ხელისუფლების ან თვითმმართველი ორგანოების გადასაწყვეტია ნებისმიერ სექტორში და პირდაპირ ან არაპირდაპირ ეხება ბავშვის უფლებებს. რეკომენდირებულია ამ საკითხებზე განსაკუთრებით მნიშვნელოვანია ბავშვთა პირადი მონაცემების დაცვა და კოდექსი უნდა ითვალისწინებდეს ერთიან, მკაფიო და აღსრულებად დაცვის საშუალებებს (ინფორმაციაზე წვდომის რეგულირება, ინფორმაციის დაცვაზე პასუხისმგებელი პირი, ინფორმაციის კონფიდენციალობის დარღვევის შემთხვევაში გასაჩივრების ეფექტური მექანიზმი, სხვა) ადმინისტრაციული ორგანოების მიერ ბავშვთა მონაწილეობით ადმინისტრაციული წარმოების პროცესში.

„პერსონალურ მონაცემთა დაცვის შესახებ“ კანონის მიზანია პერსონალური მონაცემების დამუშავებისას უზრუნველყოს ადამიანის უფლებათა და თავისუფლებათა, მათ შორის, პირადი ცხოვრების ხელშეუხებლობის დაცვა¹⁸⁷. კანონის თანახმად, **პერსონალური მონაცემი არის ნებისმიერი ინფორმაცია**, რომელიც უკავშირდება იდენტიფიცირებულ ან იდენტიფიცირებად ფიზიკურ პირს. პირი იდენტიფიცირებადია, როდესაც შესაძლებელია მისი იდენტიფიცირება პირდაპირ ან არაპირდაპირ, კერძოდ, საიდენტიფიკაციო ნომრით ან პირის მახასიათებელი ფიზიკური, ფიზიოლოგიური, ფსიქოლოგიური, ეკონომიკური, კულტურული ან სოციალური ნიშნებით¹⁸⁸. **კანონი არ ვრცელდება:** სასამართლოში მიერ მონაცემთა დამუშავებაზე სამართალწარმოების დაზიანების საფრთხის თავიდან აცილების მიზნით¹⁸⁹; მედიასაშუალების მიერ მონაცემთა დამუშავებაზე საზოგადოების ინფორმირების მიზნით (თუმცა ეკისრება მონაცემთა საიდუმლოების დაცვის ვალდებულება)¹⁹⁰; დანაშაულის გამოძიების მიზნით მონაცემთა დამუშავებაზე, თუ

¹⁸⁷ მუხ. 1

¹⁸⁸ მუხ. 2. „ა“

¹⁸⁹ მუხ.3.3 „ბ“

¹⁹⁰ მუხ.3.4

საკითხი რეგულირდება სისხლის სამართლის საპროცესო კოდექსით ან ოპერატიული-სამძებრო საქმიანობის შესახებ ან სხვა სპეციალური კანონით¹⁹¹.

განსაკუთრებული კატეგორიის მონაცემი არის მონაცემი, რომელიც დაკავშირებულია პირის რასობრივ ან ეთნიკურ კუთვნილებასთან, პოლიტიკურ შეხედულებებთან, რელიგიურ ან ფილოსოფიურ მრწამსთან, პროფესიულ კავშირში გაწევრებასთან, ჯანმრთელობის მდგომარეობასთან, სქესობრივ ცხოვრებასთან, ნასამართლობასთან, ადმინისტრაციულ პატიმრობასთან, პირისთვის აღკვეთის ღონისძიების შეფარდებასთან, პირთან საპროცესო შეთანხმების დადებასთან, განრიდებასთან, დანაშაულის მსხვერპლად აღიარებასთან ან დაზარალებულად ცნობასთან, აგრეთვე ბიომეტრიული და გენეტიკური მონაცემები, რომლებიც ზემოაღნიშნული ნიშნებით ფიზიკური პირის იდენტიფიცირების საშუალებას იძლევა¹⁹². განსაკუთრებული კატეგორიის მონაცემთა დამუშავება აკრძალულია სუბიექტის თანხმობის გარეშე, გარდა შემდეგი გამონაკლისებისა¹⁹³:

- მონაცემთა დამუშავება აუცილებელია მონაცემთა სუბიექტის ან მესამე პირის სასიცოცხლო ინტერესების დასაცავად და სუბიექტს ფიზიკურად ან სამართლებრივად უნარი არა აქვს, მონაცემთა დამუშავებაზე თანხმობა განაცხადოს;
- მონაცემები მუშავდება საზოგადოებრივ ჯანმრთელობის დაცვის, ჯანმრთელობის დაცვის ან დაწესებულებების მიერ ფიზიკური პირის ჯანმრთელობის დაცვის მიზნით, ასევე ჯანმრთელობის სისტემის მართვის ან ფუნქციონირებისთვის;
- მონაცემები მუშავდება ბრალდებულთა/მსჯავრდებულთა პირადი საქმეებისა და რეესტრების წარმოების, მსჯავრდებულის მიმართ მის მიერ სასჯელის მოხდის ინდივიდუალური დაგეგმვის ან/და მსჯავრდებულის სასჯელის მოხდისგან პირობით ვადამდე გათავისუფლებასთან და მისთვის სასჯელის მოუხდელი ნაწილის უფრო მსუბუქი სახის სასჯელით შეცვლასთან დაკავშირებული საკითხების განხილვის მიზნით.

აღსანიშნავია, რომ კანონი არ მოიცავს კონკრეტულ დებულებებს ბავშვთა პირადი მონაცემების დაცვის შესახებ. რეკომენდირებულია საკანონმდებლო ცვლილებების შემუშავებისას გათვალისწინებული იქნეს ამ კანონით ან სხვა შესაბამისი სფეროს მარეგულირებელი კანონებით ისეთი პერსონალური ინფორმაციის დამუშავების და დაცვის საკითხები, რომელიც ეხება ბავშვთა ალტერნატიულ ზრუნვაში განთავსებას, ოჯახურ დავებს, თავშესაფრის მამიებელ ბავშვებს, განათლების საკითხებს, ჯანმრთელობის დაცვას, ადმინისტრაციულ სანქციებს და ასევე, სისხლის სამართლის პასუხისმგებლობის ასაკს მიუღწეველ ბავშვთა მიერ სისხლის სამართლის კოდექსით გათვალისწინებული ქმედების ჩადენის საქმეს.

კანონი ინფორმაციული უსაფრთხოების შესახებ მიზნად ისახავს ხელი შეუწყოს ინფორმაციული უსაფრთხოების დაცვის ქმედით და ეფექტიან განხორციელებას, დააწესოს საჯარო და კერძო სექტორების უფლება-მოვალეობები ინფორმაციული უსაფრთხოების დაცვის სფეროში, აგრეთვე განსაზღვროს ინფორმაციული უსაფრთხოების პოლიტიკის განხორციელების სახელმწიფო კონტროლის მექანიზმები¹⁹⁴. კანონი „კრიტიკულ ინფორმაციულ სისტემას“ განმარტავს, როგორც ინფორმაციული სისტემას, რომლის უწყვეტი ფუნქციონირება მნიშვნელოვანია ქვეყნის თავდაცვისათვის ან/და

¹⁹¹ მუხ. 3.6

¹⁹² მუხ. 2. „ბ“

¹⁹³ მუხ. 6.2 „ბ“, „გ“, „ვ“

¹⁹⁴ მუხ. 1

ეკონომიკური უსაფრთხოებისათვის, სახელმწიფო ხელისუფლების ან/და საზოგადოების ნორმალური ფუნქციონირებისათვის.

მართალია, გარკვეულწილად ბუნდოვანია, თუ რა იგულისხმება „საზოგადოების ნორმალურ ფუნქციონირებაში“, თუმცა არ გამოირიცხება ამ ტერმინის ქვეშ ვიგულისხმობთ ბავშვთა პირადი მონაცემების დაცვის საკითხი, რაც საბოლოო ჯამში ბავშვთა, როგორც საზოგადოების წევრთა, კეთილდღეობას ემსახურება. რეკომენდირებული საკანონმდებლო ცვლილებების განხორციელების პროცესში დამატებით მოხდეს ამ კანონის გაანალიზება და, შეძლებისდაგვარად, ცალკე თავი მიეძღვნას ბავშვთა პერსონალური ინფორმაციის უსაფრთხოების სპეციფიკურ გარანტიებს.

ბავშვთა პირადი მონაცემების დაცვა ევროკავშირის ქვეყნებში¹⁹⁵
ევროკავშირის 26 ქვეყნის კანონმდებლობით გათვალისწინებულია ბავშვთა პირადი მონაცემების მკაცრი კონფიდენციალობით დაცვა მესამე პირთაგან. დაცვის სათანადო პროცედურები ძირითადად ეხება: ალტერნატიულ ზრუნვაში განთავსებას, საოჯახო საკითხებს, თავშესაფრის მაძიებელთა საკითხებს, განათლების საკითხებს, ჯანმრთელობის, ადმინისტრაციულ სანქციებს და ასევე, სისხლის სამართლის პასუხისმგებლობის ასაკს მიუღწეველ ბავშვთა მიერ სისხლის სამართლის კოდექსით გათვალისწინებული ქმედების ჩადენის საქმეს.

ბავშვთა პირადი მონაცემების დაცვა სამოქალაქო და ადმინისტრაციული სამართალწარმოების დროს

სამოქალაქო საპროცესო კოდექსი¹⁹⁶ ადგენს სასამართლო მედიაციის პროცესის კონფიდენციალურობის შესახებ, რომელიც მედიატორსა და მხარეს უკრძალავს მედიაციის პროცესში მოპოვებული ინფორმაციის გამჟღავნებას¹⁹⁷. სხვა მხრივ, პროცესის დახურულად გამოცხადება შესაძლებელია მხარის მოტივირებული შუამდგომლობით¹⁹⁸.

ადმინისტრაციული საპროცესო კოდექსი¹⁹⁹ ძალადობისგან ბავშვის დაცვის ღონისძიებების განხილვის დროს ითვალისწინებს მოსამართლის უფლებამოსილებას მხარის ან საკუთარი ინიციატივით საქმე დახურულ სხდომაზე განიხილოს²⁰⁰. მოსამართლე დახურულ სხდომაზე განიხილავს საქმეს არანებაყოფლობითი ფსიქიატრიული დახმარების შესახებ²⁰¹. სკოლა-პანსიონში გაგზავნის საკითხიც განიხილება დახურულ სხდომაზე²⁰².

კოდექსებში არ გვხვდება სხვა განსაკუთრებული დაცვის გარანტიები სასამართლო წარმოების პროცესში მონაწილე ბავშვთა პირადი მონაცემების კონფიდენციალობის შესახებ.

კანონმდებლობა უნდა ითვალისწინებდეს სათანადო ზომებს და ერთიან სტანდარტს ყველა სფეროში ბავშვის პირადი ცხოვრების და რეპუტაციის დასაცავად და ისეთი

¹⁹⁵ ბავშვზე მორგებული მართლმსაჯულება ევროკავშირის ქვეყნებში, გვ. 36

¹⁹⁶ <https://matsne.gov.ge/ka/document/view/29962>

¹⁹⁷ მუხ. 187⁸

¹⁹⁸ მუხ. 9.1

¹⁹⁹ <https://matsne.gov.ge/ka/document/view/16492>

²⁰⁰ მუხ. 21¹².10

²⁰¹ მუხ. 21¹⁸.2

²⁰² მუხ. 21³⁷.2

ინფორმაციის გავრცელების თავიდან აცილებისთვის, მათ შორის, მედიის მიერ, რაც გამოიწვევს პროცესში მონაწილე ბავშვის ინდენტიფიცირებას²⁰³.

ბავშვთა პირადი მონაცემების დაცვა ზოგადი განათლების სისტემაში

კანონი ზოგადი განათლების შესახებ ადგენს, რომ მოსწავლის პერსონალური მონაცემების შეგროვებისას და შენახვისას სკოლა ხელმძღვანელობს ზოგადი ადმინისტრაციული კოდექსის მოთხოვნებით. სკოლას უფლება აქვს მოსწავლეს მოსთხოვოს სამედიცინო შემოწმების გავლა დაავადებებზე, ალკოჰოლზე, ნარკოტიკებზე²⁰⁴. განათლების მართვის საინფორმაციო სისტემის ერთ-ერთი ფუნქციაა მოსწავლეთა პერსონალური მონაცემების აღრიცხვა²⁰⁵.

ანტისოციალური ქცევის მქონე არასრულწლოვნის მიმართ გადამისამართების ღონისძიებების, მათ შორის, სხვა სკოლაში გადაყვანის, სკოლა-პანსიონში გაგზავნის შესახებ გადაწყვეტილებას იღებს ადმინისტრაციული ორგანი, კერძოდ, განათლების და მეცნიერების სამინისტროსთან არსებული ექსპერტთა ჯგუფი, ხოლო შემდეგ ეტაპზე - სასამართლო ადმინისტრაციული სამართალწარმოების წესით. მართალია, მითითება კეთდება სასამართლო სხდომის დახურვაზე, თუმცა არ გვხვდება სხვა ღონისძიებები პერსონალური მონაცემების დაცვის და კონფიდენციალობის დაცვის მიზნით არც ზოგადი ადმინისტრაციული კოდექსით და არც ადმინისტრაციული საპროცესო კოდექსით.

განხილული ნორმების შინაარსით ირკვევა, რომ სკოლა მოსწავლის პერსონალური, მათ შორის, განსაკუთრებული კატეგორიის (ჯანმრთელობის) მონაცემების დამუშავებისას ხელმძღვანელობს ზოგადი ადმინისტრაციული კოდექსით. თუმცა როგორც ზემოთ აღინიშნა, ეს კოდექსი არ მოიცავს პერსონალური მონაცემების შექმნის, დამუშავების, შენახვის და მართვის ისეთ მნიშვნელოვან პრინციპებს, როგორცაა: ლეგიტიმურობა, კანონიერება და სამართლიანობა, ხანგრძლივობა, შენახვის პირობები და უსაფრთხოება, ინფორმაციაზე წვდომა პასუხისმგებელი საჯარო დაწესებულების შიგნით და ა.შ. ამასთანავე, კოდექსი ეხება მხოლოდ პერსონალურ ინფორმაციას და არა განსაკუთრებული კატეგორიის მონაცემთა დაცვის საკითხებს.

რეკომენდებულია შეიქმნას ბავშვის პერსონალური მონაცემების დაცვის საკანონმდებლო გარანტიები განათლების სისტემაში, განსაკუთრებით, ბავშვთა მიმართ დისციპლინური ღონისძიებების გამოყენების კუთხით, რათა თავიდან ავიცილოთ ბავშვთა სტიგმატიზაცია და მათ პირად ცხოვრებაში არასათანადო ჩარევა.

ბავშვთა პირადი მონაცემების დაცვა ჯანმრთელობის დაცვის სისტემაში

როგორც ზემოთ განვიხილეთ, კანონი „პერსონალური მონაცემების დაცვის შესახებ“ უშვებს განსაკუთრებული კატეგორიის მონაცემთა დამუშავებას სუბიექტის თანხმობის გარეშე ჯანმრთელობის დაცვის საკითხებზე. მართალია, იგივე კანონი ადგენს ყველა სახის პირადი მონაცემის დამუშავების წესებს და ნებისმიერ პირს ანიჭებს უფლებას მოითხოვოს მის შესახებ არაკანონიერად დამუშავებული მონაცემების წაშლა ან განადგურება, თუმცა სუბიექტის თანხმობის არასავალდებულო ხასიათი სხვადასხვა უწყებებს უტოვებს სივრცეს შეაგროვოს, შეინახოს და გასცეს ამგვარი მონაცემები რეგულირების გარეშე.

²⁰³ ამ საკითხზე, დამატებით იხილეთ: იხ. ევროპის საბჭოს კონვენცია ადამიანთა ტრეფიკინგის წინააღმდეგ (16.05.2005) /საქართველოს მიერ რატიფიცირებულია 14.03.2007; გაეროს სახელმძღვანელო პრინციპები მართლმსაჯულების შესახებ მოწმე და მსხვერპლი ბავშვების მონაწილეობით (ECOSOC Res 2005/20, 22 July 2005) პარა. X.27

²⁰⁴ მუხ. 17

²⁰⁵ მუხ. 28.2 „დ“

რაც შეეხება უშუალოდ ჯანმრთელობის სფეროს მარეგულირებელ კანონმდებლობას, მოიცავს ზოგად დებულებებს და ვერ უზურუნველყოფს პირის ჯანმრთელობასთან დაკავშირებული მონაცემების დაცვის გარანტიებს, რაც თავისთავად ცხადია, რომ უფრო მეტად დაუცველს ტოვებს ბავშვის პირადი და ოჯახური ცხოვრების კონფიდენციალობის დაცვის უფლებას. კერძოდ:

- **კანონები ჯანმრთელობის დაცვის, პაციენტის უფლებების და ფსიქიატრიული დახმარების შესახებ** არ მოიცავს პერსონალური მონაცემების, მათ შორის, განსაკუთრებული კატეგორიის მონაცემების განმარტებას. კანონი ჯანმრთელობის დაცვის შესახებ განმარტავს სამედიცინო საიდუმლოს, როგორც „ექიმის და სხვა სამედიცინო პერსონალის მიერ პროფესიული საქმიანობის პროცესში პაციენტის ფიზიკური, ფსიქიკური მდგომარეობის, მისი საზოგადოებრივი ან სამსახურებრივი საქმიანობის, ოჯახური ან პირადი ცხოვრების შესახებ მიღებული ინფორმაცია; ექიმისათვის მიმართვის ფაქტს, აგრეთვე, სიკვდილის გარემოებებს“²⁰⁶. განსაკუთრებული კატეგორიის პირადი მონაცემები მოიცავს გაცილებით მეტ სენსიტიური კატეგორიის ინფორმაციას, ვიდრე ფიზიკური, ფსიქიკური და პირადი ცხოვრების შემცველ დეტალებს²⁰⁷;
- **კანონი ჯანმრთელობის დაცვის შესახებ** ადგენს, რომ მედიცინის მუშაკი და სამედიცინო დაწესებულების ყველა თანამშრომელი ვალდებულია დაიცვას სამედიცინო (საექიმო) საიდუმლო, გარდა იმ შემთხვევებისა, როცა კონფიდენციალური ინფორმაციის გამჟღავნებას მოითხოვს გარდაცვლილის ნათესავი ან კანონიერი წარმომადგენელი, სასამართლო, საგამოძიებო ორგანოები, ან ეს აუცილებელია საზოგადოებრივი უსაფრთხოების უზრუნველსაყოფად, სხვათა უფლებებისა და თავისუფლებების დასაცავად²⁰⁸. ეს ნორმა იძლევა ძალიან ფართო ინტერპრეტაციის საშუალებას და სამედიცინო დაწესებულების თანამშრომლებს უფლებას ანიჭებს თავიანთი შეხედულებისამებრ გადაწყვიტონ სამედიცინო საიდუმლოს გამჟღავნება, თუ ჩათვლიან, რომ ეს აუცილებელია სხვათა უფლებების დასაცავად (მაგ. იმ მოტივით, რომ სურს სხვების დაცვა გადამდები დაავადებისგან, გამჟღავნებს კონკრეტული ადამიანის ჯანმრთელობის სტატუსს).
- **იგივე დებულებას იმეორებს კანონი პაციენტის უფლებების შესახებ, რომ** კონფიდენციალური ინფორმაციის გამჟღავნება დასაშვებია პაციენტის თანხმობით ან ამ თანხმობის გარეშე, თუ გაუმჟღავნებლობა საფრთხეს უქმნის მესამე პირების სიცოცხლეს ან ჯანმრთელობას ან გათვალისწინებულია კანონმდებლობით. ოჯახში ძალადობის შესაძლო ფაქტთან დაკავშირებული ინფორმაცია მიეწოდება მხოლოდ შესაბამის სახელმწიფო ორგანოს პაციენტის უფლებებისა და ინტერესების დასაცავად²⁰⁹. ნორმის შინაარსიდან ჩანს, რომ მაშინ, როდესაც ოჯახში ძალადობის შესახებ ინფორმაცია მიეწოდება მხოლოდ კომპეტენტურ ორგანოს, სხვა სახის კონფიდენციალური ინფორმაცია შეიძლება მიეწოდოს პაციენტის თანხმობის გარეშე არაუფლებამოსილ მესამე პირებსაც, თუ მედიცინის მუშაკი ჩათვლის, რომ ეს აუცილებელია მესამე პირთა ჯანმრთელობისა და სიცოცხლის დასაცავად.
- **კანონი ფსიქიატრიული დახმარების შესახებ** ადგენს, რომ ინფორმაციის გაცემა მესამე პირზე შესაძლებელია პაციენტის ან მისი კანონიერი წარმომადგენლის თანხმობით, ანდა სასამართლოს გადაწყვეტილებით²¹⁰. თანხმობის გარეშე

²⁰⁶ მუხ. 3. „ჩ“

²⁰⁷ მუხ. 2. „ბ“

²⁰⁸ მუხ. 42

²⁰⁹ მუხ. 28.1

²¹⁰ მუხ. 26.3

შესაძლებელია ამ ინფორმაციის გაცემა თუ საფრთხე ექმნება პაციენტის ან მესამე პირის სიცოცხლეს ან/და ჯანმრთელობას²¹¹.

კიდევ ერთხელ ხაზგასმით აღსანიშნავია, რომ ევროპის საბჭოს სამართლებრივი სტანდარტებით ძალიან დიდი მნიშვნელობა ენიჭება ბავშვთა პირადი მონაცემების დაცვას და ამ მონაცემებზე დაშვების შეზღუდვას, განსაკუთრებით, როდესაც საქმე ეხება ჯანმრთელობის და სამედიცინო ჩარევის საკითხებს. ევროპის სასამართლო, ასევე, ძალიან მაღალი სტანდარტით განიხილავს სახელმწიფო დაწესებულებების მიერ პირადი მონაცემების შენახვის საკითხი.

რეკომენდებულია გადაიხედოს განხილული კანონები და შეიქმნას სამართლებრივი დაცვის გარანტიები ბავშვთა პირადი მონაცემების დაცვისთვის ჯანდაცვის სისტემაში.

საქმე „ავილკინა და სხვები რუსეთის წინააღმდეგ“²¹² ეხება ორი წლის გოგონას სამედიცინო ისტორიის პროკურორისთვის მიწოდებას მისი მოთხოვნის თანახმად, რათა მოეპოვებინა ინფორმაცია „იეჰოვას მოწმეთა“ მიერ სისხლის გადასხმის უარყოფის შესახებ. ევროპის სასამართლომ გაითვალისწინა რა, რომ დანაშაულის გამოძიების ინტერესებმა შესაძლოა გადაწონოს პაციენტის და თემის ინტერესები სამედიცინო ინფორმაციის დაცვასთან დაკავშირებით, თუმცა აღნიშნა, რომ განმცხადებელი არ იყო ექვმიტანილი ან ბრალდებული რაიმე დანაშაულის ჩადენაში. ამასთანავე, განმცხადებლის მკურნალ ექიმებს შეეძლოთ მიემართათ ეროვნული სასამართლოსთვის გოგონასთვის სისხლის გადასხმის მოთხოვნით, თუ თვლიდნენ, რომ ამის გარეშე გოგონას სიცოცხლეს საფრთხე ემუქრებოდა. აქედან გამომდინარე, ევროპის სასამართლომ დაასკვნა, რომ განმცხადებლის სამედიცინო ინფორმაციის გამჟღავნება პროკურორისთვის გადაუდებელი სოციალური აუცილებლობის გარეშე, წარმოადგენდა კონვენციის მე-8 მუხლის დარღვევას.

3.3.3. პროფესიონალთა სპეციალიზაცია და მულტიდისციპლინური მიდგომა

ევროპის საბჭოს კონვენცია ბავშვთა სექსუალური ექსპლუატაციისა და სექსუალური ძალადობისგან დაცვის შესახებ²¹³ მოითხოვს, რომ სახელმწიფომ გაატაროს საკანონმდებლო ღონისძიებები იმ პირთა ცნობიერების ასამაღლებლად ბავშვთა დაცვის საკითხებზე, რომლებსაც რეგულარული კონტაქტი აქვთ ბავშვებთან საგანმანათლებლო, ჯანდაცვის, სოციალური დაცვის, იურიდიულ და სამართალდამცავ, ასევე სპორტის, კულტურისა და დასვენების სფეროში. ეს პირები, აგრეთვე, უნდა ფლობდნენ შესაბამის ცოდნას ბავშვების სექსუალური ექსპლუატაციისა და მათ მიმართ სექსუალური ძალადობის შესახებ²¹⁴.

კონვენცია, აგრეთვე, მოითხოვს, სახელმწიფომ გაატაროს შესაბამისი საკანონმდებლო ზომა, რაც უზრუნველყოფს ბავშვებთან სამუშაო პროფესიათა მაძიებელი კანდიდატები არ იქნებიან წარსულში ნასამართლავი ბავშვთა სექსუალური ექსპლუატაციის და ძალადობის დანაშაულებზე²¹⁵.

²¹¹ მუხ. 26.4

²¹² Case of Avilkina and Others vs. Russia / Application no. 1585/09 / Final Judgement 07/10/2013

²¹³ კონვენცია მიღებულია 25/10/2007. საქართველოს მიერ რატიფიცირებულია 23/09/2014

²¹⁴ კონვენციის მუხ. 5

²¹⁵ მუხ. 5.3

ევროპის საბჭოს მითითებები განმარტავს, ბავშვებთან მომუშავე ყველა პროფესიონალმა უნდა მიიღოს აუცილებელი ინტერდისციპლინური მომზადება ბავშვის უფლებების, სხვადასხვა ასაკობრივი საჭიროებების და ბავშვზე მორგებული პროცესის შესახებ. მათი გადამზადება უნდა მოხდეს აგრეთვე ნებისმიერი ასაკის და განვითარების ბავშვთან კომუნიკაციის მეთოდებზე, განსაკუთრებით, მოწყვლად სიტუაციაში მყოფ ბავშვებთან დაკავშირებით²¹⁶.

მულტიდისციპლინური მიდგომის განსახორციელებლად უნდა შემუშავდეს ერთიანი შეფასების ჩარჩო სხვადასხვა პროფესიონალების მონაწილეობით (როგორცაა, იურისტები, ფსიქოლოგები, ექიმები, სოციალური მუშაკები და მედიატორები, პოლიცია და მიგრაციის სამსახური საჭიროებისამებრ), რომელიც უზრუნველყოფს მათ ერთობლივ მონაწილეობას გადაწყვეტილების მიღების პროცესში ბავშვის საუკეთესო ინტერესების შესაბამისად. მულტიდისციპლინური მუშაობის დროს მკაცრად უნდა იქნეს დაცული კონფიდენციალობის პროფესიული წესები²¹⁷.

პროფესიონალთა სპეციალიზაცია არასრულწლოვანთა საკითხებზე პირველად დაინერგა სისხლის სამართლის სისტემაში. **არასრულწლოვანთა მართლმსაჯულების კოდექსი**²¹⁸ მოითხოვს, რომ კანონთან კონფლიქტში მყოფ არასრულწლოვანთან, მსხვერპლ და მოწმე ბავშვებთან მომუშავე ყველა პროფესიონალი ვალდებულია იყოს სპეციალიზებული ბავშვთა საკითხებზე.

ევროპის საბჭოს რეკომენდაცია წევრ სახელმწიფოებს²¹⁹: შექმნან ბავშვთა საქმეებზე სპეციალიზებულ მოსამართლეთა და ადვოკატთა სისტემა, და იმგვარად განავითარონ სასამართლოები, რომ სამართლებრივი და სოციალური ელემენტების კომბინაცია იქნეს გათვალისწინებული ბავშვების და მათი ოჯახების სასარგებლოდ.

კანონმდებლობით სავალდებულო არაა იმ პროფესიონალთა სპეციალიზაცია, რომლებიც ბავშვებთან მუშაობენ **სამოქალაქო და ადმინისტრაციული** მართლმსაჯულების სფეროებში, რაც საკითხთა ფართო სპექტრს მოიცავს და ფაქტობრივად ფარავს ყველა სფეროს/სექტორს სისხლის სამართლის მართლმსაჯულების გარდა. სავალდებულო სპეციალიზაცია უნდა დაინერგოს ფართოდ ისე, რომ სისხლის სამართლის სისტემის გარდა მოიცვას სამოქალაქო და ადმინისტრაციული სასამართლო წარმოებასაც, ასევე, ადმინისტრაციულ ორგანოებში საქმის წარმოება და ალტერნატიული სასამართლო განხილვის მექანიზმი, სასამართლო მედიაცია.

საერთაშორისო სტანდარტების²²⁰ თანახმად, პროფესიონალთა სპეციალიზაციის ინსტიტუციურმა სისტემამ უნდა უზრუნველყოს განგრძობადი სწავლება/ტრენინგები ბავშვთან კომუნიკაციის უნარებში (ბავშვის ფსიქოლოგია, ბავშვისთვის გასაგები ენა) ბავშვებთან მომუშავე ყველა პროფესიონალისთვის (ადვოკატები, მოსამართლეები, მედიატორები, სოციალური მუშაკები, ფსიქოლოგები და სხვა სპეციალისტები, რომლებმაც შეიძლება მონაწილეობა მიიღონ ბავშვის მულტიდისციპლინური შეფასების ან/და ფსიქო-სოციალური და სამედიცინო დახმარების/რეაბილიტაციის პროცესში). სწავლების მიზანი

²¹⁶ იგივე, პარა. 14-18

²¹⁷ იგივე, 16-18. გვ. 23

²¹⁸ <https://matsne.gov.ge/ka/document/view/2877281>

²¹⁹ ევროპის საბჭოს სახელმძღვანელო მითითებები, V.f. გვ. 33

²²⁰ ევროპის საბჭოს სახელმძღვანელო მითითებები, 2010; ასევე,

უნდა იყოს როგორც ბავშვთან მუშაობის შესახებ ცოდნის მიწოდება, ასევე, უნარ-ჩვევების გამომუშავება/გაუმჯობესება და სათანადო მიდგომების და ღირებულებების განვითარება.

ბელგიის ადვოკატთა ასოციაციას აქვს ბავშვებთან საქმეებზე მომუშავე სპეციალიზებული ადვოკატების ცალკე განყოფილება. ასოციაცია სთვალავს ადვოკატებს ორწლიან კურსს ბავშვთა უფლებებზე. კურსის პროგრამა მოიცავს კანონმდებლობას, საბაზისო სწავლებას ბავშვთა ფსიქოლოგიისა და განვითარების თემაზე და პრაქტიკულ სწავლებას ბავშვთან კომუნიკაციის მეთოდებზე. ესაა სავალდებულო კურსი „ბავშვთა სპეციალიზებული ადვოკატის“ სერტიფიკატის მისაღებად.

რაც შეეხება მულტიდისციპლინურ მიდგომას, მოსამართლეებმა და სამართლის სფეროს სხვა სპეციალისტებმა ბავშვთან დაკავშირებული გადაწყვეტილებები უნდა მიიღონ სხვა პროფესიის სპეციალისტებთან კონსულტაციის და ურთიერთმხარდაჭერის გზით, განსაკუთრებით ისეთ საკითხებზე, როგორცაა ბავშვის საუკეთესო ინტერესების შეფასება, პროცესში მონაწილეობის შესაძლო საზიანო შედეგი ბავშვზე და სხვა.

სასამართლოს მულტიდისციპლინური მიდგომა

ევროპის 16 ქვეყნის კანონმდებლობით განმტკიცებულია სამოქალაქო და ადმინისტრაციულ სასამართლო პროცესებში მონაწილე ბავშვის მდგომარეობის ყოველმხრივი შესწავლის ვალდებულება. ამ მიზნით ტარდება ბავშვის მდგომარეობის შეფასება სამართლებრივ, ფსიქოლოგიურ, სოციალურ, ემოციურ, ფიზიკური ჯანმრთელობის და კოგნიტიური კუთხით. ეს მულტიდისციპლინური მიდგომა ფუნქციონირებს ფორმალური თანამშრომლობის პროცედურით სასამართლოსა და ბავშვთა საკითხებზე მომუშავე სხვადასხვა სახელმწიფო უწყებების პროფესიონალებს შორის.

ავსტრია

ბავშვის საუკეთესო ინტერესების განსაზღვრის მიზნით, ავსტრიის სამოქალაქო კოდექსი ადგენს, რომ „ბავშვის კეთილდღეობა“ უნდა იყოს გადაწყვეტილების გამოტანის წამყვანი პრინციპი და ადგენს ძირითად შეფასების კრიტერიუმებს მოსამართლისთვის:

- ბავშვის ფიზიკური და ფსიქოლოგიური დაცვა და უსაფრთხოება;
- მშობლების მიერ ბავშვის მიმართ პატივისცემა და მიმღებლობა;
- ბავშვის ტალანტების, შესაძლებლობების, ინტერესების და განვითარების ხელშეწყობა;
- ბავშვის მოსაზრებები;
- ბავშვის ნების წინააღმდეგ გადაწყვეტილების აღსრულების შემთხვევაში ბავშვის მიმართ მოსალოდნელი ზიანის თავიდან აცილება;
- ბავშვის მიმართ ნებისმიერი სახის ძალადობის, შეურაცხყოფის და საფრთხის თავიდან აცილება;
- ორივე მშობელთან ბავშვის კონტაქტის შენარჩუნების უზრუნველყოფა;
- თავიდან იქნეს აცილებული ბავშვში ერთგულებისა და დანაშაულის გრძნობას შორის კონფლიქტი;
- ბავშვის ინტერესების და უფლებების, მისი მშობლების და გარემოცვის პატივისცემა

მოწმე და მსხვერპლ ბავშვთა მიმართ მულტიდისციპლინური მიდგომა

ისლანდიაში, ნორვეგიაში და შვედეთში, ფუნქციონირებს „ბავშვთა სახლები“ ბავშვთა მიმართ ძალადობის შემთხვევებისთვის. სოციალური მუშაკები, სასამართლო სამედიცინო ექსპერტები, პედიატრები, პოლიცია და პროკურორები მუშაობენ

ერთობლივად. ისინი ერთმანეთში ინაწილებენ ფუნქციებს. ბავშვთან გასაუბრება ტარდება ერთხელ სპეციალისტის მიერ, რომელსაც პროცესის სხვა მონაწილეები ვიდუო კავშირის საშუალებით სხვა ოთახში უსმენენ. ამ სახლებში არის, აგრეთვე, სამედიცინო ექსპერტიზის ჩატარების საშუალება და ფსიქოლოგიური დახმარების სერვისიც.

შესაბამისად, რეკომენდირებულია საკანონმდებლო ცვლილებები შემუშავდეს, რათა საქართველოს სამოქალაქო და ადმინისტრაციული კანონმდებლობით (როგორც მატერიალური, ასევე, საპროცესო) სავალდებულო გახდეს ბავშვთან დაკავშირებით საქმეთა განხილვის მულტიდისციპლინური წესი, როგორც ადმინისტრაციული ორგანოების, ასევე, სასამართლოს მიერ. ამავე დროს, კანონმდებლობით უნდა დადგინდეს მსხვერპლ და მოწმე ბავშვთა მიმართ მულტიდისციპლინური მიდგომა როგორც გასაუბრების, ასევე, მოკლე და გრძელვადიანი დახმარებისა და რეაბილიტაციის დროს. თუმცა გასათვალისწინებელია, რომ ამ მხრივ, მნიშვნელოვანია, პირველ რიგში, ერთიანი სისტემის შემუშავება.

3.3.4. ბავშვზე მორგებული სასამართლო პროცესი

ევროპის საბჭოს სახელმძღვანელო მითითებები განმარტავს, რომ ბავშვზე მორგებული მართლმსაჯულება სასამართლო წარმოების დროს მოიცავს შემდეგ გარანტიებს:

- **ხელმისაწვდომი სასამართლო პროცესი:** უფლების დარღვევის შემთხვევაში ეროვნული კანონი შესაძლებლობას უნდა აძლევდეს ბავშვს მიმართოს სასამართლოს. ამისათვის კანონმა ბავშვი უნდა გაათავისუფლოს ყოველგვარი სასამართლო ხარჯისგან და უზრუნველყოს იურიდიული დახმარება²²¹. საპროცესო ქმედუნარიანობის ფიქსირებული ასაკის მითითება გამორიცხავს ბავშვის ინდივიდუალური შესაძლებლობების და აღქმის უნარის გათვალისწინებას და შესაძლოა ზოგჯერ უსამართლო იყოს. ამიტომ ქვეყნის კანონმდებლობამ უნდა შექმნას საფუძველი ბავშვმა მიმართოს სასამართლოს, როდესაც ის სათანადოდ აცნობიერებს საკუთარ უფლებებს²²².
- **იურიდიული დახმარება და წარმომადგენლობა:** კანონით ბავშვს უნდა ჰქონდეს უფლება უფასო იურიდიულ დახმარებასა და საკუთარი სახელით წარმომადგენლობაზე. ბავშვთან მომუშავე ადვოკატები უნდა იყვნენ სპეციალიზებული ბავშვთა საკითხებზე და პროცესში წარმომადგენდნენ უშუალოდ ბავშვის მოსაზრებას, მიაწოდოს მას ყველა საჭირო ინფორმაცია და განმარტება. რაც შეეხება წარმომადგენლობას, როდესაც ბავშვსა და მის მშობლებს შორის ინტერესთა კონფლიქტია, კომპეტენტურმა ორგანომ უნდა დაუნიშნოს მას საპროცესო წარმომადგენელი (guardian ad litem) ან სხვა დამოუკიდებელი წარმომადგენელი. კანონით გარანტირებული უნდა იყოს ბავშვის უფლება წარმომადგენლობაზე, მშობლებისგან დამოუკიდებლად, განსაკუთრებით ისეთ პროცესში, როდესაც მშობლები სავარაუდოდ დამრღვევები არიან²²³.
- **ბავშვის უფლება აზრის გამოთქმასა და მოსმენაზე:** მოსამართლემ უნდა მოუსმინოს ბავშვს ყველა მასთან დაკავშირებულ საკითხზე ადაპტირებული საშუალებების გამოყენებით და მის მოსაზრებებს სათანადო მნიშვნელობა მიანიჭოს ასაკისა და განვითარების დონის შესაბამისად. ბავშვს ეს უფლება არ

²²¹ პარა. 34-36. გვ. 26-27

²²² ევროპის საბჭოს სახელმძღვანელო მითითებები, 2010, პარა 96

²²³ პარა. 37-43. გვ. 27

უნდა შეეზღუდოს ასაკის გამო და მას უნდა მოუსმინონ ნებისმიერ შემთხვევაში, როდესაც მას სურს აზრის გამოთქმა, თუ ეს არ ეწინააღმდეგება მის საუკეთესო ინტერესებს. ამასთან ერთად ბავშვს უნდა მიეწოდოს ინფორმაცია ამ უფლების გამოყენების შესახებ და იქვე უნდა განემარტოს, რომ მათი აზრი ყველა შემთხვევაში ვერ იქნება გათვალისწინებული. სასამართლო გადაწყვეტილება უნდა იყოს დასაბუთებული და ბავშვს უნდა განემარტოს მისი შინაარსი გასაგებ ენაზე²²⁴.

- **პროცესის გაჭიანურების თავიდან აცილება:** ბავშვთან დაკავშირებულ ყველა პროცესი უნდა ჩატარდეს „გადაუდებლობის“ პრინციპით, განსაკუთრებით საოჯახო საქმეებზე (მაგ. მშობლის უფლებები, მეურვეობა, მშობლის მიერ ბავშვის გატაცება) სარისკო შედეგების თავიდან ასაცილებლად. საჭიროებისამებრ განხილული უნდა იქნეს დროებითი განკარგულებების მიღება. კანონის თანახმად, უნდა არსებობდეს სასამართლოს გადაწყვეტილების დაუყოვნებლივ აღსრულების მექანიზმი²²⁵.
- **პროცესის ორგანიზება, ბავშვზე მორგებული გარემო და გასაგები ენა:** პროცესის დაწყებამდე ბავშვს გასაგები ენით უნდა გააცნონ სასამართლოს ან სხვა შესაბამისი შენობის მოწყობის გეგმა, ასევე, მონაწილე პირების როლი და ვინაობა. ბავშვს უნდა მისცენ ნება თან ახლდეს მშობლები ან, სადაც საჭიროა, მის მიერ არჩეული ზრდასრული პირი, გარდა იმ შემთხვევისა, როდესაც დასაბუთებული გადაწყვეტილებით დადასტურებული საწინააღმდეგო დასაშვებ მტკიცებულებად უნდა იყოს აღიარებული და გამოყენებული ინტერვიუს სხვადასხვა მეთოდები, როგორცაა ვიდე ან აუდიო-ჩაწერა ან წინასასამართლო დახურული მოსმენის ჩანაწერი. დაცული უნდა იყოს კონფიდენციალობა. პროცესი უნდა წარიმართოს პერიოდული შესვენებებით. მოსაცდელი და ინტერვიუს ოთახები უნდა იყოს მოწყობილი ბავშვზე მორგებული გარემოს პრინციპით²²⁶.
- **ბავშვთან გასაუბრება/ჩვენების მიღება:** ბავშვთან გასაუბრება უნდა აწარმოოს სპეციალიზებული პროფესიონალი. გასაუბრების რაოდენობა უნდა იყოს შეძლებისდაგვარად მცირე და ყოველ ჯერზე ჩატაროს ერთიდაიგივე პირმა. მაქსიმალურად უნდა იქნეს თავიდან აცილებული პირდაპირი კონტაქტი მსხვერპლ ან მოწმე ბავშვსა და სავარაუდო მოძალადეს შორის, თუ ამას არ მოითხოვს მსხვერპლი ბავშვი. თავიდან უნდა იქნეს აცილებული მიმანიშნებელი კითხვები. ბავშვის მიერ გაკეთებული განცხადებები და ჩვენება არასდროს უნდა ჩაითვალოს მტკიცებულების ძალის არმქონედ ან არასარწმუნოდ მხოლოდ ბავშვის ასაკიდან გამომდინარე²²⁷.

ა) ბავშვი სამოქალაქო სამართალწარმოების პროცესში

ბავშვის სამართლებრივი ქმედუნარიანობა

სამოქალაქო კოდექსის თანახმად, ქმედუნარიანობა ანუ ფიზიკური პირის უნარი, თავისი ნებითა და მოქმედებით სრული მოცულობით შეიძინოს და განახორციელოს სამოქალაქო

²²⁴ პარა. 44-49, გვ. 28

²²⁵ პარა. 50-53

²²⁶ მითითება 54-62, გვ. 29-30

²²⁷ მითითებები 64-74, გვ. 30-31

უფლებები და მოვალეობები, წარმოიშობა 18 წლის ასაკიდან. 7 წლამდე ასაკის არასრულწლოვანი (მცირეწლოვანი) ქმედუუნაროდ ითვლება²²⁸, ხოლო შვიდიდან თვრამეტ წლამდე არასრულწლოვანი შეზღუდული ქმედუუნარიანობის მქონეა²²⁹. ეს ნორმები ვრცელდება ბავშვის საპროცესო ქმედუუნარიანობაზე როგორც სამოქალაქო, ასევე ადმინისტრაციულ სამართალწარმოებასთან დაკავშირებით.

საქართველოს სამოქალაქო კოდექსი ბავშვის მონაწილეობის უფლების შესახებ არაერთგვაროვან სტანდარტს ადგენს. ზოგან ითხოვს სავალდებულო თანხმობას ასაკობრივი დათქმით, ზოგან მხოლოდ სურვილის გათვალისწინებაზე მიუთითებს და მშობელთა უფლების ბოროტად გამოყენებისას, უფლებას აძლევს დამოუკიდებლად მიმართოს სასამართლოს. კერძოდ: კოდექსი თანხმობას სავალდებულოდ ადგენს 10 წლის ასაკიდან შემდეგ საკითხებზე: გვარის შეცვლისას²³⁰; შვილად აყვანის დადგენისას²³¹; ნაშვილებისთვის სახელის შეცვლისას²³²; ნაშვილების მშობლად დაბადების აქტში მშვილებლის რეგისტრაციისას²³³. მშობლის უფლებამართმეული პირისთვის უფლებების აღდგენის დროს ითვალისწინებს ბავშვის სურვილსაც, თუ მას შეუსრულდა 10 წელი²³⁴, თუმცა იგივე წესი არ მოქმედებს მშობლის უფლების ჩამორთმევის საკითხის განხილვისას²³⁵. არასრულწლოვანს 14 წლის ასაკიდან შეუძლია დამოუკიდებლად მიმართოს სასამართლოს მშობლის მიერ აღზრდა-განათლების მოვალეობების შეუსრულებლობის ან არასათანადოდ შესრულების ან მშობლის უფლების ბოროტად გამოყენებისას²³⁶.

სამოქალაქო კოდექსი სათანადო ვერ უზრუნველყოფს ბავშვის უფლებას მოუსმინონ მასთან დაკავშირებული ისეთი მნიშვნელოვანი საკითხების განხილვისას, როგორცაა: ბავშვის საცხოვრებელი ადგილის განსაზღვრა მშობელთა შეუთანხმებლობისას²³⁷; ბავშვის ურთიერთობის განსაზღვრა მშობელთან, რომელთანაც არ ცხოვრობს²³⁸; ბავშვის ურთიერთობა ბებია-პაპასთან²³⁹; მშობელთან დაბრუნების საკითხი²⁴⁰.

სამოქალაქო საპროცესო კოდექსი ადგენს რამდენიმე საპროცესო დაცვის საშუალებას ბავშვის მონაწილეობის უფლებასთან დაკავშირებით, კერძოდ: ბავშვთა უფლებებსა და კანონით დაცულ ინტერესებს სასამართლოში იცავენ მათი მშობლები. ამასთანავე, სასამართლო ვალდებულია ასეთ საქმეებში ჩააბას თვით 7-18 წლამდე არასრულწლოვანი²⁴¹, ხოლო 7 წლამდე ბავშვის შემთხვევაში, სასამართლო უფლებამოსილია კანონიერი წარმომადგენლის შუამდგომლობით საქმეში მცირეწლოვანიც ჩააბას²⁴². სასამართლო ხარჯების გადახდისგან თავისუფლდებიან მოსარჩელები არასრულწლოვანთა უფლებების დარღვევასთან დაკავშირებულ სარჩელებზე²⁴³.

²²⁸ მუხ. 12

²²⁹ მუხ. 14

²³⁰ მუხ. 1196.2

²³¹ მუხ. 1255.1, 1256

²³² მუხ. 1257.2

²³³ მუხ. 1258

²³⁴ მუხ. 1209.2

²³⁵ მუხ. 1206

²³⁶ მუხ. 1198¹, 1206

²³⁷ მუხ. 1201

²³⁸ მუხ. 1198, 1202

²³⁹ მუხ. 1203

²⁴⁰ მუხ. 1204

²⁴¹ მუხ. 81.3

²⁴² მუხ. 81.5

²⁴³ მუხ. 46.1 „ე“

ბუნდოვანია, რა იგულისხმება „ჩაბმაში“ და რა სამართლებრივი სტატუსით ისარგებლებს ის სამართალწარმოების დროს. შესაბამისად, ამ საკითხის განმარტება და გადაწყვეტა დამოკიდებულია ინდივიდუალურ მოსამართლეზე, რაც არ ქმნის ბავშვის უშუალოდ მოსმენის და მისი მოსაზრებების სათანადოდ გათვალისწინების გარანტიას კონვენციით აღიარებული მნიშვნელობით.

სამოქალაქო სამართლებრივი ურთიერთობებისას, ბავშვის წვდომა სასამართლოზე თითქმის სრულიად არის დამოკიდებული მის მშობლებზე, გარდა თავად მშობელთა მიერ უფლებების ბოროტად გამოყენებისას. კოდექსი არ ითვალისწინებს სხვა შემთხვევას, როდესაც ბავშვს შეუძლია დამოუკიდებლად მიმართოს სასამართლოს, თუ მასა და მის მშობლებს ან სხვა კანონიერ წარმომადგენლებს შორის შეუთანხმებლობა (არა ძალადობის გამო) არსებობს მისი უფლების დაცვაზე მესამე პირებთან მიმართებაში.

მოსამართლის უფლება გაათავისუფლოს ბავშვის ასაკობრივი ბარიერისგან

ბელგიასა და ჩეხეთში მოსამართლე უფლებამოსილია ნებისმიერი ასაკის ბავშვის სარჩელი მიიღოს წარმოებაში ნებისმიერ საკითხთან დაკავშირებით, თუ დაასკვნის, რომ: ბავშვი აცნობიერებს თავის უფლებებს და შეუძლია დამოუკიდებლად დაიწყოს პროცესი, ან/და ინტერესთა კონფლიქტია მშობლებთან ან როდესაც სარჩელი აბსოლუტური აუცილებლობითაა განპირობებული. იგივე წესია დიდ ბრიტანეთში, მხოლოდ 12 წლის ასაკს მიღწეული ბავშვის მიმართ.

ბავშვის მონაწილეობა

ევროპის 24 ქვეყანაში პროცესში ბავშვის მონაწილეობასთან დაკავშირებით ასაკობრივი შეზღუდვას კანონი არ ადგენს. ამასთანავე, ბავშვებს უფლება აქვთ სარჩელით უფლების დარღვევაზე/ზიანის ანაზღაურებაზე სასამართლოს მიმართონ სრულწლოვანების მიღწევის შემდეგ ანუ ხანდაზმულობის ვადა ასეთ შემთხვევას არ მოქმედებს.

არასრულწლოვნის წვდომა სასამართლოზე

სამოქალაქო საპროცესო კოდექსის თანახმად, არასრულწლოვანს 14 წლის ასაკიდან უფლება აქვს მიმართოს სასამართლოს თავისი უფლებებისა და კანონიერი ინტერესების დასაცავად. სასამართლო ნიშნავს საპროცესო წარმომადგენელს. არასრულწლოვანს უფლება აქვს არ დაეთანხმოს თავის საპროცესო წარმომადგენელს და თვითონ დაიცვას საკუთარი თავი. სასამართლო ვალდებულია ასეთ საქმეებზე ჩააბას მეურვეობისა და მზრუნველობის ორგანოები²⁴⁴. კოდექსი ითვალისწინებს კიდევ ერთ შემთხვევას, კერძოდ: არასრულწლოვანს უფლება აქვს დამოუკიდებლად მიმართოს სასამართლოს, როგორც მოსარჩელემ, ასევე, სასამართლო პროცესში მონაწილეობა მიიღოს, როგორც მოპასუხემ და მესამე პირმა. თუმცა უნდა აღინიშნოს, რომ 14 წლის ასაკიდან დამოუკიდებლად მიმართვის უფლების განხორციელება თითქმის შეუძლებელია ისეთ პირობებში, როდესაც კანონი არ ადგენს ბავშვზე მორგებულ პროცედურებს და სათანადო მხარდაჭერის ღონისძიებებს ამგვარი შემთხვევებისთვის.

კანონი არ ითვალისწინებს სხვა შემთხვევას, როდესაც ბავშვს აქვს უფლება მიმართოს სასამართლოს დამოუკიდებლად საკუთარი უფლების დასაცავად არა მშობლის წინააღმდეგ, არამედ სხვა ფიზიკური ან იურიდიული პირის მიმართ, როდესაც ის კარგად აცნობიერებს თავის უფლებებს და ვერ თანხმდება მშობელთან ამ უფლების დაცვის შესახებ ან სხვა სახის ინტერესთა კონფლიქტია. მნიშვნელოვანია, ბავშვს უფლება მიენიჭოს მიმართოს სასამართლოს დამოუკიდებლად საკუთარი უფლებების დასაცავად უშუალოდ ან

²⁴⁴ მუხ. 81¹

წარმომადგენლის მეშვეობით, ასაკობრივი შეზღუდვის გარეშე, თუ ის აცნობიერებს საკუთარ უფლებებს.

ბ) ბავშვი ადმინისტრაციული სამართალწარმოების პროცესში

ადმინისტრაციული საპროცესო კოდექსი ადგენს სასამართლოს მიერ ადმინისტრაციული სამართალწარმოების წესით საქმეთა განხილვას ბავშვთა მონაწილეობით ძალადობის, ანტისოციალური ქცევის ბავშვთა სკოლა-პანსიონში გადამისამართების, არანებაყოფლობითი ფსიქიატრიული მკურნალობის საკითხებზე. **განვიხილოთ თითოეული საკითხი:**

ანტისოციალური ქცევის მქონე არასრულწლოვანთა გადამისამართება

კანონი „ზოგადი განათლების შესახებ“ ითვალისწინებს 12 წლის ასაკს მიღწეულ ანტისოციალური ქცევის მქონე არასრულწლოვანთა გადამისამართებას სხვადასხვა კულტურულ-საგანმანათლებლო პროგრამაში ჩართვას ან სხვა ღონისძიებებს გამოყენებას, ღონისძიებებში ჩართვა, სხვა სკოლაში გადაყვანას ან სკოლა-პანსიონში გაგზავნას²⁴⁵. განათლების და მეცნიერების სამინისტროს ექსპერტთა ჯგუფი საკითხის განხილვისას მოუსმენს მიმართვის ავტორს, არასრულწლოვანს, მშობელს და სოციალურ მუშაკს, საჭიროებისამებრ, სხვა პირებსაც²⁴⁶. სკოლა-პანსიონში გაგზავნა გამოიყენება, როგორც უკიდურესი ღონისძიება ან/და როდესაც 10 წელს მიღწეული ბავშვის მიერ ჩადენილია სისხლის სამართლის კოდექსით გათვალისწინებული ქმედება²⁴⁷. ექსპერტთა ჯგუფის გადაწყვეტილება სხვა ღონისძიების გამოყენების, ასევე მშობლების წერილობითი თანხმობით სკოლა-პანსიონში გაგზავნის შესახებ, არ ექვემდებარება გასაჩივრებას²⁴⁸.

განხილული ნორმები ადგენს, რომ ადმინისტრაციული ორგანოს (ექსპერტთა ჯგუფის) მიერ გადაწყვეტილება მიიღება ბავშვის ჭეშმარიტი ინტერესებიდან გამომდინარე, სავალდებულოა ბავშვის მოსმენა და მისი ბიოფსიქოსოციალური შეფასების გათვალისწინება. თუმცა კანონი დამატებით არ ადგენს ადმინისტრაციული ორგანოს მიერ ბავშვის მოსმენის და მისი მოსაზრების სათანადოდ გათვალისწინების საპროცესო გარანტიებს მისი ასაკისა და განვითარების დონის შესაბამისი საშუალებებით. ამასთანავე, აღნიშნული ნორმები ზღუდავს ბავშვის უფლებას ადმინისტრაციული ორგანოს გადაწყვეტილების გასაჩივრებაზე. კერძოდ: ა) ბავშვის უფლებას დამოუკიდებლად ან წარმომადგენლის მეშვეობით გასაჩივროს გადამისამართების ღონისძიების შესახებ (მაგ. სხვა სკოლაში გადაყვანა) ადმინისტრაციული ორგანოს გადაწყვეტილება; ბ) ბავშვის უფლებას დამოუკიდებლად გასაჩივროს ექსპერტთა ჯგუფის გადაწყვეტილება სკოლა-პანსიონში გაგზავნის შესახებ, თუ არ იზიარებს მშობლის თანხმობას ამ საკითხზე. აქედან გამომდინარე, მნიშვნელოვანია გასწორდეს ეს შეუსაბამობა და ბავშვს მიეცეს სრულფასოვანი მონაწილეობის და მისი უფლებების დასაცავად გასაჩივრების მექანიზმებზე წვდომის უფლება სამართლებრივი დაცვის საშუალებებით.

რაც შეეხება 10 წლის ასაკის მიღწეული ბავშვის სკოლა-პანსიონში გაგზავნას, ეს ღონისძიება უკიდურეს შემთხვევაში. თუ არასრულწლოვნის კანონიერი წარმომადგენელი წერილობით თანხმობას არ აცხადებს, ექსპერტთა ჯგუფი შუამდგომლობით მიმართავს სასამართლოს გადაწყვეტილების მისაღებად²⁴⁹.

²⁴⁵ მუხ. 487.1

²⁴⁶ მუხ. 487.7-10

²⁴⁷ მუხ. 487.5

²⁴⁸ მუხ. 487.15

²⁴⁹ მუხ. 487.13

ადმინისტრაციული საპროცესო კოდექსით დადგენილი წესით, სასამართლო განხილვას ექვემდებარება: ა) ექსპერტთა ჯგუფის შუამდგომლობა არასრულწლოვნის სკოლა-პანსიონში გაგზავნის ან სკოლა-პანსიონში ყოფნის ვადის გაგრძელების შესახებ²⁵⁰; ბ) არასრულწლოვნის კანონიერი წარმომადგენლის საჩივარი ექსპერტთა ჯგუფის მიერ მიღებულ გადაწყვეტილებაზე არასრულწლოვნის სკოლა-პანსიონში გაგზავნის შესახებ, როდესაც არასრულწლოვნის მიერ ჩადენილია მძიმე ან განსაკუთრებით მძიმე დანაშაული და არ მიუღწევია სისხლისსამართლებრივი პასუხისმგებლობის ასაკის²⁵¹.

სასამართლოში საქმის განხილვის ძირითადი ასპექტებია:

- არასრულწლოვნის სკოლა-პანსიონში გაგზავნის შესახებ ექსპერტთა ჯგუფის მიერ მიღებული გადაწყვეტილების თაობაზე სარჩელის წარდგენა არ აჩერებს გადაწყვეტილების მოქმედებას²⁵².
- საქმე განიხილება დახურულ სხდომაზე, რომელზე დასწრების უფლება აქვთ: შუამდგომლობის/საჩივრის ავტორს, არასრულწლოვანს, არასრულწლოვნის მშობელს, მეურვეობისა და მზრუნველობის ორგანოს წარმომადგენელს, ექსპერტთა ჯგუფის წევრებს, სოციალურ მუშაკს, არასრულწლოვნის ადვოკატს, აგრეთვე სასამართლოს მიერ მოწვეულ სხვა პირებს. მხარეთა გამოუცხადებლობა არ აბრკოლებს საქმის განხილვას. არასრულწლოვნის სკოლა-პანსიონში გაგზავნის საკითხს, განიხილავს მხოლოდ თბილისის საქალაქო სასამართლო. მისი გადაწყვეტილების გასაჩივრება შესაძლებელია ერთჯერადად 10 დღის ვადაში თბილისის სააპელაციო სასამართლოში²⁵³.
- არასრულწლოვანს უფლება აქვს უარი განაცხადოს სასამართლოში ახსნა-განმარტების მიცემაზე, აგრეთვე მოითხოვოს სასამართლო პროცესზე ადვოკატის, მშობლის/კანონიერი წარმომადგენლის დასწრება²⁵⁴.
- სკოლა-პანსიონში გაგზავნის ღონისძიების შეწყვეტის ან შეცვლის შესახებ ექსპერტთა ჯგუფს შეუძლია მიმართოს მხოლოდ სკოლა-პანსიონში მომუშავე სპეციალისტმა²⁵⁵.

განხილული ნორმების ანალიზით ჩანს, რომ სასამართლოს მიერ საქმის განხილვისა და გადაწყვეტილების მიღებისას, ადმინისტრაციული საპროცესო კოდექსი არ ასახავს ბავშვის საუკეთესო ინტერესების უპირატესი გათვალისწინების პრინციპს და გადაწყვეტილების სამართლებრივ დასაბუთებას ამ პრინციპთან მიმართებაში; სავალდებულო არ არის ბავშვის მოსმენა და მისი მოსაზრებების სათანადოდ გათვალისწინება (მხარეთა გამოუცხადებლობა არ აბრკოლებს გადაწყვეტილების მიღებას); წარმოდგენილი ფაქტების დამატებით შესწავლას სპეციალისტების მოწვევით; ბავშვს არა აქვს უფლება უშუალოდ ან წარმომადგენლის მეშვეობით მიმართოს სასამართლოს (ან/და ექსპერტთა ჯგუფს) სკოლა-პანსიონში გაგზავნის გადაწყვეტილების გადასინჯვის შესახებ ამ ღონისძიების შეწყვეტის ან შეცვლის მიზნით (მხოლოდ სკოლა-პანსიონს შეუძლია მიმართოს ექსპერტთა ჯგუფს).

ევროკავშირის 25 ქვეყანაში არსებობს სამოქალაქო და ადმინისტრაციულ სამართალწარმოებაში მონაწილე ბავშვთა ან/და მათ კანონიერ წარმომადგენელთა

²⁵⁰ მუხ. 21³⁵

²⁵¹ იხ. ადმინისტრაციული საპროცესო კოდექსის 21³⁵.1 („ბ“); ასევე, კანონი ზოგადი განათლების შესახებ, მუხ. 48⁷.14

²⁵² მუხ. 21³⁶

²⁵³ მუხ. 21³⁷

²⁵⁴ მუხ. 21³⁸

²⁵⁵ მუხ. 48⁹

მხარდაჭერის მექანიზმები, რათა ბავშვებმა შეძლონ თავიანთი უფლებების სამართლებრივი დაცვა ან უფლების დარღვევის (მოქმედებით ან უმოქმედობით) შემთხვევაში კომპენსაციის მოთხოვნა. ეს მხარდაჭერა მოიცავს:

- სასამართლოს ვალდებულება სამართალწარმოებაში მონაწილე ბავშვს მიაწოდოს ინფორმაცია სამართლებრივი დაცვის საშუალებების და კომპენსაციის მოთხოვნის უფლების შესახებ;
- იურიდიული დახმარება ბავშვებისთვის;
- გასაჩივრების ხანდაზმულობის ვადის გაგრძელების შესაძლებლობა ბავშვებისთვის იმ შემთხვევაში, თუ კანონიერი წარმომადგენელი არ იცავს ამ ვადას;
- სპეციალური ინსტიტუციური მხარდაჭერა, როგორცაა შესაბამისი უფლებამოსილი უწყების მიერ ბავშვთა კონსულტირება, ინფორმირება და უფლებების დაცვა (ბავშვთა კომისიები, ბავშვთა ომბუდსმენები, ბავშვთა სამართლებრივი მრჩეველები, ბავშვთა კეთილდღეობის სამსახურები)

ბ.ა) ადმინისტრაციული პროცესი: ბავშვთა დაცვა ძალადობისგან

კანონი „ოჯახში ძალადობის აღკვეთის, ოჯახში ძალადობის მსხვერპლთა დაცვისა და დახმარების შესახებ“ ადგენს, რომ ბავშვის მიმართ ძალადობის დროს ბავშვი განცალკევდება მოძალადე მშობლის, სხვა კანონიერი წარმომადგენლის ან ნებისმიერი სხვა მოძალადისგან პოლიციის შემაკავებელი ორდერის ან სოციალური მუშაკის გადაწყვეტილების საფუძველზე²⁵⁶.

ადმინისტრაციული საპროცესო კოდექსი ადგენს საპროცესო წესებს ბავშვზე ძალადობის შემთხვევასთან დაკავშირებით სასამართლოსადმი მიმართვის, მშობლის უფლებამოსილების შეზღუდვის და მშობლისგან ბავშვის განცალკევების გადაწყვეტილების მიღების და გასაჩივრების შესახებ²⁵⁷. სასამართლოსთვის მიმართვის უფლება აქვს მსხვერპლს, ასევე მის ოჯახის წევრს, ხოლო არასრულწლოვნის შემთხვევაში, აგრეთვე მეურვეობისა და მზრუნველობის ორგანოს. კანონის ჩანაწერის მიხედვით, ადმინისტრაციული სამართალწარმოების ყველა ეტაპზე, მათ შორის, არასრულწლოვნის დაკითხვისას გათვალისწინებული უნდა იქნეს არასრულწლოვნის „საუკეთესო ინტერესები მისი ასაკისა და განვითარების დონის შესაბამისად“²⁵⁸.

სასამართლო არასრულწლოვნის განცალკევების შესახებ გადაწყვეტილების გაუქმების ან მის გაუქმებაზე უარის თქმის თაობაზე დასაბუთებულ გადაწყვეტილებას იღებს შინაგანი რწმენის საფუძველზე. ეს გადაწყვეტილება მიღებიდან 24 საათის განმავლობაში გადაეცემა მხარეებს²⁵⁹. მიღებული გადაწყვეტილება მხარისათვის დასაბუთებული გადაწყვეტილების ჩაბარებიდან 3 დღის ვადაში ერთჯერადად საჩივრდება სააპელაციო სასამართლოში.

არასრულწლოვნის „საუკეთესო ინტერესების გათვალისწინება მისი ასაკისა და განვითარების დონის შესაბამისად“ არ არის კონვენციის ნორმატიული შინაარსის შესაბამისი, რადგან საუკეთესო ინტერესები უნდა შეფასდეს ჰოლისტურად, ბავშვის განვითარებისა და საჭიროებების სრულფასოვანი გათვალისწინებით. რაც შეეხება

²⁵⁶ მუხ. 14 (1)

²⁵⁷ მუხ. 21¹²

²⁵⁸ მუხ. 21¹² (3)

²⁵⁹ მუხ. 21¹² (13)

„ასაკისა და განვითარების დონის“ გათვალისწინებას, ეს არის ბავშვის მოსაზრებების მოსმენის უფლების ნორმატიული შინაარსი ანუ ბავშვის მოსმენის დროს სახელმწიფოს ეკისრება ვალდებულება გამოიყენოს ბავშვის ასაკის და განვითარების დონის შესაბამისი საკომუნიკაციო ან სხვა საშუალებები, რათა შეძლოს ბავშვის მოსაზრების მოსმენა და სათანადოდ გათვალისწინება. შესაბამისად, კანონის ეს ჩანაწერი უფრო გარკვევით უნდა ჩამოყალიბდეს.

კანონი მიუთითებს, რომ მოსამართლე გადაწყვეტილებას იღებს შინაგანი რწმენის საფუძველზე, რაც ცალკე აღებული, ბავშვის საუკეთესო ინტერესების განსაზღვრის და მისი მოსაზრების მოსმენის გარეშე, არ წარმოადგენს საკმარის საფუძველს ამგვარი გადაწყვეტილების მისაღებად. აღსანიშნავია, რომ კანონი საერთო სასამართლოების შესახებ მიუთითებს, რომ მოსამართლე თავის საქმიანობაში დამოუკიდებელია და გადაწყვეტილებას იღებს „მხოლოდ საქართველოს კონსტიტუციის, საერთაშორისო სამართლის საყოველთაოდ აღიარებული პრინციპებისა და ნორმების, სხვა კანონების შესაბამისად და თავისი შინაგანი რწმენის საფუძველზე“²⁶⁰. თუმცა თუ ადმინისტრაციულ საპროცესო კოდექსში აუცილებელია მოსამართლის დამოუკიდებლობაზე აქცენტის გაკეთება, ბუნდოვანია რატომ უნდა მივუთითოთ მხოლოდ „შინაგანი რწმენა“ და არა საერთაშორისო სამართლით აღიარებული პრინციპები.

გადაწყვეტილება უნდა შეესაბამებოდეს ბავშვის საუკეთესო ინტერესებს და სათანადოდ ითვალისწინებდეს ბავშვის მოსაზრებებს, როგორც საქმის გარემოებების, ასევე მისი მომავლის შესახებ (ალტერნატიული საცხოვრებელი ადგილი, ურთიერთობა მშობლებთან/ოჯახთან და ა.შ). თუ გადაუდებელი მდგომარეობის გამო ბავშვის მოსმენა ვერ ხერხდება, ეს უნდა მოხდეს პირველივე შესაძლებლობისთანავე.

ბავშვები, მათ შორის, მცირე ასაკის ბავშვებიც, უნდა მონაწილეობდნენ გადაწყვეტილების მიღების პროცესში მათი ზრდადი შესაძლებლობების გათვალისწინებით. მათ უნდა მიეწოდოთ ინფორმაცია მკურნალობის და მოსალოდნელი შედეგების შესახებ, მათ შორის, შეზღუდული შესაძლებლობის მქონე ბავშვებს - მათთვის გასაგები ფორმატით. ექიმებმა და სამედიცინო დაწესებულებებმა ბავშვებს უნდა მიაწოდონ ინფორმაცია მათთვის გასაგები ფორმით პედაგოგიული კვლევების და კლინიკურ ექსპერიმენტებში მონაწილეობის დროს იმგვარად, რომ შესაძლებელი გახდეს ბავშვთა ინფორმირებული თანხმობა სხვა სამართლებრივი დაცვის გარანტიების თანხლებით (დამატებით კანონიერი წარმომადგენლის თანხმობის აუცილებლობაც, დამატებითი ზედამხედველობის და შემოწმების მექანიზმები, თუ რამდენადაა ბავშვის თანხმობა ნებაყოფლობითი და ინფორმირებული, და რამდენად უზენებელია ბავშვის მონაწილეობა კვლევაში, სხვა)²⁶¹.

ბ.ბ) ადმინისტრაციული პროცესი: არანებაყოფლობითი ფსიქიატრიული მკურნალობა

კანონი ფსიქიატრიული დახმარების შესახებ ადგენს, რომ არანებაყოფლობით სტაციონარული ფსიქიატრიული დახმარება ტარდება, როდესაც პირს ფსიქიკური აშლილობის გამო არ გააჩნია გაცნობიერებული გადაწყვეტილების მიღების უნარი და მისი დახმარება შეუძლებელია სტაციონარში განთავსების გარეშე. ასევე იმ შემთხვევებში, თუ საფრთხე ექმნება პაციენტის ან სხვის სიცოცხლეს ან/და ჯანმრთელობას ან პაციენტმა

²⁶⁰ კანონი საერთო სასამართლოების შესახებ, მუხ. 7.1

²⁶¹ ბავშვის უფლებათა კომიტეტის ზოგადი კომენტარი #12, პარა. 100, 103

საკუთარი მოქმედებით შეიძლება მიიღოს ან სხვას მიაყენოს მნიშვნელოვანი მატერიალური ზარალი²⁶².

ადმინისტრაციული ორგანო ანუ ექიმ-ფსიქიატრთა კომისია იღებს პირველად გადაწყვეტილებას არანებაყოფლობითი მკურნალობის შესახებ, ხოლო შემდგომ ეტაპზე საკითხს განიხილავს სასამართლო ადმინისტრაციული სამართალწარმოების წესით, კერძოდ²⁶³:

- არანებაყოფლობითი ფსიქიატრიული დახმარების ჩვენების დროს არაა საჭირო პაციენტის თანხმობა და გადაწყვეტილებას სტაციონარში მოთავსების შესახებ იღებს შესაბამისი სერტიფიკატის მქონე ექიმი.
- სტაციონარში მოთავსებიდან 48 საათში ექიმ-ფსიქიატრთა კომისია შეისწავლის საკითხს და იღებს გადაწყვეტილებას ხმათა უმრავლესობით. პაციენტის მონაწილეობაზე არაფერია აღნიშნული.
- დადებითი გადაწყვეტილების შემთხვევაში, ფსიქიატრთა კომისია 48 საათში მიმართავს სასამართლოს პაციენტის სტაციონარში მოთავსების შესახებ ბრძანების გამოსაცემად.
- სასამართლო 24 საათში იღებს გადაწყვეტილებას. განხილვაში პაციენტის მონაწილეობა აუცილებელია. პაციენტის ინტერესებს სასამართლოში წარმოადგენს მისი კანონიერი წარმომადგენელი, ხოლო ასეთის არარსებობისას ნათესავი და ადვოკატი, რომელიც ენიშნება სახაზინო წესით საჭიროებისამებრ.
- პაციენტს არანებაყოფლობითი ფსიქიატრიული დახმარება გაეწევა 6 თვით, თუმცა ფსიქიატრთა კომისიას შეუძლია შეუზღუდავად მიმართოს სასამართლოს ამ ვადის გასაგრძელებლად საჭიროების ამოწურვამდე.
- სასამართლოს გადაწყვეტილება პაციენტი სტაციონარში მოთავსების ან ვადის გაგრძელების შესახებ შეუძლია გასაჩივროს პაციენტმა, მისმა კანონიერმა წარმომადგენელმა, ნათესავმა, ასევე ფსიქიატრიული დაწესებულების ადმინისტრაციამ²⁶⁴.

კანონი არ გვაწვდის სათანადო სამართლებრივი დაცვის გარანტიებს არასრულწლოვნის მონაწილეობის და გასაჩივრების მექანიზმებზე წვდომის, ასევე, სასამართლოზე ხელმისაწვდომობის შესახებ. კერძოდ:

- ექიმ-ფსიქიატრთა მიერ გადაწყვეტილების მიღებისას პაციენტის სტაციონარში განთავსების, ასევე ვადის გაგრძელების შესახებ პაციენტის მონაწილეობა არ არის აუცილებელი;
- პაციენტის მონაწილეობა აუცილებელია სასამართლოში საკითხის განხილვის დროს, თუმცა ნორმა არ გვაწვდის მისი მონაწილეობის კონკრეტულ გარანტიებს, როგორცაა მისი აზრის მოსმენის და სათანადოდ გათვალისწინების წესი კომუნიკაციისა და მხარდაჭერის შესაბამისი საშუალებების გამოყენებით. აგრეთვე, არაფერია ნათქვამი სასამართლოს მიერ სხვა ექსპერტების და სპეციალისტების ჩართვის შესაძლებლობაზე ალტერნატიული მოსაზრების მოსასმენად მულტიდისციპლინური მიდგომის გამოყენებით. მართალია, მხარის მოთხოვნით შეიძლება დაინიშნოს ალტერნატიული ექსპერტიზა, თუმცა მნიშვნელოვანია, თავად მოსამართლეს ჰქონდეს უფლება თავისი ინიციატივით და სახელმწიფო დაფინანსებით დაინიშნოს ალტერნატიული ექსპერტიზა, როდესაც საქმე ბავშვს ეხება.
- პაციენტის წარმომადგენლობის საკითხი პრობლემურია, რადგან კანონი უშვებს „ნათესავის“ თანხმობას, რაც პირთა ძალიან ფართო წრეს მოიცავს და გარანტირებული

²⁶² მუხ. 18.1

²⁶³ მუხ. 18. 1-13

²⁶⁴ მუხ. 18 (14)

არ არის ასეთი წარმომადგენლობის განხორციელებისას ბავშვის საუკეთესო ინტერესების გათვალისწინების და მოსმენის უფლების დაცვა;

- პაციენტს დახმარება გაეწევა 6 თვით, თუმცა ფსიქიატრთა კომისიას შეუძლია შეუზღუდავად მიმართოს სასამართლოს ამ ვადის გასაგრძელებლად საჭიროების ამოწურვამდე. ეს ჩანაწერი პაციენტის არანებაყოფლობითი ფსიქიატრიული მკურნალობის საკითხზე გადაწყვეტილების მიღების უფლებამოსილებას ანიჭებს ფაქტობრივად ფსიქიატრთა კომისიას და არ ასახელებს სხვა დამოუკიდებელ უწყებას, რომელიც განახორციელებს ზედამხედველობას და მკურნალობის პერიოდულ გადასიჯვას.

ადმინისტრაციული საპროცესო კოდექსი ადგენს პაციენტის არანებაყოფლობითი იზოლაციის საქმის განხილვის საპროცესო წესებს²⁶⁵:

- მოსამართლე პაციენტის არანებაყოფლობითი იზოლაციის საქმეს განიხილავს და გადაწყვეტილებას იღებს მისთვის შესაბამისი მიმართვის წარდგენიდან 48 საათში.
- საქმის განხილვაში პაციენტის მონაწილეობა აუცილებელია, თუ ეს საფრთხეს არ შეუქმნის სხვა პირების ჯანმრთელობას.
- არასრულწლოვანი პაციენტის საქმის განხილვისას არასრულწლოვანი პაციენტის ინტერესებს წარმოადგენს მისი მშობელი ან სხვა კანონიერი წარმომადგენელი.

განხილული ნორმებით ჩანს, რომ პაციენტის მონაწილეობის უფლება იზღუდება დათქმით, „თუ ეს საფრთხეს არ შეუქმნის სხვა პირების ჯანმრთელობას“. არასრულწლოვანი პაციენტის შემთხვევაში მას წარმოადგენს მისი მშობელი ან სხვა კანონიერი წარმომადგენელი. ბავშვის უფლება დამოუკიდებლად, თავისი სახელით განახორციელოს წარმომადგენლობა და ისარგებლოს სამართლებრივი და სხვა სახის მხარდაჭერით, არ არის ასახული.

ბ.გ) ბავშვის ალტერნატიულ ზრუნვაში განთავსება

მეურვეობისა და მზრუნველობის ორგანო გადაწყვეტილებას იღებს ბავშვის ალტერნატიულ ზრუნვაში განთავსების შესახებ დამოუკიდებლად ან ზოგიერთ შემთხვევაში მასთან არსებული რეგიონული საბჭოების მეშვეობით. მეურვეობისა და მზრუნველობის ორგანო გადაწყვეტილებას იღებს შემდეგი კანონების თანახმად:

- **მინდობით აღზრდა:** შვილად აყვანის და მინდობით აღზრდის შესახებ კანონის თანახმად, ბავშვის მინდობით აღზრდის შესახებ გადაწყვეტილებას იღებს მეურვეობისა და მზრუნველობის ორგანო უფლებამოსილი სოციალური მუშაკის მიერ ბავშვის საჭიროებებისა და მინდობით აღზრდის მსურველ პირთა შესახებ მომზადებული დასკვნის საფუძველზე, შემდეგი პრინციპების დაცვით: მინდობით აღზრდელის სურვილი ბავშვის ასაკის, სქესის და ჯანმრთელობის მდგომარეობის შესახებ; ბავშვის განთავსება შეძლებისდაგვარად შესაბამის ეთნიკურ, რელიგიურ და კულტურულ გარემოში; მინდობით ოჯახში ბავშვთა რაოდენობა არაუმეტეს შვიდისა; 10 წელს მიღწეული ბავშვის თანხმობა; და-მშობის ერთად განთავსება; ასაკობრივი სხვაობა 16 წელი²⁶⁶.

კანონი არ მიუთითებს მინდობით აღზრდაში განთავსებისას ბავშვის საუკეთესო ინტერესების უპირატესი გათვალისწინების პრინციპზე, როგორც ბავშვის უფლებასა და გადაწყვეტილების მიმღები ორგანოს მიერ გადაწყვეტილების მიღების საპროცესო წესზე. რაც შეეხება ბავშვის მონაწილეობას, კანონი მიუთითებს 10 წლის ბავშვის თანხმობას, თუმცა არაფერს ამბობს 10 წლამდე ასაკის ბავშვთა მოსაზრებების მოსმენასა და

²⁶⁵ მუხ. 21⁵⁴

²⁶⁶ მუხ. 31

სათანადოდ გათვალისწინებაზე. ამავე დროს, მითითებული არაა ბავშვის სათანადოდ ინფორმირების და კონსულტირების ვალდებულების შესახებ. მხოლოდ ასაკობრივი დათქმით თანხმობის აუცილებლობა არ იძლევა გარანტიას, თუ რამდენადა იქნება ეს ინფორმირებული თანხმობა.

- **სპეციალიზებულ დაწესებულებაში მოთავსება:** სოციალური დახმარების შესახებ კანონის თანახმად, სპეციალიზებული დაწესებულებაში (სადღეღამისო ზრუნვა) ბავშვის მოთავსება ხდება დაინტერესებული პირის განცხადების საფუძველზე, რომელიც შეიძლება იყოს თავად მოთავსების მსურველი ან მისი ოჯახის წევრი, მეურვეობის და მზრუნველობის ორგანო ან სასამართლო²⁶⁷. **ბავშვის** (მათ შორის, ნაპოვნი ბავშვის) სპეციალიზებულ დაწესებულებაში განთავსების შესახებ გადაწყვეტილებას იღებს **რეგიონული საბჭო**, ხოლო **მიუსაფარი ბავშვის** განთავსების შესახებ გადაწყვეტილების მიმღებია უფლებამოსილი **სოციალური მუშაკი**²⁶⁸. **საბჭოს დებულების**²⁶⁹ თანახმად, გადაწყვეტილების მიღებისას, საბჭოს წევრები ხელმძღვანელობენ საქართველოს მოქმედი კანონმდებლობით, სოციალური მუშაკის ან/და სხვა უფლებამოსილი პირების (ფსიქოლოგი, იურისტი) მიერ წარმოდგენილ შეფასებაში (დასკვნაში) მითითებული ინფორმაციითა და რეკომენდაციებით, აგრეთვე, განსახილველ საკითხთან დაკავშირებით არსებული სხვა მონაცემებით (ამ უკანასკნელის არსებობის შემთხვევაში). თუ წარმოდგენილი მასალები არ არის საკმარისი, საბჭოს უფლება აქვს, მოითხოვოს დამატებითი ინფორმაციის ან/და დოკუმენტების წარმოდგენა²⁷⁰.

კანონი არ ადგენს ბავშვის მონაწილეობის, მისი აზრის მოსმენის და საუკეთესო ინტერესების შეფასებას მულტიდისციპლინური გუნდის მიერ. კანონი არ ადგენს ალტერნატიულ ზრუნვაში ბავშვის მოთავსების პრინციპულ საკითხებს, როგორცაა: ალტერნატიულ ზრუნვის სპეციალიზებულ დაწესებულებაში მოთავსება, როგორც უკიდურესი ღონისძიება; ბავშვის და ოჯახის მდგომარეობის მულტიდისციპლინური შეფასება; ზრუნვის სათანადო ფორმის შერჩევა ბავშვის საუკეთესო ინტერესების შესაბამისად; რეგულარული მონიტორინგის სისტემა.

საბჭოს დებულება არ ადგენს ბავშვთან გადაწყვეტილების მიღების პრინციპებს, როგორცაა ბავშვის საუკეთესო ინტერესების უპირატესი გათვალისწინება, ბავშვის მოსმენა და მისი აზრის პატივისცემა, ბავშვთან დაკავშირებით პირადი მონაცემების კონფიდენციალობის დაცვა საქმის მასალების გაზიარების დროს.

მნიშვნელოვანია, საკანონმდებლო ცვლილებებმა მოიცვას ზემოთაღნიშნული საკითხების სათანადო სამართლებრივი რეგულირების საკითხი. ამავე დროს, დეტალური მსჯელობაა საჭირო ალტერნატიული ზრუნვის საკითხზე სასამართლო მიერ გადაწყვეტის შესახებ. ამაყმად, სასამართლოს გადაწყვეტილებით არ ხდება ბავშვთა განთავსება ალტერნატიული ზრუნვის ამა თუ იმ ფორმაში. ეს საკითხი საჭიროებს დამატებით შესწავლას და დარეგულირებას.

²⁶⁷ მუხ. 14 (4)

²⁶⁸ მუხ. 4

²⁶⁹ სოციალური მომსახურების სააგენტოს ბრძანება მეურვეობისა და მზრუნველობის ორგანოს რეგიონული საბჭოების ტიპური დებულების და შემადგენლობის დამტკიცების შესახებ, 2013წ.

²⁷⁰ მუხ. 7.10

სასამართლოს მიერ ბავშვთან დაკავშირებულ საქმეთა დროული განხილვა ევროპის ქვეყნებში²⁷¹

ევროკავშირის 25 ქვეყანაში სასამართლო ვალდებულია უმოკლეს ვადებში განიხილოს ბავშვთან დაკავშირებული საქმე. ეს ვალდებულება ეხება განსაკუთრებით ისეთ საქმეებს, როგორცაა: ბავშვთა მოთავსება ალტერნატიულ ზრუნვაში, საოჯახო დავები, თავშესაფრის მაძიებელ და მიგრანტ ბავშვთა საქმეები.

ევროკავშირის 6 ქვეყანაში (ბელგია, ჩეხეთი, პოლონეთი, ესტონეთი, პორტუგალია, სლოვენია) მოქმედებს სპეციალური მექანიზმი, რომელიც ზედამხედველობს „გადაუდებელი განხილვის პრინციპის“ დაცვას ადმინისტრაციულ და სამოქალაქო სასამართლოების მიერ ბავშვთა საქმეების განხილვისას. ბელგიაში ბავშვს შეუძლია სასამართლო გადაწყვეტილება გაასაჩივროს სააპელაციო წესით საქმის განხილვის დაუსაბუთებელი გაჭიანურების შემთხვევაში.

სასამართლოს მონაწილეობა ბავშვის ალტერნატიულ ზრუნვაში მოთავსების საკითხზე ევროკავშირის ქვეყნებში²⁷²

ევროკავშირის 22 ქვეყანაში აუცილებელია სასამართლოს განკარგულება ბავშვის ალტერნატიულ ზრუნვაში განთავსებისთვის. ბელგიასა და შვედეთში ბავშვის მოთავსება ზრუნვაში სასამართლო ბრძანების გარეშე შეიძლება მხოლოდ გადაუდებელ შემთხვევაში. ბელგიაში ასეთია დროებითი განთავსების განკარგულება, რომლის ვადის გაგრძელებაც ისევ სასამართლო წესით დაიშვება. შვედეთში გადაუდებელი საჭიროების დროს გადაწყვეტილებას იღებს სოციალური სამსახური, რომელიც აღსრულებდა დაუყოვნებლივ, თუმცა ადმინისტრაციული წესით უნდა დადასტურდეს სასამართლოს მიერ 7 დღეში.

3.3.5. იურიდიული დახმარება და წარმომადგენლობა

ა) იურიდიული დახმარება

კანონი იურიდიული დახმარების შესახებ ადგენს, რომ სისხლის სამართლის საქმის წარმოების ნებისმიერ სტადიაზე არასრულწლოვანი ბრალდებული, მსჯავრდებული, გამართლებული და დაზარალებული სარგებლობენ იურიდიული უფასო დახმარების უფლებით, ხოლო არასრულწლოვან მოწმეს ამ უფლებით სარგებლობა შეუძლია, თუ გადახდისუუნაროა²⁷³. არასრულწლოვანთა სისხლის სამართლის მართლმსაჯულებაში იურიდიული დახმარების სამსახურში მოქმედებს სპეციალიზებულ ადვოკატთა ჯგუფი²⁷⁴. სამოქალაქო და ადმინისტრაციულ საქმეებზე სასამართლოში წარმომადგენლობა, აგრეთვე ადმინისტრაციულ საქმეზე ადმინისტრაციულ ორგანოში წარმომადგენლობა უზრუნველყოფილია, თუ პირი გადახდისუუნაროა და მისთვის იურიდიული დახმარების გაწევა მიზანშეწონილია საქმის მნიშვნელობიდან და სირთულიდან გამომდინარე²⁷⁵.

²⁷¹ ბავშვზე მორგებული მართლმსაჯულება ევროკავშირის 28 ქვეყანაში, 2015/ICF Consulting Services და Milieu /პარა. 4.5.1

²⁷² ბავშვზე მორგებული მართლმსაჯულება ევროკავშირის 28 ქვეყანაში, 2015/ICF Consulting Services და Milieu

²⁷³ მუხ. 41

²⁷⁴ მუხ. 42

²⁷⁵ მუხ. 5. 1-2

თუმცა უნდა აღინიშნოს, რომ უფასო იურიდიული დახმარება არ მიწოდება ყველა გადახდისუუნარო პირს. სახელმწიფოს დაფინანსებით იურიდიული დახმარება ხელმისაწვდომია გადახდისუუნარო პირთა გარკვეული კატეგორიისთვის სტატუსისა და საქმის სირთულიდან გამომდინარე, კერძოდ²⁷⁶:

- საოჯახო და მემკვიდრეობითი დავები საქმის სირთულისა და მნიშვნელობიდან გამომდინარე;
- ფსიქო-სოციალური საჭიროების მქონე პირებისთვის მხარდამჭერის დანიშვნის თაობაზე;
- ოჯახში ძალადობის მსხვერპლებისთვის;
- არანებაყოფლობით ფსიქიატრიულ მკურნალობას დაქვემდებარებული პირისთვის;
- პატიმრებისთვის დისციპლინურ საკითხებზე;
- სოციალური დახმარების და პენსიის საკითხებზე;
- ომის ვეტერანთა და მათ ოჯახთა სოციალური დაცვის საკითხებზე;
- პოლიტიკური რეპრესიების მსხვერპლთა სოციალური დაცვის საკითხებზე;
- დევნილებისთვის (გადახდისუუნარობის შემთხვევაში);
- ჯანდაცვის საკითხებზე პაციენტის უფლებების დასაცავად;
- შეზღუდული შესაძლებლობის მქონე პირთა სოციალური დაცვის საკითხებზე

განხილული ნორმების შინაარსით ჩანს, რომ იურიდიული დახმარების კანონით უფასო იურიდიული დახმარება ხელმისაწვდომია ნებისმიერი ბრალდებული, მსჯავრდებული და გამართლებული ბავშვისთვის და ნებისმიერ ბავშვისთვის, რომელიც დანაშაულის მსხვერპლი გახდა. ასეთ შემთხვევებში არ მოწმდება გადახდისუუნარიანობა, რასაც მნიშვნელობა ენიჭება მოწმე ბავშვის შემთხვევაში. სამოქალაქო და ადმინისტრაციულ საქმეებზე კი უფასო იურიდიული დახმარების მიწოდების ძირითადი კრიტერიუმია გადახდისუუნარობა და მოწყვლადობის სტატუსი. ბავშვთან დაკავშირებით კანონი სხვა დათქმას ამ კუთხით არ აკეთებს, თუმცა არც ასაკობრივ შეზღუდვას მიუთითებს. თუ ბავშვი დააკმაყოფილებს რომელიმე კრიტერიუმს, ის ისარგებლებს უფასო დახმარებით. მაგალითად, თუ ბავშვი არის ოჯახში ძალადობის მსხვერპლი, ის ისარგებლებს უფასო იურიდიული დახმარებით, თუმცა ჯანდაცვის, შეზღუდული შესაძლებლობის გამო სოციალური დაცვის და ოჯახურ დავებში მონაწილეობის დროს, მისთვის უფასო დახმარების მიწოდება დამოკიდებული იქნება მის გადახდისუუნარობაზე და საქმის სირთულეზე.

ბავშვთა გადახდისუუნარობის საკითხი ძირითადად ავტომატურად მიბმულია მათი ოჯახების სოციალურ-ეკონომიკურ პირობებთან და დგინდება სოციალურად დაუცველ ოჯახთა ერთიან ბაზაში რეგისტრაციით. თავად ბავშვს, როგორც უფლებების მატარებელ სუბიექტს, ზოგიერთ შემთხვევაში შესაძლოა ამის გამო რეალური დაბრკოლებები შეექმნას საკუთარი უფლებების დამოუკიდებლად დაცვის თვალსაზრისით. აქედან გამომდინარე, მნიშვნელოვანია უფასო იურიდიული დახმარება ბავშვებისთვის ხელმისაწვდომი გახდეს, აგრეთვე, სამოქალაქო და ადმინისტრაციული მართლმსაჯულების პროცესში, როდესაც ის დამოუკიდებლად მიმართავს ადმინისტრაციულ ორგანოს ან სასამართლოს, როგორც მოსარჩელე ან პროცესის მონაწილე მხარე და შედეგმა შესაძლოა მნიშვნელოვანი გავლენა იქონიოს მის უფლებებზე. ნებისმიერ შემთხვევაში, როდესაც ბავშვი დამოუკიდებლად გადაწყვეტს თავისი უფლებების დაცვას ან/და მის მშობლებთან ინტერესთა კონფლიქტი აქვს, მას უნდა ჰქონდეს წვდომა უფასო იურიდიულ კონსულტაციასა და დახმარებაზე.

იურიდიული დახმარების კანონით აგრეთვე განსაზღვრული უნდა იყოს ბავშვზე მორგებული მართლმსაჯულების ისეთი მნიშვნელოვანი საკითხები, როგორცაა:

²⁷⁶ კანონი იურიდიული დახმარების შესახებ, მუხ. 23¹

იურიდიული დახმარების სამსახურზე ხელმისაწვდომობის ბავშვზე ადაპტირებული და ორიენტირებული სერვისი (სატელეფონო და ონლაინ კონსულტაცია, მათ შორის, სპეციალური საჭიროებებზე ადაპტირებით); ბავშვთა წვდომა უფასო იურიდიულ დახმარებაზე; ადვოკატთა სპეციალიზაცია სამოქალაქო და ადმინისტრაციულ საქმეებზე ბავშვის უფლებების კუთხით.

საფრანგეთის ადვოკატთა ასოციაციამ შექმნა ბავშვთა საკითხების ჯგუფი, რომელიც ბავშვებს აწვდის უფასო და კონფიდენციალურ სამართლებრივ კონსულტაციას ტელეფონით და პირადად. საფრანგეთში ასევე ფუნქციონირებს ახალგაზრდათა სახლები, რომლებიც ბავშვებს აწვდიან სამართლებრივ ინფორმაციას თავიანთ უფლებებზე²⁷⁷.

ბ) წარმომადგენლობა

ადვოკატის როლი განსხვავდება საპროცესო წარმომადგენლის როლისგან (guardian ad litem), რომელიც დანიშნულია სასამართლოს მიერ, რათა დაეხმაროს სასამართლოს ბავშვის საუკეთესო ინტერესების განსაზღვრაში. თავიდან უნდა იქნეს აცილებული ადვოკატის და საპროცესო წარმომადგენლის ფუნქციების ერთი პირის მიერ შესრულება, რადგან არსებობს პოტენციური ინტერესთა კონფლიქტი. კომპეტენტურმა ორგანომ უნდა დანიშნოს საპროცესო წარმომადგენელი ან სხვა დამოუკიდებელი წარმომადგენელი ბავშვის მოსაზრებების წარმოსადგენად ბავშვის ან სხვა პირის მოთხოვნით. ბავშვის უფლება სათანადო წარმომადგენლობაზე მშობლებისგან დამოუკიდებლად უნდა იყოს უზრუნველყოფილი განსაკუთრებით იმ შემთხვევაში, როდესაც მშობლები, ოჯახის წევრები ან სხვა მზრუნველები სავარაუდო მოძალადეები/დამნაშავეები არიან²⁷⁸.

სამოქალაქო კოდექსის თანახმად, ბავშვის წარმომადგენლობას სასამართლოში ახორციელებს მეურვეობისა და მზრუნველობის ორგანო ისეთ საკითხებზე, როგორცაა: მშობლებს შორის ბავშვის აღზრდის საკითხებზე დავის დროს²⁷⁹; განქორწინებულ ან ცალ-ცალკე მცხოვრებ მშობლების შორის შვილის საცხოვრებელ ადგილზე დავის დროს²⁸⁰; მშობელთა უფლება-მოვალეობების შეზღუდვის, შეჩერების ან ჩამორთმევის დროს²⁸¹, მშობლების გარდაცვალების, გარდაცვლილად აღიარების, მათი უგზო-უკვლოდ დაკარგულად აღიარების ან ბავშვის მიტოვებულად აღიარების გამო²⁸². **კოდექსი, ასევე, ადგენს,** რომ განქორწინების საქმის განხილვისას, როდესაც მშობლები ვერ თანხმდებიან შვილების საცხოვრებელ ადგილზე, სასამართლომ საჭიროებისამებრ საქმეში მონაწილეობის მისაღებად უნდა ჩააბას მეურვეობისა და მზრუნველობის ორგანო²⁸³.

სამოქალაქო საპროცესო კოდექსის თანახმად, ბავშვის მიერ დამოუკიდებლად სასამართლოსთვის მიმართვის შემთხვევაში სასამართლო ნიშნავს **საპროცესო წარმომადგენელს.** არასრულწლოვან მოსარჩელეს უფლება აქვს არ დაეთანხმოს თავის

²⁷⁷ „ევროპის საბჭოს სახელმძღვანელო მითითებები ბავშვზე მორგებული მართლმსაჯულების შესახებ“, 2015

²⁷⁸ „ევროპის საბჭოს სახელმძღვანელო მითითებები ბავშვზე მორგებული მართლმსაჯულების შესახებ“ 37-43, 101-105

²⁷⁹ მუხ. 1200

²⁸⁰ მუხ. 1201.2

²⁸¹ მუხ. 1205, 1205¹.5-6, 1206, 1207

²⁸² მუხ. 1275

²⁸³ მუხ. 1128

საპროცესო წარმომადგენელს და თვითონ დაიცვას საკუთარი თავი. სასამართლო ვალდებულია ასეთ საქმეებზე ჩააბას მეურვეობისა და მზრუნველობის ორგანოები²⁸⁴.

ადმინისტრაციული საპროცესო კოდექსის თანახმად, სასამართლო მხარედ მოიწვევს მეურვეობისა და მზრუნველობის ორგანოს საპროცესო წარმომადგენლობის განსახორციელებლად: ბავშვის მიმართ ოჯახში ძალადობის ფაქტზე ადმინისტრაციული სამართალწარმოებისას, თუ ორივე მშობლის უფლება წარმომადგენლობაზე შეჩერებულია²⁸⁵; არასრულწლოვნის სკოლა-პანსიონში გაგზავნასთან დაკავშირებულ საქმეებზე, თუ ბავშვს არ ჰყავს მშობელი ან კანონიერი წარმომადგენელი²⁸⁶.

განხილული ნორმების შინაარსით ირკვევა, რომ მეურვეობისა და მზრუნველობის ორგანო თავად ან მის მიერ დანიშნული პირის საშუალებით ახორციელებს ბავშვის საპროცესო წარმომადგენლობას სამართალწარმოების პროცესში, როდესაც ბავშვი დამოუკიდებლად მიმართავს სასამართლოს 14 წლის ასაკიდან. მეურვეობისა და მზრუნველობის ორგანო წარმოადგენს აგრეთვე ბავშვს მშობელთა შორის დავის დროს, როდესაც მათი უფლებები შეჩერებულია და დავა ეხება ბავშვის საცხოვრებელს, აღზრდას, ძალადობისგან დაცვას ან სხვა საკითხს. თუმცა ამ წარმომადგენლობის შინაარსის გარკვევა კონვენციის მიერ დადგენილ სტანდარტებთან მიმართებაში შეუძლებელია, რადგან კანონმდებლობა არ გვაწვდის სხვა დებულებებს ან მითითებას სხვა რეგულაციაზე მეურვეობისა და მზრუნველობის ორგანოს მიერ ბავშვის წარმომადგენლობის შესახებ.

წარმომადგენლობის უფლების განხორციელება უკავშირდება მთელი რიგ უმნიშვნელოვანეს საკითხებს, როგორცაა: ბავშვის მოსმენა, ბავშვისთვის ინფორმაციის მიწოდება მისთვის შესაბამისი კომუნიკაციის ფორმით, ბავშვის ფსიქო-ემოციური მხარდაჭერა, ბავშვის მოსაზრებების გაგება, გათვალისწინება და სასამართლოსთვის მისი გადაცემა, ამავე დროს მნიშვნელოვანია წარმომადგენელი დაეხმაროს მოსამართლეს ბავშვის საუკეთესო ინტერესების შეფასებას და დადგენაში. წარმომადგენლობის სათანადოდ განხორციელება მოითხოვს ბავშვის განვითარების, მისი უფლებების, მასთან კომუნიკაციის თავისებურებების შესახებ სპეციალურ ცოდნას და შესაბამისი ეთიკური ასპექტების დაცვას. ამავე დროს, საპროცესო კანონმდებლობა არ გვაწვდის მკაფიო ჩანაწერს საპროცესო წარმომადგენლის საპროცესო სტატუსზე და ამ ორგანოს პროცესში „ჩაბმაზე“.

ადამიანის უფლებათა ევროპის სასამართლომ თავის გადაწყვეტილებაში „ნ.წ. საქართველოს წინააღმდეგ“²⁸⁷ განიხილა ბავშვის წარმომადგენლობის საკითხი. გადაწყვეტილებაში ნათქვამია, რომ სოციალური მომსახურების სააგენტო დაინიშნა ბავშვების ინტერესების წარმომადგენლად სამოქალაქო კოდექსის 1200-ე მუხლის მიხედვით და სამოქალაქო საქმის განხილვისას მონაწილეობას იღებდა „დაინტერესებული მხარის“ სტატუსით. თუმცა გაურკვეველი რჩება, თუ რას გულისხმობს ამგვარი წარმომადგენლობა. არც სამოქალაქო საპროცესო კოდექსი და არც სოციალური მომსახურების სააგენტოს საქმიანობის მარეგულირებელი კანონმდებლობა მოიცავს რაიმე ჩანაწერს ამგვარი სააგენტოს ფუნქციებს და უფლებამოსილებებს ამგვარი წარმომადგენლობის განხორციელებისას.

²⁸⁴ მუხ. 81¹

²⁸⁵ მუხ. 21¹²

²⁸⁶ მუხ. 21^{37,3}

²⁸⁷ გადაწყვეტილება „ნ.წ. საქართველოს წინააღმდეგ“, 16.02.2016

ევროპის სასამართლოს გადაწყვეტილებაში, ასევე, აღნიშნულია, რომ სოციალური მომსახურების სააგენტოს სხვადასხვა წარმომადგენლები შეხვდნენ ბავშვებს მხოლოდ რამდენიმეჯერ და მხოლოდ ერთადერთი მიზნით, როგორცაა ანგარიშების შედგენა ბავშვთა საცხოვრებელი პირობების და ემოციური მდგომარეობის შესახებ. მათ არ დაუმყარებიათ ბავშვებთან რეგულარული ან ხშირი კონტაქტი მათი მდგომარეობის მონიტორინგის და მათთან ნდობაზე დაფუძნებული ურთიერთობის ჩამოსაყალიბებლად.

ამავე დროს, მნიშვნელოვანია სპეციალიზაციის საკითხიც, რადგან სააგენტოს მიერ წარმომადგენლობის განხორციელება უკავშირდება სხვადასხვა სფეროებს, როგორცაა: განათლება, ძალადობისგან დაცვა, ოჯახში ცხოვრების უფლების და საჭიროებისამებრ ალტერნატიული ზრუნვის განხორციელება, შეზღუდული შესაძლებლობების მქონე ბავშვთა უფლებები და მათი მხარდაჭერა, და ა.შ. აქედან გამომდინარე, სოციალურ მუშაკებს, რომლებიც წარმომადგენლობას ახორციელებენ, უნდა ჰქონდეთ გავლილი სავალდებულო სწავლება და წარმომადგენლობის განხორციელებისას უნდა იხელმძღვანელონ შესაბამისი ინსტრუქციებითა და რეგულაციებით.

გარდა ზემოთაღნიშნული საკითხებისა, საკანონმდებლო ცვლილებებზე მსჯელობის მნიშვნელოვანია განხილული იქნეს მეურვეობისა და მზრუნველობის ორგანოს წარმომადგენლობის განხორციელებისას პოტენციური ინტერესთა კონფლიქტი. კერძოდ:

ბავშვის შეფასება და მისი წარმომადგენლობა

- ბავშვთან დაკავშირებულ ყველა საკითხზე (სკოლა-პანსიონში გაგზავნა, ოჯახში ძალადობა, შვილად აყვანა, მხარდაჭერა, სხვა) მის ინდივიდუალურ შეფასებას ახორციელებს მეურვეობისა და მზრუნველობის ორგანო. ამასთან ერთად, იგივე ორგანო ახორციელებს ბავშვის წარმომადგენლობას სასამართლოში, რაც ეწინააღმდეგება ამგვარი წარმომადგენლობის შინაარსს. ბავშვის უფლებათა კომიტეტი ხაზგასმით მიუთითებს²⁸⁸, რომ როდესაც ბავშვი ირჩევს საკუთარი აზრი გამოხატოს წარმომადგენლის დახმარებით (ანუ საპროცესო წარმომადგენელი ყოველთვის არაა აუცილებელი, განსაკუთრებით, როდესაც ბავშვი აცნობიერებს თავის უფლებებს და არ სჭირდება დახმარება ამ კუთხით; სხვა საკითხია ადვოკატი, რომელიც უშუალოდ სამართლებრივ დახმარებას, რაც განსახვავდება წარმომადგენლის როლისგან), ამგვარი წარმომადგენელი უნდა იყოს დამოუკიდებელი, გამოხატავდეს უშუალოდ ბავშვის და არა სხვა პირების (მშობლები, დაწესებულებები, სახელმწიფო უწყება ან სხვა).
- ამ საკითხზე ძალიან მნიშვნელოვანია აღინიშნოს ალტერნატიულ ზრუნვაში მყოფი ბავშვების უფლება წარმომადგენლობაზე და ზოგადად მართლმსაჯულებაზე წვდომის შესახებ. მინდობით აღზრდაში ან სპეციალიზებულ დაწესებულებაში მოთავსებული ბავშვების წარმომადგენლები ძირითადად არიან მეურვეობისა და მზრუნველობის ორგანოს წარმომადგენლები და ზრუნვაზე ზედამხედველობასაც ის ახორციელებს. ისეთ შემთხვევებში, თუ ბავშვის უფლებების დარღვევა მოხდა

²⁸⁸ ბავშვის უფლებათა კომიტეტი, ზოგადი კომენტარი #12, პარა. 35-37

ალტერნატიული ზრუნვის დროს ბავშვის წარმომადგენლის მიერ (პირდაპირ ან არასათანადოდ დაიცვა ბავშვი ძალადობისგან), სასამართლოშიც ისევე უწყება წარმოადგენს ბავშვს, რაც ინტერესთა კონფლიქტს წარმოადგენს. აუცილებელია სისტემური და საკანონმდებლო ცვლილებების განხორციელება, რის შედეგადაც მოხდება ამ ფუნქციების გამიჯვნა და განხორციელება სხვადასხვა უწყებების მიერ (ამ საკითხის გადაწყვეტა დამატებით შესწავლას და მსჯელობას საჭიროებს).

შვილად აყვანა

- შვილად აყვანის საკითხზე ბავშვის შეფასებას და გასაშვილებელი ბავშვის სტატუსის მინიჭებას, მშვილებლის შეფასებას და მშვილებლად რეგისტრაციას, მშვილებლის შერჩევას, თავსებადობის შეფასებას, და ბოლოს სასამართლოში ბავშვის წარმომადგენლობას²⁸⁹ ახორციელებს ერთიდაიგივე ორგანო. აუცილებელია საკანონმდებლო და სისტემური ცვლილებების განხორციელება, რის შედეგადაც მოხდება ამ ფუნქციების გამიჯვნა და განხორციელება სხვადასხვა უწყებების მიერ.

ფსიქოსოციალური საჭიროების მქონე პირთა მხარდაჭერა

- მხარდამჭერის საქმიანობაზე ზედამხედველობას ახორციელებს მეურვეობისა და მზრუნველობის ორგანო. ზედამხედველობის მიზანია მხარდამჭერის მიერ სასამართლოს გადაწყვეტილებითა და საქართველოს კანონმდებლობით მისთვის განსაზღვრული მოვალეობების შესრულების კონტროლი, მხარდაჭერის მიმღების უნარების განვითარების შეფასება და შესაბამისი რეაგირება. გეგმიური შემოწმება ხორციელდება პერიოდულად, მხარდამჭერის მიერ მისთვის დაკისრებული მოვალეობების შეუსრულებლობასთან დაკავშირებით მიღებული ნებისმიერი ინფორმაციის შემოწმებით და ფაქტობრივი ზედამხედველობით²⁹⁰. პირს მხარდამჭერი ენიშნება ოჯახის ან სანათესავო წრიდან მეურვეობისა და მზრუნველობის ორგანოს გადაწყვეტილებით ან ასეთი პირის არარსებობის შემთხვევაში - თავად ამ ორგანოს უფლებამოსილი წარმომადგენელი²⁹¹. აღსანიშნავია, რომ მხარდაჭერის მიმღები შეიძლება იყოს არასრულწლოვანიც და აგრეთვე, სრულწლოვან პირს მხარდაჭერა შეიძლება დაენიშნოს მშობლის უფლებების ნაწილში. ამრიგად, ერთიდაიგივე უწყება ახორციელებს პირის მხარდაჭერას და ამავე დროს ამ მხარდაჭერაზე ზედამხედველობას. აუცილებელია სისტემური და საკანონმდებლო ცვლილებების განხორციელება, რის შედეგადაც მოხდება ამ ფუნქციების გამიჯვნა და განხორციელება სხვადასხვა უწყებების მიერ.

დასკვნის სახით შეიძლება ითქვას, რომ ბავშვის წარმომადგენლობის საკითხი მოითხოვს დეტალურ განხილვას და სათანადო რეკომენდაციების შემუშავებას მართლმსაჯულების ყველა სფეროში ბავშვის წარმომადგენლობის ერთიანი პრინციპების, სტანდარტების და რეგულაციების შემუშავებას და კანონმდებლობით განმტკიცებას საერთაშორისო სტანდარტების შესაბამისად.

²⁸⁹ სამოქალაქო კოდექსი, მუხ. 1242, კანონი „შვილად აყვანის და მინდობით აღზრდის შესახებ“

²⁹⁰ სამოქალაქო კოდექსის მუხ. 1305¹

²⁹¹ სამოქალაქო კოდექსის მუხ. 1280

3.3.6. ბავშვზე მორგებული მართლმსაჯულება სასამართლო პროცესის შემდეგ

ევროპის საბჭოს სახელმძღვანელო მითითებები მიუთითებს რამდენიმე სახელმძღვანელო პირობაზე ბავშვზე მორგებული მართლმსაჯულების შესახებ სასამართლო პროცესის შემდეგ²⁹²:

- პროცესის შემდეგ ადვოკატმა, საპროცესო წარმომადგენელმა ან კანონიერმა წარმომადგენელმა ბავშვს მისთვის გასაგებ ენაზე უნდა აუხსნას გადაწყვეტილების შინაარსი, ასევე, მიაწოდოს ინფორმაცია გადაწყვეტილების გასაჩივრების მექანიზმებზე;
- სასამართლოს გადაწყვეტილება/განკარგულება უნდა აღსრულდეს დაყოვნების გარეშე. გადაწყვეტილების იძულებით აღსრულება უნდა მოხდეს უკიდურეს შემთხვევაში, როდესაც ბავშვი მონაწილეობს;
- გადაწყვეტილების გამოტანის შემდეგ, კონფლიქტური პროცესების დროს, ბავშვებს და ოჯახებს უნდა გაეწიოთ სპეციალისტის მხარდაჭერა და კონსულტაცია. ასევე, მნიშვნელოვანია ჯანდაცვის და საჭირო სოციალური და თერაპიული კურსები ძალადობის მსხვერპლი ბავშვებისთვის.
- ბავშვის ადვოკატს, საპროცესო წარმომადგენელს ან მეურვეს უნდა ჰქონდეს უფლება მოითხოვოს მსხვერპლი ბავშვის სახელით მიყენებული ზიანის ანაზღაურება. ბავშვზე კომპენსაცია უნდა გაიცეს საჭიროებისამებრ სახელმწიფოს მიერ, ხოლო შემდეგ მოხდეს დამრღვევიდან მისი ანაზღაურება სახელმწიფოსთვის.

ა) ინფორმაცია გადაწყვეტილების შინაარსის და მისი გასაჩივრების შესახებ

სამოქალაქო საპროცესო კოდექსი ითვალისწინებს მხარეებისთვის გამოტანილი გადაწყვეტილების წერილობითი განმარტების შესახებ²⁹³, თუმცა არ ადგენს უშუალოდ ბავშვის ინფორმირებას, მისი ასაკის და შესაძლებლობების შესაბამისი ენითა და კომუნიკაციის საშუალებების გამოყენებით, გადაწყვეტილების შინაარსის, მისი აღსრულების შედეგების და გასაჩივრების მექანიზმების შესახებ.

ბ) ზიანის ანაზღაურება, კომპენსაცია

ზიანის ანაზღაურების საკითხზე სამოქალაქო კოდექსი ზოგად დებულებას, რომ ყველა პირი, რომელიც სხვა პირს მართლსაწინააღმდეგო, განზრახი ან გაუფრთხილებელი მოქმედებით მიაყენებს ზიანს, ვალდებულია აუნაზღაუროს მას ეს ზიანი²⁹⁴. **სამოქალაქო საპროცესო კოდექსის** თანახმად, ზიანის ანაზღაურების შესახებ სარჩელს უნდა დაერთოს კანონიერ ძალაში შესული სასამართლო განაჩენი ან ადმინისტრაციულ-სამართლებრივი აქტი, რომლითაც დასტურდება ზიანის მიყენების ფაქტი²⁹⁵.

ზიანის ანაზღაურების თაობაზე, ადმინისტრაციული კოდექსი ადგენს, რომ სახელმწიფო ადმინისტრაციული ორგანოს, აგრეთვე მისი თანამდებობის პირის ან საჯარო

²⁹² პარა. 75-83. გვ. 31-32

²⁹³ მუხ. 262

²⁹⁴ მუხ.992

²⁹⁵ მუხ. 309¹⁷

მოსამსახურის, ასევე, ადგილობრივი თვითმმართველობის ორგანოს ან მისი თანამდებობის პირის ან საჯარო მოსამსახურის მიერ თავისი სამსახურებრივი მოვალეობის შესრულებისას პირისთვის მიყენებული ზიანისათვის პასუხისმგებელია სახელმწიფო ან შესაბამისად, ადგილობრივი თვითმმართველობის ორგანო²⁹⁶. ასევე, თუ კერძო პირი რაიმე საქმიანობას ახორციელებს სახელმწიფო ორგანოს ან ადგილობრივი თვითმმართველობის ორგანოს მიერ დელეგირების ან დავალების საფუძველზე, ამ საქმიანობის განხორციელებისას მიყენებული ზიანისათვის პასუხისმგებელია სახელმწიფო ან მუნიციპალიტეტი²⁹⁷.

განხილული ნორმები საშუალებს აძლევს ყველა პირს (დაზარალებულს/მსხვერპლს) სამოქალაქო სარჩელი მიმართოს სასამართლოს სხვა პირის მიერ მართლსაწინააღმდეგო, განზრახი ან გაუფრთხილებელი მოქმედებით მიყენებული ზიანის ანაზღაურებისთვის. ნებისმიერ პირს შეუძლია მიმართოს სასამართლოს ადმინისტრაციული სარჩელით სახელმწიფო უწყების ან ადგილობრივი თვითმმართველობის ან/და მათ წარმომადგენელთა მიერ მიყენებული ზიანის ანაზღაურების თაობაზე.

ეს ნორმები არ აკეთებს განსხვავებულ დათქმას ასაკზე, ამიტომ შესაბამისად გავრცელდება სამოქალაქო კოდექსით დადგენილი ქმედუნარიანობის წესი. აქედან გამომდინარე, ზოგადი წესით დაზარალებული/მსხვერპლი ბავშვის სახელით მის კანონიერ წარმომადგენელს უფლება აქვს მიმართოს სასამართლოს ზიანის ანაზღაურების მოთხოვნით. რაც შეეხება დამოუკიდებლად მიმართვის უფლებას, ზემოთგანხილული სამოქალაქო კოდექსის ნორმების თანახმად, 14 წელს მიღწეულ ბავშვს ამის უფლება აქვს მხოლოდ მშობელთა მიერ უფლების ბოროტად გამოყენების შემთხვევაში ან 16 წელს მიღწეულ ბავშვს მშობელთა მიერ გადაცემული ქონების მართვის ფარგლებში. სხვა შემთხვევაში, თუ ბავშვსა და მშობელს (ან სხვა კანონიერ წარმომადგენელს) შორის შეუთანხმებლობა ან სხვაგვარი ინტერესთა კონფლიქტია, კანონი არ ითვალისწინებს რაიმე განსაკუთრებულ დათქმას ან ბავშვზე მორგებულ მხარდამჭერ პროცედურას ასაკისა და შესაძლებლობების შესაბამისი დამოუკიდებელი გასაჩივრების მექანიზმებზე წვდომის შესახებ. ამ საკითხზე განსაკუთრებული ყურადღება უნდა გამახვილდეს მოწყვლად მდგომარეობაში მყოფ ბავშვებზე.

რაც შეეხება ზიანის ანაზღაურების მოთხოვნის ხანდაზმულობის ვადას, ესაა 3 წელი. აქედან გამომდინარე, თუ სხვადასხვა მიზეზების გამო ბავშვის წარმომადგენელი ზიანს არ მოითხოვს, ხოლო ბავშვის დაუცველი მდგომარეობის შემთხვევაში - ის ვერ მიმართავს დამოუკიდებლად სასამართლოს, ვადის გაშვების შემთხვევაში, ზიანის ანაზღაურების შესაძლებლობა დაიკარგება. ევროპის საბჭოს რეკომენდაციით²⁹⁸, კონკრეტულ დანაშაულებთან მიმართებაში ან სამოქალაქო, მათ შორის, საოჯახო სამართლის ასპექტებზე, უფლების დარღვევის შესახებ ბავშვს სასამართლოსადმი მიმართვის უფლება უნდა მიეცეს სრულწლოვანების მიღწევის შემდეგ. აქედან გამომდინარე, საკანონმდებლო ცვლილებებმა, ზემოთგანხილულ საკითხებთან ერთად, უნდა მოიცვას ხსენებული ხანდაზმულობის ვადის გადახედვა და ბავშვებისთვის ამ საკანონმდებლო ბარიერის მოხსნა.

გ) გადაწყვეტილებების აღსრულება

სამოქალაქო საპროცესო კოდექსის თანახმად, დაუყოვნებლივ აღსასრულებელ გადაწყვეტილებებს ბავშვთა საქმეებზე მიეკუთვნება მხოლოდ ალიმენტის მიკუთვნების საკითხი და დასახიჩრებით ან ჯანმრთელობის დაზიანებით, ასევე მარჩენალის

²⁹⁶ მუხ. 208.1, 2

²⁹⁷ მუხ. 208.3

²⁹⁸ ევროპის საბჭოს სახელმძღვანელო მითითებები, პარა. 36

სიკვდილით გამოწვეული ზიანის ასანაზღაურებლად გადასახადების დაკისრების შესახებ²⁹⁹. სასამართლოს შეუძლია გადაწყვეტილებაში მიუთითოს აღსრულების განსაზღვრული წესი და ვადა ან გარკვეული ზომები აღსრულების უზრუნველსაყოფად³⁰⁰.

ბავშვებთან დაკავშირებული გადაწყვეტილებების აღსრულების თაობაზე საკანონმდებლო ცვლილებების განხორციელებისას უნდა იქნეს გათვალისწინებული შემდეგი ძირითადი საკითხები (დეტალური მსჯელობის შედეგად მოსალოდნელია სხვა პრობლემური საკითხების გამოვლენაც):

- **ზიანის დროული და ეფექტური ანაზღაურების მექანიზმი:** სამოქალაქო კოდექსით გათვალისწინებული არ არის დანაშაულის მსხვერპლ ბავშვთა ზიანის ანაზღაურების დროულობისა და ეფექტურობის უზრუნველყოფის საკითხი, კერძოდ, ამ ზიანის ანაზღაურების გაჭიანურებისას სახელმწიფოს მიერ ზიანის ანაზღაურება (შემდეგ უკვე სახელმწიფო უზრუნველყოფს პასუხისმგებელ პირის მიერ ანაზღაურებას).
- **ინტერესთა კონფლიქტი აღმასრულებელ ორგანთან დაკავშირებით:** მეურვეობისა და მზრუნველობის ორგანო ახორციელებს სასამართლო გადაწყვეტილებების აღსრულებას ბავშვის გადაცემასთან ან/და შვილთან მეორე მშობლის ან სხვა წევრის ურთიერთობის უფლების განხორციელებასთან დაკავშირებულ საკითხებზე³⁰¹. იგივე ორგანო ახორციელებს: ბავშვთა ალტერნატიული ზრუნვის პროცესის წარმართვას და კოორდინაციას, შვილად აყვანის პროცედურების განხორციელებას, ბავშვთა და ოჯახთა შეფასებას, ბავშვთა მიმართ ძალადობის გამოვლენას და შეტყობინებას³⁰²; ბავშვთა წარმომადგენლობას მშობელთა ნაცვლად ან/და საპროცესო წარმომადგენლობას³⁰³. აუცილებელია საკანონმდებლო და სისტემური ცვლილებების განხორციელება, რის შედეგადაც მოხდება ამ ფუნქციების გამიჯვნა და განხორციელება სხვადასხვა უწყებების მიერ (ამ საკითხის გადაწყვეტა დამატებით შესწავლას და მსჯელობას საჭიროებს).
- **ბავშვის კონსულტირება, მხარდაჭერა და მომზადება** მასთან დაკავშირებული სასამართლო გადაწყვეტილების აღსრულების პროცესში.

3.4. ბავშვის ძირითად უფლებათა შესახებ ეროვნული კანონმდებლობის ანალიზი (განათლება, ჯანდაცვა, ალტერნატიული ზრუნვა, ბავშვთა შრომა)

როგორც შესავალში აღინიშნა, წინამდებარე დოკუმენტის ძირითადი მიზანია გააანალიზოს საქართველოს კანონმდებლობა ბავშვზე მორგებული მართლმსაჯულების საკითხებზე, თუმცა მნიშვნელოვანია ამავე დოკუმენტმა მოიცვას ისეთი ძირითადი უფლებების ანალიზიც, როგორცაა: უფლება განათლებაზე და ჯანდაცვაზე, ასევე, ალტერნატიული ზრუნვის და ბავშვთა შრომის საკითხებიც. აქვე უნდა აღინიშნოს რომ არანაკლები მნიშვნელობისაა ბავშვთა უფლებების კონვენციით აღიარებული სხვა

²⁹⁹ მუხ. 268.1 „ა“, „ბ“

³⁰⁰ მუხ. 251

³⁰¹ კანონი სააღსრულები წარმოებათა შესახებ, მუხ. 2, 90¹²; საქართველოს შრომის, ჯანმრთელობისა და სოციალური დაცვის მინისტრის ბრძანება №01-16/ნ / 2011 წლის 18 აპრილი

³⁰² მინისტრის ბრძანება №190/ნ (27.06.2007) სოციალური მომსახურების სააგენტოს დებულების დამტკიცების შესახებ <https://matsne.gov.ge/ka/document/view/71380#>!

³⁰³ იხ. სამოქალაქო კოდექსის ზემოთგანხილული მუხლები

უფლებებიც და მათი გაანალიზება აუცილებელია განხორციელდეს შემდგომ ეტაპზე, რათა უზრუნველყოთ საქართველოს კანონმდებლობის სრულფასოვანი შესაბამისობა საერთაშორისო სტანდარტებთან ბავშვთა უფლებების ეფექტური განხორციელების მიზნით.

3.4.1. ბავშვთა დაცვა ექსპლუატაციის, ძალადობისა და შრომის მიმე ფორმებისგან

ბავშვის უფლებათა კონვენცია ავალდებულებს წევრ სახელმწიფოებს მიიღონ სათანადო ზომები ნებისმიერი ფორმის ძალადობის, ექსპლუატაციის, ვაჭრობის, ტრეფიკინგის და საზიანო შრომის პირობებისგან ბავშვთა დაცვის მიზნით, კერძოდ:

- მიიღონ ზომები, რომელებიც მოიცავს ბავშვის და მისი ოჯახის მხარდაჭერის პროგრამებს, ასევე, სხვა ფორმის პრევენციის და გამოვლენის, შეტყობინების, გადამისამართების, გამოძიების, მკურნალობის და ბავშვისადმი ცუდი მოპყრობის შემთხვევებზე სათანადო რეაგირების მექანიზმებს, აგრეთვე, სასამართლოს მონაწილეობას (მუხ. 19)
- ვალდებულია დაადგინოს შრომის მინიმალური ასაკი, შრომის ხანგრძლივობა, შრომის პირობები, აგრეთვე, შესაბამისი სანქციები ეფექტური აღსრულებისთვის (მუხ. 32).
- მიიღონ ზომები შემდეგი დანაშაულების პრევენციისთვის: ბავშვის დაყოლიება ან იძულება ნებისმიერ უკანონო სექსუალურ მოქმედებაში ჩასაბმელად; ბავშვთა გამოყენება პროსტიტუციასა და სხვა უკანონო სექსუალურ მოქმედებებში; ბავშვთა გამოყენება პორნოგრაფიულ საქმიანობასა და მასალებში (მუხ. 34)
- განახორციელონ სათანადო ზომები ნებისმიერი მიზნით ან ფორმით ბავშვთა მოტაცების, ყიდვა-გაყიდვის და ტრეფიკინგის პრევენციისთვის (მუხ. 35)
- მიიღონ ყველა შესაბამისი ზომა, რათა ხელი შეუწყონ ნებისმიერი ფორმის ძალადობის, ექსპლუატაციის, ცუდი მოპყრობის; წამების ან სხვა სასტიკი, არაადამიანური ან დამამცირებელი მოპყრობის ან სასჯელის ან შეიარაღებული კონფლიქტების მსხვერპლი ბავშვის ფიზიკურ და ფსიქოლოგიურ გაჯანსაღებას და სოციალურ ინტეგრაციას (მუხ.39).

ბავშვის უფლებათა კონვენციის დამატებითი ოქმი ბავშვებით ვაჭრობის, ბავშვთა პროსტიტუციისა და ბავშვთა პორნოგრაფიის შესახებ ადგენს შემდეგ განმარტებებს³⁰⁴:

- **ბავშვით ვაჭრობა** გულისხმობს ბავშვის გადაცემა ერთი ადამიანის ან ადამიანთა ჯგუფის მიერ მეორეზე ფულადი ანაზღაურების ან სხვა სახის სარგებლის მიღების მიზნით; ბავშვის შეთავაზება, გადაცემა ან მიღება, ნებისმიერი საშუალებით, შემდეგი მიზნებით: სექსუალური ექსპლუატაცია, ორგანოების გადანერგვა სარგებლის მისაღებად, იძულებით შრომაში ჩაბმა. შუამავლის მიერ ანგარებით პირის დაწრმუნება თანხმობა გასცეს ბავშვის გაშვილებაზე შვილად აყვანის შესახებ საერთაშორისო სამართლებრივი ნორმების დარღვევით.
- **ბავშვთა პროსტიტუცია** გულისხმობს ბავშვის გამოყენებას სექსუალურ მოქმედებებში ფულადი ანაზღაურების ან სხვა სახის სარგებლის მიღების

³⁰⁴ბავშვის უფლებათა კონვენციის დამატებითი ოქმი ბავშვებით ვაჭრობის, ბავშვთა პროსტიტუციისა და ბავშვთა პორნოგრაფიის შესახებ, მუხ. 2 (2000 წ. 25 მაისი); საქართველოს მიერ რატიფიცირებულია 2005 წელს

მიზნით. ბავშვის შეთავაზება, მიღება, მოძიება ან გადაცემა პროსტიტუციის მიზნით.

- **ბავშვთა პორნოგრაფია** გულისხმობს ბავშვის ნებისმიერ გამოსახულებას, ნებისმიერი საშუალებით, რომელიც ასახავს მის მონაწილეობას რეალურ ან იმიტირებულ პირდაპირ სექსუალურ მოქმედებებში ან ბავშვის სასქესო ორგანოების ნებისმიერ გამოსახულებას უპირატესად სექსუალური მიზნებისთვის. ბავშვთა პორნოგრაფიის წარმოება, გავრცელება, მიწოდება, იმპორტი, ექსპორტი, შეთავაზება, გაყიდვა ან ფლობა უპირატესად სექსუალური მიზნებისთვის.

შეზღუდული შესაძლებლობის მქონე პირთა უფლებების კონვენცია: „მონაწილე სახელმწიფოები იღებენ ეფექტურ, მათ შორის ქალებსა და ბავშვებზე ორიენტირებულ კანონმდებლობასა და სტრატეგიებს, რათა უზრუნველყონ შეზღუდული შესაძლებლობის მქონე პირთა ექსპლუატაციის, ძალადობისა და შეურაცხყოფის შემთხვევათა გამოვლენა, გამოძიება და საჭიროების შემთხვევაში კანონით დასჯა“³⁰⁵.

ევროპის საბჭოს კონვენცია ტრეფიკინგის წინააღმდეგ („ვარშავის კონვენცია“)³⁰⁶ განმარტავს:

- **„ტრეფიკინგი“** - „ადამიანის მოძიება, ტრანსპორტირება, გადაცემა, ადგილის გადაცემა ან მიღება, მუქარის ან ძალის გამოყენების ან იძულების სხვა ფორმების, მოტაცების, გაყალბების, მოტყუების, უფლებამოსილების ბოროტად გამოყენების ან მსხვერპლის უმწეობის გამოყენებით, ან ერთი პირის მიერ მისი გავლენის ქვეშ მყოფ მეორე პირზე ზეწოლით თანხმობის მისაღებად ფულადი ან სხვა სახის სარგებლის გაცემის ან მიღების გზით, ექსპლუატაციის მიზნით“.
- **„ექსპლუატაცია“** - მოცავს, როგორც მინიმუმ, სხვა ადამიანის ექსპლუატაციას პროსტიტუციისთვის ან სხვაგვარი ფორმის სექსუალურ ექსპლუატაციას, შრომის ან სხვა სერვისების შესრულების იძულებას, მონობის ან მონობის მსგავს მდგომარეობაში ჩაყენებას, მომსახურების იძულებას ან ორგანოთა ამოღებას³⁰⁷.

სპეციალური დათქმა ბავშვებთან დაკავშირებით: ბავშვის მოძიება, ტრანსპორტირება, გადაცემა, შეფარება ან მიღება ექსპლუატაციის მიზნით ჩაითვლება „ადამიანთა ტრეფიკინგად“, თუნდაც არ მოიცავდეს ამავე კონვენციით ტრეფიკინგის განმარტებაში აღწერილ საშუალებებს.³⁰⁸

▪ **ბავშვთა დაცვა ძალადობის “ყველა ფორმისგან”**

ძალადობის ნებისმიერი ფორმისგან ბავშვთა დაცვისთვის, პირველ რიგში, მნიშვნელოვანია კანონმდებლობამ დაადგინოს ძალადობის ფორმების სწორი ფორმულირება და განმარტება. გაეროს ბავშვის უფლებათა კომიტეტი მიუთითებს, რომ აუცილებელია კანონით სწორად და ამომწურავად განიმარტოს და აიკრძალოს ძალადობის სხვადასხვა ფორმები ნებისმიერ გარემოში. სამართლებრივი განმარტებების შემუშავებისას მხედველობაში უნდა იქნეს მიღებული კომიტეტის ზოგად კომენტარში მითითებული რეკომენდაციები³⁰⁹.

³⁰⁵ მუხ. 16 (5)

³⁰⁶ საქართველომ რატიფიკაცია მოახდინა 14/03/2007

³⁰⁷ ევროპის საბჭოს კონვენცია ტრეფიკინგის წინააღმდეგ, მუხ. 4 „ა“

³⁰⁸ მუხ. 4 „გ“

³⁰⁹ გაეროს ბავშვის უფლებათა კომიტეტის ზოგადი კომენტარი 13 (2011), პარა. 18

გაეროს ბავშვის უფლებათა კომიტეტის მიერ ჩამოთვლილია ძალადობის შემდეგი ფორმები და მათი განმარტებები: უგულვებელყოფა ან დაუდევარი მოპყრობა; ფსიქოლოგიური ძალადობა; ფიზიკური ძალადობა; ფიზიკური დასჯა; სექსუალური ძალადობა და ექსპლუატაცია; წამება ან არაადამიანური ან დამამცირებელი მოპყრობა ან სასჯელი; ძალადობა ბავშვებს შორის; თვითდაზიანება; ზიანის შემცველი ჩვეულებები; ძალადობა მედიაში; ძალადობა საინფორმაციო და საკომუნიკაციო ტექნოლოგიების საშუალებით; ბავშვთა უფლებების ინსტიტუციური და სისტემური დარღვევები³¹⁰.

საქართველოს კანონი „ოჯახში ძალადობის აღკვეთის, ოჯახში ძალადობის მსხვერპლთა დაცვისა და დახმარების შესახებ“ განმარტავს ძალადობის შემდეგ ფორმებს: ფიზიკური, ეკონომიკური, ფსიქოლოგიური და სექსუალური ძალადობა; იძულება; უგულვებელყოფა (ზუსტად იგივე განმარტებებს იმეორებს მთავრობის დადგენილება „ბავშვთა დაცვის მიმართვიანობის პროცედურების შესახებ“).

როგორც ვხედავთ, არსებული ჩამონათვალი არ მოიცავს ან/და არასრულყოფილად განმარტავს ისეთ მნიშვნელოვან ფორმებს, როგორცაა: ექსპლუატაცია; ფიზიკური დასჯა, ძალადობა ბავშვებს შორის, მათ შორის, ბულინგი; თვითდაზიანება; ძალადობა საინფორმაციო და საკომუნიკაციო ტექნოლოგიების საშუალებებით; ბავშვთა უფლებების სისტემური და ინსტიტუციური დარღვევები. ამავ დროს, არ არსებობს სამართლებრივი მექანიზმი ძალადობის შემთხვევებზე მონაცემთა შეგროვებისა და ანალიზის შესახებ, რაც შესაძლებელს გახდიდა ამ მხრივ სიტუაციის შესწავლას და ანალიზზე დაფუძნებული პრევენციისა და რეაგირების პოლიტიკის შემუშავებას.

▪ ფიზიკური ძალადობა

გაეროს ბავშვის უფლებათა კომიტეტის განმარტებით „ფიზიკური ძალადობა“ მოიცავს:

- ნებისმიერი სახის ფიზიკურ დასჯას და ნებისმიერი სხვა ფორმის წამებას, სასტიკ, არაადამიანურ ან დამამცირებელ მოპყრობას ან სასჯელს;
- ფიზიკური „ბულინგი“ ან გარკვეული ქცევის შესრულების იძულება (“hazing”) ზრდასრულების ან სხვა ბავშვების მიერ;
- შეზღუდული შესაძლებლობის მქონე ბავშვთა მიმართ იძულებით სტერილიზაცია;
- მკურნალობის მიზნით ძალადობრივი მეთოდების გამოყენება (მაგ.: ელექტროკონვულსიური თერაპია და ელექტროშოკის გამოყენება „ავერსიული თერაპიისთვის“ ბავშვთა ქცევის კონტროლირებისთვის);
- ბავშვის შესაძლებლობის შეზღუდვის გამოწვევა მისი ექსპლუატაციისთვის ქუჩაში ან სხვაგან სამათხოვროდ³¹¹.

▪ ფიზიკური დასჯის და სხვა ფორმის სასტიკი, არაადამიანური ან დამამცირებელი სასჯელის ან მოპყრობის აკრძალვა

კომიტეტის განმარტებით, მნიშვნელოვანია კანონით ცალკე მოხდეს ფიზიკური დასჯის აკრძალვა, რისი უპირატესი მიზანიც არის ბავშვთა მიმართ ძალადობის პრევენცია

³¹⁰ ზოგადი კომენტარი 13 (2011), პარა. 20-31

³¹¹ ზოგადი კომენტარი 13 (2011), პარა. 22

დამოკიდებულებების და პრაქტიკის შეცვლა ბავშვის აღზრდის პოზიტიური, არაძალადობრივი და მონაწილეობითი ფორმების დამკვიდრების ხელშეწყობის გზით³¹².

ამავე დროს, საჭიროა სამოქალაქო და სისხლის სამართლის კანონმდებლობით ზუსტად, კონკრეტული ფორმულირებით, აიკრძალოს ფიზიკური ან სხვა სასტიკი ან დამამცირებელი სასჯელი, რათა სრულიად ცხადი გახდეს, რომ ისეთივე უკანონო ბავშვის ცემა ან „გარტყმა“ ან „მოტყაპუნება“, როგორც ზრდასრულის. ფიზიკური დასჯის ტრადიციული მიმდებლობიდან გამომდინარე, მნიშვნელოვანია ის აიკრძალოს ყველა შესაბამისი სექტორული კანონმდებლობით, როგორცაა, მათ შორის, საოჯახო სამართალი, განათლების შესახებ კანონი, კანონი ალტერნატიული ზრუნვის და მართლმსაჯულების სისტემების შესახებ. ასევე, მნიშვნელოვანია ფიზიკური დასჯის უკანონობა პირდაპირ აისახოს აღმზრდელების, მზრუნველების, მასწავლებლების ეთიკის კოდექსებსა და სახელმძღვანელო მითითებებში და დაწესებულებების წესდებებსა და დებულებებში³¹³.

საქართველოს სამოქალაქო კოდექსის თანახმად (საოჯახო სამართლის ნაწილი), „დაუშვებელია არასრულწლოვანი ბავშვის აღზრდისას მშობლის/კანონიერი წარმომადგენლის მიერ აღზრდის ისეთი მეთოდების გამოყენება, რომლებიც არასრულწლოვნის ფიზიკურ ან/და ფსიქიკურ ტანჯვას იწვევს“³¹⁴.

კანონი ადრეული და სკოლამდელი განათლების შესახებ კრძალავს ნებისმიერ ძალადობას ბავშვის მიმართ³¹⁵, თუმცა პირდაპირ არ მიუთითებს ფიზიკური დასჯის ან სხვა სახის დამამცირებელი მოპყრობის აკრძალვის შესახებ.

კანონი ზოგადი განათლების შესახებ კრძალავს სკოლაში ძალადობას, ფიზიკურ ან/და სიტყვიერ შეურაცხყოფას მოსწავლის ან ნებისმიერი სხვა პირის მიმართ³¹⁶.

ადმინისტრაციულ სამართალდარღვევათა კოდექსით ადგენს ფინანსურ სანქციებს მშობლის ან მისი შემცვლელი პირის მიერ არასრულწლოვნის აღზრდისა და სწავლების მოვალეობათა შეუსრულებლობისთვის. დარღვევის გამოვლენა და პირის დაჯარიმება ევალება პოლიციას³¹⁷. აგრეთვე, ფინანსური სანქციები დაეკისრებათ პროფესიონალებს, რომლებიც არ შეასრულებენ ბავშვზე ძალადობის გამოვლენის და ბავშვზე ძალადობის შესახებ ინფორმაციის შესაბამისი სახელმწიფო ორგანოსთვის მიწოდების ვალდებულებას³¹⁸.

სისხლის სამართლის კოდექსით აკრძალულია ცემა ან სხვაგვარი ძალადობა, რამაც დაზარალებულის ფიზიკური ტკივილი გამოიწვია³¹⁹; ძალადობა, სისტემატური შეურაცხყოფა, შანტაჟი ან დამცირება, რამაც გამოიწვია ფიზიკური ტკივილი ან ტანჯვა³²⁰ პირის დამცირება ან იძულება, არაადამიანურ, ღირსებისა და პატივის შემლახავ

³¹² ზოგადი კომენტარი #8

³¹³ ზოგადი კომენტარი #8

³¹⁴ მუხ. 1198. ნაწ. 1¹

³¹⁵ მუხ. 6 „ბავშვთა დაცვა“

³¹⁶ კანონი ზოგადი განათლების შესახებ, მუხ. 20.1

³¹⁷ მუხ. 172, 239 (60¹)

³¹⁸ მუხ. 172⁶

³¹⁹ სისხლის სამართლის კოდექსი, მუხ. 126.2; 126¹.2

³²⁰ მუხ. 126¹.2

მდგომარეობაში ჩაყენება, რაც მას ძლიერ ფიზიკურ, ფსიქიკურ ტკივილს ან მორალურ ტანჯვას აყენებს³²¹.

სამოქალაქო კოდექსის დებულება არ წარმოადგენს დისციპლინურ ზომად ფიზიკური დასჯის პირდაპირ აკრძალვას, რადგან მიუთითებს დათქმას „ფიზიკურ ან/და ფსიქიკურ ტანჯვაზე“ ანუ აღზრდის ძალადობრივი მეთოდი აკრძალულია, თუ ის ამგვარ შედეგს იწვევს. ამგვარი დათქმა ასუსტებს აკრძალვის მნიშვნელობას და უქვემდებარებს შეფასებით კატეგორიას. შესაბამისად, ოჯახში ბავშვის აღზრდის ძალადობრივი მეთოდების გამოყენება³²², როგორცაა დისციპლინის ზომად „გარტყმა“ ან „მოტყაპუნება“ ან ბავშვის იზოლირება ან/და სხვაგვარი დამცირება პირდაპირ აკრძალული არ არის.

სკოლამდელი და ზოგადი განათლების შესახებ კანონები არ მოიცავს დისციპლინის ძალადობრივი მეთოდების, როგორცაა ფიზიკური დასჯა, სხვა სასტიკი ან დამამცირებელი მოპყრობის გამოყენების პირდაპირ აკრძალვას. ეს კანონები არ მოიცავს, აგრეთვე, ბავშვთა შორის ძალადობის, მათ შორის, „ბულინგის“ განმარტებას და აკრძალვას.

სისხლის სამართლის კოდექსის ნორმები ვერ უზრუნველყოფს ოჯახურ და სასკოლო გარემოში ბავშვთა მიმართ ძალადობრივი დასჯის მეთოდების აღმოფხვრის პრევენციას, ხოლო ადმინისტრაციულ სამართალდარღვევათა კოდექსით დადგენილი ფინანსური სანქციები ეხება მხოლოდ მშობელთა მიერ ბავშვის უგულვებელყოფის აკრძალვას და პროფესიონალთა მიერ ძალადობის შეტყობინების ვალდებულების შეუსრულებლობას და არა - უშუალოდ მათ მიერ ძალადობრივი დისციპლინის მეთოდების, მათ შორის, ფიზიკური დასჯის ან სხვა სასტიკი ან დამამცირებელი სასჯელის ან მოპყრობის დაუშვებლობას.

აქედან გამომდინარე, რეკომენდებულია სამოქალაქო კოდექსით, განათლების შესახებ კანონებით, და როგორც მინიმუმ, ადმინისტრაციული სამართალდარღვევათა კოდექსით, პირდაპირ (დათქმების გარეშე) აიკრძალოს ბავშვის მიმართ ფიზიკური დასჯის ან სხვა ფორმის სასტიკი და დამამცირებელი სასჯელის გამოყენება მშობლების ან სხვა პასუხისმგებელი პირების მიერ, როგორც დისციპლინის ზომა. დამატებით, განათლების შესახებ კანონებით უნდა განიმარტოს და აიკრძალოს „ბულინგი“ ბავშვებს შორის.

▪ ბავშვით ვაჭრობის და ექსპლუატაციის აკრძალვა

ბავშვთა ვაჭრობის, ბავშვთა პროსტიტუციისა და ბავშვთა პორნოგრაფიის საკითხებზე გაეროს სპეციალურმა მომხსენებელმა საქართველოს შესახებ ანგარიშში მიუთითა საქართველოს კანონმდებლობის ხარვეზებზე, კერძოდ, აღნიშნა, რომ „ბავშვით ვაჭრობის“ და „ბავშვთა ექსპლუატაციის“ დანაშაულები განმარტებულია მხოლოდ ტრეფიკინგის დანაშაულის შემადგენლობაში და არ არის გამოყოფილი ცალკე³²³.

სისხლის სამართლის კოდექსი განმარტავს „ექსპლუატაციას“, როგორც დამნაშავის მიერ მატერიალური ან სხვაგვარი სარგებლის მიღების მიზნით: შრომის ან მომსახურების გაწევის

³²¹ მუხ. 144³.2

³²² საქართველოში არსებულ მდგომარეობას ამ მხრივ ცხადყოფს გაეროს ბავშვთა ფონდის მიერ ჩატრებული კვლევა ძალადობის შესახებ (2013)

³²³ ბავშვთა ვაჭრობის, ბავშვთა პროსტიტუციისა და ბავშვთა პორნოგრაფიის საკითხებზე გაეროს სპეციალური მომხსენებლის ანგარიში საქართველოში ვიზიტის შესახებ, პარა. 36, 37, 40, 82; თარიღი: 21.12.2016

იძულებას, სექსუალური მომსახურების იძულებას, პირის დანაშაულებრივ საქმიანობაში, პროსტიტუციაში, პორნოგრაფიაში ან სხვა ანტისაზოგადოებრივ ქმედებაში ჩაბმას; ადამიანის სხეულის ორგანოს, ორგანოს ნაწილის ან ქსოვილის იძულებით ან მოტყუებით ამოღება, გადანერგვა ან სხვაგვარად გამოყენება; ადამიანის მონობის მსგავს მდგომარეობაში ან მონობის თანამედროვე პირობებში ჩაყენება³²⁴. მართალია, ეს განმარტება შეესაბამება კონვენციის შინაარსს, თუმცა კოდექსში მოცემულია არა ცალკე დანაშაულის, არამედ ტრეფიკინგის დანაშაულის შემადგენლობაში.

იგივე განმარტებაა მოცემული საქართველოს კანონში ადამიანით ვაჭრობის (ტრეფიკინგის) წინააღმდეგ ბრძოლის შესახებ³²⁵, ხოლო “სექსუალური ექსპლუატაცია” განიმარტება, როგორც პირის ჩაბმა პროსტიტუციაში, სხვა სახის სქესობრივ მომსახურებაში ან პორნოგრაფიული მასალის წარმოებაში მის მიმართ მუქარის, ძალადობის, იძულების, შანტაჟის ან მისი უმწეო მდგომარეობის გამოყენებით, სამსახურებრივი მდგომარეობის გამოყენებით ან სამუშაოს ხასიათისა და პირობების შესახებ ყალბი ინფორმაციის მიწოდებით³²⁶. თუმცა ეს განმარტებაც მოცემულია ტრეფიკინგის დანაშაულთან მიმართებაში, როგორც ტრეფიკინგის მიზანი,³²⁷ და არაა დადგენილი ცალკე დანაშაულად.

კონვენცია მოუწოდებს წევრ სახელმწიფოებს დაიცვან ბავშვი ყველა ფორმის სექსუალური ექსპლუატაციისა და მიიღონ სათანადო ზომები, რათა თავიდან აიცილონ: ბავშვის დაყოლიება ან იძულება ნებისმიერ უკანონო სექსუალურ აქტივობაში ჩაბმისთვის; ბავშვთა ექსპლუატაცია პროსტიტუციაში ან სხვა უკანონო სექსუალურ საქმიანობაში ჩართვისთვის; ბავშვთა გამოყენება პორნოგრაფიულ საქმიანობასა და მასალების დამზადებაში³²⁸.

ტრეფიკინგის დანაშაული მოიცავს მსხვერპლის ექსპლუატაციას, თუმცა ექსპლუატაცია ყველა შემთხვევაში არ მოიცავს ტრეფიკინგის დანაშაულის შემადგენლობას. ბავშვთა ექსპლუატაციის დანაშაულის პრევენციისა და მასზე სათანადო რეაგირებისთვის, მნიშვნელოვანია საქართველოს სისხლის სამართლის კოდექსში ექსპლუატაცია გამოიყოს ცალკე მუხლად ბავშვის უფლებათა კონვენციით დადგენილი შინაარსის შესაბამისად.

საქართველოს სისხლის სამართლის კოდექსი განმარტავს „არასრულწლოვნით ვაჭრობას (ტრეფიკინგს)“, როგორც „ყიდვა ან გაყიდვა, ან მის მიმართ სხვა უკანონო გარიგების განხორციელება, აგრეთვე მისი გადაბირება, გადაყვანა, გადამალვა, დაქირავება, ტრანსპორტირება, გადაცემა, შეფარება ან/და მიღება ექსპლუატაციის მიზნით“³²⁹.

სისხლის სამართლის კოდექსით გათვალისწინებულია დანაშაული „არასრულწლოვნის ყიდვა ან მის მიმართ სხვა უკანონო გარიგების განხორციელება შვილად აყვანის მიზნით“ და ასევე, „არასრულწლოვნის გაყიდვა ან მის მიმართ სხვა უკანონო გარიგების განხორციელება შვილად აყვანის მიზნით“³³⁰.

როგორც ვხედავთ, სისხლის სამართლის კოდექსი ცალკე დანაშაულად არ ადგენს „ბავშვით ვაჭრობას“. საქართველოს კანონმდებლობა ბავშვით ვაჭრობას განმარტავს ტრეფიკინგის ჩრდილში და არ ადგენს, როგორც ცალკე დანაშაულს. ბავშვის უფლებათა კონვენციის დამატებითი ოქმი ერთმანეთისგან განასხვავებს ბავშვით ვაჭრობასა და ბავშვთა

³²⁴ სისხლის სამართლის კოდექსი, მუხ. 143¹. შენიშვნა (1)

³²⁵ კანონი ტრეფიკინგის წინააღმდეგ ბრძოლის შესახებ, მუხ. 3 “დ“

³²⁶ იგივე, მუხ. 3 „ვ“

³²⁷ სსკ, მუხ. 143¹

³²⁸ ბავშვის უფლებათა კონვენცია, მუხ. 34

³²⁹ სისხლის სამართლის კოდექსი, მუხ. 143² (1)

³³⁰ სსკ, მუხ. 172

ტრეფიკინგს. ტრეფიკინგის დანაშაული მოიცავს ვაჭრობას, თუმცა ბავშვით ვაჭრობა ყველა შემთხვევაში არ წარმოადგენს ტრეფიკინგს.

ზემოთაღნიშნულიდან გამომდინარე, მნიშვნელოვანია გადაიხედოს სისხლის სამართლის კოდექსი და კონვენციის შესაბამისად განიმარტოს „ბავშვით ვაჭრობის“ დანაშაული, რათა ყურადღების მიღმა არ დარჩეს ტრეფიკინგის გარდა სხვა დანაშაულებრივი ქმედებები, რომლებიც მოიცავს სარგებლის მისაღებად ბავშვის გადაცემას ერთი პირიდან მეორეზე, ასევე, შუამავლის მიერ ანგარებით პირის დარწმუნებას თანხმობა გასცეს ბავშვის გაშვილებაზე შვილად აყვანის შესახებ საერთაშორისო სამართლებრივი ნორმების დარღვევით.

ბავშვთა დაცვა მავნე ზეგავლენისგან

კანონი მავნე ზეგავლენისგან არასრულწლოვანთა დაცვის შესახებ მიზნად ისახავს დაცვას იმ მავნე ზეგავლენისგან, რომელიც დაკავშირებულია ალკოჰოლური სასმელების და თამბაქოს მოხმარება-გასაღებასა და აზარტულ თამაშობებში მონაწილეობასთან³³¹. ეს კანონი კრძალავს: არასრულწლოვანისთვის ალკოჰოლური სასმელების, ლუდის და თამბაქოს მიყიდვას; მათ მიერ ამ პროდუქტების რეალიზაციას; ალკოჰოლური სასმელების, ლუდისა და თამბაქოს რეალიზაცია საგანმანათლებლო, სასწავლო-აღმზრდელობით დაწესებულებებში და მათ ტერიტორიაზე და ავალდებულებს შესაბამის დაწესებულებებს აკრძალვის შესახებ მითითებას³³²; აკრძალულია აზარტულ სათამაშო დაწესებულებებსა და აზარტულ სათამაშო ავტომატებთან არასრულწლოვანთა დაშვება³³³

კანონი ადგენს, რომ ამ წესების დარღვევისთვის პასუხისმგებლობა გათვალისწინებულია სამოქალაქო ან/და ადმინისტრაციული წესით. შემთხვევები განიხილება ადმინისტრაციული სამართალდარღვევის წესით საქართველოს ახალგაზრდობის საქმეთა დეპარტამენტის მიერ³³⁴. დეპარტამენტმა ასევე უნდა შეიმუშავოს დებულება „არასრულწლოვნებზე მავნე ზეგავლენის მომხდენი ნაბეჭდი პროდუქციის რეესტრის წარმოების შესახებ“ და არასრულწლოვნებზე მავნე ზეგავლენის მომხდენი ნაბეჭდი პროდუქციის განმსაზღვრელი კრიტერიუმები. მაუწყებელთა მიმართ ამ კანონით დადგენილი რეგულირების დარღვევებზე რეაგირება შეიძლება განხორციელდეს მხოლოდ „მაუწყებლობის შესახებ“ საქართველოს კანონის მე-14 მუხლის პირველი პუნქტით განსაზღვრული თვითრეგულირების მექანიზმის ფარგლებში³³⁵.

მიუხედავად ამისა, ეს კანონი არ ადგენს ამ წესების აღსრულების მექანიზმს, როგორცაა: ბავშვებისთვის ინფორმაციის მიწოდება მავნე ზეგავლენის შესახებ, დადგენილი წესების განხორციელების მონიტორინგი, კონკრეტული სანქციები და აღსრულების პროცედურა. მართალია, კანონი მიუთითებს, რომ აღმასრულებელი უწყებაა საქართველოს ახალგაზრდობის საქმეთა სახელმწიფო დეპარტამენტი, თუმცა ამჟამად ასეთი უწყება არ არსებობს.

შესაბამისად, რეკომენდებულია გადაიხედოს არსებული კანონი მავნე ზეგავლენისგან არასრულწლოვანთა დაცვის შესახებ და აღმოიფხვრას ყველა გამოვლენილი ხარვეზი და შეიქმნას სათანადო საკანონმდებლო გარანტიები ყოველგვარი ტიპის მავნე ზეგავლენისგან (მათ შორის, სათანადო საგანმანათლებლო და საინფორმაციო მექანიზმების შექმნის გზით) ბავშვთა დაცვის შესახებ.

³³¹ მუხ. 2.1

³³² მუხ. 4

³³³ მუხ. 13.1

³³⁴ მუხ. 17.1,2

³³⁵ მუხ. 17.4

კომერციული სუროგაცია

გაეროს ბავშვის უფლებათა კომიტეტმა ყურადღება გაამახვილა საერთაშორისო კომერციული სუროგაციის საკითხზე და აღნიშნა, რომ „გავრცელებულია სუროგაციის კომერციული პრაქტიკა, რომელიც არ არის სათანადოდ რეგულირებული, შესაძლოა ხელი შეუწყოს ბავშვებით ვაჭრობას და ბავშვის უფლებების სხვა დარღვევებს“³³⁶. ჰააგის კონფერენციის ექსპერტთა ჯგუფის შეხვედრის შედეგად გაკეთდა დასკვნა, რომ განსაკუთრებული ყურადღება უნდა მიექცეს სუროგაციის რეგულირებას³³⁷.

ბავშვთა ვაჭრობის, ბავშვთა პროსტიტუციისა და ბავშვთა პორნოგრაფიის საკითხებზე გაეროს სპეციალურმა მომხსენებელმა ყურადღება გაამახვილა საქართველოში სუროგაციის საკანონმდებლო რეგულირების საკითხზე. საქართველოს კანონმდებლობით სათანადოდ არ რეგულირდება კომერციული სუროგაცია. ამგვარ შემთხვევებში ირღვევა ბავშვის უფლებები ვინაობაზე, მოქალაქეობასა და ჯანმრთელობაზე, ასევე, იზრდება ბავშვის საუკეთესო ინტერესების საწინააღმდეგო გადაწყვეტილებებისა და მისი ექსპლუატაციის რისკი³³⁸.

საქართველოს კანონი ჯანმრთელობის დაცვის შესახებ ადგენს, რომ ექსტრაკორპორული განაყოფიერება (წყვილის ან დონორის სასქესო უჯრედების ან ემბრიონის გამოყენებით ან სუროგატული დედის საშვილოსნოში გამოზრდის გზით) ნებადართულია უშვილობის მკურნალობის მიზნით, აგრეთვე, ცოლის ან ქმრის მხრიდან გენეტიკური დაავადების გადაცემის რისკის არსებობისას³³⁹. ექსტრაკორპორული განაყოფიერების, მათ შორის, „სუროგატი დედის“ საშუალებით, დაბადებული ბავშვის დაბადების რეგისტრაციისა და საქართველოდან გაყვანის საკითხები რეგულირდება შესაბამის მინისტრთა ბრძანებებით³⁴⁰.

გარდა ამისა, საქართველოს კანონმდებლობით არ რეგულირდება სუროგაციის პრაქტიკასთან დაკავშირებული ისეთი მნიშვნელოვანი საკითხები, როგორცაა: იმ ქალთა უფლებები, რომლებიც „სუროგატი დედის“ მომსახურებას ასრულებენ და სუროგაციის გზით დაბადებულ ბავშვთა უფლებები. კანონმდებლობით, ასევე, არ რეგულირდება სამედიცინო დაწესებულებების მიერ ექსტრაკორპორული განაყოფიერების სერვისის მიწოდება და სხვა ეთიკური საკითხები.

შესაბამისად, მნიშვნელოვანია საქართველოს კანონმდებლობით მოწესრიგდეს კომერციული სუროგაციის საკითხი და დადგინდეს სათანადო გარანტიები ბავშვის საუკეთესო ინტერესების უპირატესი გათვალისწინების, ბავშვით ვაჭრობის, ბავშვისა და სუროგატის მომსახურების შემსრულებელ ქალის ექსპლუატაციის და სხვა უფლებების დარღვევის თავიდან აცილებისთვის.

ბავშვთა დაცვა შრომის საზიანო ფორმებისგან

³³⁶ ჰააგის კონფერენცია, 2015 <https://assets.hcch.net/docs/82d31f31-294f-47fe-9166-4d9315031737.pdf>

³³⁷ ჰააგის კონფერენცია, ექსპერტთა ჯგუფის შეხვედრა სუროგაციის შესახებ, თებ. 2016

³³⁸ სპეციალური მომხსენებლის ანგარიში (2016), პარაგ. 15-18

³³⁹ მუხ. 143

³⁴⁰ იუსტიციის მინისტრის ბრძანება #18 (31/12/2012), მუხ. 16 და 19, აგრეთვე, იუსტიციის მინისტრისა და შინაგან საქმეთა მინისტრის ერთობლივი ბრძანება №133-№144 (05/04/2016)

ბავშვის უფლებათა კომიტეტი მოუწოდებს სახელმწიფოს აკრძალოს ბავშვთა შრომის უკიდურესი ფორმები, დაარეგულიროს სამუშაო პირობები და გარემო დასაქმებული მოზარდებისთვის (138-ე და 182-ე კონვენციების მიხედვით), რათა უზრუნველყოს მათი სრულად დაცვა და მათი წვდომა სამართლებრივი დაცვის მექანიზმებზე³⁴¹.

საერთაშორისო კონვენცია ბავშვთა შრომის უკიდურესი ფორმების შესახებ #182 (კონვენცია 182) ბავშვთა შრომის უკიდურეს ფორმებში გულისხმობს ყოველგვარი სახის მონობას, ბავშვებით ვაჭრობას, ბავშვთა ტრეფიკინგს, იძულებით შრომას, მათ შორის, სავალდებულო ან იძულებით დაქირავებას შეიარაღებული კონფლიქტისთვის; ბავშვთა პროსტიტუციასა და პორნოგრაფიულ საქმიანობაში, ასევე ნარკოტიკებით ვაჭრობაში ჩაბმა; ისეთ შრომაში ჩაბმა, რაც თავისი ბუნებით ან გარემოებებით საზიანოა მისი ჯანმრთელობის, უსაფრთხოების ან მორალისთვის (მუხ. 3). აღნიშნული აკრძალული საქმიანობის ფორმები უნდა იყოს განსაზღვრული ეროვნული კანონებით ან რეგულაციებით, განსაკუთრებით შრომის საერთაშორისო ორგანიზაციის რეკომენდაციების გათვალისწინებით³⁴². სახელმწიფომ უნდა გამოავლინოს, თუ სად ხდება შრომის ამ ფორმების გამოყენება. შრომის უკიდურესი ფორმების ჩამონათვალი უნდა გადაიხედოს და განახლდეს პერიოდულად (მუხ. 4).

1999 წლის რეკომენდაციებით ბავშვთა შრომის უკიდურესი ფორმების შესახებ (მე-3 და მე-4 პარაგრაფი), სახელმწიფომ, შრომის უკიდურესი ფორმების განსაზღვრისას და ამ ფორმების გამოყენების ადგილის დადგენისას, მხედველობაში უნდა მიიღოს, მათ შორის:

- სამუშაო, რომელიც ბავშვს აყენებს ფიზიკური, ფსიქოლოგიური ან სექსუალური ძალადობის ქვეშ;
- მიწისქვეშა, წყალქვეშა, სახიფათო სიმაღლეზე ან დახურულ სივრცეში შრომა
- სამუშაო, რაც დაკავშირებულია სახიფათო ტექნიკასთან, აღჭურვილობასა და იარაღებთან, ან რომელიც მოიცავს მძიმე ტვირთების ხელით გადაზიდვას ან ტრანსპორტირებას;
- სახიფათო ნივთიერებებთან, აგენტებთან ან პროცესებთან, ან ტემპერატურასთან, ხმაურის დონესთან, ან ვიბრაციასთან დაკავშირებული სამუშაო, რამაც შეიძლება გამოიწვიოს ბავშვის ჯანმრთელობის დაზიანება;
- ხანგრძლივი ან ღამის საათებში მუშაობა, ასევე როდესაც ბავშვს სამუშაოს შესრულებისას უწევს დახურულ სივრცეში ყოფნა
- 16 წლის ასაკიდან ბავშვისთვის მუშაობის ნებართვა მხოლოდ იმ პირობით, რომ ბავშვთა ჯანმრთელობა, უსაფრთხოება და მორალი სრულად იქნება დაცული და ბავშვები წინასწარ მიიღებენ სათანადო კონკრეტულ ინსტრუქციებს ან პროფესიულ ტრენინგს შესასრულებელ სამუშაოსთან დაკავშირებით.

საქართველოს შრომის კოდექსი შრომითი ქმედუნარიანობის ასაკად ადგენს 16 წელს. 16 წლამდე ასაკის არასრულწლოვნის შრომითი ქმედუნარიანობა წარმოიშობა მისი კანონიერი წარმომადგენლის ან მზრუნველობის/მეურვეობის ორგანოს თანხმობით, თუ შრომითი ურთიერთობა არ ეწინააღმდეგება არასრულწლოვნის ინტერესებს, ზიანს არ აყენებს მის ზნეობრივ, ფიზიკურ და გონებრივ განვითარებას და არ უზღუდავს მას სავალდებულო დაწყებითი და საბაზო განათლების მიღების უფლებასა და შესაძლებლობას. 14 წლამდე ასაკის არასრულწლოვანთან შრომითი ხელშეკრულება

³⁴¹ ზოგადი კომენტარი #4, პარა. 11, გვ. 5-6; 32 (ე), გვ. 11

³⁴² შრომის საერთაშორისო ორგანიზაციის 1999 წლის რეკომენდაციები ბავშვთა შრომის უკიდურესი ფორმების შესახებ, პარა. 3, 4

შეიძლება დაიდოს მხოლოდ სპორტულ, ხელოვნებასთან დაკავშირებულ და კულტურის სფეროში საქმიანობაზე, ასევე სარეკლამო სამუშაოს შესასრულებლად (მუხ. 4. 1,2,3).

აკრძალულია არასრულწლოვანთან შრომითი ხელშეკრულების დადება სათამაშო ბიზნესთან, ღამის გასართობ დაწესებულებებთან, ეროტიკული და პორნოგრაფიული პროდუქციის, ფარმაცევტული და ტოქსიკური ნივთიერებების დამზადებასთან, გადაზიდვასთან და რეალიზაციასთან დაკავშირებული სამუშაოების შესასრულებლად. აკრძალულია, აგრეთვე, არასრულწლოვანთან ხელშეკრულების დადება მძიმე, მავნე და საშიშპირობებიანი სამუშაოების შესასრულებლად (მუხ. 4,5). ამავე დროს, აკრძალულია ღამის სამუშაოზე (22 საათიდან 6 საათამდე) არასრულწლოვნის დასაქმება.

კანონიერ წარმომადგენელს ან მზრუნველობის/მეურვეობის ორგანოს უფლება აქვს, მოითხოვოს არასრულწლოვანთან შრომითი ხელშეკრულების შეწყვეტა, თუ მუშაობის გაგრძელება ზიანს მიაყენებს არასრულწლოვნის სიცოცხლეს, ჯანმრთელობას ან სხვა მნიშვნელოვან ინტერესებს (მუხ. 39).

კანონი შრომითი მიგრაციის შესახებ³⁴³ ეხება საკითხებს პირის საზღვარგარეთ შრომითი მოწყობის და ანაზღაურების შესახებ. ეს კანონი საერთოდ არ მოიხსენიებს უცხოეთში შრომითი მიგრაციის დროს არასრულწლოვანთა უფლებებს და რაიმე სახის დაცვის ღონისძიებებს.

სისხლის სამართლის კოდექსით აკრძალულია არასრულწლოვნით ვაჭრობა³⁴⁴; ტრეფიკინგის მსხვერპლის მომსახურებით სარგებლობა³⁴⁵; არასრულწლოვნის ჩაბმა ანტისაზოგადოებრივ ქმედებაში³⁴⁶; არასრულწლოვნის ჩაბმა პროსტიტუციაში³⁴⁷; არასრულწლოვნის ჩაბმა პორნოგრაფიული ნაწარმოების ან პორნოგრაფიული ხასიათის სხვა საგნის უკანონოდ დამზადებასა და გასაღებაში³⁴⁸; დაქირავებულის მონაწილეობა შეიარაღებულ კონფლიქტში ან საომარ მოქმედებაში³⁴⁹.

საქართველოს კანონით ადამიანით ვაჭრობის (ტრეფიკინგის) წინააღმდეგ ბრძოლის შესახებ „იძულებითი შრომა“ განმარტებულია, როგორც ნებისმიერი სამუშაო ან მომსახურება, რომელიც მიიღება პირის ფიზიკური ან ფსიქიკური იძულებით, მის მიმართ მუქარის, შანტაჟის ან მისი უმწეო მდგომარეობის გამოყენებით³⁵⁰.

შინაგან საქმეთა სამინისტროს ოპერატიული პროცედურები ეხება მხოლოდ ტრეფიკინგის სავარაუდო მსხვერპლთა გამოვლენის მიზნით შინაგან საქმეთა სამინისტროს ოპერატიული მუშაების, მობილური ჯგუფების და გამომძიებლების მიერ განსახორციელებელ ღონისძიებებს.

განხილული საერთაშორისო სტანდარტების და საქართველოს კანონმდებლობის ანალიზით იკვეთება მნიშვნელოვანი ხარვეზები და შეუსაბამობები საერთაშორისო სტანდარტებთან, კერძოდ:

³⁴³ მიღებულია 2015 წლის 1 აპრილს <https://matsne.gov.ge/ka/document/view/2806732>

³⁴⁴ სისხლის სამართლის კოდექსი, 143²

³⁴⁵ სისხლის სამართლის კოდექსი, მუხ. 143³

³⁴⁶ სისხლის სამართლის კოდექსი, მუხ. 171

³⁴⁷ სისხლის სამართლის კოდექსი, მუხ. 253

³⁴⁸ სსკ, მუხ. 255¹

³⁴⁹ სსკ, მ. 410

³⁵⁰ იგივე, მუხ. 3 “ე“

- კანონით ან/და კანონქვემდებარე აქტით არ არის განსაზღვრული ბავშვისათვის მძიმე, მავნე და საშიშპირობებიანი და ზიანისშემცველი შრომის კონკრეტული ფორმები და პირობები;
- კანონი არ ადგენს შრომის უკიდურესი ფორმების და პირობების ადგილების იდენტიფიცირების წესი, განსახორციელებელ ღონისძიებებს და პასუხისმგებელ უწყებას ბავშვთა შრომის საკითხებზე;
- შრომის კოდექსი ადგენს, რომ 16 წლამდე ბავშვის დასაქმებისთვის საჭიროა კანონიერი წარმომადგენლის ან მეურვეობის და მზრუნველობის ორგანოს თანხმობა, თუმცა კანონით განსაზღვრული არ არის მეურვეობისა და მზრუნველობის, როგორც შრომით საქმიანობაზე თანხმობის გამცემის როლი, ფუნქციები და ბავშვის საუკეთესო ინტერესების შეფასების ფორმალური პროცედურები;
- შრომის კოდექსი უშვებს 14 წლამდე ბავშვთა დასაქმებას მხოლოდ სპორტულ, კულტურულ, ხელოვნებასთან დაკავშირებულ და სარეკლამო საქმიანობაში, თუმცა არ ადგენს არავითარი დაცვის გარანტიებს შრომის სპეციფიკური პირობების დაცვის მოთხოვნით.

ზემოთაღნიშნულიდან გამომდინარე, რეკომენდებულია საქართველომ განახორციელოს შესაბამისი საკანონმდებლო ცვლილებები და სხვა ღონისძიებები, რათა გააუმჯობესოს ბავშვთა დაცვა შრომის უკიდურეს ფორმებში ჩაბმისგან. თავდაპირველად მნიშვნელოვანი იქნება მითითებული საკანონმდებლო შეუსაბამობების აღმოფხვრა, პასუხისმგებელი უწყების გამოვლენა, ამ უწყების ფუნქციების განსაზღვრა და შესაძლებლობების გაძლიერების სამართლებრივი გარანტიების შექმნა.

3.4.2. ბავშვთა სოციალური დაცვა და ალტერნატიული ზრუნვა

ბავშვის უფლებათა კონვენციის მე-3 მუხლის თანახმად, ბავშვის მიმართ ნებისმიერი ქმედების განხორციელებისას, მათ შორის, საჯარო თუ კერძო დაწესებულებების, ადმინისტრაციული თუ სასამართლო ორგანოების მიერ, უპირველეს ყოვლისა გათვალისწინებული უნდა იყოს ბავშვის საუკეთესო ინტერესები. ბავშვზე ზრუნვის დაწესებულებების საქმიანობა უნდა შეესაბამებოდეს დადგენილ ნორმებს და სტანდარტებს უსაფრთხოებისა და ჯანდაცვის, პერსონალის რაოდენობისა და კვალიფიკაციის, ასევე, ზედამხედველობის კუთხით.

შეზღუდული შესაძლებლობის მქონე პირთა კონვენციის 23-ე მუხლის თანახმად, შეზღუდული შესაძლებლობის მქონე ბავშვებს და მასზე მზრუნველ პირებს სახელმწიფომ უნდა მიაწოდოს ბავშვის საჭიროებების და მისი ოჯახის მდგომარეობის შესაბამისი დახმარება. გრძელვადიანი მხარდაჭერა უნდა იყოს საჭიროებისამებრ უფასო და დაგეგმილი ისე, რომ უზრუნველყოს ბავშვის ეფექტური წვდომა განათლებაზე, ტრენინგზე, ჯანდაცვის და რეაბილიტაციის სერვისებზე, მოამზადოს დასაქმებისთვის, რათა საბოლოო ჯამში ხელი შეუწყოს ბავშვის სრულყოფილ სოციალურ ინტეგრაციას და ინდივიდუალურ განვითარებას. სახელმწიფო ვალდებულია, თუ ოჯახი ვერ ზრუნავს შეზღუდული შესაძლებლობების მქონე ბავშვზე, მიიღოს ყველა ზომა, რათა უზრუნველყოს ალტერნატიული ზრუნვა უფრო დიდი ოჯახის ფარგლებში, და, თუ ეს შეუძლებელია, ალტერნატიულ ოჯახურ გარემოში.

ბავშვის უფლებათა კომიტეტი სახელმწიფოებს მოუწოდებს უზრუნველყონ შემდეგი ძირითადი ღონისძიებების და მექანიზმების შექმნა ალტერნატიულ ზრუნვაში მყოფი ბავშვებისთვის: კანონმდებლობით დადგენილი გარანტიები ბავშვის მოსმენასა და მისი

მოსაზრებების სათანადოდ გათვალისწინების შესახებ ზრუნვაში განთავსების ან/და მკურნალობის გეგმის თაობაზე გადაწყვეტილების მიღების პროცესში; ალტერნატიული ზრუნვის სერვისების მონიტორინგი ბავშვთა მიმართ მოპყრობის, დაცვის, ზრუნვის და მათი საუკეთესო ინტერესების გათვალისწინების ვალდებულების შემოწმების მიზნით, რომელიც ჩატარდება კომპეტენტური ორგანოს მიერ, მათ შორის, ყველა რეზიდენტულ დაწესებულებაში შეუფერხებელი წვდომით; ბავშვთა საბჭოების შექმნა რეზიდენტული ზრუნვის დაწესებულებებში³⁵¹.

ბავშვის უფლებათა კომიტეტი განმარტავს, რომ როდესაც აკრძალვის მიუხედავად ბავშვთა მიმართ ფიზიკური დასჯა ან სხვა სახის სასტიკი ან დამამცირებელი მოპყრობა ხდება ოჯახს გარეთ, სამსახურიდან გათავისუფლება ან/და სხვა დიცპლინური ზომები, ასევე, სისხლისსამართლებრივი დევნა გონივრული სანქციაა. გადამწყვეტია ფიზიკური დასჯის ან სხვა სასტიკი ან დამამცირებელი სასჯელის აკრძალვის და შესაბამისი სანქციების შესახებ ინფორმაცია მიეწოდოს ბავშვებს და მათთან მომუშავე პროფესიონალებს. ყველა დაწესებულების მონიტორინგის სისტემა უნდა მოიცავდეს ბავშვთა მიმართ მოპყრობის და დიცპლინური ზომების ზედამხედველობას, ხოლო ბავშვებს და მათ მშობლებს ხელი უნდა მიუწვდებოდეთ კონფიდენციალურ კონსულტაციაზე, დაცვასა და გასაჩივრების პროცედურაზე სათანადო სამართლებრივი დახმარებით. დაწესებულებას უნდა ევალუირდეს ძალადობის შემთხვევების შეტყობინება და განხილვა³⁵².

ბავშვის უფლებათა კომიტეტი მოუწოდებს სახელმწიფოს ეროვნული კანონით უზრუნველყოს წარმოშობის ქვეყნის გარეთ, თანმხლების გარეშე მყოფ ბავშვთა ალტერნატიული ზრუნვა³⁵³.

გაეროს რეზოლუცია ბავშვთა ალტერნატიული ზრუნვის შესახებ³⁵⁴ ადგენს ძირითად სახელმძღვანელო პრინციპებს, რომელიც მიზნად ისახავს ხელი შეუწყოს „ბავშვის უფლებათა კონვენციის“ და სხვა საერთაშორისო ინსტრუმენტების განხორციელებას მშობელთა მზრუნველობას მოკლებული და ამგვარი რისკის ქვეშ მყოფი ბავშვების დაცვისა და კეთილდღეობისთვის³⁵⁵.

ეს რეზოლუცია ადგენს შემდეგ ფუნდამენტურ პრინციპებს, რაც უნდა განმტკიცდეს სახელმწიფოს მიერ ეროვნული კანონმდებლობით:

- სააღმზრდელო დაწესებულების რეგისტრაციისა და საქმიანობის კანონმდებლობით დადგენილი წესის დარღვევა უნდა იყოს დასჯადი. საქმიანობის ნებართვის გაცემა და რეგულარული შემოწმება უნდა განახორციელოს კომპეტენტურმა სახელმწიფო უწყებამ შემდეგი ძირითადი კრიტერიუმების მიხედვით: მიზნები, ფუნქციონირება, პერსონალის შერჩევა და კვალიფიკაცია, ზრუნვის სტანდარტების დაცვა, ფინანსური რესურსები და მენეჯმენტი³⁵⁶;
- კანონით უნდა აიკრძალოს იურიდიული და ფიზიკური პირების მიერ ბავშვთა მოძიება და განთავსება ზრუნვის დაწესებულებებში³⁵⁷;

³⁵¹ ზოგადი კომენტარი #12, პარა. 97, გვ.22

³⁵² კომიტეტის ზოგადი კომენტარი #8, პარა. 43

³⁵³ ზოგადი კომენტარი #6, 2005. პარა. 40

³⁵⁴ გაეროს გენერალური ასამბლეა, სახელმძღვანელო პრინციპები ბავშვთა ალტერნატიული ზრუნვისთვის (რეზოლუცია 64/142), 24 თებერვალი 2010 წ.

³⁵⁵ რეზოლუციის მუხ. 1 (მიზანი)

³⁵⁶ რეზოლუციის პარა. 105

³⁵⁷ იგივე, პარა. 127

- განცალკევებულ ან თანმხლების გარეშე მყოფ ბავშვებს, რომლებიც ქვეყანაში შემოვიდნენ ნებართვის გარეშე, არ უნდა აღეკვეთოთ თავისუფლება ქვეყნის ტერიტორიაზე შემოსვლის და ყოფნის შესახებ კანონის დარღვევისთვის³⁵⁸;
- კანონმდებლობით უზრუნველყოფილი უნდა იყოს ადეკვატური ზრუნვის ფორმები ოჯახური და თემზე დაფუძნებული ზრუნვის უპირატესობის მითითებით³⁵⁹;
- კანონმდებლობით გარანტირებული უნდა იყოს მარტოხელა და არასრულწლოვანი მშობლების და მათი შვილების მხარდაჭერის და ზრუნვის სერვისები. არასრულწლოვან მშობელს უნდა შეუნარჩუნდეს უფლებები, როგორც მშობელს და როგორც ბავშვს (განვითარების, განათლების უფლებები; სტიგმისგან დაცვა)³⁶⁰;
- ბავშვის მიტოვების შემთხვევაში სახელმწიფომ უნდა უზრუნველყოს კონფიდენციალობისა და უსაფრთხოების დაცვა, ამავე დროს, პატივი უნდა სცეს ბავშვის უფლებას მისი წარმოშობის ინფორმაციის მიღების უფლებაზე კანონით დადგენილი სათანადო წესით³⁶¹;
- ოჯახიდან ბავშვის განცალკევება უნდა მოხდეს კომპეტენტური ორგანოს მიერ, კანონით დადგენილი წესით; მშობლებს უნდა ჰქონდეთ გასაჩივრების და სამართლებრივი დახმარების უფლება³⁶²;
- ალტერნატიული ზრუნვის სერვისი უნდა განხორციელდეს იმ სტანდარტების შესაბამისად, რომელსაც ადგენს ბავშვის უფლებათა კონვენცია, ეს რეზოლუცია და შესაბამისად, ქვეყნის კანონმდებლობა³⁶³;
- სახელმწიფომ უნდა უზრუნველყოს ალტერნატიულ ზრუნვაში მყოფი ბავშვების დაცვა ძალადობისგან სათანადო საცხოვრებელი პირობების შექმნის და ზედამხედველობის განხორციელების გზით კომპეტენტური ორგანოს მიერ. ბავშვის საცხოვრებელი პირობები უნდა იყოს მორგებული მის ასაკს, განვითარების დონეს და საჭიროებებს³⁶⁴;
- კანონით მკაცრად უნდა აიკრძალოს ყველა სახის დისციპლინური ზომები და ქცევების მართვის მეთოდები, რაც მოიცავს წამებას, სასტიკ, არაადამიანურ ან დამამცირებელ მოპყრობას, მათ შორის ჩაკეტილ სივრცეში მოთავსებას ან სხვა სახის ფიზიკურ ან ფსიქოლოგიურ ძალადობას, მშობელთან ან სხვა ოჯახის წევრებთან კონტაქტის შეზღუდვას³⁶⁵;
- დაუშვებელია ბავშვის მიმართ ძალის გამოყენება და ნებისმიერი სახის შეზღუდვა, გარდა უკიდურესი აუცილებლობისა ბავშვის ან სხვათა ფიზიკური ან ფსიქოლოგიური საფრთხისგან დასაცავად. ამგვარი შეზღუდვა უნდა განხორციელდეს გონივრული და პროპორციული მეთოდებით კანონით დადგენილი წესის და ბავშვის ფუნდამენტური უფლებების შესაბამისად. წამლით ან მედიკამენტოზური მკურნალობით შეზღუდვა უნდა დაეფუძნოს თერაპიულ საჭიროებებს და არასდროს უნდა იქნეს გამოყენებული სპეციალისტის შეფასების და დანიშვნის გარეშე³⁶⁶.

³⁵⁸ იგივე, პარა. 143

³⁵⁹ იგივე, პარა. 53

³⁶⁰ პარა. 36

³⁶¹ პარა. 42

³⁶² პარა. 47

³⁶³ პარა. 73

³⁶⁴ პარა. 92

³⁶⁵ პარა. 96

³⁶⁶ პარა. 97

▪ ბავშვთა სოციალური დაცვა და მიტოვების პრევენცია

ბავშვის უფლებათა კონვენციის მე-18 მუხლის თანახმად, სახელმწიფომ სათანადო დახმარება უნდა გაუწიოს მშობლებს ბავშვის აღზრდის მოვალეობათა განხორციელებისას და განავითაროს შესაბამისი დაწესებულებები და სერვისები ამ მიზნით. დასაქმებული მშობლების შვილებისთვის უნდა იყოს ხელმისაწვდომი ბავშვზე ზრუნვის სერვისები.

კონვენციის 26-ე მუხლის თანახმად, ყოველ ბავშვს აქვს უფლება ისარგებლოს სოციალური დაცვით, მათ შორის, სოციალური დახმარებით, რაც გარანტირებული უნდა იყოს კანონით. სოციალური დახმარების განსაზღვრისას მხედველობაში უნდა იქნას მიღებული: ბავშვის და მასზე მზრუნველი პირების მდგომარეობა და რესურსები, ასევე სხვა საკითხები, რაც ამ სარგებლის გამოყენების საჭიროებას ეხება.

კონვენციის 27-ე მუხლის თანახმად, ყოველ ბავშვს აქვს უფლება ცხოვრების ისეთ სტანდარტზე, რომელიც შეესაბამება ბავშვის ფიზიკური, გონებრივი, სულიერი, მორალური და სოციალური განვითარების საჭიროებებს. სახელმწიფომ, რესურსების ფარგლებში და საჭიროებისამებრ, უნდა მიაწოდოს მშობლებს მატერიალური დახმარება და მხარდაჭერის პროგრამები განსაკუთრებით კვების, თანსაცმლის და საცხოვრებელი პირობების კუთხით.

შეზღუდული შესაძლებლობის მქონე პირთა კონვენციის 23-ე მუხლის (3) თანახმად, სახელმწიფომ უნდა უზრუნველყოს შეზღუდული შესაძლებლობების მქონე ბავშვების უფლება ოჯახში ცხოვრებაზე სხვა ბავშვებთან თანაბრად. ამ უფლების რეალიზების და შეზღუდული შესაძლებლობების მქონე ბავშვთა დამალვის, მიტოვების, უგულვებელყოფის და სეგრეგაციის პრევენციის მიზნით, მონაწილე სახელმწიფოები კისრულობენ ვალდებულებას, უზრუნველყონ შეზღუდული შესაძლებლობის მქონე ბავშვების და მათ ოჯახების ადრეული და ამომწურავი ინფორმირება, მომსახურება და მხარდაჭერა.

გაეროს გენერალური ასამბლეის რეზოლუციის თანახმად, სახელმწიფომ უნდა მიიღოს ყველა ზომა ბავშვი დარჩეს ან დაბრუნდეს საკუთარ ოჯახში, მშობლების ზრუნვის ქვეშ. ამისათვის სახელმწიფომ უნდა უზრუნველყოს ოჯახების მხარდაჭერა ბავშვების აღზრდის პროცესში³⁶⁷.

ოჯახისგან ბავშვთა განცალკევების პრევენციისთვის, სახელმწიფომ უნდა გატაროს შემდეგი ძირითადი ზომები³⁶⁸:

- მხარდაჭერა აღმოუჩინოს იმ ოჯახებს, რომელთა შესაძლებლობებიც დასუსტებულია სხვადასხვა ფაქტორებით, როგორცაა: შეზღუდული შესაძლებლობა, ნარკომანია ან ალკოჰოლიზმი, დისკრიმინირებული მდგომარეობა უმცირესობს ჯგუფებს მიკუთვნებულობის გამო, შეარღვეული კონფლიქტის ზონაში ან უცხო ქვეყნის მიერ ოკუპირებულ ტერიტორიაზე ცხოვრება³⁶⁹.
- სათანადო ზრუნვა და დაცვა მოწყვლადი ბავშვებისთვის, როგორცაა, ძალადობის და ექსპლუატაციის მსხვერპლი ბავშვები, მიტოვებული ბავშვები,

³⁶⁷ რეზოლუცია, პარა. 3

³⁶⁸ პარა. 9

³⁶⁹ პარა. 9. „ა“

ქუჩაში მცხოვრები ბავშვები, განცალკევებული და თანმხლების გარეშე მყოფი ბავშვები, დევნილი და ლტოლვილი ბავშვები, მიგრანტი მშრომელების ბავშვები, თავშესაფრის მაძიებელთა ბავშვები, აივ/შიდსით ან სხვა მძიმე დაავადების მქონე ან ამგვარი დაავადების მქონე ოჯახის წევრთან მცხოვრები ბავშვი³⁷⁰.

ამრიგად, ალტერნატიული ზრუნვის საჭიროების პრევენციისთვის სახელმწიფომ ორი გზით უნდა იზრუნოს, კერძოდ:

ოჯახური ზრუნვის ხელშეწყობა³⁷¹:

- ადეკვატური საცხოვრებელი პირობების შექმნა;
- საბაზისო ჯანდაცვის, განათლების და სოციალური სერვისების მიწოდება;
- ასევე, ღონისძიებების გატარება სიღარიბის, დისკრიმინაციის, მარგინალიზაციის, სტიგმატიზაციის, ძალადობის, ბავშვისადმი ცუდი მოპყრობის, ნივთიერებაზე დამოკიდებულების დასაძლევად;

ოჯახის მიერ ბავშვის მიტოვების, მასზე უარის თქმის, განცალკევების პრევენცია: სოციალური პოლიტიკა და პროგრამები³⁷² (ეს პროგრამები უნდა იყოს ინტეგრირებული თემის დონეზე და ოჯახებს რთავდეს პარტნიორებად):

- ოჯახის გაძლიერების სერვისები, როგორცაა მშობლობის კურსები, პოზიტიური მშობლობის ხელშეწყობა, კონფლიქტების მოგვარების უნარები, დასაქმების შესაძლებლობები, საჭიროების შემთხვევაში, სოციალური დახმარება;
- დამხმარე სოციალური სერვისები, როგორცაა, დღის ცენტრი, მედიაცია და შერიგების სერვისები, ნივთიერებაზე დამოკიდებულების მკურნალობის კურსი, ფინანსური დახმარება; სერვისები შეზღუდული შესაძლებლობის მქონე მშობლებისა და ბავშვებისთვის;
- ახალგაზრდების გაძლიერება ყოველდღიურ სიმწელებთან პოზიტიური გამკლავებისთვის, მათ შორის, როდესაც გადაწყვეტენ მშობლების სახლიდან წასვლას დამოუკიდებელი ცხოვრებისთვის, მათი მომზადება ინფორმირებული გადაწყვეტილებების მისაღებად რეპროდუქციულ ჯანმრთელობასთან დაკავშირებით.

კანონი სოციალური დახმარების შესახებ განსაზღვრავს, რომ სოციალური დახმარება არის საჭიროებაზე დაფუძნებული სახელმწიფო მხარდაჭერა; დახმარების გადანაწილება ხდება სპეციალური მზრუნველობის საჭიროების მქონე პირებზე, ლატაკ ოჯახებზე და უსახლკარო პირებზე³⁷³. კანონით სპეციალური საჭიროების მქონე პირად ითვლება: ობოლი და ოჯახის მზრუნველობამოკლებული ბავშვი, მზრუნველობამოკლებული, თვითმომსახურების უნარშეზღუდული სრულწლოვანი, მარჩენალდაკარგული ბავშვი, შეზღუდული შესაძლებლობის მქონე ბავშვი, მიუსაფარი ბავშვი³⁷⁴.

კანონი ადგენს სოციალური დახმარების შემდეგ სახეებს: საარსებო შემწეობას, რეინტეგრაციის შემწეობას, მინდობით აღზრდის ანაზღაურებას, არაფულად სოციალურ დახმარებას, სოციალურ პაკეტს³⁷⁵.

³⁷⁰ პარა. 9. „ბ“

³⁷¹ რეზოლუცია, პარა. 32

³⁷² პარა. 33

³⁷³ მუხ. 5

³⁷⁴ მუხ. 4 „ო“

³⁷⁵ მუხ. 6

საარსებო შემწეობა არის ყოველთვიური ფულადი დახმარება, რომელიც განკუთვნილია შეფასების სისტემით იდენტიფიცირებული ღატაკი ოჯახისთვის³⁷⁶; სოციალური პაკეტი არის ყოველთვიური ფულადი ან ფულადი და არაფულადი სარგებლის ერთობლიობა, რომელიც განკუთვნილია შეზღუდული შესაძლებლობის მქონე და მარჩენალდაკარგული პირებისთვის³⁷⁷; რეინტეგრაციის შემწეობა არის ფულადი სოციალური დახმარება, რომელიც სპეციალური მზრუნველობის საჭიროების მქონე პირის ბიოლოგიურ ოჯახს, რომელიც ამ პირს სპეციალიზებული დაწესებულებიდან გაიყვანს ოჯახურ გარემოში საცხოვრებლად³⁷⁸; მინდობით აღზრდის ანაზღაურება არის ფულადი სოციალური დახმარება, რომელიც მიეცემა დედობილს/მამობილს შვილობილის მოსაველელად³⁷⁹.

კანონი, ასევე, ადგენს, რომ სპეციალური მზრუნველობის საჭიროების მქონე პირი შეიძლება იყოს პრევენციისა და რეინტეგრაციის მიზნით არაფულადი სოციალურ დახმარების მიმღები, როდესაც ოჯახში არსებული მდგომარეობა ბავშვის მზრუნველობამოკლებულად ცნობის დასაბუთებული წინაპირობაა. არაფულად სოციალური მომსახურების სახეები და მდგომარეობის შეფასების კრიტერიუმები განისაზღვრება მინისტრის ბრძანებით³⁸⁰.

განხილული ნორმების ანალიზით ჩანს, რომ კანონმდებლობით გათვალისწინებულია ძირითადად ფულადი შემწეობა ღატაკი ოჯახების, შეზღუდული შესაძლებლობის მქონე და მარჩენალდაკარგული პირებისთვის, ასევე, ოჯახისთვის, რომელიც ბავშვს დაიბრუნებს დაწესებულებიდან. მართალია კანონში მითითებულია, აგრეთვე, არაფულადი სოციალური მომსახურება შეზღუდული შესაძლებლობის მქონე, მარჩენალდაკარგული და ასევე, მიტოვების რისკის ქვეშ მყოფი ბავშვებისა და მათი ოჯახებისთვის, თუმცა არაფერია აღნიშნული ამგვარი დახმარების კონკრეტული ფორმების, დანიშვნის საფუძვლების და ხელმისაწვდომობის შესახებ. კანონი არ მიუთითებს ოჯახების გაძლიერების სერვისებზე, როგორცაა: კვების, ტანსაცმლის და საცხოვრებელი პირობების გაუმჯობესების მხარდაჭერა, კურსები მშობლებისთვის, სარეაბილიტაციო კურსები, საკონსულტაციო და საინფორმაციო სერვისები და სხვა.

სპეციალური საჭიროების ბავშვებს შორის არაა მითითებული ძალადობის ან/და ექსპლუატაციის მსხვერპლი ბავშვი. დახმარების საჭიროების მქონე ოჯახებთან დაკავშირებით კანონი მიუთითებს მხოლოდ ღატაკ ოჯახებს და არაფერს ამბობს სხვა ოჯახებზე, როგორცაა, მათ შორის, მარტოხელა მშობლები, არასრულწლოვანი მშობლები, აივ/შიდსით ან სხვა მიმამე დაავადებების მქონე მშობლები, რომელთაც განსაკუთრებული მხარდაჭერა სჭირდებათ ბავშვის აღზრდის პროცესში.

რაც შეეხება იმ ოჯახების მხარდაჭერას, რომელთა შესაძლებლობებიც შესუსტებულია ალკოლიზმით ან ნარკომანიით, ნაცვლად იმისა, რომ სახელმწიფომ უზრუნველყოს მათი წვდომა სარეაბილიტაციო კურსებსა და სხვა სახის დახმარებაზე, სამოქალაქო კოდექსის³⁸¹ თანახმად შესაძლოა მშობლის უფლება-მოვალეობები ჩამოერთვათ, ხოლო მათი ბავშვი შვილად აყვანას დაექვემდებაროს. სამოქალაქო კოდექსი, ასევე, ადგენს, რომ მშობლის უფლებების ჩამორთმევის საფუძვლის აღმოფხვრის შემდეგ შესაძლებელია ამ უფლებების

³⁷⁶ იგივე კანონი, მუხ. 7

³⁷⁷ მუხ. 12¹

³⁷⁸ მუხ. 9.2

³⁷⁹ მუხ. 10

³⁸⁰ მუ. 12

³⁸¹ სამოქალაქო კოდექსი, მუხ. 1206

ადდგენა, მაგრამ დაუშვებელია იმ ბავშვის მიმართ, რომელიც უკვე გაშვილდა³⁸². კანონმდებლობის ეს დებულებები წინააღმდეგობაშია კონვენციასთან და უნდა გაუქმდეს.

კანონი არ მიუთითებს, რომ შეზღუდული შესაძლებლობის მქონე მშობელთა ან ბავშვთა სოციალური მხარდაჭერა უნდა იყოს გრძელვადიანი და ერთ პაკეტში მოიცავდეს განათლების, ჯანდაცვის, რეაბილიტაციის, სოციალური ინტეგრაციის და სხვა ინდივიდუალური საჭიროებების მიხედვით განსაზღვრული დახმარების სახეებს.

ამასთან დაკავშირებით მნიშვნელოვანია განვიხილოთ სამოქალაქო კოდექსის დებულება³⁸³, რომელიც ადგენს ფსიქო-სოციალური საჭიროების მქონე არასრულწლოვანის უფლებას სასამართლო წესით მოითხოვოს მხარდაჭერა იმ უფლება-მოვალეობების განხორციელებისას, რომლით სარგებლობაც მას დამოუკიდებლად, მშობლების თანხმობის გარეშე შეუძლია.

იქედან გამომდინარე, რომ სამოქალაქო კოდექსი არ განაგრცობს ამ დებულებას, ის პრაქტიკაში გამოუყენებელი რჩება. ბავშვის უფლებათა კონვენციის და გაეროს ბავშვზე ზრუნვის სტანდარტების თანახმად, ეს მხარდაჭერა უნდა განიმარტოს ბავშვთა სოციალური დახმარების პაკეტის ფარგლებში და უნდა მოიცავდეს ისეთ პერსონალურ მხარდაჭერას, რომელიც მოიცავს სპეციალიზებული პროფესიონალის დახმარებას რჩევების, კონსულტაციის და ინფორმაციის მიწოდების გზით საკუთარი უფლებების დამოუკიდებლად რეალიზების შესახებ. ბავშვს უნდა ჰქონდეს ამგვარ მხარდაჭერ პირთან დამოუკიდებელი, კონფიდენციალური წვდომის უფლება ნებისმიერ საკითხთან დაკავშირებით, მათ შორის, ძალადობისგან დაცვის, რეპროდუქციული ჯანმრთელობის, გადაწყვეტილებების მიღებისას მონაწილეობის უფლების და სხვა ისეთ საკითხებზე, რითაც მას შეუძლია დამოუკიდებლად ისარგებლოს სხვა ბავშვებთან თანაბრად.

ეს კანონი მხოლოდ ერთგან მოიხსენიებს ბავშვის საუკეთესო ინტერესებს, კერძოდ, რეინტეგრაციის შემწეობის ხელშეკრულების პირობების დარღვევისას ბიოლოგიური ოჯახი კარგავს ფულადი დახმარების მიღების უფლებას, ხოლო რეინტეგრირებული ბავშვის საკითხი წყდება მისი ინტერესების უპირატესი დაცვით³⁸⁴. კანონში არ გვხვდება სხვა დებულება, თუ როგორ განისაზღვრება ინდივიდუალური ბავშვის საუკეთესო ინტერესები და როგორ ხდება ამ ინტერესების უპირატესი გათვალისწინება ფულადი და არაფულადი სოციალური დახმარების განსაზღვრისას.

▪ სახელმწიფო ზრუნვაში ბავშვის განთავსება

ბავშვის უფლებათა კონვენციის მე-20 მუხლის თანახმად, ოჯახურ გარემოს დროებით ან სამუდამოდ მოკლებული ბავშვი უზრუნველყოფილი უნდა იყოს სახელმწიფოს მიერ განსაკუთრებული დაცვითა და დახმარებით. ეროვნული კანონმდებლობით გარანტირებული უნდა იყოს ალტერნატიული ზრუნვა ამ ბავშვისთვის. ამგვარი ზრუნვა შესაძლოა მოიცავდეს, მათ შორის, მინდობით აღზრდას, შვილად აყვანას ან აუცილებლობის შემთხვევაში, შესაბამის სააღმზრდელო დაწესებულებაში განთავსებას. ზრუნვის ფორმის შერჩევისას გათვალისწინებული უნდა იყოს: ბავშვის აღზრდის უწყვეტობა იმავე გარემოში, ეთნიკური, რელიგიური, კულტურული და ენობრივი მახასიათებლები.

³⁸² მუხ. 1209

³⁸³ სამოქალაქო კოდექსი, მუხ. 12.5

³⁸⁴ მუხ. 21 (3)

კონვენციის 21-ე მუხლი მოითხოვს, სახელმწიფომ შექმნას შვილად აყვანის ისეთი სისტემა, რომელიც უზრუნველყოფს ბავშვის საუკეთესო ინტერესების უპირველს ყოვლისა გათვალისწინებას.

შეზღუდული შესაძლებლობის მქონე პირთა კონვენციის 23-ე მუხლის (4) თანახმად, ბავშვი არავითარ შემთხვევაში არ უნდა იქნეს განცალკევებული მშობლებისგან ბავშვის ან ერთი ან ორივე მშობლის შეზღუდული შესაძლებლობების საფუძველზე.

გაეროს გენერალური ასამბლეის რეზოლუციის თანახმად, ეროვნული კანონით უნდა აიკრძალოს იურიდიული და ფიზიკური პირების მიერ ბავშვთა მოძიება და განთავსება ზრუნვის დაწესებულებებში³⁸⁵. კანონმდებლობით უზრუნველყოფილი უნდა იყოს ადეკვატური ზრუნვის ფორმები ოჯახური და თემზე დაფუძნებული ზრუნვის უპირატესობის მითითებით³⁸⁶; ბავშვის მიტოვების შემთხვევაში სახელმწიფომ უნდა უზრუნველყოს კონფიდენციალობისა და უსაფრთხოების დაცვა, ამავე დროს, პატივი უნდა სცეს ბავშვის უფლებას მისი წარმოშობის ინფორმაციის მიღების უფლებაზე კანონით დადგენილი სათანადო წესით³⁸⁷; ოჯახიდან ბავშვის განცალკევება უნდა მოხდეს კომპეტენტური ორგანოს მიერ, კანონით დადგენილი წესით; მშობლებს უნდა ჰქონდეთ გასაჩივრების და სამართლებრივი დახმარების უფლება³⁸⁸.

▪ სპეციალიზებულ დაწესებულებაში მოთავსება

სოციალური დახმარების შესახებ კანონის თანახმად, სპეციალიზებული დაწესებულება არის ფიზიკური ან იურიდიული პირი, რომელიც ახორციელებს სპეციალური მზრუნველობის საჭიროების მქონე პირების სოციალურ მომსახურებას მთელი დღე-ღამის განმავლობაში ან/და დღე-ღამის განსაზღვრულ პერიოდში, გარდა პანსიონური მომსახურების მქონე ზოგადსაგანმანათლებლო დაწესებულებისა³⁸⁹.

ამ კანონის თანახმად, სპეციალიზებულ დაწესებულებაში, გარდა პანსიონისა, ბავშვის მოთავსების შესახებ გადაწყვეტილებას იღებს მეურვეობისა და მზრუნველობის ორგანო³⁹⁰. ბავშვის მოთავსება დაწესებულებაში ხდება დაინტერესებული პირის განცხადების საფუძველზე, რომელიც შეიძლება იყოს თავად მოთავსების მსურველი ან მისი ოჯახის წევრი, მეურვეობის და მზრუნველობის ორგანო ან სასამართლო³⁹¹.

აღსანიშნავია, რომ კანონი არ ითვალისწინებს პრინციპს ბავშვის ალტერნატიულ ზრუნვაში განთავსების, როგორც უკიდურესი ღონისძიების შესახებ, რათა ბავშვი მხოლოდ მაშინ მოთავსდეს ალტერნატიულ ზრუნვაში, როდესაც ეს აუცილებელია და არცერთმა სხვა ღონისძიებამ ოჯახის გაძლიერებისა და რეინტეგრაციის მიზნით შედეგი არ გამოიღო.

საქართველოს სახალხო დამცველის 2013 წლის ანგარიში, გამოთქმულია შემფოთება, რომ დაბადებისას არასწორი დიაგნოსტიკა და სტატუსის მინიჭების მოქმედი წესები

³⁸⁵ იგივე, პარა. 127

³⁸⁶ იგივე, პარა. 53

³⁸⁷ პარა. 42

³⁸⁸ პარა. 47

³⁸⁹ კანონი სოციალური დახმარების შესახებ, მუხ. 13

³⁹⁰ მუხ. 14 (1,2)

³⁹¹ მუხ. 14 (4)

კვლავაც აფერხებენ დროული და ადეკვატური ზრუნვის უზრუნველყოფას. არსებული სისტემა არ იძლევა 0-3 წლის ჩვილისთვის სტატუსის მინიჭების შესაძლებლობას. ეს მნიშვნელოვანი გამოწვევაა პოლიტიკასა და პრაქტიკაში და ხელს უშლის ბავშვებს (და მათ მომვლელებს) ამ ასაკობრივ ჯგუფში ისარგებლონ სტატუსთან დაკავშირებული სახელმწიფო დაფინანსებით. ადრეული დიაგნოსტიკის და სტატუსის განსაზღვრის საკითხი აუტისტური დარღვევების და დაუნის სინდრომის შემთხვევაში, დღემდე გაურკვეველი რჩება.

სპეციალიზებულ დაწესებულებაში ბავშვის განთავსების წესი დადგენილია მინისტრის ბრძანებით³⁹², რომელიც ადგენს:

- ბავშვთა სპეციალიზებული დაწესებულება არის საადმინისტრაციო დაწესებულება (მათ შორის, მიუსაფარ ბავშვთა თავშესაფარი), დღის ცენტრი და დედათა და ბავშვთა თავშესაფარი, ასევე, სახელმწიფო კონტროლს დაქვემდებარებული ტრეფიკინგის მსხვერპლთა დაცვისა და დახმარების ფონდის ფილიალები, მათ შორის, ბავშვთა სახლი³⁹³;
- ბავშვის (მათ შორის, ნაპოვნი ბავშვის) სპეციალიზებულ დაწესებულებაში განთავსების შესახებ გადაწყვეტილებას იღებს რეგიონული საბჭო, ხოლო მიუსაფარი ბავშვის განთავსების შესახებ გადაწყვეტილების მიმღებია უფლებამოსილი სოციალური მუშაკი³⁹⁴.
- ბავშვის უშუალო შეფასებას ახდენს სოციალური მუშაკი შეგროვილი დოკუმენტების შესახებ (პირადობის დამადასტურებელი დოკუმენტები, ჯანმრთელობის ცნობა/ფორმა 100 (ზოგადი), სამედიცინო-სოციალური ექსპერტიზის დასკვნა შშმ პირის/ბავშვის შემთხვევაში)³⁹⁵.
- შეზღუდული შესაძლებლობის მქონე პირთა პანსიონატში ან სათემო ორგანიზაციაში მოთავსებას ექვემდებარებებიან: შეზღუდული შესაძლებლობის მქონე სრულწლოვანი პირები, ასევე, ამ პირის 18 წლამდე ასაკის შვილები, თუ ეს არ ეწინააღმდეგება ბავშვის ჭეშმარიტ ინტერესებს³⁹⁶;
- დღის ცენტრში განთავსებას ექვემდებარება 6-18 წლამდე ბავშვები³⁹⁷;
- დღის ცენტრში ან მიუსაფარ ბავშვთა თავშესაფარში მოთავსებას ექვემდებარება მიუსაფარი ბავშვი³⁹⁸;
- დედათა და ბავშვთა თავშესაფარში მოთავსებას ექვემდებარება სხვადასხვა პრობლემების მქონე დედა, ასევე სხვადასხვა პრობლემების მქონე ქალი, რომელიც ორსულობის არანაკლებ 26-ე კვირაში იმყოფება (მათ შორის 10 წლამდე ასაკის შვილ(ებ)თან ერთად, თუ ეს უკანასკნელ(ნ)ი მიტოვების ან ინსტიტუციაში მოხვედრის რისკის წინაშე იმყოფებიან)³⁹⁹;

³⁹² სპეციალიზებულ დაწესებულებაში პირის მოთავსებისა და ამ დაწესებულებიდან მისი გაყვანის წესისა და პირობების შესახებ/ შრომის, ჯანმრთელობისა და სოციალურ საკითხთა მინისტრის ბრძანება 52/ნ/26.02.2010

³⁹³ მუხ. 5¹

³⁹⁴ მუხ. 4

³⁹⁵ მუხ. 6

³⁹⁶ ბრძანების მუხ. 3.3

³⁹⁷ მუხ. 3.4

³⁹⁸ მუხ. 3.5

³⁹⁹ მუხ. 3.6

- სააღმზრდელო დაწესებულებაში განთავსებას ექვემდებარება 18 წლამდე ასაკის მზრუნველობამოკლებული ბავშვი⁴⁰⁰. ასეთად ბრძანება განმარტავს ბავშვებს: რომელთა მშობლებიც უგზო-უკვლოდ დაკარგულად ან გარდაცვლილად არიან აღიარებული ან მხარდამჭერის მიძღვება და სასამართლომ მშობლის უფლებების ნაწილში მხარდამჭერად დაუნიშნა მეურვეობის და მზრუნველობის ორგანოს უფლებამოსილი პირი; ობოლია; მშობლებს შეეზღუდათ, შეუჩერდათ ან ჩამოერთვათ მშობლის უფლება-მოვალეობები; მიტოვებულადაა აღიარებული; მისი დატოვება მშობელთან საზიანოა ბავშვისთვის მისგან დამოუკიდებელი მიზეზებით⁴⁰¹.

არსად არ კეთდება მითითება ბავშვის მონაწილეობის, მისი აზრის მოსმენის და საუკეთესო ინტერესების შეფასების შესახებ მულტიდისციპლინური გუნდის მიერ. კანონი არ ადგენს ალტერნატიულ ზრუნვაში ბავშვის მოთავსების პრინციპულ საკითხებს, როგორცაა: ალტერნატიულ ზრუნვის სპეციალიზებულ დაწესებულებაში მოთავსება, როგორც უკიდურესი ღონისძიება; ბავშვის და ოჯახის მდგომარეობის მულტიდისციპლინური შეფასება; ზრუნვის სათანადო ფორმის შერჩევა ბავშვის საუკეთესო ინტერესების შესაბამისად; დამოუკიდებელი რეგულარული სუპერვიზიისა და მონიტორინგის სისტემა; და სხვა. კანონით ასევე არაა მოწესრიგებული ბუნებრივი და სხვა სახის კატასტროფების დროს ბავშვთა უფლებების, მათ შორის, დროებითი და გრძელვადიანი ზრუნვის საკითხები.

მნიშვნელოვანია განვიხილოთ მეურვეობისა და მზრუნველობის ორგანოსთან არსებული რეგიონული საბჭოების მიზანი და ფუნქციები, რომლებიც იღებენ გადაწყვეტილებას სპეციალიზებულ ზრუნვაში მზრუნველობამოკლებულ ბავშვთა განთავსების შესახებ. საბჭოს ტიპური დებულების⁴⁰² თანახმად, საბჭოს შემადგენლობაში შედიან სოციალური მომსახურების სააგენტოს, განათლების და მეცნიერების სამინისტროს შესაბამისი საგანამართლებლო რესურს-ცენტრის, ადგილობრივი თვითმმართველობის, ადგილობრივი არასამთავრობო ორგანიზაციის ან/და პროფესიული გაერთიანების წარმომადგენლები. საბჭოში ასევე შესამღებელია შედიოდნენ: შრომის, ჯანმრთელობის და სოციალურ საკითხთა სამინისტროს კონტროლს დაქვემდებარებული ტრეფიკინგის მსხვერპლთა დაცვისა და დახმარების ფონდის წარმომადგენელი, ადგილობრივი სამედიცინო დაწესებულების ექიმი ან სადაზღვევო კომპანიის ექიმი, სხვა დაინტერესებული პირი⁴⁰³.

დებულების თანახმად, საბჭოს მიზანი მეურვეობა/მზრუნველობის და სოციალურ საკითხებთან დაკავშირებით, პირის ჭეშმარიტი ინტერესების დაცვის უზრუნველყოფა სახელმწიფოსა და სამოქალაქო საზოგადოებას შორის თანამშრომლობით და მულტიდისციპლინური მიდგომის გამოყენებით⁴⁰⁴.

საბჭოს წევრებს სხდომის დაწყებამდე მინიმუმ 5 სამუშაო დღით ადრე ეგზავნებათ (ეცნობებათ) სხდომის დაწყების დრო და ადგილი, დღის წესრიგი, განსახილველ შემთხვევათა აღწერილობა და საჭიროების შემთხვევაში შესაბამისი დოკუმენტაცია. აუცილებლობის შემთხვევაში, დასაშვებია საბჭოს წევრებისათვის დამატებით, საქმის მასალების გადაგზავნა, სხდომამდე არაუგვიანეს ერთი დღისა⁴⁰⁵.

⁴⁰⁰ მუხ. 3.7

⁴⁰¹ მუხ. 2.7

⁴⁰² სოციალური მომსახურების სააგენტოს ბრძანება მეურვეობისა და მზრუნველობის ორგანოს რეგიონული საბჭოების ტიპური დებულების და შემადგენლობის დამტკიცების შესახებ, 2013წ.

⁴⁰³ დებულების მუხ. 2

⁴⁰⁴ მუხ. 3.1 „ბ“

⁴⁰⁵ მუხ.7.7

გადაწყვეტილების მიღებისას, საბჭოს წევრები ხელმძღვანელობენ საქართველოს მოქმედი კანონმდებლობით, სოციალური მუშაკის ან/და სხვა უფლებამოსილი პირების (ფსიქოლოგი, იურისტი) მიერ წარმოდგენილ შეფასებაში (დასკვნაში) მითითებული ინფორმაციითა და რეკომენდაციებით, აგრეთვე, განსახილველ საკითხთან დაკავშირებით არსებული სხვა მონაცემებით (ამ უკანასკნელის არსებობის შემთხვევაში). თუ წარმოდგენილი მასალები არ არის საკმარისი, საბჭოს უფლება აქვს, მოითხოვოს დამატებითი ინფორმაციის ან/და დოკუმენტების წარმოდგენა⁴⁰⁶.

საბჭოს დებულება არ ადგენს ბავშვთან გადაწყვეტილების მიღების პრინციპებს, როგორცაა ბავშვის საუკეთესო ინტერესების უპირატესი გათვალისწინება, ბავშვის მოსმენა და მისი აზრის პატივისცემა, ბავშვთან დაკავშირებით პირადი მონაცემების კონფიდენციალობის დაცვა საქმის მასალების გაზიარების დროს. რაც შეეხება მულტიდისციპლინურ შეფასებას, როგორც ბავშვის საუკეთესო ინტერესების დადგენის გზას, საბჭო ახდენს მხოლოდ წარმოდგენილი დოკუმენტების საფუძველზე. რეალურად ბავშვის შეფასებას, დოკუმენტების მოძიებას და დასკვნის შედგენას ახდენს მხოლოდ სოციალური მუშაკი. დოკუმენტების სავალდებულო ნუსხაში მითითებული არაა ფსიქოლოგის, განათლების სპეციალისტის, ექიმის და სხვა დასკვნები ბავშვის მდგომარეობის და საჭიროებების სრულფასოვანი შეფასებისთვის. უფრო მეტიც, საბჭოს შემადგენლობაში ჯანდაცვის სპეციალისტთა მონაწილეობა „შესაძლებელია“ და არა სავალდებულო, რაც იწვევს კითხვის ნიშნის ქვეშ ტოვებს ბავშვის ჯანმრთელობის მდგომარეობის სრულყოფილ გამოკვლევას და ეს საკითხი ამოიწურება მხოლოდ საბაზისო სამედიცინო ცნობის (ფორმა 100) წარდგენით.

აქედან გამომდინარე შეიძლება დავასკვნათ, რომ განხილული კანონებსა და კანონქვემდებარე აქტებს შორის არცერთი მათგანი არ მიუთითებს ისეთი მნიშვნელოვანი ელემენტების და გარემოებების შესწავლას, როგორცაა: ბავშვის ჯანმრთელობის და განათლების საჭიროებები, ძალადობის გამოცდილება, მკურნალობის და სხვა სერვისების საჭიროება, ოჯახთან ურთიერთობა, მისი მოსაზრებების მოსმენა და სურვილების მხედველობაში მიღება ასაკის და განვითარების დონის შესაბამისად. ამავე დროს, ნათელია, რომ ბავშვის საჭიროებების და თავსებადობის შეფასებას უშუალოდ ახორციელებს სოციალური მუშაკი, რომლის დასკვნის საფუძველზეც მეურვეობისა და მზრუნველობის ორგანოსთან არსებული რეგიონული საბჭო იღებს გადაწყვეტილებას. მართალია, რეგიონული საბჭოების შემადგენლობაში სხვადასხვა სპეციალისტები შედიან, თუმცა მათი მონაწილეობა უშუალოდ ბავშვის საუკეთესო ინტერესების ყოველმხრივი შეფასების და დადგენის პროცესში უმნიშვნელოა. შესაბამისად, მულტიდისციპლინური გუნდის მიერ შეფასების განხორციელება არც კანონით და არც პრაქტიკით სათანადოდ არაა გარანტირებული.

ჩატარებულმა კვლევამ⁴⁰⁷ გამოავლინა სისტემური პრობლემა: მულტიდისციპლინური და მულტიუწყებრივი მიდგომა გამოიყენება მაშინ, როდესაც საქმე კრიზისულია ანუ, ასეთ მიდგომას აქვს რეაქციული და არა პრევენციული დატვირთვა. პრევენციის დონეზე ასეთი მიდგომა საერთოდ არ არსებობს მოწყვლად ჯგუფებზე ზრუნვის სისტემაში. ასევე, მულტიდისციპლინური მუშაობა ქეისის მომზადების დროს უნდა მიმდინარეობდეს, რათა ეს ქეისები პროფესიულად დამუშავდეს და წარედგინოს საბჭოს.

⁴⁰⁶ მუხ. 7.10

⁴⁰⁷ ახალგაზრდა პედაგოგთა კავშირი, მეურვეობისა და მზრუნველობის ორგანოს რეგიონული საბჭოების მუშაობის ეფექტიანობის კვლევა, 2016

▪ ბავშვზე ზრუნვის დაწესებულების ლიცენზირება

კონვენცია⁴⁰⁸ მოითხოვს იმ საკანონმდებლო ჩარჩოს გადასინჯვას, რომელიც ეხება ყველა სახელმწიფო, კერძო და მოხალისეობრივ საწესებზე მომუშავე დაწესებულებას და სერვისს. კანონმდებლობის განხილვა უნდა მოიცავდეს ყველა ყველა ზრუნვის სერვისის მინდობით აღზრდის და დღის ცენტრების, ჯანმდაცვის, განათლების, სასჯელაღსრულების და სხვა სერვისებს. სტანდარტები უნდა მოქმედებდეს ყველგან შესაბამისი ინსპექციისა და მონიტორინგის მექანიზმებით⁴⁰⁹.

გაეროს რეზოლუცია ბავშვთა ალტერნატიული ზრუნვის შესახებ ადგენს სააღმზრდელო დაწესებულების რეგისტრაციისა და საქმიანობის კანონმდებლობით დადგენილი წესის დარღვევა უნდა იყოს დასჯადი. საქმიანობის ნებართვის გაცემა და რეგულარული შემოწმება უნდა განახორციელოს კომპეტენტურმა სახელმწიფო უწყებამ შემდეგი ძირითადი კრიტერიუმების მიხედვით: მიზნები, ფუნქციონირება, პერსონალის შერჩევა და კვალიფიკაცია, ზრუნვის სტანდარტების დაცვა, ფინანსური რესურსები და მენეჯმენტი⁴¹⁰.

კონვენციის 25-ე მუხლის თანახმად, სახელმწიფომ უნდა აღიაროს ბავშვის უფლება მისი მკურნალობის და ზრუნვაში განთავსების გარემოებების პერიოდულ გადახედვაზე.

კანონი „სააღმზრდელო საქმიანობის ლიცენზირების შესახებ“⁴¹¹ ადგენს შემდეგს:

- კანონი ვრცელდება ნებისმიერი ორგანიზაციულ-სამართლებრივი ფორმით დაფუძნებულ სააღმზრდელო დაწესებულებებზე, გარდა მინდობით აღზრდისა, სამედიცინო სტაციონარული დაწესებულებისა, საქართველოს განათლებისა და მეცნიერების სამინისტროს მიერ დაფუძნებული სკოლა-პანსიონისა, აგრეთვე ისეთი დაწესებულებისა, რომელშიც ბავშვი იმყოფება წელიწადში არაუმეტეს 3 თვისა⁴¹².
- სამინისტრო განსაზღვრავს სააღმზრდელო საქმიანობის განხორციელების ტერიტორიას და რაოდენობას, ხოლო საჭიროების შემთხვევაში სააღმზრდელო საქმიანობის განმახორციელებელი პირის შერჩევის წესსა და პირობებს. აკრძალულია სხვა ტერიტორიაზე და სხვა რაოდენობის სააღმზრდელო საქმიანობის განხორციელება⁴¹³.
- სააღმზრდელო საქმიანობის საჭიროა ბავშვზე ზრუნვის სტანდარტებთან შესაბამისი სააღმზრდელო პროგრამა; ინფორმაცია პერსონალის რაოდენობის, კვალიფიკაციის შესახებ; მატერიალურ-ტექნიკური მდგომარეობის და შენობა-ნაგებობების შესახებ ინფორმაცია; საქმიანობა უნდა შეესაბამებოდეს მთავრობის დადგენილებით დამტკიცებულ „ბავშვზე ზრუნვის სტანდარტებს“⁴¹⁴.
- ლიცენზიის გამცემი უფლებამოსილია შეამოწმოს ლიცენზიის მფლობელი ლიცენზიის პირობებთან შესაბამისობის დასადგენად, ასევე ისეთ შემთხვევაშიც,

⁴⁰⁸ მუხ. 3 (3)

⁴⁰⁹ Implementation Handbook for UN CRC, UNICEF, 2007 / არაოფიციალური თარგმანი, გვ. 41

⁴¹⁰ რეზოლუციის პარა. 105

⁴¹¹ კანონი სააღმზრდელო საქმიანობის ლიცენზირების შესახებ / მიღებულია 08.06.2016 <https://matsne.gov.ge/ka/document/view/3307127>

⁴¹² მუხ. 1

⁴¹³ მუხ. 3. 1,2

⁴¹⁴ მუხ. 6

თუ არსებობს დასაბუთებული ინფორმაცია ლიცენზიის მფლობელის მიერ სალიცენზიო პირობების დარღვევის შესახებ. სალიცენზიო პირობების დარღვევა გამოიწვევს პასუხისმგებლობას საქართველოს კანონმდებლობით დადგენილი წესით⁴¹⁵.

ამავე დროს, კანონი ლიცენზირებულად თვლის იმ სააღმზრდელო დაწესებულებებს, მათ შორის საქართველოს სამოციქულო ავტოკეფალური მართლმადიდებელი ეკლესიის საგანმანათლებლო დაწესებულებებს, რომლებსაც ლიცენზია მიღებული ჰქონდათ სააღმზრდელო საქმიანობის შესახებ წინა კანონით⁴¹⁶. აღსანიშნავია, რომ წინა კანონით ეს დაწესებულებები ლიცენზირებულად ჩაითვალებოდა ლიცენზიის მისაღებად დადგენილი პროცედურების დაკმაყოფილების გარეშე. არცერთი კანონი არ მიუთითებს ამ დაწესებულებებისთვის რაიმე სავალდებულოდ შესასრულებელ პირობას გარდამავალ ეტაპზე სტანდარტებთან შესაბამისობის და შემდგომში მცირე ზომის საოჯახო ზრუნვის ფორმად ჩამოყალიბების შესახებ. ჩანაწერი არსებობს მხოლოდ კანონქვემდებარე აქტში, მთავრობის დადგენილებაში ბავშვზე ზრუნვის სტანდარტების შესახებ, რომელიც საგამონაკლისო პირობებს უწესებს 24-საათიან დიდი ზომის ინსტიტუციებს და სტანდარტებთან შესაბამისობისთვის უდგეს ვადას 2020 წლის 1 იანვრამდე⁴¹⁷. თუმცა არც ეს კანონქვემდებარე აქტი მიუთითებს ეტაპობრივი განხორციელების შესახებ. აქედან გამომდინარე, დიდი ზომის ინსტიტუციებში მყოფი ბავშვები კიდევ რამდენიმე წელი რჩებიან ბავშვზე ზრუნვის სახელმწიფო სისტემის გარეთ და წინარე გამოცდილების მიხედვით (2009 წლის მარტიდან წლიდან ეს დაწესებულებები კანონით ითვლებიან ლიცენზირებულად სტანდარტების დაკმაყოფილების გარეშე⁴¹⁸) კვლავ ბუნდოვანი რჩება ამ პრობლემის გადაჭრის გზები.

გაეროს სპეციალური მომხსენებელი ბავშვებით ვაჭრობის, ბავშვთა პროსტიტუციისა და ბავშვთა ტრეფიკინგის საკითხებზე აღნიშნავს, რომ საქართველოში „ბავშვზე ზრუნვის არა-სახელმწიფო დაწესებულებების კრიტიკა გამოწვეულია იმით, რომ ისინი თავს არიდებენ სახელმწიფოს მიერ რეგულირებას, მონიტორინგს და კონტროლს“⁴¹⁹. მომხსენებელი მოუწოდებს საქართველოს:

- შეიმუშავოს და განახორციელოს ახალი სამოქმედო გეგმა ბავშვზე ზრუნვის სისტემის რეფორმისთვის დეინსტიტუციონალიზაციის პროცესის დასრულებისთვის, რაც მოიცავს არა-სახელმწიფო ბავშვზე ზრუნვის დაწესებულებების რეგულირებას, მონიტორინგს და ხედამხედველობას იმ საბოლოო მიზნით, რომ ისინი დაიხურება და მიიღება ბავშვზე ზრუნვის ალტერნატიული ზომები⁴²⁰.
- უზრუნველყოს შეზღუდული შესაძლებლობის მქონე ბავშვთა დეინსტიტუციონალიზაცია მათი ოჯახების მხარდაჭერის და ზრუნვის ალტერნატიული ფორმების ხელშეწყობით⁴²¹.

⁴¹⁵ მუხ. 8

⁴¹⁶ კანონი სააღმზრდელო საქმიანობის ლიცენზირების შესახებ / მიღებულია 11.03.2005 / ძალადაკარგულია 17/06/2016

⁴¹⁷ მთავრობის დადგენილება ბავშვზე ზრუნვის სტანდარტების შესახებ, მუხ. 1 (4)

⁴¹⁸ იხ. 2009 წლის 24 მარტის ცვლილება <https://matsne.gov.ge/ka/document/view/17950>

⁴¹⁹ გაეროს სპეციალური მომხსენებელი ბავშვებით ვაჭრობის, ბავშვთა პროსტიტუციისა და ბავშვთა ტრეფიკინგის საკითხებზე. ანგარიში, 2016 წ. 21 დეკემბერი. პარა. 70

⁴²⁰ იგივე, პარა. 86. „ბ“

⁴²¹ იგივე, პარა. 86. „გ“

აღსანიშნავია, რომ ეს კანონი არ აწესრიგებს სკოლა-პანსიონის ლიცენზირების საკითხს, რომელიც მოიცავს როგორც საგანმანათლებლო, ასევე სააღმზრდელო კომპონენტს. არც ამ და არც სხვა კანონით არ წესრიგდება სამედიცინო სტაციონარულ დაწესებულებებში მოთავსებულ ბავშვზე ზრუნვის სტანდარტები (მაგალითად, კანონი ფსიქიატრიული დახმარების შესახებ ადგენს, რომ პაციენტის განთავსების ვადა არანებაყოფლობით მკურნალობის დროს შესაძლოა იყოს 6 თვე და მეტი⁴²²). ამრიგად, საქართველოში მოქმედი სკოლა-პანსიონური დაწესებულებების სააღმზრდელო საქმიანობა, ასევე, სტაციონარული სამედიცინო დაწესებულებებში მოთავსებულ ბავშვზე ზრუნვის პირობები რჩება სავალდებულო სტანდარტების და რეგულირების გარეშე.

რაც შეეხება მონიტორინგს, კანონი მიუთითებს, რომ ლიცენზიის გამცემი უფლებამოსილია შეამოწმოს ლიცენზიის პირობების შესრულება ზოგადად ან დარღვევის შესახებ დასაბუთებული ინფორმაციის არსებობისას. კანონი არ მიუთითებს მონიტორინგის (ინსპექცია, ზედამხედველობა) რეგულარულობაზე, წესსა და ინსტრუმენტებზე. ამავე დროს, კანონი არ ადგენს, თუ რა შეიძლება ჩაითვალოს „დასაბუთებულ ინფორმაციად“ დაწესებულების შესამოწმებლად და არც ბავშვისთვის ხელმისაწვდომ გასაჩივრების პროცედურებს მიუთითებს. აღსანიშნავია ასევე, რომ კანონი სააღმზრდელო საქმიანობის შესახებ არ მიუთითებს სააღმზრდელო საქმიანობის განხორციელებაზე ბავშვის საუკეთესო ინტერესების უპირატესი გათვალისწინებით. ეს და სხვა ფუნდამენტური პრინციპები ასახული არაა არც მთავრობის დადგენილებაში ბავშვზე ზრუნვის სტანდარტების შესახებ. ეს კანონი არ აწესრიგებს არც მინდობით აღზრდის, როგორც სააღმზრდელო საქმიანობის საკითხს და მინიმალური მოთხოვნების გარდა⁴²³ მინდობით აღზრდაც რჩება სტანდარტების გარეშე.

3.4.3. ბავშვის უფლება განათლებაზე

ბავშვის უფლებათა კონვენცია⁴²⁴ მოუწოდებს სახელმწიფოს უზრუნველყოს ბავშვის უფლება განათლებაზე, მათ შორის, განათლების შესახებ ინფორმაციის ხელმისაწვდომობის, სკოლაში დასწრების ხელშეწყობის და სკოლიდან გარიცხვის შემცირების გზით. სახელმწიფომ, აგრეთვე, უნდა მიიღოს ყველა სათანადო ზომა, რათა სასკოლო დისციპლინა განხორციელდეს ბავშვის ღირსებისა და კონვენციასთან შესაბამისობით. კომიტეტის განმარტებით⁴²⁵, დაუშვებელია დისციპლინის ზომად ფიზიკური დასჯის ან სხვა სასტიკი ან დამამცირებელი სასჯელი ან მოპყრობა.

შეზღუდული შესაძლებლობის მქონე პირთა უფლებების გაეროს კომიტეტი განმარტავს, რომ ინკლუზიური განათლება არის თითოეული მოსწავლის ფუნდამენტური უფლება, პრინციპი, რომელიც აფასებს მოსწავლეთა კეთილდღეობას, ღირსებას და ავტონომიას და აღიარებს ინდივიდუალურ მოთხოვნილებებს და შესაძლებლობას ეფექტურად მონაწილეობდეს საზოგადოებრივ ცხოვრებაში. ინკლუზიური განათლება არის ადამიანის უფლებათა განხორციელების საშუალება, რისი მეშვეობითაც შეზღუდული შესაძლებლობის მქონე პირებს შეუძლიათ თავი დააღწიონ სიღარიბეს, აღიჭურვონ თემში სრულფასოვანი მონაწილეობის საშუალებებით და დაცულნი იყვნენ ექსპლუატაციისგან. ინკლუზიური განათლება არის განათლების უფლების

⁴²² კანონი ფსიქიატრიული დახმარების შესახებ, მუხ. 18.1-13

⁴²³ კანონი შვილად აყვანის და მინდობით აღზრდის შესახებ

⁴²⁴ მუხ. 28

⁴²⁵ ზოგადი კომენტარი #1, პარა. 8; ზოგადი კომენტარი # 8, პარა. 32

დამაბრკოლებელი ბარიერების აღმოფხვრის პროცესის შედეგი, რომელიც მოიცავს კულტურულ, პოლიტიკურ და სასკოლო პრაქტიკის ცვლილებებს განათლების პროცესში მოსწავლეთა ეფექტური ჩართვისთვის⁴²⁶.

კომიტეტი ხაზგასმით აღნიშნავს ტერმინებს შორის განსხვავების სწორად აღქმის მნიშვნელობას. კერძოდ, **ექსკლუზია** ნიშნავს მოსწავლეებისთვის განათლების ხელმისაწვდომობაზე პირდაპირ ან არაპირდაპირ უარყოფას⁴²⁷. **სეგრეგაცია** ხდება, როდესაც შეზღუდული შესაძლებლობის მქონე პირებისთვის განათლების მიწოდება ხდება სპეციალურად მათთვის შექმნილ განცალკევებულ გარემოში. **ინტეგრაცია** არის შეზღუდული შესაძლებლობის მქონე პირთა განთავსების პროცესი სტანდარტული განათლების დაწესებულებებში. **ინკლუზია** მოიცავს სისტემური რეფორმის პროცესს, რომელიც მოიცავს განათლების სფეროში მასალის შინაარსის, სასწავლო მეთოდების, მიდგომების, სტრუქტურების და სტრატეგიების ცვლილებებსა და მოდიფიკაციებს ბარიერების დასაძლევად იმ მიზნით, რომ ყველა მოსწავლეს მიეწოდოს ასაკთან შესაბამისი თანასწორი, მონაწილეობითი სასწავლო გარემო, რომელიც ყველაზე უკეთ პასუხობს მათ მოთხოვნილებებსა და არჩევანს.

მოსწავლეთა განთავსება ჩვეულებრივ სკოლაში შესაბამისი სტრუქტურული ცვლილებების გარეშე (გაკვეთილების ორგანიზება, სასწავლო გეგმის და სწავლებისა და შესწავლის სტრატეგიები) არ ნიშნავს ინკლუზიას. უფრო მეტიც, ინტეგრაცია ავტომატურად ვერ უზრუნველყოფს სეგრეგაციიდან ინკლუზიაზე გადასვლას.

ინკლუზიური განათლების ძირითადი მახასიათებლებია: სისტემური მიდგომა, რომელიც მოიცავს აუცილებელ ცვლილებებს ინსტიტუციური კულტურის, პოლიტიკის და პრაქტიკის კუთხით; მთლიანი საგანმანათლებლო გარემოს ცვლილება სწავლების მეთოდების, საბჭოს შეხვედრების, მასწავლებელთა სუპერვიზიის, საკონსულტაციო სერვისების და სამედიცინო ზრუნვის, სასკოლო ტურების, ბიუჯეტირების, მშობლებთან კომუნიკაციას ადგილობრივ თემში თუ უფრო ფართო მასშტაბით; სრულფასოვანი პიროვნული მიდგომა, რაც ნიშნავს პერსონალიზებული განათლების მიწოდებას ნაცვლად იმისა, რომ მოსწავლისგან მოითხოვოს სისტემაზე მორგება; მასწავლებელთა მხარდაჭერა გადამზადებით მათ შორის შეზღუდული შესაძლებლობის მქონე მასწავლებელთა ჩართვით; მრავალფეროვნების პატივისცემა დისკრიმინაციის გარეშე ნებისმიერი ნიშნით; მოსწავლისადმი მეგობრულად განწყობილი გარემო; სკოლის მიტოვების რისკისა და სავალდებულო განათლების მიღმა მყოფი ბავშვების მონიტორინგი და მათ შესახებ მონაცემთა ბაზების ხელმისაწვდომობა, სასწავლო-საგანმანათლებლო მასალების ხელმისაწვდომობა და გამოყენება ფორმალური და არაფორმალური განათლების დაწესებულებებში სავალდებულო განათლების მიღმა დარჩენილი და სპეციალური საგანმანათლებლო საჭიროებების მქონე ბავშვებისათვის მათ შორის, სკოლიდან განთავსვის რისკის ქვეშ მყოფი მოსწავლეებისათვის, ეფექტური მომზადება გარდამავალი ეტაპებისთვის, რაც ნიშნავს მოსწავლეთა შესაძლებლობების განვითარებას განათლების შემდგომ საფეხურებზე გადასვლისთვის; პარტნიორობა, რაც მოიცავს მასწავლებელთა, მოსწავლეთა და სხვა ასოციაციების თუ არაფორმალური ჯგუფების ცოდნის გაღრმავება შეზღუდული შესაძლებლობის შესახებ; მონიტორინგი, როგორც განგრძობადი პროცესი, რადგან მნიშვნელოვანია მოხდეს ინკლუზიური

⁴²⁶ შეზღუდული შესაძლებლობის მქონე პირთა უფლებების კომიტეტის ზოგადი კომენტარი #4 „ინკლუზიური განათლების შესახებ“, პარა. 10
⁴²⁷ პარა. 11

▪ განათლების მიზნები

ბავშვის უფლებათა კონვენციის თანახმად, ბავშვის განათლების მიზნებია⁴²⁹: ბავშვის პიროვნების, ტალანტების, გონებრივი და ფიზიკური შესაძლებლობების განვითარება მისი სრული პოტენციალით; ადამიანის უფლებების და ძირითადი თავისუფლებებისადმი პატივისცემის ჩამოყალიბება; ბავშვის პატივისცემის განვითარება მისი მშობლებისადმი, კულტურული, ენობრივი და იმ ქვეყნის ეროვნული ღირებულებებისადმი, რომელშიც წარმოიშვა ან ცხოვრობს, და ასევე, მისგან განსხვავებული ცივილიზაციებისადმი; ბავშვის მომზადება ცხოვრებისეული პასუხისმგებლობისთვის თავისუფალ საზოგადოებაში, ურთიერთგაგების, მშვიდობის, ტოლერანტობის, სქესთა თანასწორობის, ყველა ადამიანს, ეთნიკურ, ეროვნულ და რელიგიურ დაჯგუფებას შორის მეგობრობის სულისკვეთებით; ბუნებრივი გარემოს მიმართ პატივისცემის განვითარება.

კომიტეტი განმარტავს⁴³⁰, რომ კონვენციის მიერ აღიარებული, განათლების მიზნების ზოგადი და ძალიან ფართო მნიშვნელობის გამო ზოგიერთი სახელმწიფო მათ ასახვას შიდა კანონმდებლობაში საჭიროდ არ თვლის. თუმცა, კომიტეტი თვლის, რომ კანონმდებლობაში ამ მიზნების ასახვის გარეშე ამ პრინციპების განხორციელება სათანადოდ ვერ მიიღწევა. აქედან გამომდინარე, კომიტეტი მოუწოდებს სახელმწიფოს უზრუნველყოს ამ პრინციპების განმტკიცება შესაბამისი კანონებით. **კანონმდებლობით უნდა განმტკიცდეს,** რომ დაუშვებელია დისციპლინის ზომად ფიზიკური დასჯის ან სხვა სასტიკი ან დამამცირებელი სასჯელი ან მოპყრობა⁴³¹.

კანონი ზოგადი განათლების შესახებ ადგენს⁴³² ზოგადი განათლების სფეროში სახელმწიფო პოლიტიკის ძირითად მიზნებს, კერძოდ: ა) მოსწავლის ეროვნული და ზოგადსაკაცობრიო ღირებულებების მქონე, თავისუფალ პიროვნებად ჩამოყალიბებისთვის საჭირო პირობების შექმნა; ბ) მოსწავლის გონებრივი და ფიზიკური უნარ-ჩვევების განვითარება, აუცილებელი ცოდნით უზრუნველყოფა, ცხოვრების ჯანსაღი წესის დამკვიდრება, ლიბერალურ-დემოკრატიულ ღრებულებებზე დამყარებული სამოქალაქო ცნობიერების ჩამოყალიბება, მოსწავლის მიერ კულტურულ ფასეულობათა პატივისცემა, ოჯახის, საზოგადოების, სახელმწიფოსა და გარემოს წინაშე უფლება-მოვალეობების გაცნობიერებაში ხელშეწყობა.

ზოგადი განათლების შესახებ კანონის მიერ აღიარებული განათლების მიზნები სრულყოფილად არ ასახავს კონვენციით აღიარებულ მიზნებს, კერძოდ, მასში გამოტოვებულია ისეთი მნიშვნელოვანი მიზნები, როგორცაა: ადამიანის უფლებათა პატივისცემის ჩამოყალიბება; ტოლერანტობის, თანასწორობის, მშვიდობისა და განსხვავებულისადმი პატივისცემის ჩამოყალიბება და ა.შ. შესაბამისად, მნიშვნელოვანია კანონი გადაიხედოს ამ მიმართულებით.

კანონი ადრეული და სკოლამდელი აღზრდისა და განათლების შესახებ არ მოიცავს ჩანაწერს განათლების მიზნების შესახებ. მნიშვნელოვანია გადაიხედოს ეს კანონი და

⁴²⁸ პარა. 12

⁴²⁹ მუხ. 29

⁴³⁰ ზოგადი კომენტარი #1, განათლების მიზნები: პარა. 17

⁴³¹ ზოგადი კომენტარი #1, პარა. 8; ზოგადი კომენტარი # 8, პარა. 32

⁴³² კანონი ზოგადი განათლების შესახებ, მიღებულია 04.08.2005/ მუხ. 3 (1)

<https://matsne.gov.ge/ka/document/view/29248>

აისახოს მასში სკოლამდელი განათლების მიზნები კონვენციის შესაბამისად. საკანონმდებლო ცვლილებებმა მნიშვნელოვანია ასახოს შემდეგი საკითხები:

- ადრეული და სკოლამდელი დაწესებულებების აღმზრდელ-პედაგოგებისა და სხვა ძირითადი პერსონალის პროფესიული განვითარების ეროვნული სისტემა, რაც აუცილებელი წინაპირობაა ხარისხიანი განათლების უფლების რეალიზებისთვის;
- კანონით შეზღუდულია ალტერნატიულ და მრავალფეროვან სერვისებზე ხელმისაწვდომობა (რადგან დადგენილია სავალდებულო საათების რაოდენობა და ბაღების მხოლოდ საჯარო და კერძო ორგანიზაციული ფორმა), რაც ნიშნავს რომ იზღუდება კონკრეტული თემის საჭიროებებზე მორგებული (საზოგადოებრივი და საჯარო) საგანმანათლებლო სერვისების შექმნის შესაძლებლობა⁴³³;
- კანონი ადრეული და სკოლამდელი აღზრდისა და განათლების შესახებ არ მოიცავს არცერთ ჩანაწერს თამაშისა და მონაწილეობითი უფლებების შესახებ, რომლებიც წარმოადგენს ძირითად ქვაკუთხედს ხარისხიანი, ბავშვზე ორიენტირებული განათლების უზრუნველყოფისთვის ადრეულ ასაკში⁴³⁴

კანონი არაფერს ამბობს სახელმწიფოს ვალდებულებებზე განსაკუთრებით მოწყვლადი ბავშვების ხარისხიანი და ხელმისაწვდომი განათლებით უზრუნველყოფის შესახებ.

▪ ინკლუზიური განათლება

კომიტეტი მოითხოვს სახელმწიფომ შექმნას ყოვლისმომცველი და კოორდინირებული საკანონმდებლო და პოლიტიკის ჩარჩო შესაბამისი სანქციებით. ძირითადი ელემენტებია⁴³⁵:

- ადამიანის უფლებათა საერთაშორისო სტანდარტებთან შესაბამისობა;
- ინკლუზიის და მისი მიზნების მკაფიო განმარტება, რომელიც იქნება რეფორმის ნაწილი და არა - დანამატი;
- ინკლუზიური განათლების მატერიალური უფლება, როგორც საკანონმდებლო ჩარჩოს ერთ-ერთი ელემენტი, რაც გულისხმობს შეუსაბამო ტერმინების ამოღებას კანონებიდან; გარანტია ყველა მოსწავლისთვის, შეზღუდული შესაძლებლობით და მის გარეშე, ისარგებლონ თანაბარი უფლებით სწავლის ინკლუზიური შესაძლებლობებით, ზოგადი განათლების სისტემაში, ხოლო ინდივიდუალურ მოსწავლეს მიეწოდოს სპეციალური მხარდაჭერის სერვისები;
- განათლების შესახებ კანონებში ინკლუზია უნდა აისახოს, როგორც კონკრეტული მიზანი;
- სკოლების დიზაინი „უნივერსალური დიზაინის“ პრინციპით და ამავე დროს, უკვე არსებული სკოლების ადაპტაციის გეგმის და დროის გრაფიკის შემუშავება⁴³⁶;
- ინკლუზიური განათლების ხარისხობრივი სტანდარტების და მონიტორინგის მექანიზმების შემუშავება; გონივრული მისადაგების აღიარება და შესაბამისი სანქციების დაწესება შეუსრულებლობისთვის;
- ადრეული გამოვლენის, შეფასების და მხარდაჭერის ჩარჩო მექანიზმის შექმნა;
- ადგილობრივი თვითმმართველობის ვალდებულება დაგეგმონ და უზრუნველყონ ყველა მოსწავლისთვის, ამით შორის შეზღუდული

⁴³³ ამაზე საუბარი არის კონვენციის ზოგად კომენტარში #7, მუხლი 31

(<http://www2.ohchr.org/english/bodies/crc/docs/AdvanceVersions/GeneralComment7Rev1.pdf>)

⁴³⁴ (მუხლი 31 და მუხლები 12-17, აგრეთვე ზოგადი კომენტარი 7)

⁴³⁵ პარა. 62

⁴³⁶ კომიტეტის ზოგადი კომენტარი #2

შესაძლებლობის მქონე პირებისთვის, ინკლუზიური საგანმანათლებლო გარემო, შესაბამისი ენები, კომუნიკაციის შესაბამისი საშუალებები;

- **საკანონმდებლო გარანტიების შექმნა** შეზღუდული შესაძლებლობის მქონე ბავშვთა უფლების რეალიზებისთვის მოსმენაზე და მათი მოსაზრებების სათანადოდ გათვალისწინებაზე განათლების სისტემაში, მათ შორის, სკოლის საბჭოების, სახელმწიფო და ადგილობრივი ხელისუფლების ორგანოების მეშვეობით, ასევე, გადაწყვეტილებების გასაჩივრების კუთხით; პარტნიორული კოორდინაცია ყველა სახელმწიფო და არასამთავრობო ორგანიზაციების, მათ შორის, შშმ პირთა და მშობელთა მონაწილეობით. ასევე, სკოლის მიტოვების რისკისა და სავალდებულო განათლების მიღმა მყოფი ბავშვების მონიტორინგისა და ამ ბავშვების შესახებ მონაცემთა ბაზების შექმნისა და ხელმისაწვდომობის შესახებ.

ადრეული და სკოლამდელი აღზრდისა და განათლების შესახებ⁴³⁷ განმარტავს ინკლუზიური განათლებას, როგორც საგანმანათლებლო მიდგომა, რომლის ფარგლებშიც განათლების სისტემა უზრუნველყოფს დაწესებულებაში ყველა ბავშვისთვის ხარისხიანი განათლების მიწოდებას მათი ინდივიდუალური საჭიროებების გათვალისწინებით, მიუხედავად ბავშვების ფიზიკური, შემეცნებითი, სენსორული, სოციალური, ემოციური, ლინგვისტური, ეთნიკური, რასობრივი, რელიგიური, გენდერული თუ სხვა მახასიათებლებისა⁴³⁸.

ეს კანონი, აგრეთვე, ადგენს სხვადასხვა უწყებების ვალდებულებებს ინკლუზიური განათლების კუთხით:

- განათლების და მეცნიერების სამინისტროს უფლებამოსილებებს და ვალდებულებებს, რომლის ფარგლებშიც სამინისტრო ინკლუზიური განათლების პრინციპების გათვალისწინებით ამზადებს საგანმანათლებლო რესურსების სიასა და მეთოდოლოგიურ რესურსებს და უზრუნველყოფს ამ რესურსების მუნიციპალიტეტებისათვის ხელმისაწვდომობას⁴³⁹;
- მუნიციპალიტეტების უფლებამოსილებებსა და ვალდებულებებს სკოლამდელი აღზრდისა და განათლების სფეროში, რომელის ფარგლებშიც იზრუნველყოფენ თანაბრად ხელმისაწვდომ და ინკლუზიურ სკოლამდელ აღზრდასა და განათლების მიწოდებას⁴⁴⁰;
- დაწესებულებების უფლებებსა და ვალდებულებებს ბავშვებთან და მათ მშობლებთან მიმართებაში: ინკლუზიურ განათლებასთან, ძალადობისგან ბავშვის დაცვასთან, უსაფრთხოებასთან, სანიტარიასა და ჰიგიენასთან დაკავშირებული სტანდარტების შესაბამისად დაწესებულების სტრატეგიის შემუშავებას⁴⁴¹;
- დაწესებულება უზრუნველყოფს ინკლუზიური განათლების მიწოდებას ბავშვებისთვის, მიუხედავად მათი ფიზიკური, შემეცნებითი, სენსორული, სოციალური, ემოციური, ლინგვისტური, ეთნიკური, რასობრივი, რელიგიური, გენდერული თუ სხვა მახასიათებლებისა⁴⁴².

⁴³⁷ <https://matsne.gov.ge/ka/document/view/3310237>

⁴³⁸ მუხ. 3 „ლ“

⁴³⁹ მუხ. 8 „დ“

⁴⁴⁰ მუხ. 10 „ბ“

⁴⁴¹ მუხ. 17.2 „გ“

⁴⁴² მუხ. 23.1

განხილული ნორმების ანალიზით შეგვიძლია დავასკვნათ, რომ ინკლუზიური განათლების განმარტება შესაბამისობაშია საერთაშორისო სტანდარტებთან, თუმცა ნორმები გარკვეულო ბუნდობანებას შეიცავს უწყებების უფლებამოსილებასა და ვალდებულებებთან დაკავშირებით. აუცილებელია კანონმა დაადგინოს კოორდინაციის ვალდებულება სკოლამდელ დაწესებულებასა და სხვადასხვა სექტორულ უწყებებს შორის, რაც უზრუნველყოფს ინფორმაციის გაცვლასა და თანამშრომლობას ბავშვის საუკეთესო ინტერესებიდან გამომდინარე, რათა საგანმანათლებლო დაწესებულებამ მაქსიმალურად შეძლოს ბავშვის საჭიროებებზე, შესაძლებლობებსა და ინტერესებზე მორგებული მომსახურების უზრუნველყოფა. კანონმა, აგრეთვე, უნდა ასახოს: ახალი დაწესებულების მშენებლობა განხორციელდეს უნივერსალური დიზაინის პრინციპით; ყველა არსებულმა დაწესებულებამ განახორციელოს გონივრული მისადაგების ვალდებულება; განათლების ხარისხის მონიტორინგის ჩარჩომ გაითვალისწინოს ინკლუზიურობის პრინციპის განხორციელების მონიტორინგი.

კანონი ზოგადი განათლების შესახებ აღიარებს ინკლუზიური განათლების პრინციპს და ინკლუზიურ განათლებას განმარტავს, როგორც სპეციალური საგანმანათლებლო საჭიროების მქონე მოსწავლის ჩართვას ზოგადსაგანმანათლებლო პროცესში თანატოლებთან ერთად. სპეციალური საგანმანათლებლო საჭიროების მქონე მოსწავლე კი არის პირი, რომელსაც თანატოლებთან შედარებით აქვს სიძნელე სწავლაში და რომლისთვისაც საჭიროა ეროვნული სასწავლო გეგმის მოდიფიცირება ან/და სასწავლო გარემოსთან ადაპტაცია ან/და ინდივიდუალური სასწავლო გეგმის და პროგრამების შედგენა ეროვნული სასწავლო გეგმის შესაბამისობაში და განხორციელება. ინკლუზიური განათლების მულტიდისციპლინური გუნდი სპეციალური საგანმანათლებლო საჭიროების განსაზღვრის მიზნით ახორციელებს პირის შეფასებას და მისთვის განათლების საუკეთესო ფორმის შერჩევას⁴⁴³.

აღნიშნული განმარტება არ შეესაბამება შეზღუდული შესაძლებლობის მქონე პირთა უფლებების კონვენციას, რადგან ინკლუზიური განათლების პრინციპს განმარტავს ვიწროდ, მხოლოდ სწავლასთან დაკავშირებული სიძნელის ჭრილში („პირი, რომელსაც თანატოლებთან შედარებით აქვს სიძნელე სწავლაში“⁴⁴⁴) და არა როგორც თითოეული მოსწავლის ფუნდამენტურ უფლებას მიიღოს მაღალი ხარისხის, მის ასაკთან, ინდივიდუალურ მოთხოვნილებებთან შესაბამისი განათლება. ინკლუზიური განათლება არის განათლების უფლების დამაბრკოლებელი ბარიერების აღმოფხვრის პროცესის შედეგი, რომელიც მოიცავს კულტურულ, პოლიტიკურ და სასკოლო პრაქტიკის ცვლილებებს განათლების პროცესში მოსწავლეთა ეფექტური ჩართვისთვის. აქედან გამომდინარე, მნიშვნელოვანია გადაიხედოს ზოგადი კანონში არსებული განმარტება და შესაბამისობაში მოვიდეს ბავშვის უფლებათა და შეზღუდული შესაძლებლობის მქონე პირთა უფლებების კონვენციებთან და შესაბამის საერთაშორისო სტანდარტებთან. განხორციელება;

კანონი პროფესიული განათლების შესახებ⁴⁴⁵ და კანონი უმაღლესი განათლების შესახებ⁴⁴⁶ საერთოდ არ მოიცავს ჩანაწერს ინკლუზიური განათლების შესახებ.

კანონმდებლობით განათლების ყველა საფეხურზე და ეტაპზე უზრუნველყოფილი უნდა იყოს ინკლუზიურობის პრინციპი. ეს კანონები შესაბამისობაში უნდა მოვიდეს

⁴⁴³ მუხ. 2

⁴⁴⁴ ზოგადი განათლების შესახებ კანონი, მუხ. 2 „ჩ²“, „უ“

⁴⁴⁵ <https://matsne.gov.ge/ka/document/view/23608>

⁴⁴⁶ <https://matsne.gov.ge/ka/document/view/32830>

საერთაშორისო სტანდარტებთან, რათა შეზღუდული შესაძლებლობის მქონე ბავშვებმა და ახალგაზრდებმა სხვებთან თანაბარ პირობებში შეძლონ განათლების მიღება.

1.1. უნივერსალური დიზაინი და გონივრული მისადაგება

კომიტეტი განმარტავს⁴⁴⁷, რომ სახელმწიფომ დაუყოვნებლივ უნდა განახორციელოს ისეთი ვალდებულებები, როგორცაა: დისკრიმინაციის დაუშვებლობა, რისთვისაც აღმოფხვრილი უნდა იყოს ყველა სამართლებრივი და სხვა ბარიერები, რაც ხელს უშლის ინკლუზიურ განათლების უფლებას; გონივრული მისადაგების უზრუნველყოფა, რისი შეუსრულებლობაც წარმოადგენს დისკრიმინაციას შეზღუდული შესაძლებლობის ნიშნით; სავალდებულო, უფასო ზოგადი ინკლუზიური განათლების უზრუნველყოფა ყველასთვის, მათ შორის, შეზღუდული შესაძლებლობის მქონე ბავშვებისთვის.

კანონი ზოგადი განათლების შესახებ ადგენს, რომ სკოლა ვალდებულია შეზღუდული შესაძლებლობის მქონე მოსწავლეებისთვის დააწესოს შეღავათები მათი სწავლისა და აღზრდისათვის აუცილებელი პირობების შესაქმნელად⁴⁴⁸ და უფლებამოსილია შექმნას პირობები ინკლუზიური სწავლებისათვის⁴⁴⁹. ეს ნიშნავს, რომ კანონი სკოლას არ ავალდებულებს შექმნას ინკლუზიური გარემო „გონივრული მისადაგების“ უზრუნველყოფით.

კანონი შეზღუდული შესაძლებლობების მქონე პირთა სოციალური დაცვის შესახებ⁴⁵⁰ არ ითვალისწინებს ინკლუზიურობის პრინციპს და უფლებას. ეს კანონი მიუთითებს, რომ:

- განათლების ორგანოები ჯანმრთელობის დაცვისა და სოციალური უზრუნველყოფის ორგანოებთან ერთად ვალდებული არიან, უზრუნველყონ შეზღუდული შესაძლებლობის მქონე ბავშვების ადრეული და სკოლამდელი აღზრდა და განათლება და სკოლისგარეშე აღზრდა მათთვის ჯეროვანი სარეაბილიტაციო დახმარების გაწევის ხელსაყრელი შესაძლებლობების შექმნის მიზნით, აგრეთვე შეზღუდული შესაძლებლობის მქონე პირთა მიერ საშუალო-სპეციალური და უმაღლესი განათლების მიღება ინდივიდუალური გეგმის შესაბამისად⁴⁵¹.

ეს დებულება უნდა ამოქმედდეს 2017 წლის 1 აპრილიდან, თუმცა შეუსაბამო კონვენციასთან და საჭიროებს გადახედვას.

- ამავე დროს, ეს კანონი უშვებს შეზღუდული შესაძლებლობის მქონე პირთა მიერ განათლების მიღებას სპეციალურ სასწავლო დაწესებულებებში⁴⁵².

სპეციალური დაწესებულებების არსებობა უშვებს სეგრეგაციად და ეწინააღმდეგება ინკლუზიის პრინციპს.

⁴⁴⁷ შეზღუდული შესაძლებლობის მქონე პირთა უფლებების კომიტეტის ზოგადი კომენტარი #4, პარა. 40

⁴⁴⁸ მუხ. 33.1 „ზ“

⁴⁴⁹ მუხ. 33.2 „გ“

⁴⁵⁰ <https://matsne.gov.ge/ka/document/view/30316>

⁴⁵¹ მუხ. 17.2: დებულება ამოქმედდება 2017 წლის 1 აპრილიდან

⁴⁵² მუხ. 18.1

- კანონი ადგენს, რომ „თუ შეუძლებელია შეზღუდული შესაძლებლობის მქონე ბავშვების ზოგად ან სპეციალურ ადრეული და სკოლამდელი აღზრდისა და განათლების დაწესებულებებში აღზრდა და სწავლება, მშობლების/კანონიერი წარმომადგენლების სურვილის შესაბამისად, მათი აღზრდა და სწავლება ხდება ოჯახში“⁴⁵³.

ეს დებულებაც უნდა ამოქმედდეს 2017 წლის 1 აპრილიდან, თუმცა ეწინააღმდეგება ინდივიდის ფუნდამენტურ უფლებას ინკლუზიურ განათლებაზე. ესაა ინდივიდუალურად ბავშვის უფლება და არა მისი მშობლის ან მზრუნველის და სახელმწიფომ ყველა სათანადო ზომა უნდა მიიღოს ამ უფლების განსახორციელებლად და დაუშვებელია ამ ვალდებულებისგან თავის არიდება რესურსების სიმწირის გამო.

ადმინისტრაციულ სამართალდარღვევათა კოდექსი⁴⁵⁴ ითვალისწინებს ფინანსურ სანქციებს დასახლებული პუნქტების დაპროექტებისა და განაშენიანების, საცხოვრებელი რაიონების ფორმირების, საპროექტო გადაწყვეტილებების შემუშავების, შენობათა და ნაგებობათა მშენებლობისა და რეკონსტრუქციის დროს შეზღუდული შესაძლებლობის მქონე პირის საჭიროებებისა და მოთხოვნილებების გაუთვალისწინებლობისთვის (500-800 ლარი), ხოლო ჯარიმის გამოწერაზე უფლებამოსილი ორგანო შრომის, ჯანმრთელობის და სოციალურ საკითხთა სამინისტრო. ეს სანქციები მხოლოდ დეკლარაციული ხასიათისაა, რადგან მითითებულია სამინისტრო, თუმცა დადგენილი არაა რომელი კონკრეტული სამსახურია უფლებამოსილი აღასრულოს ეს მექანიზმი.

ადგილობრივი თვითმმართველობის კოდექსი⁴⁵⁵ არ მოიცავს ინკლუზიურობის პრინციპს და მასთან დაკავშირებულ არცერთ ვალდებულებას არ აკისრებს თვითმმართველობის ორგანოებს. მნიშვნელოვანია ეს ჩანაწერი გაკეთდეს როგორც სკოლამდელ განათლებასთან, ასევე, სკოლისგარეშე დაწესებულებებთან მიმართებით (ეს უკანასკნელიც თვითმმართველობის ექსკლუზიურ უფლებამოსილებას წარმოადგენს).

▪ დისციპლინური ღონისძიებების გამოყენება

კანონი „ზოგადი განათლების შესახებ“ მიუთითებს, რომ მოსწავლის მიმართ დისციპლინური ღონისძიებების საკითხზე, სკოლის შინაგანაწესის დარღვევის შემთხვევაში, არასრულწლოვნის მიერ ჩადენილი დისციპლინური გადაცდომის გამოვლენის ან მის მიმართ დისციპლინური სახდელის საკითხის გადაწყვეტისას „მოსწავლეს უფლება აქვს მშობელთან ერთად წარდგეს“⁴⁵⁶.

ეს ნორმა ბავშვს უფლებას აძლევს მშობელთან ერთად წარდგეს, თუმცა არ უთითებს საკითხის განხილვის პროცესში დამოუკიდებლად მონაწილეობის შესახებ. შესაბამისად, მნიშვნელოვანია ამ კანონში მკაფიოდ აისახოს ბავშვის პირდაპირი მონაწილეობის და მისი აზრის მოსმენის შესახებ.

- „ანტისოციალური ქცევის მქონე“ არასრულწლოვანთა გადამისამართება

⁴⁵³ მუხ. 18.3

⁴⁵⁴ მუხ. 178² და 239.45

⁴⁵⁵ <https://matsne.gov.ge/ka/document/view/2244429>

⁴⁵⁶ მუხ. 19.6

კანონი „ზოგადი განათლების შესახებ“ ითვალისწინებს 12 წლის ასაკს მიღწეულ ანტისოციალური ქცევის მქონე არასრულწლოვანთა გადამისამართებას სხვადასხვა კულტურულ-საგანმანათლებლო პროგრამაში ჩართვას ან სხვა ღონისძიებებს გამოყენებას, სხვა სკოლაში გადაყვანას ან სკოლა-პანსიონში გაგზავნას. გადამისამართება ხორციელდება გარკვეული ვადით არასრულწლოვნის ჭეშმარიტი ინტერესებიდან გამომდინარე⁴⁵⁷. სკოლა-პანსიონში გადამისამართების მიზეზი შეიძლება გახდეს 10 წლის ასაკს მიღწეული არასრულწლოვნის ისეთი ქმედება, რომელიც გათვალისწინებულია საქართველოს სისხლის სამართლის კოდექსით და სისხლისსამართლებრივი პასუხისმგებლობისათვის განსაზღვრულ ასაკს მიღწეული პირის მიერ ჩადენის შემთხვევაში დადგებოდა ამ პირის სისხლისსამართლებრივი პასუხისმგებლობის საკითხი⁴⁵⁸.

გადაწყვეტილებას იღებს განათლების სამინისტროსთან არსებული ექსპერტთა ჯგუფი ადმინისტრაციული წარმოების წესით. კანონის თანახმად, სკოლა, მანდატური, არასრულწლოვნის მშობელი/კანონიერი წარმომადგენელი, პროკურორი, უზნის ინსპექტორი, სოციალური მუშაკი უფლებამოსილია ექსპერტთა ჯგუფს წარუდგინოს მიმართვა არასრულწლოვნის მიმართ გადამისამართების ღონისძიების გამოყენების შესახებ. მიმართვაში აღწერილი უნდა იყოს არასრულწლოვნის ქცევა და მას უნდა დაერთოს შესაბამისი ქცევის დამადასტურებელი დოკუმენტები (ასეთის არსებობის შემთხვევაში)⁴⁵⁹.

სკოლა-პანსიონში გაგზავნა გამოიყენება, თუ სხვა ღონისძიება საკმარისი არ იქნება არასრულწლოვნის რესოციალიზაციისთვის. თუ ამის შესახებ არასრულწლოვნის კანონიერი წარმომადგენელი წერილობით თანხმობას არ აცხადებს, ექსპერტთა ჯგუფი შუამდგომლობით მიმართავს სასამართლოს გადაწყვეტილების მისაღებად⁴⁶⁰. ექსპერტთა ჯგუფის გადაწყვეტილება სხვა ღონისძიების გამოყენების, ასევე მშობლების წერილობითი თანხმობით სკოლა-პანსიონში გაგზავნის შესახებ, არ ექვემდებარება გასაჩივრებას⁴⁶¹. გასათვალისწინებელია, რომ სხვა ღონისძიებები მოიცავს სხვადასხვა კულტურულ-საგანმანათლებლო პროგრამაში ჩართვას ან სხვა სკოლაში გადაყვანას⁴⁶². თუმცა ასეთი ღონისძიებების მიწოდების მექანიზმი არ არსებობს ანუ კონკრეტულად არცერთი უწყება არ არის პასუხისმგებელი ამგვარი ღონისძიებების ორგანიზებულად, დადგენილი წესით და სტანდარტით მიწოდებაზე.

განხილული ნორმები მიუთითებს, რომ გადამისამართება ხორციელდება „არასრულწლოვნის ჭეშმარიტი ინტერესებიდან გამომდინარე“, ხოლო ექსპერტთა ჯგუფი „არასრულწლოვანს მოუსმენს მისი ინტერესებიდან გამომდინარე“, თუმცა თუმცა ბუნდოვანს ტოვებს ბავშვის მოსმენის საკითხს და მისთვის ინფორმაციის გასაგებ ენაზე მიწოდების საკითხს. ამავე დროს, კანონი არ მოიცავს გადაწყვეტილებაში საუკეთესო ინტერესების უპირატესი გათვალისწინების დასაბუთების ვალდებულებას.

ბუნდოვანია, აგრეთვე, კანონის დებულება იმის შესახებ, რომ მიმართვის განცხადება უნდა შეიცავდეს ბავშვის „ანტისოციალური ქცევის“ დამადასტურებელ დოკუმენტებს, ასეთის არსებობის შემთხვევაში. შესაბამისად, გაურკვეველია, თუ როგორ უნდა მოხდეს ამგვარი

⁴⁵⁷ მუხ. 487.1

⁴⁵⁸ მუხ. 487.5

⁴⁵⁹ მუხ. 487.6

⁴⁶⁰ მუხ. 487.13

⁴⁶¹ მუხ. 487.15

⁴⁶² მუხ. 487.1

ქვეყნის დოკუმენტირება და იმ ბავშვთა იდენტიფიცირება, რომელთა გადამისამართებაც მნიშვნელოვანია.

მიუხედავად იმისა, რომ კანონი მიუთითებს, პირველ რიგში, კულტურულ-საგანმანათლებლო ღონისძიებების გამოყენებაზე, ასეთი ღონისძიებების მიწოდების მექანიზმი არ არსებობს ანუ კონკრეტულად არცერთი უწყება არ არის პასუხისმგებელი ამგვარი ღონისძიებების ორგანიზებულად, დადგენილი წესით და სტანდარტით მიწოდებაზე.

ამავე დროს, კანონი დამატებით არ ადგენს ადმინისტრაციული ორგანოს მიერ ბავშვის მოსმენის საპროცესო გარანტიებს მისი ასაკისა და განვითარების ღონის შესაბამისი საშუალებებით. ამასთანავე, აღნიშნული ნორმები ზღუდავს ბავშვის უფლებას ადმინისტრაციული ორგანოს გადაწყვეტილების გასაჩივრებაზე. კერძოდ: ა) ბავშვის უფლებას დამოუკიდებლად ან წარმომადგენლის მეშვეობით გაასაჩივროს გადამისამართების ღონისძიების შესახებ (მაგ. სხვა სკოლაში გადაყვანა) ადმინისტრაციული ორგანოს გადაწყვეტილება; ბ) ბავშვის უფლებას დამოუკიდებლად გაასაჩივროს ექსპერტთა ჯგუფის გადაწყვეტილება სკოლა-პანსიონში გაგზავნის შესახებ, თუ არ იზიარებს მშობლის თანხმობას ამ საკითხზე.

ასევე, უნდა აღნიშნოს, ადმინისტრაციული სამართალწარმოების დროს ექსპერტთა ჯგუფის მიერ საკითხი განიხილება თბილისში, ხოლო სასამართლო წესით ამ საკითხის განმხილველი სასამართლოა თბილისის საქალაქო და სააპელაციო სასამართლოები, რაც ქმნის ბარიერს სასამართლოზე ხელმისაწვდომობის თვალსაზრისით თბილისიდან მოშორებით მცხოვრები ბავშვებისთვის.

რეკომენდებულია საკანონმდებლო ცვლილებების შემუშავებისას, მხედველობაში იქნას მიღებული ყველა გამოვლენილი ხარვეზი და შეიქმნას სათანადო სამართლებრივი დაცვის გარანტიები და ბავშვთა მიმართ ადრეული ჩარევის ისეთი მექანიზმები, რომელიც უზრუნველყოფს ბავშვის საუკეთესო ინტერესების უპირატესად გათვალისწინებას და ბავშვის უფლებების დაცვას პრევენციული ღონისძიებების განხორციელებისას.

3.4.4. ბავშვის უფლება ჯანმრთელობის დაცვაზე

ბავშვის უფლებათა კონვენცია მოითხოვს, რომ სახელმწიფომ აღიაროს და უზრუნველყოს ბავშვის უფლება ჯანდაცვის მაღალი სტანდარტით სარგებლობაზე, კერძოდ, მიიღოს სათანადო ზომები, რათა უზრუნველყოს: ბავშვთა სიკვდილიანობის შემცირება; აუცილებელი სამედიცინო დახმარება ყველა ბავშვისთვის; მშობიარობამდე და მშობიარობის შემდგომი სამედიცინო ზრუნვა დედებისთვის; აღმოფხვრას ავადმყოფობის და ცუდი კვება; წვდომა საკვებსა და წყალზე; ხელმისაწვდომობა განათლებაზე ბავშვთა ჯანმრთელობის, ძუძუთი კვების უპირატესობის, ჰიგიენის და სანიტარიის, უბედური შემთხვევების თავიდან აცილების შესახებ; პრევენციული ჯანდაცვის, ოჯახის დაგეგმარების და სერვისების განვითარება.

ბავშვის უფლებათა კომიტეტი აღნიშნავს, რომ ძუძუთი კვების ხელშეწყობა ჩვილთა სიკვდილიანობის შემცირების ერთ-ერთი ღონისძიებაა⁴⁶³, ასევე, მოუწოდებს სახელმწიფოებს ჯანმრთელობის დაცვის სერვისის დანერგვას სკოლებში და სათანადო

⁴⁶³ ზოგადი კომენტარი #15, 2013, პარა. 35 და 44

ლონისძიებების გატარებას ბავშვებს შორის ფსიქო-სოციალური, ემოციური და ფსიქოლოგიური პრობლემების ადრეული გამოვლენისა და მკურნალობისთვის.⁴⁶⁴

ბავშვის უფლებათა კონვენციის თანახმად:

- სახელმწიფომ უნდა უზრუნველყოს ჯანმრთელობის დაცვის რეაბილიტაციის სერვისების ხელმისაწვდომობა შეზღუდული შესაძლებლობის მქონე ბავშვებისთვის⁴⁶⁵;
- სამკურნალო დაწესებულებებში მოთავსებულ ბავშვებს უფლება აქვთ მათი მკურნალობის პერიოდულ გადახედვაზე⁴⁶⁶;
- სახელმწიფომ უნდა მიიღოს ყველა ზომა, მათ შორის საკანონმდებლო, ნარკოტიკების და ფსიქოტროპული ნივთიერებების გამოყენებისგან ბავშვთა დასაცავად⁴⁶⁷;
- უფლებელყოფის, ექსპლუატაციის, ძალადობის, წამების ან სხვა ცუდი მოპყრობის მსხვერპლ ბავშვებს აქვთ უფლება მიიღონ დახმარება ფიზიკური და ფსიქო-სოციალური ინტეგრაციის მიზნით, და აკონკრეტებს, რომ ასეთი დახმარება მათ უნდა მიეწოდოთ ბავშვის ღირსების შესაბამის ჯანსაღ გარემოში⁴⁶⁸.

საქართველოს კანონმდებლობა ჯანმრთელობის სფეროსთან დაკავშირებით შედგება შემდეგი კანონებისგან: კანონი ჯანმრთელობის დაცვის შესახებ⁴⁶⁹, კანონი პაციენტის უფლებების შესახებ⁴⁷⁰, კანონი ფსიქიატრიული ჯანმრთელობის შესახებ⁴⁷¹, საზოგადოებრივი ჯანმრთელობის შესახებ, და სხვა კანონები. ქვემოთ მოცემულია კანონების ანალიზი ჯანმრთელობის უფლების თაობაზე კონვენციით დადგენილ მოთხოვნებთან შესაბამისობის კუთხით.

ბავშვის უფლებათა კონვენციით დადგენილი სტანდარტის თანახმად, სახელმწიფომ თავისი ვალდებულებები უნდა შეასრულოს შემდეგი პროცესის გავლით: დაგეგმვა, განხორციელება, მონიტორინგი და შეფასება⁴⁷². მონიტორინგისთვის მნიშვნელოვანია კარგად სტრუქტურირებული და დისაგრეგირებული ინდიკატორები. საინფორმაციო სისტემის საშუალებით უნდა მოხდეს საიმედო, გამჭვირვალე და სათანადო მონაცემების შეგროვება კონფიდენციალობის დაცვით. მონაცემების ანალიზის შედეგად მიღებულ მიგნებებს უნდა დაეყრდნოს სახელმწიფოს ანგარიშვალდებულების მექანიზმები⁴⁷³.

კომიტეტი მიუთითებს⁴⁷⁴ ეროვნული კანონმდებლობით დასადგენ შემდეგ დამატებით ვალდებულებებზე: ჯანდაცვაზე ბავშვის უფლების შინაარსის განმარტება, პასუხისმგებელ პირთა და უწყებათა კოკრეტული როლი და ფუნქციები; კონკრეტული მითითება, თუ რომელი სერვისებით შეუძლიათ ისარგებლონ ბავშვებმა, დედებმა და ორსულმა ქალებმა; სერვისებისა და მედიკამენტების ხარისხის რეგულირება.

⁴⁶⁴ იგივე, პარა. 36 და 38

⁴⁶⁵ მუხ. 23

⁴⁶⁶ მუხ. 25

⁴⁶⁷ მუხ. 33

⁴⁶⁸ მუხ. 39

⁴⁶⁹ <https://matsne.gov.ge/ka/document/view/29980>

⁴⁷⁰ <https://matsne.gov.ge/ka/document/view/16978>

⁴⁷¹ <https://matsne.gov.ge/ka/document/view/24178>

⁴⁷² ზოგადი კომენტარი 15, პარა. 108.2

⁴⁷³ იგივე, პარა. 108.3

⁴⁷⁴ პარ. 95

პირველადი ჯანდაცვა

კონვენცია მოითხოვს⁴⁷⁵, სახელმწიფომ მიიღოს, მათ შორის, საკანონმდებლო ზომები ბავშვის ჯანმრთელობის უფლების დისკრიმინაციის გარეშე განხორციელებისთვის. ეროვნულმა კანონმა უნდა დაადგინოს ბავშვის უფლება ჯანდაცვაზე შესაბამისი სერვისების, პროგრამების, ადამიანური რესურსის და ინფრასტრუქტურის საშუალებით. კანონმა უნდა დაადგინოს ბავშვზე მორგებული, მაღალი ხარისხის ჯანდაცვის სერვისები ორსული ქალებისა და ბავშვებისთვის მათი გადახდისუნარიანობის შემოწმების გარეშე. კანონები უნდა გადაიხედოს დისკრიმინაციული ჩანაწერების გასაუქმებლად. **კომიტეტი მოუწოდებს⁴⁷⁶** სახელმწიფოებს, ჯანდაცვის სექტორში მონაწილე სახელმწიფო უწყებების დიდი რაოდენობის გათვალისწინებით, კანონმდებლობით კონკრეტულად განსაზღვრონ მათი როლი და პასუხისმგებლობები.

საქართველოს კანონი საზოგადოებრივი ჯანმრთელობის შესახებ⁴⁷⁷ მიზნად ისახავს მოსახლეობის ჯანმრთელობის და ცხოვრების ჯანსაღი წესის დამკვირვების ხელშეწყობას; რეპროდუქციული ჯანმრთელობის ხელშეწყობა; დაავადებების გავრცელების თავიდან აცილება⁴⁷⁸. კანონი ავალდებულებს სამედიცინო მომსახურების მიმწოდებლებს მიაწოდონ ინფორმაცია საქართველოში მცხოვრებ ყველა პირს პროფილაქტიკური აცრის არსის, აუცილებლობის, მოსალოდნელი კლინიკური გამოსავლის, აცრასთან დაკავშირებული რისკის და უარის თქმის შესაძლო შედეგების შესახებ. არასრულწლოვნების შემთხვევაში ეს ინფორმაცია უნდა მიეწოდოს მის კანონიერ წარმომადგენელს⁴⁷⁹.

კანონი ჯანმრთელობის დაცვის შესახებ აწესრიგებს ურთიერთობებს სახელმწიფო ხელისუფლების ორგანოებს და ფიზიკურ და იურიდიულ პირებს შორის მოქალაქეთა ჯანმრთელობის დაცვის სფეროში⁴⁸⁰.

კანონის თანახმად⁴⁸¹, **პირველადი ჯანდაცვა** არის ჯანმრთელობის დაცვის სისტემასთან ცალკეული პირისა და ოჯახის პირველი შეხება; უწყვეტი, ყოვლისმომცველი და კოორდინირებული, უპირველესად საოჯახო მედიცინის სისტემაზე დაფუძნებული, საზოგადოების თითოეული წევრისათვის ხელმისაწვდომი სამედიცინო მომსახურება, რომელიც მოიცავს ჯანმრთელობის ხელშეწყობის, დაავადებების პრევენციის, ფართოდ გავრცელებული დაავადებების სამკურნალო და სარეაბილიტაციო ღონისძიებებს, მათ შორის, დედათა და ბავშვთა ჯანმრთელობაზე ზრუნვას, ოჯახის დაგეგმვას, პალიატიურ მზრუნველობას, აუცილებელი მედიკამენტებით ხელმისაწვდომობის უზრუნველყოფას.

პირველადი ჯანდაცვის სფეროში, ეს კანონი ადგენს⁴⁸², რომ:

⁴⁷⁵ იგივე, პარა. 94

⁴⁷⁶ პარა. 97

⁴⁷⁷ <https://matsne.gov.ge/ka/document/view/21784>

⁴⁷⁸ მუხ. 1

⁴⁷⁹ მუხ. 8.1

⁴⁸⁰ მუხ. 1

⁴⁸¹ მუხ. 3 „ტ“

⁴⁸² თავი XIII

- საზოგადოებრივი ჯანმრთელობის დაცვის სახელმწიფო ვალდებულებები აისახება შესაბამის სახელმწიფო და ადგილობრივ პროგრამებში⁴⁸³;
- საზოგადოებრივი ჯანმრთელობის დაცვის ღონისძიებათა განხორციელებისათვის იქმნება ქალაქებისა და რაიონების საზოგადოებრივი ჯანმრთელობის დაცვის სამსახურები, რომელთა მეთოდურ ხელმძღვანელობას ახორციელებს შრომის, ჯანმრთელობისა და სოციალური დაცვის სამინისტრო⁴⁸⁴;

მოქალაქესა და საქართველოში სტატუსის მქონე მოქალაქეობის არმქონე პირს უფლება აქვთ:

- დისკრიმინაციის გარეშე ისარგებლონ დადგენილი წესით დამტკიცებული ჯანმრთელობის დაცვის სახელმწიფო პროგრამებით გათვალისწინებული სამედიცინო დახმარებით. დაუშვებელია პენიტენციურ დაწესებულებაში მოთავსებული პაციენტის დისკრიმინაცია სამედიცინო დახმარების გაწევისას;⁴⁸⁵
- საქართველოს ყველა მოქალაქეს უფლება აქვს მისთვის გასაგები ფორმით მიიღოს ამომწურავი და ობიექტური ინფორმაცია, აგრეთვე, მოიძიოს მეორე აზრი საკუთარი ჯანმრთელობის მდგომარეობის შესახებ⁴⁸⁶.

უსაფრთხო დედობის და ბავშვთა ჯანმრთელობის დაცვის თაობაზე, კანონი ადგენს⁴⁸⁷ :

- სახელმწიფო უზრუნველყოფს უსაფრთხო დედობას, საწარმოებსა და დაწესებულებებში ბავშვთა მოვლისათვის საჭირო პირობების შექმნის და დაფინანსების საკანონმდებლო უზრუნველყოფას, დედათა და ბავშვთა უფლებების დაცვის აუცილებლობის შესახებ საზოგადოებრივი აზრის ჩამოყალიბებას⁴⁸⁸;
- სახელმწიფო უზრუნველყოფს სამედიცინო დახმარებას ობოლი და მშობლების ზრუნვას მოკლებული, ფიზიკური და ფსიქიკური დეფექტების მქონე ბავშვებისათვის განკუთვნილ დაწესებულებებში⁴⁸⁹ (ტერმინი „დეფექტების მქონე“ უნდა შეიცვალოს ტერმინით „ფსიქო-სოციალური საჭიროების მქონე“);
- სახელმწიფო ხელს უწყობს ახალშობილების, ჩვილი და სხვა ასაკის ბავშვების უსაფრთხო და ადეკვატური საკვებით უზრუნველყოფას, ბუნებრივი კვების მხარდაჭერას და ქალის რძის შემცვლელების მარკეტინგის საერთაშორისო კოდექსის დაცვას⁴⁹⁰.

კანონი პაციენტის უფლებების შესახებ ამ კანონის მიზანია მოქალაქის უფლებების დაცვა ჯანმრთელობის დაცვის სფეროში, აგრეთვე მისი პატივისა და ღირსების ხელშეუხებლობის უზრუნველყოფა⁴⁹¹. ამ კანონით აღიარებულია, რომ თითოეულ მოქალაქეს აქვს უფლება მიიღოს ქვეყანაში აღიარებული და დანერგილი სტანდარტების შესაბამისი სამედიცინო მომსახურება⁴⁹² დისკრიმინაციის გარეშე⁴⁹³. ეს კანონი, ასევე, აღიარებს, უცხო ქვეყნის მოქალაქეთა ან მოქალაქეობის არმქონე პირთა უფლებას

⁴⁸³ მუხ. 85¹

⁴⁸⁴ მუხ. 85²

⁴⁸⁵ მუხ. 5, 6

⁴⁸⁶ მუხ. 7

⁴⁸⁷ თავი XXII

⁴⁸⁸ მუხ. 132 (1)

⁴⁸⁹ მუხ. 135

⁴⁹⁰ მუხ. 133.2

⁴⁹¹ მუხ. 1

⁴⁹² მუხ. 5

⁴⁹³ მუხ. 6

ჯანდაცვაზე საქართველოს ტერიტორიაზე ყოფნისას, საერთაშორისო ხელშეკრულებების თანახმად⁴⁹⁴.

პაციენტს შეუძლია მიმართოს სასამართლოს და მოითხოვოს⁴⁹⁵: კომპენსაცია მიყენებული ზიანისთვის; სამედიცინო პერსონალის საქმიანობის ლიცენზიის შეჩერება ან გაუქმება; სახელმწიფო სამედიცინო და სანიტარული სტანდარტების შეცვლა.

კანონის თანახმად, არასრულწლოვნის ხელმისაწვდომობა სამედიცინო მომსახურებაზე ხროციელდება სამედიცინო პროგრამების საშუალებით⁴⁹⁶; არასრულწლოვან პაციენტს უფლება აქვს მიიღოს ინფორმაცია საკუთარი ჯანმრთელობის მდგომარეობის და მკურნალობის შესახებ⁴⁹⁷; მელოგინე ქალს უფლება აქვს გვერდით ყავდეს ახალშობილი და კვებოს საკუთარი შეხედულებებისამებრ⁴⁹⁸.

განხილული კანონმდებლობის ნორმები პირველად ჯანდაცვაზე ხელმისაწვდომობის შესახებ ძირითადად ზოგადი ხასიათისაა და არ მოიცავს მკაფიო, კონკრეტულ დებულებებს. განხილული კანონმდებლობის ძირითადი შეუსაბამოებები კონვენციასთან მიმართებაში, შემდეგია:

- კანონი არ მოიცავს პირდაპირ და მკაფიო ჩანაწერს ბავშვის და ორსული ქალის უფლებაზე პირველადი ჯანდაცვის სერვისების უზრუნველყოფის შესახებ შესაბამისი სერვისების, პროგრამების, ხარისხის კრიტერიუმების მითითებით კონვენციის თანახმად, სახელმწიფოს ვალდებულებები ამ სფეროში უნდა აისახოს კანონმდებლობით და საკმარისი არაა პროგრამებზე მითითება;
- კანონი არ მოიცავს პირდაპირ და მკაფიო ჩანაწერს მშობლის მზრუნველობას მოკლებული და ალტერნატიულ ზრუნვაში განთავსებული ბავშვების ჯანმრთელობის უფლების უზრუნველყოფის შესახებ, კერძოდ, თუ რა იგულისხმება სამედიცინო დახმარებაში (მხოლოდ გადაუდებელი თუ უწყვეტი) და კონკრეტულად რომელი უწყებაა პასუხისმგებელი;
- კანონი არ მოიცავს ჩანაწერს სახელმწიფომ უზრუნველყოს ექსპლუატაციის, ძალადობის, წამების ან სხვა ცუდი მოპყრობის მსხვერპლ ბავშვებთან უფლება სათანადო სამედიცინო და ფსიქო-სოციალური რეაბილიტაციის სერვისებზე;
- კანონი არ ადგენს სახელმწიფოს ვალდებულებას დანერგოს ჯანმრთელობის დაცვის სერვისის სკოლებში ბავშვებში ფსიქო-სოციალური, ემოციური და ფსიქოლოგიური პრობლემების ადრეული გამოვლენისა და მკურნალობისთვის.

მშობიარობამდე და მშობიარობის შემდგომი ჯანდაცვა და ბავშვთა სიკვდილიანობა

კომიტეტი მოუწოდებს⁴⁹⁹ სახელმწიფო აღიაროს და უზრუნველყოს მშობიარობამდე და მშობიარობის შემდგომი სამედიცინო ზრუნვა დედებისთვის; სოციალური დაცვის სისტემის მიერ გაითვალისწინების, საყოველთაო დაფარვის ან ფინანსური დახმარების საშუალებით, წვდომა ზრუნვაზე, ანაზღაურებად დეკრეტზე და სხვა სოციალურ შეღავათებზე. კანონმდებლობამ უნდა აკრძალოს დედის რძის შემცვლელი პროდუქტების არასათანადო მარკეტინგი და რეკლამირება.

⁴⁹⁴ მუხ. 9
⁴⁹⁵ მუხ. 10
⁴⁹⁶ მუხ. 39
⁴⁹⁷ მუხ. 43
⁴⁹⁸ მუხ. 38
⁴⁹⁹ ზოგადი კომენტარი 15. პარა. 55

▪ **ორსულ და მეძუძურ ქალთა სამედიცინო დახმარება**

კანონი პაციენტის უფლებების შესახებ ადგენს:

- ორსულს და მეძუძურ დედას უფლება აქვთ სამედიცინო მომსახურების გამწევისაგან მიიღონ სრული, ობიექტური, დროული და გასაგები ინფორმაცია ორსულობის, მშობიარობის ან ლოგინობის პერიოდში დაგეგმილი ნებისმიერი სამედიცინო ჩარევის შემთხვევაში ნაყოფზე ან ახალშობილზე შესაძლო პირდაპირი ან ირიბი მავნე ზემოქმედების შესახებ⁵⁰⁰;
- მშობიარეს უფლება აქვს მიიღოს გადაწყვეტილება მისთვის და ნაყოფისთვის სამედიცინო მომსახურების გაწევის შესახებ⁵⁰¹;
- მელოგინე ქალს უფლება აქვს გვერდით იყოლიოს ახალშობილი, თუ სამედიცინო მომსახურების გამწევი, ბავშვის ჯანმრთელობის მდგომარეობასთან დაკავშირებით მის სხვაგან გადაყვანას არ გადაწყვეტს, აგრეთვე საკუთარი შეხედულებისამებრ კვებოს ახალშობილი⁵⁰².

კანონი ჯანმრთელობის დაცვის შესახებ ადგენს:

- სახელმწიფო ხელს უწყობს უსაფრთხო დედობას, საწარმოებსა და დაწესებულებებში ბავშვთა მოვლისათვის საჭირო პირობების შექმნის და დაფინანსების საკანონმდებლო უზრუნველყოფას, დედათა და ბავშვთა უფლებების დაცვის აუცილებლობის შესახებ საზოგადოებრივი აზრის ჩამოყალიბებას⁵⁰³;
- ორსული ქალის სამედიცინო მეთვალყურეობა, მშობიარობისა და მშობიარობის შემდგომი სამედიცინო დახმარება უზრუნველყოფილია საქართველოს კანონმდებლობის შესაბამისად⁵⁰⁴.

განხილული კანონები ორსულ და მეძუძურ ქალთა უფლებების კუთხით აღიარებს მხოლოდ უფლებას ინფორმაციაზე, სამედიცინო მომსახურების შესახებ გადაწყვეტილების მიღებაზე და ახალშობილის კვებაზე. რაც შეეხება მშობიარობამდე და მშობიარობის შემდგომ სამედიცინო დახმარებას, კანონი ადგენს, რომ ეს „უზრუნველყოფილია საქართველოს კანონმდებლობის შესაბამისად“, თუმცა არ მიუთითებს რომელიმე კანონზე. აქედან გამომდინარე, მნიშვნელოვანია გადაიხედოს განხილული კანონები კონვენციის მოთხოვნებთან შესაბამისობაში მოყვანის მიზნით.

შრომითი უფლებები და დაცვის გარანტიები

კანონი ჯანმრთელობის დაცვის შესახებ ადგენს:

- საქართველოს შრომის, ჯანმრთელობისა და სოციალური დაცვის სამინისტრო განსაზღვრავს შრომითი საქმიანობის იმ სახეების ჩამონათვალს, რომლითაც არ შეიძლება იყოს დაკავებული ორსული ქალი და მეძუძური დედა, აგრეთვე შრომითი საქმიანობის შეწყვეტის ვადებს მშობიარობამდე და მშობიარობის შემდეგ⁵⁰⁵.

შრომის კოდექსი⁵⁰⁶ ადგენს:

⁵⁰⁰ მუხ. 35

⁵⁰¹ მუხ. 36.1

⁵⁰² მუხ. 38

⁵⁰³ მუხ.132

⁵⁰⁴ მუხ. 132

⁵⁰⁵ მუხ. 131.1

⁵⁰⁶ <https://matsne.gov.ge/ka/document/view/1155567>

- აკრძალულია ორსული ან ახალნამშობიარები ქალის, შეზღუდული შესაძლებლობის მქონე პირის, არასრულწლოვნის ზეგანაკვეთურ სამუშაოზე დასაქმება მისი თანხმობის გარეშე⁵⁰⁷;
- აკრძალულია ღამის სამუშაოზე (22 საათიდან 6 საათამდე) არასრულწლოვნის, ორსული, ახალნამშობიარები ან მეძუძური ქალის დასაქმება, ხოლო 3 წლამდე ასაკის ბავშვის მომვლელის ან შეზღუდული შესაძლებლობის მქონე პირის დასაქმება – მისი თანხმობის გარეშე⁵⁰⁸;
- ორსულობის, მშობიარობისა და ბავშვის მოვლის გამო შვებულებიდან ანაზღაურებადია 183 კალენდარული დღე, ხოლო მშობიარობის გართულების ან ტყუპის შობის შემთხვევაში – 200 კალენდარული დღე⁵⁰⁹;
- ორსულობის, მშობიარობისა და ბავშვის მოვლის გამო შვებულება და ახალშობილის შვილად აყვანის გამო შვებულება ანაზღაურდება საქართველოს სახელმწიფო ბიუჯეტიდან. ორსულობის, მშობიარობისა და ბავშვის მოვლის გამო ანაზღაურებადი შვებულების, აგრეთვე ახალშობილის შვილად აყვანის გამო ანაზღაურებადი შვებულების პერიოდზე გასაცემი ფულადი დახმარების ოდენობაა არაუმეტეს 1000 ლარისა⁵¹⁰;
- აკრძალულია არასრულწლოვანთან, ასევე ორსულ ან მეძუძურ ქალთან შრომითი ხელშეკრულების დადება მძიმე, მავნე და საშიშპირობებიანი სამუშაოების შესასრულებლად⁵¹¹;
- დამსაქმებელს არა აქვს უფლება სამსახურიდან გაათავისუფლოს ორსული ქალი შვებულების პერიოდში ორსულობის, მშობიარობისა და ბავშვის მოვლის გამო, გარდა იმ შემთხვევისა, როდესაც: შრომის ხელშეკრულების ვადის გასვლა; ხელშეკრულებით დაკისრებული სამუშაოს შესრულება, მხარეთა შეთანხმება; დასაქმებულის მიერ ინდივიდუალური ან კოლექტიური ხელშეკრულებით ან/და შინაგანაწესით დაკისრებული ვალდებულების უხეში დარღვევა; დისციპლინური დარღვევის განმეორებით ჩადენა ბოლო 1 წლის პერიოდში; სასამართლო გადაწყვეტილება, დამსაქმებელი ფიზიკური პირის გადაცვალება⁵¹².

განხილული კანონები გვთავაზობს ორსულ და მეძუძურ ქალთა შრომითი უფლებების დაცვის გარკვეულ გარანტიებს, როგორცაა: აკრძალვა ზეგანაკვეთურ სამუშაოზე დასაქმება თანხმობის გარეშე; ღამის საათებში, მძიმე, მავნე და საშიშპირობებიანი სამუშაოზე დასაქმების აკრძალვა; ანაზღაურებადი დეკრეტული შვებულება 183 დღით; ერთჯერადად 1000 ლარის დახმარება.

კანონი, ასევე, კრძალავს სამსახურიდან განთავისუფლებას ორსულობის, მშობიარობის და ბავშვის მოვლის გამო შვებულების პერიოდში, თუმცა უშვებს გამონაკლისებს, როდესაც ეს აკრძალვა არ მოქმედებს. ეს გამონაკლისები მოიცავს დეკრეტული შვებულების პერიოდში ისეთი მიზეზებით სამსახურიდან გათავისუფლების დაშვებას, როგორცაა: ხელშეკრულებით ან/და შინაგანაწესით დაკისრებული ვალდებულების უხეში დარღვევა, შრომის ხელშეკრულების ვადის გასვლა და ხელშეკრულებით გათვალისწინებული სამუშაოს შესრულება. აღნიშნული გამონაკლისები ძალიან ფართო სივრცეს ტოვებს ორსული და მეძუძური ქალების შრომითი უფლებების დარღვევისთვის, მით უფრო იმ

⁵⁰⁷ მუხ. 17.2

⁵⁰⁸ მუხ.18

⁵⁰⁹ მუხ. 27.2

⁵¹⁰ მუხ. 29

⁵¹¹ მუხ.4.5

⁵¹² მუხ. 37. 2 „გ“

პირობებში, როდესაც კანონმდებლობით გათვალისწინებული არ არის ბავშვთა და ორსულ ან მეძუძურ ქალთა შრომითი უფლებების დაცვის და უსაფრთხო შრომის პირობების მონიტორინგის მექანიზმი.

ასევე ბუნდოვანია მითითება უსაფრთხო დედობის და შრომის ადგილებში ბავშვთა მოვლისთვის საჭირო პირობების შექმნის საკანონმდებლო უზრუნველყოფის შესახებ, რადგან არც აქ კეთდება მითითება რაიმე კონკრეტულ საკანონმდებლო აქტზე.

ოჯახის დაგეგმვა და რეპროდუქციული ჯანმრთელობა

საქართველოს კანონი საზოგადოებრივი ჯანმრთელობის შესახებ⁵¹³ მიზნად ისახავს მოსახლეობის ჯანმრთელობის და ცხოვრების ჯანსაღი წესის დამკვირვების ხელშეწყობას; რეპროდუქციული ჯანმრთელობის ხელშეწყობას; დაავადებების გავრცელების თავიდან აცილებას⁵¹⁴.

კანონი ადგენს, რომ შრომის, ჯანმრთელობის და სოციალურ საკითხთა სამინისტრო განსაზღვრავს დედათა, ბავშვთა და მოზარდთა ჯანმრთელობის პოლიტიკას, რეპროდუქციული ჯანმრთელობის პოლიტიკას და სხვა სამინისტროებთან ერთად უზრუნველყოფს ბავშვთა ოპტიმალური განვითარებისთვის ხელისშემწყობ გარემოს⁵¹⁵.

კანონმდებლობა არ მოიცავს სხვა რაიმე კონკრეტულ ღონისძიებებს ოჯახის დაგეგმვისა და რეპროდუქციული ჯანმრთელობის ხელშეწყობის შესახებ. მითითებულია ჯანმრთელობის და სოციალური საკითხთა სამინისტროს როლი პოლიტიკის შემუშავებისთვის, თუმცა დადგენილი არ არის კონკრეტული უწყება და მიმართულებები ამ კუთხით. მნიშვნელოვანია კანონმდებლობამ მოაწესრიგოს ეს საკითხი.

შეზღუდული შესაძლებლობის მქონე ბავშვთა წვდომა ჯანდაცვაზე

შეზღუდული შესაძლებლობის მქონე ბავშვები

შეზღუდული შესაძლებლობის მქონე პირთა კონვენციის 26-ე მუხლის თანახმად, სახელმწიფოებმა უნდა უზრუნველყონ ყოვლისმომცველი სააბილიტაციო და სარეაბილიტაციო მომსახურების და პროგრამების ორგანიზება, განმტკიცება და გაფართოება, მათ შორის, ჯანდაცვის სერვისები. ეს პროგრამები უნდა დაიწყოს რაც შეიძლება ადრეულ ეტაპზე და უნდა ეფუძნებოდეს ინდივიდუალური საჭიროებებისა და ძლიერი მხარეების მულტიდისციპლინარულ შეფასებას.

ბავშვის უფლებათა კომიტეტის თანახმად⁵¹⁶, ჯანდაცვის პოლიტიკა უნდა იყოს ყოვლისმომცველი და უზრუნველყოფდეს შეზღუდული შესაძლებლობის ადრეულ გამოვლენას, ადრეულ ინტერვენციას, მათ შორის ფსიქოლოგიურ და ფიზიკურ მკურნალობას, რეაბილიტაციას, ფიზიკური დამხმარე საშუალებების, მაგალითად კიდურის პროთეზის, მობილობის მოწყობილობების, სმენის და მხედველობის აპარატების მიწოდების ჩათვლით. მომსახურება უნდა მიეწოდებოდეს, როგორც თემში, ასევე სახლში და ადვილად ხელმისაწვდომი უნდა იყოს. გარდა ამისა, კავშირები უნდა დამყარდეს ადრეული ინტერვენციის სამსახურებს, სკოლამდელ

⁵¹³ <https://matsne.gov.ge/ka/document/view/21784>

⁵¹⁴ მუხ. 1

⁵¹⁵ მუხ. 28

⁵¹⁶ ბავშვთა უფლებების კომიტეტი, ზოგადი კომენტარი 9 შეზღუდული შესაძლებლობების მქონე ბავშვებთან მიმართებაში, 27.02.2007

დაწესებულებებსა და სკოლებს შორის, რათა ხელი შეეწყოს ბავშვის შეუფერხებელ განვითარებას.

კანონი „სამედიცინო-სოციალური ექსპერტიზის შესახებ“⁵¹⁷ განმარტავს, რომ შეზღუდული შესაძლებლობის მქონე პირი არის პირი მყარი ფიზიკური, ფსიქიკური, ინტელექტუალური ან სენსორული დარღვევებით, რომელთა სხვადასხვა დაბრკოლებასთან ურთიერთქმედებამ შესაძლოა ხელი შეუშალოს საზოგადოებრივ ცხოვრებაში ამ პირის სრულ და ეფექტიან მონაწილეობას სხვებთან თანაბარ პირობებში⁵¹⁸. კანონი ადგენს, რომ 18 წლის ასაკის მიღწევამდე შეზღუდული შესაძლებლობის მქონე პირს უდგინდება კატეგორია – „შეზღუდული შესაძლებლობის სტატუსის მქონე ბავშვი“ შესაბამისი წესით⁵¹⁹.

ეს კანონი ადგენს, რომ სამედიცინო-სოციალური ექსპერტიზა არის დისციპლინათაშორისი საქმიანობის სფერო და მოიცავს სამედიცინო-ბიოლოგიურ, სოციოლოგიურ, სოციალურ, ფსიქოლოგიურ, ეკონომიკურ და სხვა ასპექტებს. მისი ძირითადი ამოცანაა ადამიანის ქმედობაუნარიანობის შეზღუდვის ხარისხის განსაზღვრა და აქედან გამომდინარე შესაძლებლობის შეზღუდვის გამომწვევი მიზეზის, გადამოწმების ვადისა და მომდინარეობის დროის დადგენა, აგრეთვე საქართველოს კანონმდებლობით დადგენილი შეზღუდული შესაძლებლობის მქონე პირთა სოციალური დაცვის სხვადასხვა სახის განსაზღვრა⁵²⁰.

კანონი ფსიქოსოციალური საჭიროებიდან გამომდინარე ექსპერტიზის ჩატარების შესახებ⁵²¹ ადგენს, რომ ფსიქოსოციალური საჭიროებიდან გამომდინარე ექსპერტიზა არის დისციპლინათაშორისი საქმიანობა, რომელიც მოიცავს სამედიცინო-ფსიქიატრიული, ფუნქციური, ფსიქოლოგიური, სოციალური ადაპტაციის და სხვა ასპექტების შეფასებას. მისი ძირითადი ამოცანაა პირის გონებრივი/ინტელექტუალური დარღვევის ხარისხის დადგენა, მისი სოციალური ადაპტაციის შეფასება და, აქედან გამომდინარე, პირის მხარდაჭერის თავისებურებების განსაზღვრა⁵²².

სამოქალაქო კოდექსი განმარტავს, რომ ქმედუნარიანად ითვლება 18 წელს მიღწეული ფსიქოსოციალური საჭიროების მქონე პირი (იგივე მხარდაჭერის მიმღები) ანუ პირი, რომელსაც აქვს მყარი ფსიქიკური, გონებრივი/ინტელექტუალური დარღვევები, რომელთა სხვადასხვა დაბრკოლებასთან ურთიერთქმედებამ შესაძლოა ხელი შეუშალოს საზოგადოებრივ ცხოვრებაში მის სრულ და ეფექტიან მონაწილეობას სხვებთან თანაბარ პირობებში, ამასთანავე, აღნიშნული დაბრკოლებები სათანადო რჩევისა და დახმარების გარეშე მნიშვნელოვნად ართულებს პირის მიერ საკუთარი ნების თავისუფლად გამოხატვას და ინფორმირებული და გააზრებული არჩევანის გაკეთებას სასამართლოს მიერ განსაზღვრულ სფეროში⁵²³.

⁵¹⁷ კანონი სამედიცინო-სოციალური ექსპერტიზის შესახებ, მიღებულია 07/12/2001, ბოლო ცვლილება 13.03.2014 <https://matsne.gov.ge/ka/document/view/15772>

⁵¹⁸ მუხ. 3 „ბ“

⁵¹⁹ მუხ. 10

⁵²⁰ მუხ. 4

⁵²¹ კანონი ფსიქოსოციალური საჭიროებიდან გამომდინარე ექსპერტიზის ჩატარების შესახებ, მიღებულია 20/03/2015, <https://matsne.gov.ge/ka/document/view/2788241>

⁵²² მუხ.4

⁵²³ მუხ. 12.4

კოდექსის თანახმად, მხარდაჭერის მიმღებად სასამართლომ შეიძლება ცნოს აგრეთვე არასრულწლოვანი იმ ფარგლებში, რომლებშიც, საქართველოს კანონმდებლობის თანახმად, მას თავისი უფლება-მოვალეობების განხორციელებისას კანონიერი წარმომადგენლის თანხმობა არ სჭირდება⁵²⁴ (მონაწილეობის უფლება, ჯანმრთელობის საკითხებზე მშობლის ინფორმირების გარეშე კონსულტაციისა და სამედიცინო მომსახურების მიღება, ინკლუზიური განათლების უფლება, უფლებების დასაცავად სამართლებრივი დაცვის საშუალებებით სარგებლობა, ა.შ).

კანონი შეზღუდული შესაძლებლობის მქონე პირთა უფლებების დაცვის შესახებ ადგენს, რომ სახელმწიფო უზრუნველყოფს შეზღუდული შესაძლებლობის მქონე პირთა სოციალურ დაცვას და უქმნის მათ საჭირო პირობებს ინდივიდუალური განვითარების, შემოქმედებითი და საწარმოო შესაძლებლობების რეალიზაციისათვის. სახელმწიფო ამ კატეგორიის ბავშვებს უწესებს უფლებებისა და კანონიერი ინტერესების რეალიზაციის დამატებით გარანტიებს⁵²⁵.

კანონები ჯანმრთელობის დაცვის შესახებ, პაციენტის უფლებების შესახებ, საზოგადოებრივი ჯანმრთელობის შესახებ არ ითვალისწინებს რაიმე დებულებას შეზღუდული შესაძლებლობის მქონე ბავშვთა ჯანმრთელობის უფლების და განსაკუთრებული საჭიროებების შესაბამისი სერვისების შესახებ (ჯანდაცვის სპეციალური ღონისძიებები, ადრეული იდენტიფიკაცია, აბილიტაცია, რეაბილიტაცია).

როგორც ვხედავთ, მითითებული კანონების თანახმად, ბავშვის შეფასებისას უნდა იქნეს გათვალისწინებული არა მხოლოდ სამედიცინო დიაგნოზი, არამედ ფსიქო-სოციალური ფაქტორები, რაც ძირითადად შესაბამისობაშია საერთაშორისო სტანდარტებთან. მიუხედავად ამისა, კანონები ძირითადად ატარებს დეკლარაციულ ხასიათს და არ მოიცავს კონკრეტულ ღონისძიებებს ბავშვის მულტიდისციპლინური შეფასების და მისთვის ინდივიდუალურ საჭიროებებზე მორგებული მხარდაჭერის ფორმების შერჩევის მიზნით.

ჯანდაცვის სისტემა მუშაობს შეზღუდული შესაძლებლობების მქონე ბავშვთა ოჯახების მიერ წარმოდგენილ ინდივიდუალურ განაცხადზე რეაგირების რეჟიმში და გამოყოფს ფინანსურ ან სხვა სახის დახმარებას შეზღუდული სახელმწიფო რესურსების ფარგლებში. სისტემა არ ითვალისწინებს საიდენტიფიკაციო და ადრეული ინტერვენციის ზომებს, რომ ადრეულ ასაკში დაეხმაროს შეზღუდული შესაძლებლობების მქონე ბავშვებს და მათ ოჯახებს გაუმკლავდნენ სტრესს და უზრუნველყონ მათი შვილების სათანადო, ინფორმირებული მოვლა⁵²⁶.

როგორც ანალიზიდან ჩანს, კანონმდებლობა არ ითვალისწინებს შეზღუდული შესაძლებლობის ადრეულ გამოვლენას, ადრეულ ინტერვენციას, მათ შორის ფსიქოლოგიურ და ფიზიკურ მკურნალობას, რეაბილიტაციას, ასევე, მომსახურებაზე ხელმისაწვდომობას თემში, სახლში და კოორდინირებულ თანამშრომლობას ადრეული ინტერვენციის სამსახურებს, სკოლამდელ დაწესებულებებსა და სკოლებს შორის.

შესაბამისად, რეკომენდებულია განხილული კანონების გადასინჯვა მოხდეს ამ ხარვეზების აღმოფხვრის და საერთაშორისო სტანდარტებთან შესაბამისობაში მოყვანის მიზნით.

კვება

⁵²⁴ მუხ. 12.5

⁵²⁵ მუხ. 3

⁵²⁶ შეზღუდული შესაძლებლობის მქონე ბავშვები საქართველოში, გაეროს ბავშვთა ფონდი, 2015 http://unicef.ge/uploads/UNICEF_CRPD_GEO_edit.pdf

ბავშვის უფლებათა კონვენციის 24-ე მუხლის თანახმად, თანახმად, სახელმწიფომ უნდა უზრუნველყოს საზოგადოების ყველა სეგმენტის, განსაკუთრებით, მშობლებისა და ბავშვების, მხარდაჭერა, რათა მათ მიიღონ შესაბამისი ცოდნა ბავშვის ჯანმრთელობის, ჯანსაღი კვების და ძუძუთი კვების უპირატესობის შესახებ.

ბავშვის უფლებათა კომიტეტი აღნიშნავს, რომ ძუძუთი კვების ხელშეწყობა ჩვილთა სიკვდილიანობის შემცირების ერთ-ერთი ღონისძიებაა⁵²⁷.

კვლევები⁵²⁸ ცხადყოფს, რომ ბავშვებში, რომლებიც იკვებებიან დედის რძით, ნაკლებია ინფექციური დაავადებები, სიკვდილიანობა, სტომატოლოგიური პრობლემები და ხასიათდებიან უფრო მაღალი ინტელექტით იმ ბავშვებთან შედარებით, რომლებიც მცირე ხნით ან საერთოდ არ იკვებებოდნენ დედის რძით. მშობლებსა და სხვა მზრუნველებს, ყოველგვარი კომერციული გავლენების გარეშე, უნდა მიუწვდებოდეთ ხელი ობიექტურ, სრულყოფილ და თანმიმდევრულ ინფორმაციაზე ბავშვთა ჯანსაღი კვების შესახებ⁵²⁹.

საქართველოს კანონი საზოგადოებრივი ჯანმრთელობის შესახებ⁵³⁰ მიზნად ისახავს მოსახლეობის ჯანმრთელობის და ცხოვრების ჯანსაღი წესის დამკვირვების ხელშეწყობას; რეპროდუქციული ჯანმრთელობის ხელშეწყობას; დაავადებების გავრცელების თავიდან აცილებას⁵³¹. კანონი მიუთითებს, რომ სამინისტრო ადგენს ბავშვთა (მათ შორის, ჩვილ ბავშვთა), ფორტიფიცირებული და სპეციალური მოხმარების (დიეტური, დიაბეტური) საკვები პროდუქტების უსაფრთხოების ნორმებს⁵³².

საქართველოს კანონი „ბავშვთა ბუნებრივი კვების დაცვისა და ხელშეწყობის, ხელოვნური საკვების მოხმარების შესახებ“ მიზნად ისახავს ბავშვთა ჯანმრთელობის დაცვას ბუნებრივი კვების პრაქტიკის ხელშეწყობის, დაცვისა და წახალისების, აგრეთვე, ჩვილ ბავშვთა ხელოვნური კვების პროდუქტების, საწოვრიანი ბოთლების, საწოვრებისა და სატყუარების გავრცელების რეგულირების გზით. კანონი კრძალავს ხელოვნური კვების პროდუქტების უფასოდ ან ფასდაკლებით მიწოდებას სამედიცინო დაწესებულებების, ორსული ქალების და ჩვილ ბავშვთა დედების და მათი ოჯახებისთვის.

კანონის თანახმად⁵³³, შრომის, ჯანმრთელობის და სოციალურ საკითხთა სამინისტრომ უნდა შექმნას ბავშვთა ბუნებრივი კვების დაცვისა და ხელშეწყობის, ბავშვთა ხელოვნური კვების პროდუქტების კონტროლის ეროვნული სამეთვალყურეო საბჭო. საბჭომ უნდა მოამზადოს რეკომენდაციები ბუნებრივი კვების დაცვისა სახელმწიფო პოლიტიკის განსახორციელებლად, უზრუნველყოს მოსახლეობისთვის ინფორმაციის მიწოდება. ამასთანავე, ადმინისტრაციული სამართალდარღვევათა კოდექსი ითვალისწინებს ჯარიმას ამ კანონის მოთხოვნების დარღვევისთვის.

⁵²⁷ ზოგადი კომენტარი #15, 2013, პარა. 35 და 44

⁵²⁸ The Lancet “ბუნებრივი კვება 21-ე საუკუნეში: ეპიდემიოლოგია, მექანიზმები და გამოწვევები”, 28/01/2016

⁵²⁹ გაეროს რეზოლუცია ჩვილ ბავშვთა და მოზრდილ ბავშვთა კვება, რომელიც მოიცავს მსოფლიო ჯანდაცვის ორგანიზაციისა და იუნისეფის გლობალურ სტრატეგიას ბავშვთა კვების შესახებ / 2003 წ.

⁵³⁰ <https://matsne.gov.ge/ka/document/view/21784>

⁵³¹ მუხ. 1

⁵³² მუხ. 27.4

⁵³³ თავი III

თუმცა, მიუხედავად კანონის არსებობისა, დღემდე არ ფუნქციონირებს მისი აღსრულების მონიტორინგის და კანონის დარღვევის შემთხვევაში საჯარიმო სანქციების ამოქმედებაზე უფლებამოსილი ორგანო. კანონები არ ითვალისწინებს ინფორმაციის ეფექტური გავრცელების მექანიზმებს ბავშვთა ჯანმრთელობის, ჯანსაღი კვების და ძუძუთი კვების უპირატესობის შესახებ.

- **განათლება ჯანმრთელობის შესახებ**

კომიტეტი მოუწოდებს⁵³⁴ სახელმწიფოს გაატაროს შეიმუშავოს შესაბამისი სტრატეგია და ზომები, მათ შორის, საკანონმდებლო ღონისძიებები ბავშვების საფრთხისგან დასაცავად, როგორცაა დახრჩობა, დამწვრობა და სხვა უბედური შემთხვევები.

კანონი ჯანმრთელობის დაცვის შესახებ ადგენს⁵³⁵, რომ მოსახლეობის ჯანმრთელობის დაცვის მიზნით სახელმწიფო მხარს უჭერს თამბაქოს წვევის და ალკოჰოლის ნაწარმის ჭარბი გამოყენების საპროფილაქტიკო ღონისძიებებს და ქმნის მათი განხორციელების მექანიზმებს. საზოგადოებრივი თავშეყრის ადგილებში თამბაქოს მოწვევა და მცირეწლოვანთათვის თამბაქოსა და ალკოჰოლური ნაწარმის მიყიდვა წესრიგდება საქართველოს კანონმდებლობით.

- **ფსიქიატრიული ჯანმრთელობა**

ბავშვის უფლებათა კონვენციის თანახმად:

- სახელმწიფომ უნდა უზრუნველყოს ჯანმრთელობის დაცვის რეაბილიტაციის სერვისების ხელმისაწვდომობა მეზღუდული შესაძლებლობის მქონე ბავშვებისთვის⁵³⁶;
- სამკურნალო დაწესებულებებში მოთავსებულ ბავშვებს უფლება აქვთ მათი მკურნალობის პერიოდულ გადახედვაზე⁵³⁷

კანონი ფსიქიატრიული დახმარების შესახებ დადგენილი შემდეგი ნორმები ეხება ბავშვებს:

- 16 წლამდე ბავშვის ფსიქიატრიული დახმარება, მათ შორის, მკურნალობა, დასაშვებია მისი კანონიერი წარმომადგენლის თხოვნის ან/და ინფორმირებული თანხმობის საფუძველზე (აუცილებელია გადაწყვეტილების მიღების პროცესში პაციენტის მონაწილეობა მისი ასაკისა და ფსიქიკური ჯანმრთელობის მდგომარეობის გათვალისწინებით)⁵³⁸.
- აქტიური ბიოლოგიური მეთოდებით (შოკური, კრუნჩხვითი და სხვა) მკურნალობა დასაშვებია კანონიერი წარმომადგენლის ინფორმირებული თანხმობით, მხოლოდ ექიმ-ფსიქიატრთა კომისიის გადაწყვეტილებით⁵³⁹.
- ექიმ-ფსიქიატრს უფლება აქვს სტაციონარში მყოფი პაციენტის მიმართ გამოიყენოს ფიზიკური შეზღუდვის მეთოდები, თუ არსებობს პაციენტის მიერ საკუთარი თავის ან

⁵³⁴ ზოგადი კომენტარი #15, პარა. 63

⁵³⁵ მუხ. 86

⁵³⁶ მუხ. 23

⁵³⁷ მუხ. 25

⁵³⁸ მუხ. 10

⁵³⁹ მუხ. 8.2

სხვის დაზიანების საფრთხე და ამ საფრთხის აცილება სხვაგვარად შეუძლებელია. ფიზიკური შეზღუდვა მოიცავს სპეციალიზებულ პალატაში იზოლაციას ან/და ფიზიკურ შეზღუდვას⁵⁴⁰;

- აკრძალულია პაციენტის დასჯის ან დაშინების მიზნით ფიზიკური შეზღუდვის მეთოდების ან მედიკამენტების გამოყენება. ფიზიკური შეზღუდვის მეთოდების გამოყენების შესახებ გადაწყვეტილებას იღებს მკურნალი ექიმი ან სტაციონარის მორიგე ექიმი, რომლის დასაბუთებაც ფიქსირდება სამედიცინო დოკუმენტაციაში⁵⁴¹.
- ამ მეთოდების გამოყენების მიზანშეწონილობის სასამართლოში გასაჩივრება შეუძლია კანონიერ წარმომადგენელს ან ნათესავს⁵⁴².

კანონი ფსიქიატრიული დახმარების შესახებ

არანებაყოფლობით სტაციონარული ფსიქიატრიული დახმარება ტარდება, როდესაც პირს ფსიქიკური აშლილობის გამო არ გააჩნია გაცნობიერებული გადაწყვეტილების მიღების უნარი და მისი დახმარება შეუძლებელია სტაციონარში განთავსების გარეშე. ასევე იმ შემთხვევებში, თუ საფრთხე ექმნება პაციენტის ან სხვის სიცოცხლეს ან/და ჯანმრთელობას ან პაციენტმა საკუთარი მოქმედებით შეიძლება მიიღოს ან სხვას მიაყენოს მნიშვნელოვანი მატერიალური ზარალი⁵⁴³.

ასეთი დახმარების ჩვენების დროს არაა საჭირო პაციენტის თანხმობა და გადაწყვეტილებას სტაციონარში მოთავსების შესახებ იღებს შესაბამისი სერტიფიკატის მქონე ექიმი. სტაციონარში მოთავსებიდან 48 საათში ექიმ-ფსიქიატრთა კომისია შეისწავლის საკითხს და იღებს გადაწყვეტილებას ხმათა უმრავლესობით. პაციენტის მონაწილეობაზე არაფერია აღნიშნული. დადებითი გადაწყვეტილების შემთხვევაში, ფსიქიატრთა კომისია 48 საათში მიმართავს სასამართლოს პაციენტის სტაციონარში მოთავსების შესახებ ბრძანების გამოსაცემად. სასამართლო 24 საათში იღებს გადაწყვეტილებას. განხილვაში პაციენტის მონაწილეობა აუცილებელია. პაციენტის ინტერესებს სასამართლოში წარმომადგენს მისი კანონიერი წარმომადგენელი, ხოლო ასეთის არარსებობისას ნათესავი და ადვოკატი, რომელიც ენიშნება სახაზინო წესით საჭიროებისამებრ. პაციენტს დახმარება გაეწევა 6 თვით, თუმცა ფსიქიატრთა კომისიას შეუძლია შეუზღუდავად მიმართოს სასამართლოს ამ ვადის გასაგრძელებლად საჭიროების ამოწურვამდე⁵⁴⁴.

სასამართლოს გადაწყვეტილება პაციენტი სტაციონარში მოთავსების ან ვადის გაგრძელების შესახებ შეუძლია გაასაჩივროს პაციენტმა, მისმა კანონიერმა წარმომადგენელმა, ნათესავმა, ასევე ფსიქიატრიული დაწესებულების ადმინისტრაციამ⁵⁴⁵.

ეს კანონი შეიცავს ისეთ პრობლემატურ ხარვეზებს, რომლებიც ქმნის სივრცეს არანებაყოფლობითი ფსიქიატრიული კურნალობის დროს ბავშვის უფლებების დარღვევის რისკებს, კერძოდ:

- ექიმ-ფსიქიატრთა მიერ გადაწყვეტილების მიღებისას პაციენტის სტაციონარში განთავსების, ასევე ვადის გაგრძელების შესახებ პაციენტის მონაწილეობა არ არის აუცილებელი;
- პაციენტის მონაწილეობა აუცილებელია სასამართლოში საკითხის განხილვის დროს, თუმცა ნორმა არ გვაწვდის მისი მონაწილეობის კონკრეტულ გარანტიებს, როგორცაა

⁵⁴⁰ მუხ. 16.1-2

⁵⁴¹ მუხ. 16.5

⁵⁴² მუხ. 16.6

⁵⁴³ მუხ. 18.1

⁵⁴⁴ მუხ. 18. 1-13

⁵⁴⁵ მუხ. 18 (14)

მისი აზრის მოსმენის და სათანადოდ გათვალისწინების წესი კომუნიკაციისა და მხარდაჭერის შესაბამისი საშუალებების გამოყენებით. აგრეთვე, არაფერია ნათქვამი სასამართლოს მიერ სხვა ექსპერტების და სპეციალისტების ჩართვის შესაძლებლობაზე ალტერნატიული მოსაზრების მოსამენად მულტიდისციპლინური მიდგომის გამოყენებით;

- პაციენტის წარმომადგენლობის საკითხი პრობლემურია, რადგან კანონი უშვებს „ნათესავის“ თანხმობას, რაც პირთა ძალიან ფართო წრეს მოიცავს და გარანტირებული არ არის ასეთი წარმომადგენლობის განხორციელებისას ბავშვის საუკეთესო ინტერესების გათვალისწინების და მოსმენის უფლების დაცვა;
- პაციენტს დახმარება გაეწევა 6 თვით, თუმცა ფსიქიატრთა კომისიას შეუძლია შეუზღუდავად მიმართოს სასამართლოს ამ ვადის გასაგრძელებლად საჭიროების ამოწურვამდე. ეს ჩანაწერი პაციენტის არანებაყოფლობითი ფსიქიატრიული მკურნალობის საკითხზე გადაწყვეტილების მიღების უფლებამოსილებას ანიჭებს ფაქტობრივად ფსიქიატრთა კომისიას და არ ასახელებს სხვა დამოუკიდებელ უწყებას, რომელიც განახორციელებს ზედამხედველობას და მკურნალობის პერიოდულ გადასიჯვას.

თანხმობა და კონფიდენციალობა

კომიტეტი მოუწოდებს სახელმწიფოს შექმნას შესაბამისი კანონმდებლობა ან რეგულაცია, რათა უზრუნველყოს ბავშვთა ხელმისაწვდომობა კონფიდენციალურ სამედიცინო კონსულტაციაზე მშობლის თანხმობის გარეშე, ასაკის მიუხედავად, როდესაც ეს საჭიროა მისი უსაფრთხოებისა და კეთილდღეობისათვის. ბავშვებს ასეთი შეუზღუდავი ხელმისაწვდომობა შესაძლოა დასჭირდეთ, მაგალითად, ოჯახში ძალადობის დროს ან რეპროდუქციული ჯანმრთელობის შესახებ ინფორმაციის ან სერვისის საჭიროებისას, ან ბავშვსა და მის მშობელს შორის სამედიცინო სერვისზე შეუთანხმებლობის დროს. სამედიცინო კონსულტაციის მიღების უფლება განსხვავდება სამედიცინო თანხმობის მიცემის უფლებისგან და არ უნდა ექვემდებარებოდეს ასაკობრივ შეზღუდვას. რაც შეეხება სამედიცინო თანხმობის მიცემის უფლებას, კომიტეტი მიესალმება კონკრეტული ასაკის დადგენას, როდესაც ბავშვს შეუძლია ასეთი თანხმობა დამოუკიდებლად გასცეს, თუმცა კომიტეტი მოუწოდებს სახელმწიფოებს უზრუნველყონ უფრო დაბალი ასაკის ბავშვისთვის ამ უფლების რეალიზება, როდესაც მას აქვს უნარი გამოხატოს საკუთარი ინფორმირებული მოსაზრება მისი მკურნალობის შესახებ, რასაც სათანადო მნიშვნელობა უნდა მიენიჭოს. ექიმებმა და სამედიცინო დაწესებულებებმა ბავშვებს უნდა მიაწოდონ ინფორმაცია თავიანთი უფლებების შესახებ პედაგოგიულ კვლევებსა და კლინიკური ექსპერიმენტებში მონაწილეობის შესახებ. ბავშვის უნდა იყოს ინფორმირებული, რათა მისგან შესაძლებელი გახდეს ინფორმირებული თანხმობის მიღება ყველა უფლების დაცვით⁵⁴⁶.

კვლევები ბავშვთა მონაწილეობით

მართალია, ბავშვის უფლებათა კონვენცია პირდაპირ ჩანაწერს არ მოიცავს კვლევებში ბავშვთა მონაწილეობის შესახებ, თუმცა კომიტეტი ზოგად კომენტარში⁵⁴⁷ მიუთითებს, რომ „კვლევის ჩატარებისას დაცული უნდა იყოს ბავშვის უფლებათა კონვენციის და „ადამიანთა მონაწილეობით ჩატარებული ბიო-სამედიცინო კვლევის საერთაშორისო სტანდარტების“ პრინციპები და მოთხოვნები“.

⁵⁴⁶ ზოგადი კომენტარი #12, პარა. 98-104, 23

⁵⁴⁷ კომიტეტის ზოგადი კომენტარი #15, პარა. 85

„ადამიანთა მონაწილეობით ჩატარებული ბიო-სამედიცინო კვლევის საერთაშორისო სტანდარტები“ ბავშვთა მონაწილეობით კვლევების შესახებ ადგენს⁵⁴⁸, რომ ბავშვის მონაწილეობით კვლევის დაწყებამდე, შესაბამისი პასუხისმგებელი პირი (სპეციალური ეთიკის კომისიის წარმომადგენელი) უნდა დარწმუნდეს, რომ:

- კვლევის მიზანია ცოდნის გაღრმავება ბავშვთა ჯანმრთელობის დაცვის საკითხებზე;
- ბავშვის მშობელი ან სხვა კანონიერი წარმომადგენელი თანახმაა;
- ბავშვის აზრი მოსმენილია მისი შესაძლებლობების მიხედვით და მისი ტანხმობა მიღებულია;
- ბავშვს შეუძლია უარი თქვას კვლევაში მონაწილეობის ან კვლევის გაგრძელების შესახებ, რაც სავალდებულოდ უნდა იქნას გათვალისწინებული.

განსაკუთრებული ყურადღება უნდა დაეთმოს კვლევაში იმ ბავშვთა მონაწილეობის საკითხს, რომლებიც სახელმწიფო ზრუნვის ქვეშ არიან. მათი მონაწილეობა კვლევაში მხოლოდ გამონაკლის შემთხვევაშია დასაშვები. ამგვარ შემთხვევაში, ბავშვის მონაწილეობის საკითხი უნდა გადაწყდეს არა მხოლოდ ეთიკის კომისიის მიერ, არამედ დამატებითი დამოუკიდებელი ექსპერტების მონაწილეობით, რომლებიც ბავშვის ინტერესებიდან გამომდინარე მოქმედებენ.

კანონი პაციენტის უფლებების შესახებ მოიცავს ცალკე თავს არასრულწლოვნის უფლებებთან დაკავშირებით, რომელშიც მოცემულია დებულებები ჯანმრთელობის შესახებ ინფორმაციის და სამედიცინო მომსახურების მიღების უფლების და ასაკობრივი დათქმების შესახებ, კერძოდ:

- ჯანმრთელობის დაცვის სფეროში მოქალაქის უფლებებსა და კეთილდღეობას მედიცინისა და სამედიცინო მეცნიერების ინტერესებთან შედარებით უპირატესი მნიშვნელობა აქვს⁵⁴⁹;
- 14-18 წლამდე ბავშვს უფლება აქვს მშობლისგან დამოუკიდებლად, კონფიდენციალურად მიმართოს ექიმს აივ ინფექცია/შიდსის დიაგნოსტიკის მიზნით, ორსულობის ხელოვნურად შეწყვეტის ან კონსულტაციისთვის სქესობრივად გადამდები დაავადების ან ნარკომანიის მკურნალობის, კონტრაცეფციის არაქირურგიული მეთოდების შესახებ⁵⁵⁰;
- გარდა ზემოთაღნიშნული შემთხვევებისა, 16 წლამდე ბავშვს სამედიცინო მომსახურება გაეწევა მხოლოდ მშობლის ან კანონიერი წარმომადგენლის თანხმობით⁵⁵¹. არასრულწლოვან პაციენტს აქვს საკუთარი ჯანმრთელობის მდგომარეობისა და მკურნალობის შესახებ ინფორმაციის მიღების უფლება. მიწოდებული ინფორმაცია უნდა შესაბამებოდეს მის ასაკსა და გონებრივი განვითარების დონეს⁵⁵²;
- 16 წლამდე ასაკის არასრულწლოვანი პაციენტის გამოყენება სწავლების ობიექტად დასაშვებია მხოლოდ მისი მშობლის ან კანონიერი წარმომადგენლის ინფორმირებული თანხმობით. გადაწყვეტილების მიღებისას აუცილებელია

⁵⁴⁸ სახელმძღვანელო წესი #14

⁵⁴⁹ მუხ. 2

⁵⁵⁰ მუხ. 40.2, „ბ“, „გ“

⁵⁵¹ მუხ. 41.2

⁵⁵² მუხ. 43

პაციენტის მონაწილეობაც ასაკისა და გონებრივი განვითარების გათვალისწინებით⁵⁵³;

▪ თუ მცირეწლოვანი ან გაცნობიერებული გადაწყვეტილების მიღების უნარის არმქონე პაციენტის ნათესავის ან კანონიერი წარმომადგენლის გადაწყვეტილება ეწინააღმდეგება პაციენტის ჯანმრთელობის ინტერესებს, სამედიცინო მომსახურების გამწევს უფლება აქვს, ეს გადაწყვეტილება სასამართლოში გაასაჩივროს⁵⁵⁴.

განხილული ნორმების ანალიზით ჩანს, რომ კანონით არ არის გარატირებული ბავშვის უფლება ასაკის მიუხედავად, დამოუკიდებლად და კონფიდენციალურად მიიღოს სამედიცინო კონსულტაცია (მითითებულია მხოლოდ ინფორმაცია მისი მკურნალობის და ჯანმრთელობის მდგომარეობის შესახებ). კანონი პაციენტის უფლებების შესახებ არ ასახავს ბავშვის საუკეთესო ინტერესების უპირატესი გათვალისწინების პრინციპს. კანონი მიუთითებს მხოლოდ მოქალაქის უფლებებისა და კეთილდღეობის უპირატესობას მედიცინის და მეცნიერების ინტერესებთან შედარებით. მნიშვნელოვანია კანონმა დააკონკრეტოს ბავშვის უფლება მისი ინტერესების უპირატესი გათვალისწინების და მისი მონაწილეობის შესახებ.

„ჯანმრთელობის დაცვის შესახებ“ საქართველოს კანონით მხარდაჭერის მიმღების და მცირეწლოვანი პაციენტების სწავლების ობიექტად გამოყენება დასაშვებია კანონიერი წარმომადგენლის თანხმობით, თუ თავად მხარდაჭერის მიმღები და მცირეწლოვანი წინააღმდეგობას არ გამოხატავენ⁵⁵⁵.

16 წლამდე ასაკის არასრულწლოვანი პაციენტის გამოყენება სწავლების ობიექტად დასაშვებია მხოლოდ მისი მშობლის ან კანონიერი წარმომადგენლის ინფორმირებული თანხმობით. გადაწყვეტილების მიღებისას აუცილებელია პაციენტის მონაწილეობაც ასაკისა და გონებრივი განვითარების გათვალისწინებით⁵⁵⁶. პრობლემურია, აგრეთვე, სამართლებრივი ნორმა ბავშვთა სამედიცინო კვლევის ობიექტად გამოყენების შესახებ, რომლის მიხედვითაც მცირეწლოვანი შეიძლება იყოს სამედიცინო-ბიოლოგიური კვლევის ობიექტი, თუ იგი არ გამოხატავს რაიმე წინააღმდეგობას და მიღებულია მისი ნათესავის ან კანონიერი წარმომადგენლის ინფორმირებული თანხმობა⁵⁵⁷.

მცირეწლოვანი შეიძლება იყოს კვლევის ობიექტი, თუ მოსალოდნელია, რომ მისთვის ან ამავე კატეგორიის სხვა პირებისთვის პირდაპირი და მნიშვნელოვანი სარგებლობის მომტანი იქნება⁵⁵⁸. ამავე დროს, დაკონკრეტებული არაა, თუ რა ტიპის კვლევა იგულისხმება და არაა განსაზღვრული ბავშვთა დაცვის გარანტიები ისეთ კვლევებში მათი ჩართვისგან, რომელიც საფრთხეს უქმნის მათ სიცოცხლეს და ჯანმრთელობას ან/და სხვა უფლებებს.

ამ ჩანაწერის ნორმატიული შინაარსი ეწინააღმდეგება მცირეწლოვანი ბავშვის მოსმენის და მისი საუკეთესო ინტერესების უპირატესი გათვალისწინების პრინციპს. ამავე დროს გასათვალისწინებელია, თუ რამდენად დასაშვებია, თუნდაც ბავშვის თანხმობით, მისი ჩაბმა იმგვარ სამედიცინო ან სხვა სახის კვლევებში, რომელთა შინაარსიც და შედეგებიც შესაძლოა მისთვის რაიმე სახით სარისკო იყოს.

ნორმა ბუნდოვანია და ტოვებს სივრცეს ბავშვის ინტერესებისთვის საზიანო გადაწყვეტილებებისთვის, განსაკუთრებით, როდესაც დაშვებულია „ნათესავის“ თანხმობა,

⁵⁵³ მუხ. 42.1

⁵⁵⁴ მუხ. 25.1

⁵⁵⁵ მუხ. 26

⁵⁵⁶ მუხ. 42

⁵⁵⁷ მუხ. 110

⁵⁵⁸ მუხ. 111

რაც პირთა ძალიან ფართო წრეს მოიცავს. ამავე დროს, გაურკვეველი რჩება, თუ რომელ ორგანოს ეკისრება ბავშვთა კვლევის ობიექტად გამოყენების საკითხების ზედამხედველობა, ეთიკური სტანდარტების დაცვის ვალდებულება და მცირეწლოვან ბავშვთა უფლებების დაცვა ბავშვსა და მის კანონიერ წარმომადგენლებს შორის ინტერესთა კონფლიქტის შემთხვევაში. ეს სფერო არცერთი კანონით ან რეგულაციით არ არის მოწესრიგებული.

რეკომენდებულია საკანონმდებლო ცვლილებების შემუშავებისას გათვალისწინებული იქნას აღნიშნული ხარვეზები და შეიქმნას სამართლებრივი დაცვის გარანტიები ჯანდაცვის საკითხებზე ბავშვის საუკეთესო ინტერესების უპირატესობის, კონფიდენციალური სამედიცინო კონსულტაციის მიღების უფლების რეალიზების და სამედიცინო კვლევებში ბავშვის მონაწილეობის საკითხის რეგულირების თაობაზე.